






LIBRARY  
Brigham Young University



DANIEL C. JACKLING LIBRARY  
IN THE  
FIELD OF RELIGION











DE GRATIA ET LIBERO ARBITRIO



---

*Quae per leges jura sunt scriptoribus  
ea sibi auctor reservat.*

---



282.01  
P829  
v.2

FR. N. DEL PRADO, O. P.

IN UNIVERSITATE FRIBURGensi APUD HELVET. PROFESSOR

---

# DE GRATIA ET LIBERO ARBITRIO

---

PARS SECUNDA


---

CONCORDIA LIBERI ARBITRII CUM DIVINA MOTIONE

JUXTA S. AUGUSTINUM ET D. THOMAM

« Doctrinam Thomae Aquinatis stu-  
deant magistri in discipulorum animos  
insinuare, ejusque prae ceteris solidita-  
tem atque excellentiam in perspicuo po-  
nant. »

(LEO III. Encycl. *Aeterni Patris.*)



FRIBURGI HELVETIORUM

EX TYPIS CONSOCIATIONIS SANCTI PAULI

—  
1907



## APPROBATIO ORDINIS

---

Opus R. P. N. DEL PRADO *De gratia et libero arbitrio*, tribus voluminibus comprehensum, jussu Reverendissimi Patris Hyacinthi-M<sup>a</sup> Cormier, Magistri Generalis Ordinis Praedicatorum, attente a nobis perlectum, plane dignum judicamus quod typis mandetur.

Friburgi Helvetiorum, die 23. Martii 1907.

FR. AMBROSIVS MONTAGNE, O. P.

*Sac. Theol. Magister.*

FR. J. DE LANGEN-WENDELS, O. P.

*Sac. Theol. Magister.*

---

Attentis approbationibus quæ supra, Opus a R. P. N. DEL PRADO, cui titulus *De gratia et libero arbitrio* typis dari permittimus.

Romæ, die 30. Martii 1907.

FR. HYACINTHUS-M<sup>a</sup> CORMIER,

Loco † Sigilli.

*Magister Generalis Ordinis Praedicatorum.*

---

## APPROBATIO ORDINARI

---

IMPRIMATUR :

Friburgi Helvetiorum, die 13. Aprilis 1907.

Loco † Sigilli.

† JOSEPHUS,

*Episcopus Lausannensis et Genevensis.*

**THE LIBRARY  
BRIGHAM YOUNG UNIVERSITY  
PROVO UTAH**

PARS SECUNDA

---

CONCORDIA LIBERI ARBITRII


CUM DIVINA MOTIONE

JUXTA S. AUGUSTINUM ET D. THOMAM





# PROLOGUS



Explanatis jam per Dei auxilium omnibus quaestionibus ac singulis quaestionum articulis, quibus D. Thomas absolvit considerationem *de exteriori principio humanorum actuum*, sc. de Deo, prout ab ipso per gratiam adjuvamus ad recte agendum : nunc pro complemento totius tractatus *De gratia Dei* duae aliae quaestiones adjiciendae sunt, in quarum prima declarare oportet concordiam liberi arbitrii cum divina gratia juxta S. Augustinum ac D. Thomam ; in altera vero considerare opus erit concordiam liberi arbitrii cum divina gratia juxta Ludovicum Molina. Ut enim sapienter observat Johannes a S. Thoma in I-II. q. 111. disp. XXIV. a. 2. : « In hac parte notandae sunt duae principales sententiae, quae sunt quasi capita hujus controversiae, quas aliae sententiae sequuntur, quae voluerunt rigorem et contrarietatem harum sententiarum moderari, sed non valuerunt. Prima est Molinae, quam docet multis locis, praesertim in I. partem Summae, q. 23. a. 4. et 5. disp. 1. memb. 6. et in *Concordia* ad q. 14. disp. 37. et 38. ; qui plane asseruit gratiam efficacem non habere efficaciam ex se, sed reddi efficacem ex consensu nostro libero, atque ita gratiam efficacem non distingui in ipsa ratione intrinseca a sufficienti, sed solum extrinsece ratione nostri consensus secuti ; quae sententia aliis dura visa est, illamque voluerunt moderari, sed fere verbis, non re..... Secunda sententia extrema est communis inter Thomistas, sc. gratiam ex sua intrinseca natura esse efficacem independentem et antecedenter ad



consensum liberum, idque habere ex physica et reali praemotione seu praedeterminatione. »

Concordia autem liberi arbitrii cum gratiae donis, divina praescientia, praedestinatione et reprobatione, magnifice delineata a S. Augustino, et profunde ac solide fundata atque perfecta ab Angelico Doctore, breviter ac dilucide, quantum materia patietur et Deus nobis concesserit, in hac una quaestione per subsequencia summa capita ostendetur, nimirum :

1<sup>o</sup> Utrum gratia convenienter dividatur in sufficientem et efficacem.

2<sup>o</sup> Utrum divisio gratiae in sufficientem et efficacem habeat fundamentum in distinctione Divinae Voluntatis in antecedentem et consequentem.

3<sup>o</sup> Utrum gratia, quae dicitur efficax, habeat efficaciam ex se, ab intrinseco ; id est, ex intentione Dei moventis.

4<sup>o</sup> Quid sit physica praemotio, per quam gratia ex se efficax formaliter constituitur, seu quot ac quales habeat essentielles characteres.

5<sup>o</sup> Utrum gratia efficax sit aliquid physicum et reale in libero arbitrio receptum.


6<sup>o</sup> Utrum gratia efficax habeat diversos gradus perfectionis in sua virtute motiva.

7<sup>o</sup> Quomodo motio divina possit in diversa genera distingui.

8<sup>o</sup> Utrum intrinseca efficacia gratiae tollat vel minuat liberum hominis arbitrium.

9<sup>o</sup> Utrum efficacia gratiae repetenda sit in ultima quaestionis resolutione ex efficacia ipsius divinae voluntatis.

10<sup>o</sup> Quomodo, juxta D. Thomam, tota haec **de divino influxu** controversia resolvenda veniat in veritatem fundamentalem Philosophiae Christianae, nempe : **Solus Deus est suum esse ; in omnibus autem aliis differt esse rei et essentia ejus.** (I. q. 3. a. 4. ; q. 44. a. 1. ; q. 61. a. 1. ; *I. C. Gent.* cap. 22. et *II.* cap. 52.)





## CAPUT PRIMUM

**Gratia convenienter dividitur in  
sufficientem et efficacem.**

### I

#### PRAENOTANDA

PRIMO : Supra doctrinam S. Augustini et D. Thomae haec divinae gratiae divisio constituenda est. — Quoad primum operae pretium est ante omnia definire sensum atque determinare intelligentiam horum verborum : *sufficiens* et *efficax*. Etenim, quamvis sapientis non sit de nominibus curare, et theologia sit maxime sapientia, attamen, ut admonet D. Thomas *II. Sent.* dist. 42. q. 2. a. 2. solut. 3. ad 1. : « Sapiens bene curat nomina, secundum quod exprimunt proprietatem rerum, et non propter se ». Quid autem intelligendum sit per gratiam sufficientem, quid vero per gratiam efficacem, non a more loquendi grammaticorum, sed a modo loquendi theologorum oportet quaerere et accipere. Unde S. Augustinus *II. Contra Cresconium Grammaticum* cap. 2. : « Disciplina disputandi, sive illam dialecticam velis appellare sive quid aliud, satis tamen sobrie docet, cum de re constat, non esse de nomine laborandum. » Inter theologos porro, a quibus debemus edoceri circa sensum et intelligentiam gratiae sufficientis ac gratiae efficacis, eminent magni illi doctores, a quorum doctrina, praesertim in materia de gratia et libero arbitrio, non decet viros



philosophos ac prudentes recedere. S. Augustinum itaque ac D. Thomam reverenter audiamus.

SECUNDO : **Doctrina S. Augustini.** — S. Augustinus enim *De corrept. et grat.* cap. 11. loquens de gratia, quae data est primo Adamo, et de gratia potentiori, quae datur nobis per Christum, ita dividit ac distinguit unam ab altera : « Prima est enim, qua fit ut habeat homo justitiam, si velit; secunda ergo plus potest, qua etiam fit ut velit tantoque ardore diligat, ut carnis voluntatem contraria concupiscentem voluntate spiritus vincat. Nec *illa* quidem parva erat, qua demonstrata est etiam potentia liberi arbitrii; quoniam sic adjuvabatur, ut sine hoc adjutorio in bono non maneret, sed hoc adjutorium, si vellet, desereret. *Haec* autem tanto major est, ut parum sit homini reparare perditam libertatem; parum sit denique non posse sine illa vel apprehendere bonum, vel permanere in bono si velit, nisi etiam efficiatur ut velit... Fit quippe in nobis per hanc Dei gratiam in bono recipiendo et perseveranter tenendo, non solum *posse*, quod volumus, verum etiam *velle*, quod possumus. Quod non fuit in homine primo; unum enim horum in illo fuit, alterum non fuit. Namque ut reciperet bonum, gratia non egebat, quia nondum perdiderat; ut autem in eo permaneret, egebat adjutorio gratiae, sine quo id omnino non posset; et acceperat posse, si vellet; sed non habuit velle quod posset; nam si habuisset, perseverasset. Posset enim perseverare, si vellet; quod ut nollet, de libero descendit arbitrio, quod tunc ita liberum erat, ut et bene velle posset et male... Itemque ipsa adjutoria distinguenda sunt. Aliud est adjutorium sine quo aliquid non fit, et aliud est adjutorium quo aliquid fit. »

Rursus, S. Augustinus *De praedest. sanct.* cap. 3. distinguit ad invicem duos modos diversos divinae vocationis, docens : « Quia neque velle possumus, nisi vocemur, et cum post vocationem voluerimus, non sufficit voluntas nostra et cursus noster, nisi Deus et vires currentibus praebeat, et perducat quo vocat. Ac deinde subjunxi : manifestum est

ergo non volentis neque currentis, sed miserentis Dei esse, quod bonum operemur : omnino verissimum est. Sed parum de ipsa vocatione disserui, quae fit secundum propositum Dei ; non enim omnium, qui vocantur, talis est, sed tantum electorum. » Et cap. 6. scribit : « Multi audiunt verbum veritatis : sed alii credunt, alii contradicunt. Volunt isti credere, nolunt autem illi. Quis hoc ignoret ? quis hoc neget ? Sed, cum aliis praeparetur, aliis non praeparatur voluntas a Domino ; discernendum est utique, quid veniat de misericordia ejus, quid de judicio. » Et cap. 8. addit : « Omnes Deus docet venire ad Christum, non quia omnes veniunt, sed quia nemo aliter venit... Hos omnes docet venire ad Christum Deus ; hos enim omnes vult salvos fieri et in agnitionem veritatis venire. Nam si et illos, quibus stultitia est verbum crucis, ut ad Christum venirent docere voluisset, procul dubio venirent et ipsi. » Et cap. 16. ait : « Vocat enim Deus praedestinos multos filios suos, ut eos faciat membra praedestinati unici Filii sui, *non ea vocatione* qua vocati sunt, qui noluerunt venire ad nuptias ; illa quippe vocatione et Judaei vocati sunt, quibus Christus crucifixus scandalum est, et gentes, quibus Crucifixus stultitia est : sed *ea vocatione* praedestinos vocat, quam distinxit Apostolus dicens I Cor. 1. : *Ipsis autem vocatis Judaeis atque Graecis praedicare se Christum Dei virtutem et Dei sapientiam...* Quam vocationem significans ait Rom. 9, 12 : *Non ex operibus, sed ex vocante dictum est. Quia major serviet minori.* Numquid dixit : *Non ex operibus, sed ex credente ?* Prorsus etiam hoc abstulit homini, ut totum daret Deo. Dixit ergo : *Sed ex vocante*, non quacumque vocatione, sed qua vocatione fit credens. »

Hanc ipsam duplicem vocationem, qua nempe vocatus est Jacob et qua vocatus est Esau, iterum distinguit S. Augustinus *I. Ad Simplicianum* q. 2. appellans primam *congruam*, alteram *non congruam* ; denominans primam *altam et secretam*, secundam non ita <sup>1</sup>. Atque iterum *II. Contra*

<sup>1</sup> « Si vellet etiam Deus ipsorum misereri, posset ita revocare,



*duas Epist. Pelag. cap. 10.* : « Non enim omnes vocati, secundum propositum sunt vocati; quoniam multi vocati, pauci electi (Math. 20, 16). Ipsi ergo secundum propositum vocati, qui electi ante constitutionem mundi. » Atque istud est fundamentum doctrinale ab Augustino traditum pro divisione divinae gratiae in sufficientem et efficacem. Videamus fundamentum etiam a D. Thoma aedificatum.

**TERTIO : Doctrina D. Thomae.** — D. Thomas autem Ephes. 3. lect. 2. ait : « Deinde cum dicit : *Secundum donum gratiae Dei*, tangit (Apostolus) auxilium sibi praestitum ad mysteriorum executionem. Hujusmodi autem auxilium duplex fuit : unum quidem ipsa facultas exsequendi; aliud, ipsa operatio sive actualitas. Facultatem autem dat Deus infundendo virtutem et gratiam, per quas efficitur homo potens et aptus ad operandum; sed ipsam operationem confert, in quantum operatur in nobis interius movendo et instigando ad bonum. Et ideo hoc accipiens Apostolus a Deo, dicit quantum ad primum : *Factus sum minister*, sed certe non meis meritis, nec virtute propria, sed *secundum donum gratiae Dei, quae data est mihi*, qua sc. idoneus efficior ad executionem divinorum mysteriorum... Quantum ad secundum dicit : *secundum operationem*, quam Deus efficit,

quomodo illis aptum esset, ut et moverentur, et intelligerent, et sequerentur. Verum est ergo : *Multi vocati, pauci vero electi*; illi enim electi, qui congruenter vocati; illi autem, qui non congruebant neque contemperabantur vocationi, non electi; quia non secuti, quamvis vocati. Item verum est : *Non volentis neque currentis, sed miserentis est Dei* (Rom. 2.), quia etiamsi multos vocat, eorum tamen miseretur, quos ita vocat, quomodo eis vocari aptum est ut sequantur. Falsum est autem, si quis dicit : *Igitur non miserentis Dei, sed volentis atque currentis est hominis*, quia nullius Deus frustra miseretur. Cujus autem miseretur, sic eum vocat, quomodo scit eum congruere, ut vocantem non respuat ». (I. Ad Simplic. q. 2.). « Subventum est igitur infirmitati voluntatis humanae, ut divina gratia *indeclinabiliter* et *insuperabiliter* ageretur... Deo volenti salvum facere hominem nullum resistit arbitrium. » (De corrept. et grat. cap. 12., 34. et 45.).

in quantum virtus ejus operatur in nobis et velle et perficere pro bona voluntate. »

Quod quidem magis adhuc a radice enucleat Angelicus Doctor Rom. 9. lect. 3. : « Manifestum est autem, quod omne Dei beneficium, quod homini confert ad salutem, est divinae praedestinationis effectus. Divinum autem beneficium non solum extendit se ad *infusionem* gratiae, qua homo justificatur, sed etiam ad gratiae *usum* : sicut etiam in rebus naturalibus non solum Deus causat ipsas formas in rebus, sed etiam ipsos motus et operationes formarum, eo quod Deus est principium omnis motus, cujus operatione cessante a movendo, ex formis nullus motus vel operatio sequitur. Sicut autem se habet habitus gratiae vel virtutis in anima ad usum ipsius, sic se habet forma naturalis ad suam operationem ; et ideo dicitur Is. 26, 12 : *Omnia opera nostra operatus es in nobis, Domine*. Probat autem hoc speciali ratione Aristoteles IX. *Metaph.* de operibus voluntatis humanae. Cum enim homo habeat potentiam ad opposita, puta ad sedendum vel non sedendum, oportet quod reducatur in actum per aliquid aliud. Reducitur autem in actum alterius horum per consilium, ex quo unum oppositorum praelegit alteri. Sed cum iterum homo habeat potentiam consiliandi vel non consiliandi, oportebit esse aliquod, per quod reducatur in actum consilii ; et cum in hoc non sit procedere in infinitum, oportet esse aliquod principium extrinsecum superius homine, quod ipsum moveat ad consiliandum ; et hoc non est aliud quam Deus. Sic igitur ipse usus gratiae est a Deo ; nec propter hoc superfluit habitus gratiae, sicut nec superfluunt formae naturales, quamvis Deus in omnibus operetur, quia sicut dicitur Sap. 8, 1 : *Ipse disponit omnia suaviter*, quia sc. per suas formas omnia inclinantur quasi sponte in id, ad quod ordinantur a Deo. » Hactenus D. Thomas, qui etiam I-II. q. 109. a. 10. ad 3. distinguit cum S. Augustino duplex donum gratiae, nimirum : alterum, *quo perseverare possunt* homines, alterum vero, *quo de facto perseverant*.

---



## II

## CONCLUSIO 1.

**Gratia Dei convenienter dividitur in  
sufficientem et efficacem.**

Arg. 1<sup>um</sup>. — Ex documentis S. Augustini et D. Thomae. Ex supradictis datur gratia : 1<sup>o</sup> quae dat *posse* facere bonum, si velimus ; 2<sup>o</sup> sine qua aliquid boni non fit ; 3<sup>o</sup> qua vocamur a Deo et ab ipso docemur venire ad Christum ; 4<sup>o</sup> quae est facultas exsequendi ; 5<sup>o</sup> quae est etiam forma infusa per modum habitus. Similiter datur gratia : 1<sup>o</sup> quae dat *velle* et *facere* bonum, quod possumus ; 2<sup>o</sup> qua tale bonum fit ; 3<sup>o</sup> qua ita vocamur a Deo, ut simul praeparetur voluntas nostra a Domino, et ita edocemur, ut simul discamus ad Christum venire et veniamus ; 4<sup>o</sup> a qua est ipsa operatio sive actualitas ; 5<sup>o</sup> a qua est etiam ipse usus gratiae. Jam vero : illa Dei gratia, cui competunt quinque primi characteres vel saltem aliquis ex illis, appellatur *sufficiens*. Illa autem Dei gratia, cui conveniunt quinque characteres posteriores, denominatur *efficax*. Cum ergo praedicti characteres vel notae sic se habeant ad invicem, ut posteriores praesupponant atque includant priores, priores tamen non alios praesupponant nec semper cum ipsis jungantur ; nam de facto saepe gratiae primi generis reperiuntur separatae a gratia alterius generis : manifestum est, quod convenienter cum fundamento in re fiat distinctio et divisio inter utriusque ordinis gratiam.

Arg. 2<sup>um</sup>. — Ex Conc. Trid. De fide est mandata divinae legis : 1<sup>o</sup> obligare omnes homines ad ipsorum observationem ; 2<sup>o</sup> non esse hominibus impossibilia ad observandum ; 3<sup>o</sup> non posse *omnia* ab homine impleri in statu naturae corruptae sine gratia Dei. Unde Conc. Trid. sess. 6. cap. 11. : « Nemo autem, quantumvis justificatus, liberum se esse ab

observatione mandatorum putare debet, neque temeraria illa et a Patribus sub anathemate prohibita voce uti : Dei praecepta homini justificato ad observandum esse impossibilia. Nam Deus impossibilia non jubet, sed jubendo monet et facere quod possis, et petere quod non possis. » Et can. 18. : « Si quis dixerit Dei praecepta homini, etiam justificato et sub gratia constituto, esse ad observandum impossibilia : A. S. » Et S. Augustinus *De nat. et grat.* cap. 43. : « Non igitur Deus impossibilia jubet, sed jubendo admonet et facere quod possis, et petere quod non possis. Jam nunc videamus unde possit, unde non possit. Iste dicit : *Voluntate non est, quod natura potest.* Ego dico : *Voluntate quidem non est homo justus, si natura potest ; sed medicina poterit, quod vitio non potest.* » Et in cap. 42. : « Neque de ipsa possibilitate contendo, cum sanata et adjuta hominis voluntate possibilitas ipsa simul cum effectu in sanctis proveniat, dum caritas Dei, quantum plenissime natura nostra sana atque purgata capere potest, diffunditur in cordibus nostris per Spiritum S. qui datus est nobis. »

Habentur ergo tria : 1<sup>o</sup> possibilitas observandi omnia praecepta legis ; 2<sup>o</sup> haec possibilitas non ex solis viribus naturae, sed ex viribus praeterea gratiae ; 3<sup>o</sup> possibilitas ipsa simul cum effectu. Possibilitas itaque observandi omnia divina mandata vocatur *gratia sufficiens* ; possibilitas autem ipsa simul cum effectu vocatur *gratia efficax*.

Arg. 3<sup>um</sup>. — Ex S. Scriptura. Gratia divina *sufficiens* est quae dat *posse* facere bonum salutare, etiam in his, qui non faciunt ; ac proinde est illa gratia, cui liberum hominis arbitrium non solum *potest* resistere, verum etiam aliquando resistit. Gratia autem divina *efficax* est quae confert ipsum facere bonum salutare ; ac proinde est illa gratia, cui liberum hominis arbitrium, licet resistere *possit*, non tamen unquam ei *resistit*. Sed in S. Scriptura inveniuntur dari gratiae, quae in vacuum recipiuntur, et quibus resistitur, et quae fructum salutarem non faciunt. Sic Is. 5, 4 : « Quid est, quod debui ultra facere vineae meae, et non feci ei ? An quod expectavi, ut faceret uvas, et fecit labruscas ? » Math.



23, 37 : « Jerusalem, Jerusalem, quae occidis prophetas et lapidas eos, qui ad te missi sunt, quoties volui congregare filios tuos, quemadmodum gallina congregat pullos suos sub alas, et noluisti ? » II Cor. 6, 1 : « Exhortamur, ne in vacuum gratiam Dei recipiatis. » E contra adinvenitur gratia Dei, quae in vacuum non recipitur, cui homo non resistit, quae semper dat fructum in tempore suo. Sic I Cor. 15, 10 : « Gratia autem Dei sum id quod sum, et gratia ejus in me vacua non fuit, sed abundantius illis omnibus laboravi ; non ego autem, sed gratia Dei mecum. » Et Jer. 31, 3 : « In caritate perpetua dilexi te ; ideo attraxi te, miserans. » Os. 11, 4 : « In funiculis Adam traham eos, in vinculis caritatis. » Joh. 15, 16 : « Non vos me elegistis, sed ego elegi vos, et posui vos, ut eatis et fructum afferatis, et fructus vester maneat. »

Arg. 4<sup>um</sup>. — Ex analogia inter ordinem naturae et ordinem gratiae, per quam natura elevatur ac perficitur. In ordine enim naturae tria distinguuntur in nobis, sc. : *esse*, *posse* et *operari*. In ordine igitur supernaturali gratiae tria quoque oportet distinguere, nempe : 1<sup>o</sup> ipsum lumen gratiae sanctificantis, quae est participata similitudo divinae naturae in nobis ; 2<sup>o</sup> ipsas virtutes infusas simul cum gratia ; 3<sup>o</sup> actus harum virtutum supernaturalium. Primum est veluti *substantia* ordinis supernaturalis, et haec est gratia divina, quae dat *esse*. Alterum constituit veluti *potentiam* supernaturalis ordinis et principium immediatum *quo* supernaturalis operationis ; et haec est gratia divina, quae dat *posse*. Tertium requirit *applicationem* potentiarum naturalium per virtutes infusas perfectarum ad agendum ; et haec est gratia divina, quae dat *agere*. Tertium pertinet ad *gratiam efficacem*, primum autem et secundum, ad *gratiam sufficientem*, ad quam reducuntur quaecumque vel per modum actus, vel per modum habitus, vel per modum objecti disponunt hominem plus vel minus, sic vel aliter, ad gratiae sanctificantis consecutionem, ut declarabitur per subsequentes conclusiones.

## III

## CONCLUSIO 2.

**Gratia divina, quae dicitur sufficiens, est gratia multiplex, et amplectitur intra latitudinem sui generis plurima ac diversa Dei auxilia.**

Arg. 1<sup>um</sup>. — Ex ipsis attributis gratiae sufficientis. De conceptu essentiali gratiae sufficientis est conferre *potestatem* faciendi opus salutare. Sed huiusmodi *potestas* est multiplicis generis, et in adjuvando ad bonum salutare finaliter exsequendum diversimode se habet. Gratia igitur sufficiens intra genus suum plurima Dei auxilia complectitur. Diversi etenim gradus huiusce potestatis possunt manifestari ex diversis ipsis gradibus, quibus homines conjunguntur Christo et Christus est caput omnium hominum. Christus autem est caput omnium hominum secundum diversos gradus, quos D. Thomas sic exponit III. q. 8. a. 3. : « Primo enim et principaliter est caput eorum, qui actu uniuntur ei per *gloriam*; secundo, eorum qui actu uniuntur ei per *caritatem*; tertio, eorum qui actu uniuntur ei per *fidem*; quarto vero eorum qui ei uniuntur solum in *potentia nondum reducta ad actum*, quae tamen est ad actum reducenda secundum divinam praedestinationem; quinto vero eorum qui in *potentia* sunt ei uniti, *quae numquam reducetur ad actum*; sicut homines in hoc mundo viventes, qui non sunt praedestinati, qui tamen ex hoc saeculo recedentes totaliter desinunt esse membra Christi, qui jam nec sunt in *potentia*, ut Christo uniantur. Illi, qui sunt infideles, et si *actu* non sint de Ecclesia, sunt tamen de Ecclesia in *potentia*. Quae quidem potentia in duobus fundatur : primo quidem et principaliter in virtute Christi, quae est sufficiens ad salutem totius humani generis; secundo, in arbitrii libertate. » Inter eos, qui jam nec sunt in potentia, ut Christo uniantur,



et inter illos, qui actu uniuntur ei per gloriam, reperire licet multos ac diversos gradus illius magnae potentiae *filios Dei fieri*; maximae, inquam, potentiae, quae secundario et minus principaliter fundatur in ipsa hominis libertate, primario autem et principalius in virtute Christi, in quo est vita, spes et resurrectio nostra. Unde ipse Angelicus Doctor III. q. 49. 1. ad 3. : « Christus sua passione nos a peccatis liberavit causaliter, id est, instituens causam nostrae libertatis, ex qua possunt quaecumque peccata quandoque remitti, vel praeterita vel praesentia vel futura; sicut si medicus faciat medicinam, ex qua possint quicumque morbi sanari, etiam in futurum. »

Arg. 2<sup>um</sup>. — Signum, quo aliqua gratia ostenditur esse tantummodo *sufficiens*, apparet in hoc, quod homo non solum *potest* resistere tali gratiae, verum etiam in hoc, quod aliquando resistit. Sed in S. Scriptura plura genera gratiarum exhibentur, quibus homo resistit; quaedam enim sunt exteriora, ut praedicatio Evangelii, exempla boni operis, miracula, et alia hujusmodi beneficia; quaedam autem interiora, ut sanctae cogitationes, pii affectus voluntatis, habitus infusi virtutum. Unde Dominus, Math. 11, 20-21 : « Coepit exprobrare civitatibus, in quibus factae sunt plurimae virtutes ejus, quia non egissent poenitentiam. Vae tibi Corozain, vae tibi Bethsaida; quia si in Tyro et Sidone factae essent virtutes, quae factae sunt in vobis, olim in cilicio et cinere poenitentiam egissent. » Similiter Apostolus Rom. cap. 1. affirmat gentiles esse inexcusabiles, « quia cum cognovissent Deum, non sicut Deum glorificaverunt aut gratias egerunt; sed evanuerunt in cogitationibus suis, et obscuratum insipiens cor eorum... Propter quod tradidit illos Deus in desideria cordis eorum. » Etiam habentibus fidem Apostolus Jacobus 2, 19-20 ait : « Tu credis, quoniam unus est Deus; bene facis; et daemones credunt et contremiscunt. Vis autem scire, o homo inanis, quoniam fides sine operibus mortua est? » Etiam adolescenti illi, qui omnia mandata Dei custodivit a juventute sua, cum requireret a Jesu Domino nostro : « Quid adhuc mihi deest? » Jesus ait illi : « Si vis

perfectus esse, vade, vende quae habes, et da pauperibus, et habebis thesaurum in coelo; et veni, sequere me. Cum audisset autem adolescens verbum, abiit tristis; erat enim habens multas possessiones. » (Math. 19, 20-22). Prov. 1, 24-25 : « Quia vocavi, et renuistis, extendi manum meam, et non fuit qui aspiceret; despexistis omne consilium meum. » Act. Ap. 7, 52 : « Vos semper Spiritui Sancto resistitis. » Ephes. 4, 30 : « Nolite contristare Spiritum Sanctum Dei, in quo signati estis in diem redemptionis. » Quae declarans D. Thomas Ephes. 4. lect. 10. ait : « Sicut quando aliquis contristatur, recedit a contristante, ita Spiritus Sanctus a peccante; et sic est sensus : *Nolite contristare Spiritum Sanctum*, id est, nolite eum fugare vel expellere per peccatum. »

Arg. 3<sup>um</sup>. — Ex omnibus, quae sunt tradita supra q. 109. *de necessitate gratiae* ad bene agendum. Ex dictis in praedicta q. habetur : 1<sup>o</sup> quod homo in quibusdam, quae excedunt naturalem cognitionem, indiget nova illustratione superaddita naturali illustrationi; 2<sup>o</sup> quod homo in statu naturae corruptae indiget dono gratiae superadditae naturalibus bonis ad diligendum Deum naturaliter super omnia; 3<sup>o</sup> quod homo habens gratiam sanctificantem *potest* mereri vitam aeternam, *potest* singula et omnia peccata mortalia vitare, *potest* perseverare in bono usque ad finem vitae. Et tamen etiam ex ibidem dictis constat : 1<sup>o</sup> quod homo ad hoc, quod *faciat* opera vitae aeternae meritoria, indiget divina motione praeter habitum gratiae; 2<sup>o</sup> quod homo ad hoc, quod *non peccet*, indiget etiam auxilio gratiae praeter habituale donum; 3<sup>o</sup> quod homo ad hoc, quod *perseveret*, etsi non indigeat aliqua alia habituali gratia, indiget tamen divino auxilio ipsum dirigente et protegente contra temptationum impulsus. Ergo secundum doctrinam D. Thomae datur gratia, quae dat *potestatem* merendi, *potestatem* peccata vitandi, et *potestatem* perseverandi; et insuper datur gratia, quae dat ipsum *mereri*, ipsum *bene agere*, et ipsum *perseverare*. Et ad hoc, quod homo praeparet se ad habitum gratiae consequendum, « indiget divino auxilio non solum quantum ad exteriora moventia, prout sc. ex divina provi-



dentia procurantur homini occasiones salutis, puta praedicationes, exempla, et interdum aegritudines et flagella; sed etiam quantum ad interiorem motum, prout Deus cor hominis interius movet ad bonum..... Et sic Deus movet mentem humanam ad bonum, quod tamen potest huic motioni resistere; et ideo ex Deo est, ut homo se ad gratiam praeparet; sed quod gratia careat, non habet causam a Deo, sed ab homine, secundum illud Os. 13, 9 : *Perditio tua ex te, Israël; tantummodo ex me auxilium tuum.* » Quodl. 1. a. 7.

Igitur et antequam homo consequatur gratiam sanctificantem, accipit a Deo diversa auxilia, quibus *potest* illam consequi; et postquam gratiam habitualement consecutus est, ipsa gratia et ipsi habitus virtutum et donorum sunt etiam diversa auxilia, quibus homo *potest* mereri, recte agere et in bono perseverare. Unde D. Thomas I-II. q. 106. a. 2. ad 2. : « Gratia Novi Testamenti, etsi adjuvet hominem ad non peccandum, non tamen ita confirmat in bono, ut homo peccare non possit; hoc enim pertinet ad statum gloriae. Et ideo si quis post acceptam gratiam Novi Testamenti peccaverit, majori poena est dignus, tamquam majoribus beneficiis ingratus et auxilio sibi dato non utens; nec tamen propter hoc dicitur, quod Lex Nova iram operatur, quia quantum est de se, sufficiens auxilium dat ad non peccandum. »

#### IV

#### CONCLUSIO 3.

**Gratia divina, accepta prout est gratia actualis, convenienter dividitur in sufficientem et efficacem.**

Arg. 1<sup>um</sup>. — Gratia actualis est motus quidam animae, seu motio, qua a Deo movetur anima hominis ad aliquid cognoscendum vel volendum vel agendum, ut supra q. 110. a. 2. manet ostensum. Sed iste actus Dei moventis, qui in anima mota est motus, dum physice agit in intellectum movendo

ipsum ad aliquid cognoscendum, moraliter agit in liberam hominis voluntatem, conferendo illi *posse* velle vel agere; dum vero physice agit in ipsam voluntatem, movendo ipsam ad volendum vel agendum, dat ei ipsum *velle* et *operari*. Prima ergo gratia est *sufficiens*; altera autem, *efficax*.

Arg. 2<sup>um</sup>. — In S. Scriptura frequens fit mentio hujusce utriusque divinae motionis. Prov. 1, 20-21 : « Sapientia foris praedicat, et in plateis dat vocem suam, et in capite turbarum clamat. » Ps. 80, 11 : « Dilata os tuum, et implebo illud. » Math. 11, 28 : « Venite ad me omnes, qui laboratis et onerati estis, et ego reficiam vos. » Zach. 1, 3 « ... Convertimini ad me... et convertar ad vos. » Ezech. 2, 1 : « Fili hominis, sta super pedes tuos, et loquar tecum. » Cantic. 5, 2 : « ... Vox dilecti mei pulsantis : Aperi mihi... ». Math. 3, 2 : « Poenitentiam agite; appropinquavit enim regnum coelorum. » Apoc. 3, 20 : « Ecce sto ad ostium et pulso; et si quis audierit vocem meam et aperuerit mihi januam, intrabo ad illum et coenabo cum illo, et ipse mecum. » En motionem supernaturalem, qua Deus confert nobis *posse* recte agere, invitando nos et alliciendo et miris modis excitando.

Ezech. 2, 2 : « Et ingressus est in me spiritus... et statuit me supra pedes meos. » Ibid. 11, 19 : « Dabo eis cor unum et spiritum novum tribuam in visceribus eorum. » Jer. Thraen. 5, 21 : « Converte nos, Domine, ad te, et convertemur. » Ps. 50, 17 : « Domine, labia mea aperies, et os meum annuntiabit laudem tuam. » Et Ps. 118, 32 : « Viam mandatorum tuorum cucurri, cum dilatasti cor meum. » Act. Ap. 16, 14 : « Et quaedam mulier, nomine Lydia... cujus Dominus aperuit cor intendere his, quae dicebantur a Paulo. » Cantic. 5, 4-6 : « Dilectus meus misit manum suam per foramen, et venter meus intremuit ad tactum ejus. Surrexi, ut aperirem dilecto meo... Pessulum ostii mei aperui dilecto meo. » Apoc. 3, 9 : « Ecce faciam illos ut veniant et adorent ante pedes tuos; et scient, quia ego dilexi te. » Ps. 72, 24 : « Tenuisti manum dexteram meam, et in voluntate tua deduxisti me, et cum gloria suscepisti me. » Ecce motionem, qua

Deus *physice* agit in ipsam potentiam liberae voluntatis, intus inclinando atque immutando, et qua Deus confert nobis ipsam *actualitatem* recte volendi et agendi.

Arg. 3<sup>um</sup>. — Inter propositiones Cornelii Jansenii damnatas ab Innocentio X. uti haereticas, adest haec : « Interiorem gratiae in statu naturae lapsae numquam resistitur. » Et inter propositiones Paschasii Quesnelli damnatas a Clemente XI. adest etiam ista : « Gratia est vox illa Patris, quae homines interius docet, ac eos venire facit ad Jesum Christum; quicumque ad eum non venit, postquam audivit vocem exteriorem Filii, nullatenus est doctus a Patre. » Et rursus : « Quando Deus mandatum suum et suam externam locutionem concomitatur unctione sui Spiritus et interiori vi gratiae suae, operatur illam in corde obedientiam, quam petit. »

Ex quibus habetur : 1<sup>o</sup> dari gratiam interiorem, cui homo aliquando resistit; 2<sup>o</sup> praeter vocem exteriorem Filii dari vocem interiorem, qua homo docetur a Patre, et tamen homo non venit ad Christum; 3<sup>o</sup> dari unctionem S. Spiritus et interiorem vim gratiae divinae concomitantem Dei externam locutionem, et tamen Deus non semper operatur illam in corde obedientiam, quam petit. Itaque gratia interior, cui resistit homo, *sufficiens* est. Gratia seu vox illa Patris, qua homo interius docetur venire ad Christum, et qua tamen homo non venit, *sufficiens* est. Illa unctio Spiritus Sancti et vis interior, quae non operatur in corde obedientiam, *sufficiens* est. Etenim verae gratiae sunt, et interiores; et conferunt *posse* venire ad Christum et *posse* operari illam in corde obedientiam, quam Deus petit. E contra, gratia interior, cui homo non resistit, *efficax* est. Illa vox Patris, qua homo edocetur interius venire ad Christum et edoctus venit, *efficax* est. Et illa interior vis divinae gratiae et illa unctio S. Spiritus, quae, dum comitatur locutionem externam Dei, etiam operatur illam in corde obedientiam, quam Deus petit, *efficax* est. Etenim verae gratiae sunt, et interiores; et conferunt non modo *potestatem* veniendi ad Christum et *potestatem* operandi, sed praeterea superaddunt ipsum *actum* veniendi et ipsam *actualem* obedientiam.



Quapropter juxta doctrinam catholicam oportet distinguere gratiam ipsam interiorem actualem in *sufficientem* et *efficacem*; et admittere inter utramque gratiam divinam verum discrimen, id est: non modo in actu *secundo*, postquam liberum hominis arbitrium jam elicit consensum, verum in actu quoque *primo*, ex Dei proposito atque intentione. Jansenii namque ac Quesnelli error ex eo processisse videtur, quod, cum negarent tale discrimen, ponebant omnem gratiam interiorem *ex se efficacem*. Quapropter a sententia etiam illorum cavendum, qui, inficientes ex opposita regione discrimen praedictum, ponunt omnem gratiam interiorem dumtaxat *ex se sufficientem*. Extrema se tangunt; et sermo Ecclesiae, unum errorem damnans, usque ad oppositum pertingit, utpote « vivus... et efficax et penetrabilior omni gladio ancipiti ». (Hebr. 4, 12)

---

## V

### CONCLUSIO 4.

**Gratia interior, sumpta prout est motio, qua Deus physice agit in ipsam potentiam liberi arbitrii, convenienter etiam dividitur in sufficientem et efficacem.**

Arg. 1<sup>um</sup>. — D. Thomas supra q. 112. a. 2. ad 2. : « Cum homo ad gratiam se praeparare non possit, nisi Deo eum praeveniente et movente ad bonum, non refert, utrum subito vel paulatim aliquis ad perfectam praeparationem perveniat. Dicitur enim Eccli. 11, 23 : *Facile est in oculis Dei subito honestare pauperem*. Contingit autem quandoque, quod Deus movet hominem ad aliquod bonum, non tamen perfectum; et talis praeparatio praecedit gratiam. Sed quandoque statim perfecte movet ipsum ad bonum, et subito gratiam homo accipit, secundum illud Joh. 6, 45 : *Omnis, qui audit a Patre et didicit, venit ad me*. Et ita contigit Paulo, qui

subito cum esset in progressu peccati, perfecte motum est cor ejus a Deo, audiendo, addiscendo et veniendo; et ideo subito est gratiam consecutus. » Datur igitur duplex motio seu gratia interior actualis, qua Deus movet cor hominis ad bonum supernaturale gratiae sanctificantis consequendae, sc. : movendo ad bonum, *non tamen perfectum*, et movendo *perfecte* ad bonum. Altera quidem motio est gratia *sufficiens*; altera vero *efficax*.

Arg. 2<sup>um</sup>. — Datur actus seu motus liberi arbitrii in Deum per dilectionem et in peccatum per dolorem seu tristitiam, qui est simul cum justificatione, et actus seu motus liberi arbitrii in Deum per dilectionem et in peccatum per dolorem seu poenitudinem, qui praecedat tempore ipsam justificationem. Sed uterque motus est supernaturalis; uterque causatus a motione divina, qua physice Deus immutat potentiam liberae voluntatis; uterque est « verum donum Dei et Spiritus Sancti impulsus »; at alius a Spiritu Sancto non solum movente, verum quoque in anima inhabitante; alius autem etiam est donum Spiritus Sancti « non adhuc quidem inhabitantis, sed tantum moventis, quo poenitens adjutus, viam sibi ad justitiam parat. Et quamvis sine sacramento poenitentiae per se ad justificationem perducere peccatorem nequeat, tamen eum ad Dei gratiam in sacramento poenitentiae impetrandam disponit. » (Conc. Trid. sess. 14. cap. 4.) Unus ergo motus procedit a motione voluntatis, quae est gratia *sufficiens*; alter vero a motione intrinseca cordis, quae est gratia *efficax*. Cujus virtutis intrinseca efficacia tum vel maxime ostenditur, cum Deus « ita infundit donum gratiae justificantis, quod etiam simul cum hoc movet liberum arbitrium ad donum acceptandum... » (I-II. q. 113. a. 3.)

Arg. 3<sup>um</sup>. — Inter *vocationem exteriozem*, quae fit per praedicationem, et *vocationem*, quae est idem quod justificatio, est quaedam alia *vocatio interior*; et haec quandoque non pertingit ad finem suum ex vocati defectu; quandoque pertingit ad finem suum ex nova motione superaddita, quoniam « facientibus quod est in se viribus gratiae, Deus numquam denegat ulteriorem gratiam ». Prima vocatio

est gratia sufficiens; secunda autem vocatio est quoque gratia sufficiens, cum non pertingit ad finem ex defectu vocati; et etiam est gratia sufficiens, cum pertingit, quoniam non est idem quod justificatio, sed *via* ad illam. Sed vocatio interior, quae pertingit ad terminum justificationis et non est adhuc ipsa justificatio, sed *via* ad illam, importat secum immutationem intrinsecam cordis convertentis se ad Deum per dolorem peccati et amorem Dei initialem, etsi imperfectum. Ergo gratia sumpta prout est motio, qua Deus physice agit in liberam hominis voluntatem, potest esse *sufficiens* tantum; et potest esse quoque *efficax*, sc. cum est *vocatio*, quae identificatur cum ipsa gratiae infusione, per quam homo justificatur.

Arg. 4<sup>um</sup>. — Ut D. Thomas docet III. q. 8. a. 3. ad 1. : Potentia se uniendi cum Christo « in duobus fundatur; primo quidem et principaliter in virtute Christi, quae est sufficiens ad salutem totius humani generis; secundario in arbitrii libertate ». Jam vero potentia, quae fundatur in arbitrii libertate, ex se non est nisi potentia obedientialis, ut declaratur ab ipso D. Thoma III. q. 1. a. 3. ad 3. atque in sexcentis plus minus locis sub diversis aspectibus explanatur. Sic *Quodl.* 5. a. 2. : « Natura sibi relicta non potest in actum meritorium, qui est supra facultatem naturae; potest autem in actum peccati, qui est demeritorius, sicut in aliquid infra naturam humanam existens; homo enim peccando descendit a dignitate suae naturae... Naturalia enim adjuta per gratiam sunt principia merendi; sibi autem relicta possunt esse principia demerendi. » Cum ergo liberum hominis arbitrium adjuvatur et supra semetipsum elevatur per gratiam Dei primo et principaliter ipsum moventem, tunc eo ipso acquirit veram potentiam etiam seipsum movendi in ordine supernaturali, et incipit esse in debita proportionem et ad formam gratiae sanctificantis et ad Deum ut agens, quod debet istam formam inducere. Liberum itaque hominis arbitrium, dum agitur a Spiritu Sancto, agit seipsum; dum movetur, seipsum movet; dum determinatur, se determinat progrediendo in via justificationis et appropin-



quando Deo. Indiget tamen agi, moveri et applicari; quia nihil se educit de potentia in actum, et praesertim, quia potentia liberi arbitrii ad actum supernaturalem sit secundum ordinem divinae potentiae, cui omnis creatura obedit ad nutum.

Sed liberum hominis arbitrium, dum actum atque motum a Deo ut ab agente supernaturali ponit seipsum in debita proportionem ad Deum qui dat gratiam, et ad gratiam quae datur, appropinquare valet plus vel minus ipsi Deo per affectum et desiderium; et in potestate illius est se ordinare ad ipsam gratiam per remotionem impedimenti, quod quidem impedimentum est peccatum. Et ideo concludit D. Thomas *IV. Sent. dist. 17. q. 1. a. 2. solut. 2.* : « Per displicentiam peccati et affectum ad Deum se aliquis ad gratiam praeparat; et quando haec duo efficaciter facit, dicitur facere quod in se est, et gratiam recipit. De primo horum dicitur Jacob. 4, 8 : *Appropinquate Deo, et appropinquabit vobis.* De secundo, Apoc. 3, 20 : *Si quis... aperuerit mihi januam, intrabo ad illum.* » Dum igitur per displicentiam peccati et affectum ad Deum libera hominis voluntas magis magisque Deo appropinquat, haec omnia effectus sunt gratiae *sufficientis*. Cum autem haec duo efficaciter facit, aperiendo Deo ut intret, gratiam sanctificantem recipit; et hoc effectus est gratiae *efficacis*, a qua accipimus hoc ipsum, quod est libere Deo intranti aperire. Unde D. Thomas *De Verit. q. 24. a. 15. ad 2.* : « Dicendum, quod nos aperire cor nostrum Deo possumus, sed non sine divino auxilio; unde ab eo petitur II Machab. 1, 4 : *Adaperiat Dominus cor vestrum in lege sua et in praeceptis suis, et faciat pacem.* Et sic dicendum est ad alia; nam nec praeparare nec velle homo potest, nisi hoc Deus in eo operetur. »

## VI

## OBSERVATIONES

PRIMA : Cum ergo motio supernaturalis, qua Deus ut auctor gratiae physice agit et immediate, immediatione tum suppositi tum virtutis, in ipsam potentiam liberi arbitrii creati, compleat ac perficiat potentiam operativam liberae voluntatis, atque se habeat in ratione principii activi et in ratione causae efficientis respectu actus liberi boni et supernaturalis, qui procedit a Deo per physicam praemotionem mediante ipsa voluntate creata : exinde idem dicendum de hac supernaturali motione ac de causa per ordinem ad suum effectum. Posita enim causa, ponitur effectus ; posita etiam motione physica supernaturali, ponitur actio bona et supernaturalis liberi arbitrii. Posita ergo gratia sufficienti, quae sit physica motio, ponitur effectus ; ac per comparisonem ad hunc effectum, ad quem immediate ordinatur, dicenda est *efficax* ; sed per comparisonem ad effectum, ad quem ordinatur mediante alia motione, dicitur *sufficiens*. Haec autem doctrina passim traditur a D. Thoma, dum agit de efficientia ac causalitate passionis, mortis, resurrectionis ac ascensionis Domini nostri Jesu Christi. Atque inter alia plura sit illud III. *Suppl.* q. 76. a. 1. ad 1. : « Dicendum, quod causa sufficiens statim producit effectum suum, ad quem immediate ordinatur, non autem effectum, ad quem ordinatur mediante alio, quantumcumque sit sufficiens ; sicut calor, quantumcumque sit intensus, non statim in primo instanti causat calorem ; sed statim incipit movere ad calorem, quia calor est effectus ejus mediante motu. » Et I. q. 113. a. 5. ad 1. : « Angeli mittuntur in ministerium, efficaciter quidem propter eos solos, qui haereditatem capiunt salutis, si consideretur ultimus effectus custodiae, qui est perceptio haereditatis ; nihilominus tamen et aliis ministerium angelorum non subtrahitur ; quamvis enim in eis hanc efficaciam non habeat,

quod perducantur ad salutem, efficax tamen est circa eos angelorum ministerium, in quantum a malis multis retrahuntur. » Et similiter III. q. 86. a. 3. ad 1. : « Interdum ille, qui plura peccata consuevit committere, deserit unum, non tamen aliud; quod quidem fit auxilio divino, quod tamen non pertingit usque ad remissionem culpae <sup>1</sup>. » Et rursus,

<sup>1</sup> Conformiter ad haec etiam S. Augustinus *De Grat. et lib. arb.* cap. 17. loquitur de quadam divina gratia, quam ipse vocat *parvam et imperfectam caritatem, voluntatem bonam et invalidam*; et de quadam alia gratia divina, quam appellat *magnam et robustam*. Atque VIII. *Confess.* cap. 11. describit sic effectus divinae gratiae in corde suo : « Jam pene faciebam, non faciebam; nec relabebam tamen in pristina, sed de proximo stabam et respirabam. Et item conabar, et paulo minus ibi eram, et paulo minus jam jamque attingebam et tenebam; et non ibi eram, nec attingebam, nec tenebam, haesitans mori morti et vitae vivere; plusque in me valebat deterius inolitum quam melius insolitum. Punctumque ipsum temporis, quo aliud futurus eram, quanto proprius admovebatur, tanto ampliorem incutiebat horrorem; sed non recutiebat retro nec avertebat, sed suspendebat. » Et post hanc luctam spiritus et carnis, quam vivis ipse describit coloribus, Augustinus legit codicem Apostoli, ubi dicebatur : *Induimini Dominum Jesum Christum et carnis curam ne feceritis in desideriis*. « Nec ultra (inquit) volui legere, nec opus erat. Statim quippe cum fine hujusce sententiae quasi luce securitatis infusa cordi meo omnes dubitationis tenebrae diffugerunt. » Et caetera, quae in capite 12. usque ad finem libri narrantur, ex quibus omnibus manifeste ostenditur, qualiter per Dei gratiam voluntas Augustini ex bona et invalida facta fuit magna, optima et robusta; per Dei, inquam, gratiam, quae dedit primum *posse*, et deinde *operari*. Gratiam, inquam, illam qua, ut ipse S. Augustinus in *epistola ad Vitalem* ait, « voluntas corrigatur, doctrinae (fidei) consentiatur, natura sanetur. Quae facit prodesse doctrinam; et per ipsam Deus etiam hoc efficit, ut velimus. Et quae datur iis, qui nolunt credere, ut velint credere; qui ab ejus lege doctrinaque dissentiunt, ut legi ejus doctrinaeque consentiant; ut det illis Deus, quod per prophetam promisit, *cor cognoscendum*... Et cum ad fidem ejus doctrinamque conversi, volentes ex nolentibus fiunt, oportet sine dubitatione fatearis voluntates hominum Dei gratia praeveniri, et ut bonum velint homines, quod nolebant, Deum facere, qui rogatur ut faciat, et cui nos novimus agere gratias dignum et justum esse cum fecerit. »



Rom. 5. lect. 5. : « Justificatio Christi transit in justificationem omnium hominum quantum ad *sufficientiam*, licet quantum ad *efficientiam* procedat in solos fideles. Unde dicitur I Tim. 4, 10 : *Qui est Salvator omnium hominum, maxime autem fidelium.* »

SECUNDA : Recte itaque Johannes a S. Thoma I-II. q. 111. disp. 24. a. 1. tradit « auxilium sufficiens seu gratiam sufficientem non consistere in indivisibili, sed in multis concurrentibus ad nostros actus, sine quibus nullo modo fieri possunt; et unumquodque eorum dicitur *auxilium sufficiens*, non adaequate et complete, sed in suo genere... Habet enim gratia sufficiens magnam latitudinem; et cum pertineat ad virtutem seu potestatem agendi, sicut una virtus est perfectior alia, ita et gratia sufficiens. » « Gratia efficax in praesenti dicitur illa, quae habet effectum non quomodo-cumque, sed respectu ejus, quod ultimo intenditur, sc. respectu consensus liberi. »

TERTIA : Ad rem quoque diligenter adnotat Lemos, IV. *Panopl. grat.* lib. 4. part. 2. tract. 3. cap. 7. : « Communis et vera Thomistarum sententia est, quod omne auxilium, *sufficiens* comparatione unius actus, semper est *efficax* ratione alterius, ad quem efficiendum ex absoluto et efficaci decreto voluntatis divinae ordinatur... Auxilium, *sufficiens* ad credendum, *efficax* est respectu quarundam piarum cogitationum et notitiarum credendorum, quas efficaciter in homine efficit, quae actum credendi antecedunt. Similiter auxilium, *sufficiens* ad contritionem, *efficax* est comparatione aliorum actuum imperfectorum, quos in homine efficaciter producit : quales sunt consideratio inferni poenarum, turpitudinis peccati, timoris inferni, attritionis et similium, qui regulariter essentialem contritionem antecedunt... Insuper idem habitus est simul sufficiens in ordine ad unum effectum, et efficax in ordine ad alium; etenim habitus gratiae efficaciter animam sanat atque justificat; et simul est sufficiens radix comparatione actus meritorii. Parique ratione

habitus caritatis efficaciter efficit hominem amatorem Dei et simul est principium habituale sufficiens comparatione actualis Dei dilectionis. Eadem ergo ratione idem auxilium actuale poterit simul esse auxilium *sufficiens* comparatione unius effectus, et *efficax* respectu alterius. »

QUARTA : Similiter observat Alvarez, *III. De auxiliis divinae gratiae* cap. 17. inquit : « *Posse* autem, quod tribuit auxilium sufficiens, debet accipi in ordine ad actum perfectum, ad quem ultimate ordinabatur ; nihilominus omne auxilium sufficiens comparatione unius actus semper est efficax respectu alterius, ad quem efficiendum decreto absoluto divinae voluntatis destinatur. Ut, verbi gratia, auxilium sufficiens ad actum fidei, efficaciter producit in homine pias cogitationes et notitias credendorum, vel pia desideria habendi fidem, et alios hujusmodi actus imperfectos, qui regulariter loquendo antecedunt assensum fidei. Similiter auxilium sufficiens ad actum contritionis producit efficaciter in homine considerationem poenarum inferni aut bonitatis divinae, vel turpitudinis peccati, timorem inferni, vel attritionem, qui regulariter perfectam contritionem antecedunt. Ita docent communiter recentiores Thomistae, praesertim M. Medina I-II. q. 109. a. 10. circa finem. » Et lib. 4. cap. 21. ex allegatis ac probatis lib. 3. cap. 16. et ex disp. 76. cap. 19. et disp. 82. et 86. concludit : « Necessario distinguendum est duplex Dei adjutorium sive auxilium gratiae : aliud sufficiens, quo homo potest ad Deum converti vel pie operari ; aliud efficax, quo Deus efficit, ut actualiter convertatur et pie operetur. »

QUINTA : Adnotandum denique cum Gonet, *Manuale Thomistar.* tract. 7. *De Gratia* cap. 10. « convenienter gratiam, quae dat *posse*, tametsi non inferat actum, *sufficientem* appellari, idque duplici titulo : 1<sup>o</sup> quia sufficienter excitat voluntatem ad agendum ; 2<sup>o</sup> quia dat illi totum complementum et totam virtutem seu sufficientiam, quae requiritur ex parte actus primi, quamvis non det *applicationem*,

*actualitatem* seu complementum se tenens ex parte actus secundi. Quod vero hoc sufficiat ad rationem et denominationem auxilii sufficientis, ex utroque sancto Doctore Augustino et Thoma aperte colligitur. Licet enim Augustinus *De grat. Christi* et *De corrept. et grat.* admittat auxilium actionis seu adjutorium quo, quod docet ita necessarium esse ad operandum et perseverandum, ut sine illo nemo unquam bene agat nec perseveret, tamen praeter illud agnoscit auxilium possibilitatis seu adjutorium sine quo, quod sufficiens esse ibidem docet, quamvis praeter illud aliud requiratur. Ergo ex Augustino de ratione auxilii sufficientis non est, quod illud se solo sufficiat, et praeter illud non requiratur aliud ad agendum. Item S. Thomas I-II. q. 106. a. 2. ad 2. dicit, quod *lex nova, quantum est de se, sufficiens auxilium dat ad non peccandum*. Ubi per *auxilium sufficiens* intelligit gratiam habitualement, ut docet Conradus, Sylvius et alii ejus interpretes; et constat tunc ex titulo articuli, ubi quaerit: *Utrum lex nova justificet*. Tunc ex scopo, in quem collimat; intendit enim probare legem novam justificare, quia ad eam principaliter pertinet gratia habitualis seu justificans. Atqui in doctrina D. Thomae ad non peccandum seu ad observanda praecepta divina et actus supernaturales eliciendos, praeter gratiam habitualement, requiritur in justis aliqua gratia actualis et movens, per quam gratia habitualis et habitus supernaturales et infusi ab ea promanantes applicentur ad agendum, et de actu primo ad secundum reducantur, ut constat ex q. 109. a. 9. ubi idem S. Doctor sic ait: *Homo in gratia existens non indiget auxilio gratiae, quasi aliquo alio habitu infuso; indiget tamen auxilio secundum alium modum, ut sc. a Deo moveatur ad recte agendum*. Ergo juxta D. Thomam non requiritur ad denominationem auxilii sufficientis quod se solo ita sufficiat ad operandum, ut homo non indigeat alio auxilio movente et applicante; sed ad hoc satis est, quod auxilium sufficiens tribuat omnia necessaria et requisita ex parte actus primi... Ex his intelliges Ludovicum Montaltium, dum in famosis illis *ad provincialem epistolis* deridet



Thomistas, eo quod auxilium, quod admittunt, appellent *sufficiens*, etsi praeter illud aliud ad agendum requiratur, non solum in doctrina D. Augustini et S. Thomae sese peregrinum ostendere, sed etiam seipsum vicissim a Thomistis exponere deridendum, juxta illud vulgare adagium : *Irrisores irridebuntur* <sup>1</sup>. »

<sup>1</sup> Argumentum illud, quod LUDOVICUS MONTALTIUS (alias Blasius PASCAL) veluti deridendo objicit Thomistis, ad hoc reducit : *C'est-à-dire que cette grâce suffit, quoiqu'elle ne suffise pas*. Ubi Pascal ludit verbis ut *grammaticus*, sed loquitur ignoranter quatenus *theologus*. Unde GONET loco supra citato adjungit : « Et certe cum ille (Pascal) in praedictis epistolis passim profiteatur se esse D. Augustini discipulum et gratiae per se efficacis acerrimum defensorem, vel debet omne auxilium *sufficiens*, ab *efficaci* distinctum, rejicere, subindeque asserere praecepta impossibilia esse justo, qui caret auxilio efficaci, quod Innocentius X. in sua *Nova Constitutione* damnavit ut haereticum; vel ipsum fateri necesse est justum, qui caret auxilio efficaci et solo sufficienti instructus est, habere *potentiam* ad agendum *sufficienter completam*; subindeque dici posse habere auxilium revera sufficiens ad implenda praecepta ». Hucusque Gonet. Semel saltem videtur Pascal volteriani risus praeludium fecisse. Et tamen praedictum argumentum, quod ex ore Pascal deridentis exivit, accipiunt tamquam optimaee argumentationis exemplar Molinistae ac Congruistae, qui non cessant illud repetentes objicere contra gratiam sufficientem in sensu Augustiniano et Thomistico supra explicato. At de hoc infra *III. Parte* cap. 10. redibit sermo.



## CAPUT SECUNDUM

Quomodo divisio gratiae in sufficientem et efficacem habeat fundamentum in distinctione divinae voluntatis in antecedentem et consequentem.

---

### I

#### PRAENOTANDA

PRIMO : Quaenam sint opera, in quibus ostenditur efficacia gratiae. — Ex dictis patet divisionem divinae gratiae in sufficientem et efficacem non sumi praecise ex eo, quod gratia efficax aliquid efficiat et gratia sufficiens nihil efficiat; sed ex eo, quod gratia sufficiens est *facultas* seu *potentia* operandi opus boni salutaris; et gratia efficax, simul cum facultate operandi tale bonum, importat ipsam *actualitatem* salutaris operationis. Opus autem boni salutaris non vocatur hic quodcumque bonum, vel quaecumque operatio, etiam supernaturalis; sed opus salutare perfectum in suo genere per ordinem ad vitam aeternam merendam, augendam ac consequendam. Unde tale opus, gratiae efficacis effectus, manifestatur : 1º in ipso actu justificationis, dum liberum arbitrium movetur in Deum per fidem, spem et caritatem; 2º quotiescumque homo post consecutionem gratiae sanctificantis utitur ad agendum habitibus infusis simul cum gratia habituali. « Rectus autem gratiae usus est per opera caritatis; quae quidem secundum quod sunt de necessitate virtutis, pertinent ad praecepta moralia » (I-II. q. 108. a. 2.); 3º in ipso discedendi a vita mortali actu, qui

perseverantiae finalis donum denominatur. Quapropter operari, quod confertur homini a Deo per gratiam, quae dicitur et est efficax, est operari opera meritoria vitae aeternae, et meritoria gratiae ipsius sanctificantis jam receptae augmenti, et meritoria augmenti ipsius quoque gloriae; et denique, perseverando usque in finem salvum fieri.

**SECUNDO : Gratia divina in summo suae efficaciae.** — Tunc enim gratia actualis, qua movemur a Deo ad salutem et qua de facto jam salutem operamur, perveniet ad summum suae efficaciae, cum pertingemus ad terminum finalem hujusce motus, quo in Deo vivimus, movemur et sumus; cujus quidem motus terminus est ipsa consecutio vitae aeternae ac felix gratiae sanctificantis per gloriam consummatio. Tunc etenim adimplebuntur totaliter mirabiles divinae gratiae in nobis effectus. « Et quomodo descendit imber et nix de coelo et illuc ultra non revertitur, sed inebriat terram et infundit eam, et germinare eam facit, et dat semen serenti et panem comedenti : sic erit verbum meum, quod egredietur de ore meo; non revertetur ad me vacuum, sed faciet quodcumque volui, et prosperabitur in his, ad quae misi illud. Quia in laetitia egrediemini et in pace deducemini; montes et colles cantabunt coram vobis laudem, et omnia ligna regionis plaudent manu. Pro salionca ascendet abies, et pro urtica crescet myrtus; et erit Dominus nominatus in signum aeternum, quod non auferetur. » Is. 55, 10-13.

**TERTIO : Multiplex operandi bonum salutare potentia, et undenam oriatur.** — *Potentia* autem operandi opus bonum salutare est multiplex, ac per diversos gradus homo ascendendo procedit in receptione talis potestatis. Primo quidem omnis nostra *sufficientia* atque *efficacia* ex meritis Domini nostri Jesu Christi derivatur.

*Sufficientia* enim; nam, ut docet D. Thomas, « meritum Christi sufficienter operatur ut quaedam causa universalis salutis humanae; sed oportet hanc causam applicari singulis



per sacramenta et per fidem formatam... Et ideo requiritur aliquid aliud ad salutem nostram praeter meritum Christi, cujus tamen meritum Christi est causa ». *Efficacia* autem : quoniam, ut ipse Angelicus Doctor tradit, « hoc ipsum gratis alicui nostrum a Deo confertur, quod efficaciam meriti Christi consequatur ». (*De Verit.* q. 29. a. 7. ad 8. et ad 13.) Ex unione itaque cum Domino nostro Jesu Christo procedit et facultas operandi bonum salutare et ipsamet boni salutaris operatio. Joh. 1, 17 : « Et de plenitudine ejus nos omnes accepimus, et gratiam pro gratia. Gratia et veritas per Jesum Christum facta est. »

**QUARTO : Duplex causa, quare meritum Christi non se habeat aequaliter ad omnes quantum ad efficaciam.** — Attamen, ut D. Thomas tradit *De Verit.* q. 29. a. 7. ad 4. : « Meritum Christi quantum ad *sufficientiam* aequaliter se habet ad omnes, non autem quantum ad *efficaciam*; quod accidit partim ex libero arbitrio, partim ex divina electione, per quam quibusdam misericorditer effectus meritorum Christi confertur, quibusdam vero justo judicio subtrahitur. » Ex duplici ergo causa procedit, quod meritum Christi non se habeat aequaliter ad omnes quoad efficaciam, sc. :

1<sup>o</sup> *Partim ex libero hominis arbitrio*, in quo est p<sup>o</sup>tentia *obedientialis* ad gratiam Dei recipiendam, et potentia *deficiendi* et, per deficientiam, divinae gratiae resistendi. Unde quod homo gratiam Dei non recipiat, prima causa est semper peccatum, sive actuale sive originale saltem, ut contingit in pueris qui absque baptismo decedunt. Ita constanter cum S. Augustino, D. Thomas multis in locis. (I. q. 23. a. 5.; I-II. q. 98. a. 4. ad 2.; II-II. q. 2. a. 5. ad 1.) Ac *III. Sent.* dist. 19. q. 1. a. 2. ad 4. : « Dicendum, quod hoc, quod idololatrae adhuc manent sub servitute daemonis, contingit ex hoc, quod auxilia, quae sunt ex passione Christi, accipere negligunt. »

2<sup>o</sup> *Partim ex divina electione*. Deus, qui semper confert gratiam ex misericordia et amore : 1<sup>o</sup> quibusdam confert gratiam, quos speciali amore dilexit, et diligendo elegit, et

eligendo praedestinavit ad vitam aeternam ; 2<sup>o</sup> ceteris autem, quos non praedestinavit, confert multa beneficia, quae sunt communia omnibus, et non tantum ordinis naturalis, verum etiam quaedam, quae pertinent ad vitam gratiae vel ad illam habendam parant viam.

Unde D. Thomas *III. C. Gent. cap. 159.* : « Deus enim, quantum in se est, paratus est omnibus gratiam dare : *omnes enim homines vult salvos fieri et ad agnitionem veritatis venire*, ut dicitur I Tim. 2, 4. Sed illi soli gratia privantur, qui in seipsis gratiae impedimentum praestant ; sicut sole mundum illuminante, in culpam imputatur ei, qui oculos claudit, si ex hoc aliquod malum sequatur, licet videre non possit nisi lumine solis praeveniat. » Et in Joh. 10. lect 5. : « Peccatum autem est causa quare non illuminamur a Deo per fidem ; puta originale vel in aliquibus actuale : quae quidem causa in omnibus est. Unde omnes illi qui deseruntur, justo Dei judicio deseruntur ; et illi qui eliguntur, ex Dei miseratione assumuntur. » Et sic semper verificatur, quod in defectu gratiae prima causa est ex nobis ; in gratiae autem collatione causa prima est Deus.

**QUINTO : Quaestio dilucidanda.** — Cum autem omnes gratiae, quas accipit homo qui a vita aeterna excidit, non pertingant usque ad summum gradum gratiae efficacis, qui in ipsa gloriae consecutione manifestatur, et tamen habeant veram rationem gratiae sufficientis, cujus perfecta ratio invenitur in habitibus infusis simul cum gratia justificante : idcirco assurgendum est altius, ut videamus distinctionem gratiae sufficientis et gratiae efficacis esse revera fundatam supra distinctionem ordinis generalis providentiae et ordinis specialis praedestinationis. Praedestinatio, inquit D. Thomas, est quidam modus providentiae ; sed addit aliqua specialia super eam. (*I. Sent. dist. 4. q. 1. a. 2. ad 4.*)

## II

## CONCLUSIO

**Divisio divinae gratiae in sufficientem et efficacem habet suum angulare fundamentum in distinctione divinae voluntatis in antecedentem et consequentem.**

Arg. 1<sup>um</sup>. — Sumptum ex effectibus utriusque voluntatis. D. Thomas *I. Sent.* dist. 46. q. 1. a. 1. : « Voluntas est duplex, sc. antecedens et consequens; et hoc contingit non ex aliqua diversitate voluntatis divinae, sed propter diversas condiciones ipsius voliti. Potest enim in unoquoque homine considerari natura ejus et aliae circumstantiae ipsius, ut quod est volens et praeparans se ad salutem suam, vel etiam repugnans et contrarie agens. Si ergo in homine tantum natura sua consideretur, aequaliter bonum est omnem hominem salvari, quia omnes conveniunt in natura humana. Et cum omne bonum sit volitum a Deo, hoc etiam Deus vult; et hoc vocatur voluntas *antecedens*, qua omnes homines salvos fieri vult. Et hujus voluntatis effectus est ipse ordo naturae in finem salutis, et promoventia in finem omnibus communiter proposita, tam naturalia quam gratuita; sicut potentiae naturales et praecepta legis et hujusmodi. »

Duplicem itaque in Deo distinguere oportet voluntatem : quarum altera vult omnes homines salvos fieri; altera vero vult illos salvari, quos elegit. Effectus primae voluntatis sunt : 1<sup>o</sup> ipse ordo naturae in finem salutis; 2<sup>o</sup> promoventia in finem omnibus communiter proposita, tum naturalia tum gratuita. Effectus vero secundae voluntatis sunt omnia promoventia in finem salutis illis, quos ab aeterno Deus elegit, collata. Gratuita autem quae, communiter omnibus hominibus proposita, illos promovent in finem beatitudinis, pertinent ad illam gratiam, quae communis est bonis et malis. Gratuita vero, quae conferuntur electis, ad illam gratiam spectant,



quae bonos discernit a malis : de qua duplici gratia plurima scribit S. Augustinus in libris *De praedest. sanct.* et *De dono persev.* Gratuita igitur in finem vitae aeternae promotiva, quae omnibus hominibus proponuntur, rationem habent gratiae sufficientis. Gratuita vero, quae non solum in finem salutis promovent, verum etiam bonos discernunt a malis, rationem specialem continent gratiae efficaci.

Arg. 2<sup>um</sup>. — Ex duplici ordine in salutem per duplicem voluntatem expresso desumptum. D. Thomas, *De Verit.* q. 23. a. 2. ait : « Illud ergo, ad quod Deus creaturam ordinavit, quantum est de se, dicitur esse volitum ab eo quasi prima intentione, sive voluntate *antecedente*. Sed quando creatura impeditur propter sui defectum ab hoc fine, nihilominus tamen Deus implet in ea id bonitatis, cujus est capax; et hoc est quasi de secunda intentione ejus et dicitur voluntas *consequens*... Nec tamen... intentio Dei frustrari potest; quia istum, qui non salvatur, praescivit ab aeterno fore non salvandum; nec ordinat ipsum in salutem secundum ordinem praedestinationis, qui est ordo absolutae voluntatis; sed quantum ex parte sua est, dedit ei naturam ad beatitudinem ordinatam. »

Habetur igitur duplex ordo in salutem, sc. : *ordo praedestinationis*, qui est ordo absolutae voluntatis, et *ordo ad beatitudinem*, propter quam Deus omnes homines creavit atque condidit. Voluntas absoluta est voluntas consequens; voluntas autem conditionata est voluntas antecedens; nec tamen est imperfectio ex parte voluntatis, sed ex parte voliti, quod non accipitur cum omnibus circumstantiis, quae exiguntur ad rectum ordinem in salutem. (*I. Sent.* dist. 46. q. 1. a. 2. ad 2.) Gratia ergo, quae datur a Deo vel saltem offertur omnibus hominibus pro executione ordinis in salutem propter quam Deus omnes homines fecit, gratia *sufficiens* dicitur. Gratia autem, quae confertur a Deo pro executione ordinis in salutem, qui est ordo praedestinationis, gratia *efficax* denominatur.

Arg. 3<sup>um</sup>. — Depromptum ex diverso modo, quo se habent homines prout a Deo ordinantur in beatitudinem.

D. Thomas, *De Verit.* q. 23. a. 2. : « Quia ergo Deus omnes homines propter beatitudinem fecit, dicitur voluntate antecedente omnium salutem velle. Sed quia quidam suae salutis adversantur, quos ordo suae sapientiae ad salutem venire non patitur..., implet in eis alio modo id, quod ad suam bonitatem pertinet, sc. eos per justitiam damnans; ut sic, dum a primo ordine voluntatis deficiunt, in secundum labantur, et dum Dei voluntatem non faciunt, impleatur in eis voluntas Dei. Ipse autem defectus peccati, quo aliquis redditur dignus poena..., non est volitus a Deo, nec voluntate antecedente nec voluntate consequente, sed est ab eo solummodo permissus. » Ex omnibus ergo hominibus, quorum salutem Deus vult voluntate antecedente, quidam suae salutis adversantur et gratiae resistunt; quidam vero gratiae non resistunt, sed consentiunt, et libere consentiunt. Alios Deus vult salvari voluntate antecedente ratione humanae naturae, quam ad salutem fecit, et ratione etiam aliorum beneficiorum, quae illis gratuito contulit; vult tamen illos damnari voluntate consequente propter peccata, quae in eis inveniuntur. Alios vero vult Deus illos salvari utraque voluntate, antecedente et consequente, ratione naturae, quam ipse ad salutem fecit, et ratione gratiae, qua homines ipsi salutem meruerunt consequendam. Gratia itaque divina, cui alii resistunt, gratia *sufficiens* dicitur; gratia vero, cui alii consentiunt, dicitur et est *efficax*.

Arg. 4<sup>um</sup>, per quod tertium completur, et via ad errorem Pelagii occluditur. Sic ad litteram Angelicus Doctor Heb. 12. lect. 3. : « Gratia enim, etsi non habeatur ex meritis, alioquin gratia non esset gratia, tamen oportet, quod homo faciat quod in se est. Deus autem voluntate sua liberalissima dat eam omni praeparanti se. Apoc. 3, 20 : *Ecce sto ad ostium et pulso; si quis aperuerit mihi, intrabo ad eum*. I Tim. 2, 4 : *Qui vult omnes homines salvos fieri*. Et ideo gratia Dei nulli deest; sed omnibus, quantum in se est, se communicat, sicut nec sol deest oculis caecis... Sed contra, quia si gratia non datur ex operibus, sed tantum ex hoc, quod aliquis non ponit obstaculum : ergo habere gratiam

dependet ex solo libero arbitrio et non ex electione Dei, quod est error Pelagii. Respondeo : Dicendum est, quod hoc ipsum, quod aliquis non ponit obstaculum, ex gratia procedit. Unde si aliquis ponat, et tamen moveatur cor ejus ad removendum illud, hoc est ex dono gratiae Dei vocantis per misericordiam suam. Gal. 1, 15 : *Cum autem placuit ei, qui me segregavit ex utero matris meae et vocavit per gratiam suam.* Hoc autem donum gratiae non est gratum faciens. Quod ergo a quibusdam removetur istud obstaculum, hoc est ex misericordia Dei; quod autem non removetur, hoc est ex justitia ejus. »

Gratia ergo, cui homo ponit obstaculum, cui resistit, est gratia *sufficiens*. Gratia vero, cui homo obstaculum non ponit, cui consentit, est gratia *efficax*, cujus est effectus : 1<sup>o</sup> quod non ponatur obstaculum; 2<sup>o</sup> quod ipsum obstaculum, si ponitur, removeatur; 3<sup>o</sup> quod ipsum liberum arbitrium consentiat. Totum hoc procedit primo et principaliter ex gratia, qua Deus nos movet ad consentiendum et ad libere consentiendum.

### III

#### Corroboratur conclusio auctoritate Romani Pontificis.

Supra exposita doctrina circa voluntatem Dei antecedentem et consequentem, prout evolvitur ac declaratur a D. Thoma <sup>1</sup> *I. Sent.* dist. 46. q. 1. a. 1.; *De Verit.* q. 23. a. 2; *I. q.* 19. a. 6.

<sup>1</sup> Doctrina theologica circa voluntatis divinae distinctionem in antecedentem et consequentem primo tradita esse videtur a S. Joanne Damasceno. *II. De Orthodoxa Fide*, cap. 29. Quam divisionem sub nomine *primariae et secundariae* indicaverat S. Chrysostomus Hom. 1. *in epist. ad Ephes.* Et aliquid simile scribit Tertullianus *II. Adversus Marcionem*, cap. 11. Tertullianus enim ait : « Usque ad delictum hominis Deus a primordio tantum *bonus*; exinde iudex et *severus*... Ita prior bonitas Dei secundum naturam; severitas posterior secundum causam. » S. Chrysostomus vero loco citato (*Patrol. Graec.* tom. 62. p. 13) exponens illa verba Apostoli : *Secun-*



apparet comprobata et auctoritative definita a Romano Pontifice per condemnationem subsequentium propositionum, quarum aliae ad voluntatem Dei circa salutem omnium hominum referuntur, aliae autem ad efficaciam spectant orationis Domini nostri Jesu Christi atque ipsius desiderii pro hominum omnium salute.

Propositiones istae sunt Paschasii Quesnelli, et inter propositiones 101 damnatas a Clemente XI. in Const. *Unigenitus*, 8 Sept. 1713 hac enumeratione recensentur :

« Propositio 12. : Quando Deus vult salvare animam, quocumque tempore, quocumque loco, effectus indubitabilis sequitur voluntatem Dei. »

« Prop. 13. : Quando Deus vult animam salvam facere et eam tangit interiori gratiae suae manu, nulla voluntas humana ei resistit. »

*dum propositum voluntatis suae*, ait : « Id est propterea quod valde velit. Hoc est, ut ita dicam, ejus desiderium. Ubique enim εὐδοξία (hoc enim vocabulum hic usurpat Paulus) est voluntas princeps et quae praecedit; est enim etiam alia voluntas; utpote voluntas prima est, ut non pereant qui peccarunt; voluntas secunda est, ut qui facti sunt mali, pereant. » S. Damascenus autem sic : « Hoc itidem nosse oportet Deum primaria et antecedente voluntate velle omnes salvos esse et regni sui compotes fieri (I. Tim. 2, 4). Non enim nos ut puniret, condidit; sed quia bonus est, ad hoc, ut bonitatis suae participes essemus. Peccantes porro puniri vult, quia justus est. » Unde patet D. Thomam locis supra citatis sumere ac declarare *voluntatem Dei antecedentem et consequentem* sensu altiori atque ampliori. Etenim dum Tertullianus, Chrysostomus et Damascenus non vocant voluntatem Dei *consequentem*, nisi qua Deus peccatores punit aut peccare permittit, Angelicus Doctor extendit voluntatem consequentem tam ad bonos quam ad malos, ad omnes videlicet homines, ita quod *volitum* voluntate antecedente sit id, quod in nobis est ex parte solius Dei; et *volitum* voluntate consequente claudit etiam seu respiciat id, quod est ex parte nostra. Id autem quod est ex parte nostra, potest esse bonum vel malum; si quidem bonum, tunc est etiam principaliter a Deo; si vero malum, tunc est solummodo a nobis. Quamobrem distinctio voluntatis divinae in antecedentem ac consequentem juxta doctrinam D. Thomae est altior et profundior, quemadmodum apparet ex illius expositione in hoc capite 2.

« Prop. 30. : Omnes, quos Deus vult salvare per Christum, salvantur infallibiliter. »

« Prop. 31. : Desideria Christi semper habent suum effectum; pacem intimo cordium infert, quando eis illam optat. »

« Prop. 14. : Quantumcumque remotus a salute sit peccator obstinatus, quando Jesus se ei videndum exhibet lumine salutari suae gratiae, oportet ut se dedat, accurrat, sese humiliet et adoret Salvatorem suum. »

Doctrina est igitur Ecclesiae Catholicae : 1<sup>o</sup> quod *non* quocumque tempore, *non* quocumque loco, *non* semper, quando Deus vult salvare animam, effectus indubitabilis sequitur voluntatem Dei. Ecce ergo voluntas Dei antecedens. En gratia sufficiens. 2<sup>o</sup> Quando Deus vult animam salvam facere et eam tangit interiori gratiae suae manu, aliqua voluntas humana ei resistit. En gratia interior sufficiens; en voluntas antecedens. 3<sup>o</sup> *Non omnes*, quos Deus vult salvare per Christum, *infallibiliter* salvantur. Ecce voluntas Dei salutifera omnium hominum; en voluntas antecedens, cujus effectus sunt omnia promoventia in finem salutis omnibus hominibus proposita. 4<sup>o</sup> Desideria Christi *aliquando* non habent suum effectum; *aliquando* non inferunt cordi hominum pacem, quam illis Jesus optat. En voluntas Christi conditionata, respondens voluntati Dei antecedenti; en gratia sufficiens. 5<sup>o</sup> Quando Jesus se peccatoribus obstinatis et remotis ad salutem videndum exhibet lumine salutari suae gratiae, peccator *non semper* accurrit, *non semper* se humiliat et adorat Salvatorem suum. En gratia sufficiens. Et si accurrit et humiliat se et adorat Salvatorem suum, *non necessario* accurrit, sed *libere*. En gratia efficax perficiens atque exaltans liberam hominis voluntatem.

At Ecclesia Dei vivi, quae magistra est ac columna veritatis, edocet nos praeterea per S. Scripturam, per Concilia, per Patres et Doctores, maxime per S. Augustinum et D. Thomam, haec quae subsequuntur :

PRIMO : « Non rapiet eas quisquam de manu mea. De ovibus istis nec lupus rapit, nec fur tollit, nec latro interficit.

Securus est de numero earum, qui pro eis novit, quod dedit. Et hoc est quod ait : Non rapiet eas de manu mea. » (S. Aug. *in Joh.* tract. 48.)

SECUNDO : « Omnes, quos Deus vult salvos fieri, sine dubitatione salvantur; nec possunt salvari, nisi quos Deus vult salvos fieri. Nec est quisquam, quem Deus salvari velit, et non salvetur. » (S. Fulgent. *De Incar. et gratia Christi* cap. 31.)

TERTIO : « An audebis dicere, rogante Christo ne deficeret fides Petri, defecturam fuisse, si Petrus eam deficere voluisset; hoc est, si eam usque in finem perseverare noluisse? quasi aliud Petrus ullo modo vellet, quam pro illo Christus rogasset, ut vellet... Pro illo Christi non potuit esse inanis oratio. » (S. August. *De corrept. et grat.* cap. 8.)

QUARTO : « Dum ille orat in excelso, navicula turbatur fluctibus in profundo. Quia insurgunt fluctus, potest illa navicula turbari; sed quia Christus orat, non potest mergi. » (S. Aug. *serm.* 14. *de Verbis Domini* <sup>1</sup>.)

QUINTO : « Non perit unus ex his, pro quibus Christus mortuus est. Christus non perdit, quos emit sanguine. Proprio Filio suo non pepercit, sed pro nobis omnibus tradidit illum : pro nobis praedestinatis, justificatis, glorificatis; de quibus sequitur : *Quis accusabit adversus electos Dei?* » (S. August. *epist. ad Evodium*; *serm.* 8. *De S. Vincent.*; *tract.* 45. *in Joh.* <sup>2</sup>)

<sup>1</sup> Serm. 72. Appendix. Edit. Migne.

<sup>2</sup> Verba ad litteram sic scribuntur in locis praecitatis : « Multi in cruce Christi gloriantes et ab eadem via non recedentes... quia non perit unus ex illis, pro quibus mortuus est (Joh. 17, 12), ad eandem perveniant aeternitatem, veritatem, caritatem, id est, ad stabilem, certam, plenamque felicitatem, ubi manentibus, videntibus, amantibus sunt cuncta perspicua. » S. Aug. *Epist. ad Evodium*. *Epist.* 169. edit. Migne.

« Quando perit qui sanguine Christi redemptus est? Potens homo non potest perdere quod emit auro suo, et Christus perdit quod emit



SEXTO : « Omnis absoluta voluntas Christi, etiam humana, fuit impleta, quia fuit Deo conformis; et per consequens, omnis ejus oratio fuit exaudita... Dominus non oravit pro crucifixoribus, neque etiam pro omnibus, qui erant credituri in eum, sed pro his solum, qui erant praedestinati, ut per Ipsum vitam consequerentur aeternam. » (D. Thomas III. q. 21. a. 4. et ad 2.)

SEPTIMO : « Cum rectissime dicatur Salvator pro totius mundi redemptione crucifixus propter veram humanae naturae susceptionem et propter communem in primo homine omnium perditionem, potest tamen dici pro his tantum crucifixus, quibus mors ipsius profuit. Dicit enim Evangelista, quia Jesus moriturus erat pro gente, et non tantum pro gente, sed etiam ut filios Dei dispersos congregaret in unum » (S. Prosper; *Respons. ad capita Gallorum*).

OCTAVO : « Subventum est igitur infirmitati voluntatis humanae, ut divina gratia indeclinabiliter et insuperabiliter ageretur. Deo volenti salvum facere hominem, nullum resistit arbitrium. » (S. August. *De corrept. et grat.* cap. 12. et cap. 14.)

Duplex itaque voluntas Dei : antecedens et consequens; conditionata et absoluta. Duplex ordo divinae sapientiae, nempe : secundum generalem providentiam et secundum praedestinationem. Duplex gratia : sufficiens et efficax; dans posse salvari et largiens ipsam actualitatem salutis per justificationem, per usum gratiae justificantis, per in bono perseverantiam ac per glorificationem.

sanguine suo? » S. Aug. serm. in Natali martyris Vincentii. Serm. 274. edit. Migne.

« Novit Dominus qui sunt ejus. Novit praescitos, novit praedestinos... Adde adhuc : *Qui proprio Filio suo non pepercit, sed pro nobis omnibus tradidit eum : quomodo non et cum illo omnia nobis donavit?* Sed quibus nobis? Praescitis, praedestinis, justificatis, glorificatis, de quibus sequitur : *Quis accusabit adversus electos Dei?* (Rom. 8, 29 et ss.) » S. Aug. Tract. 45. in Johan.

## IV

**Duplex quidem ordo hominum in salutem.**

D. Thomas, *De Verit.* q. 6. a. 1. sic declarat differentiam inter utrumque : « Praedestinatio quantum ad duo a providentia differt : providentia enim dicit universaliter ordinationem in finem; unde se extendit ad omnia, quae a Deo in finem aliquem ordinantur, sive sint rationabilia sive irrationabilia, sive bona sive mala. Praedestinatio autem respicit tantum illum finem, qui est principalis rationalis creaturae, utpote gloriam; et ideo praedestinatio non est nisi hominum et eorum, quae spectant ad salutem. Differt etiam alio modo. In qualibet enim ordinatione ad finem est duo considerare, sc. ipsum ordinem et exitum vel eventum ordinis. Non enim omnia, quae ad finem ordinantur, finem consequuntur. Providentia ergo *ordinem* in finem respicit tantum; unde per Dei providentiam omnes homines ad beatitudinem ordinantur. Sed praedestinatio respicit etiam *exitum* vel eventum ordinis; unde non est nisi eorum, qui gloriam consequuntur. Sicut igitur se habet providentia ad impositionem ordinis, ita se habet praedestinatio ad ordinis exitum vel eventum. Quod enim aliqui finem gloriae consequuntur, non est principaliter ex propriis viribus, sed ex auxilio gratiae divinitus datae. » Unde :

1<sup>o</sup> Ordo providentiae claudit in amplitudine sui ambitus ordinem praedestinationis. Etenim, ut D. Thomas docet I. q. 22. a. 1. et q. 23. a. 1. : « Ipsa igitur ratio ordinis rerum in finem providentia in Deo nominatur... Proprie loquendo, rationalis creatura, quae est capax vitae aeternae, perducitur in ipsam quasi a Deo transmissa... Unde ratio praedictae transmissionis creaturae rationalis in finem vitae aeternae, praedestinatio nominatur... Et sic patet, quod praedestinatio, quantum ad objecta, est quaedam pars providentiae. »

2<sup>o</sup> Tam ordo generalis providentiae quam ordo specialis

praedestinationis est certus atque infallibilis; et D. Thomas ostendit I. q. 23. a. 6. praedestinationem certissime et infallibiliter consequi suum effectum ex eo, quod praedestinatio est pars providentiae; cujus quidem ordinem esse infallibilem ostenderat jam q. 22. a. 4.

3<sup>o</sup> Attamen sub praedestinatione nullus cadit ordo etiam in particulari, qui deficiat a proprio eventu; quoniam sub praedestinatione cadit et *ordo* et *eventus* ordinis. Sub providentia autem cadunt ordines simul cum eventu futuri, et ordines deficientes a proprio eventu; quia talis ordo, deficiens a proprio eventu, non est provisus a Deo quoad *eventum* illius ordinis deficientis *proprium*. Unde :

4<sup>o</sup> Cum per ordinem providentiae tantum ordinantur homines a Deo ad beatitudinem, providentia respicit *ordinem* in finem, at non *exitum* vel eventum ordinis. Nec tamen intelligendum est, quod intentio Dei frustrari possit. Deus enim nihil facit frustra, nec Dei intentio umquam frustratur. (I. q. 23. a. 6. ad 1.; *De Verit.* q. 23. a. 2.) Cum vero per ordinem praedestinationis ordinantur homines ad beatitudinem, providentia ista specialis respicit et ordinem in finem et praeterea ipsius ordinis exitum seu eventum.

5<sup>o</sup> Numerus praedestinatorum est certus Deo, non solum per modum cognitionis, sed etiam per modum cujusdam principalis praefinitionis. Non sic autem omnino est de numero reproborum, qui videntur esse praeordinati a Deo in bonum electorum, quibus omnia cooperantur in bonum. Sed quia ipse actus liberi arbitrii creati reducitur in Deum sicut in causam, necesse est ut ea, quae ex libero arbitrio fiunt, divinae providentiae subdantur. Providentia enim hominis continetur sub providentia Dei, sicut causa particularis sub causa universali, respectu cujus ipsamet particularis causa habet rationem effectus. (I. q. 2. a. 3. ad 2.; q. 22. a. 2. ad 4.; q. 23. a. 7.)

6<sup>o</sup> Hominum autem justorum quodam excellentiori modo Deus habet providentiam quam impiorum, in quantum non permittit contra eos evenire aliquid, quod finaliter impediat



salutem eorum. Nam diligentibus Deum omnia cooperantur in bonum, his, qui secundum propositum vocati sunt Sancti, ut dicitur Rom. 8, 28.

---

## V

**Duplex etiam voluntas Dei.**

D. Thomas loco supra citato, postquam distinxit inter ordinem ad beatitudinem secundum providentiam et secundum praedestinationem, adjungit : « Praedestinatio secundum rationem praesupponit *dilectionem*, per quam Deus vult salutem alicujus. Unde sicut prudens non ordinat in finem nisi in quantum est temperatus vel justus, ita Deus non praedestinat nisi in quantum est diligens. Praeexigitur etiam *electio*, per quam ille, qui in finem infallibiliter dirigitur, ab aliis separatur, qui non hoc modo in finem diriguntur. Haec autem separatio non est propter diversitatem aliquam inventam in his, qui separantur, quae posset ad amorem incitare; quia antequam nati essent aut aliquid boni egissent aut mali, dictum est : *Jacob dilexi, Esau autem odio habui*, ut dicitur Rom. 9, 13. Et ideo praedestinatio praesupponit electionem et dilectionem. Ad praedestinationem vero duo sequuntur, sc. *consecutio finis*, qui est glorificatio, et *collatio auxilii* ad consequendum finem, quod est appositio gratiae; quod ad vocationem pertinet. Unde et praedestinationis duo effectus assignantur, sc. gratia et gloria. » *De Verit.* q. 6. a. 1.

Quam quidem doctrinam complet et confirmat Angelicus Doctor passim ubique in suis scriptis, et praesertim in Summa Theologica I. q. 23. a. 3. ad 1. declarans illa verba Sap. 11, 25 : « Diligis omnia quae sunt, et nihil odisti eorum quae fecisti », ait : « Deus omnes homines diligit, et etiam omnes creaturas, in quantum omnibus vult aliquod bonum; non tamen quodcumque bonum vult omnibus. In quantum igitur quibusdam non vult hoc bonum, quod est vita aeterna,

dicatur eos habere odio vel reprobare. » Et ibid. a. 4. ad 1. : « Si consideretur communicatio bonitatis divinae in comuni, *absque electione* bonitatem suam communicat... Sed si consideretur communicatio istius vel illius boni, *non absque electione* tribuit; quia quaedam bona dat aliquibus, quae non dat aliis. Et sic in collatione gratiae et gloriae attenditur electio. » Et ibid. ad 3. : « Deus vult omnes homines salvos fieri, antecedenter, quod non est simpliciter velle, sed secundum quid; non autem consequenter, quod est simpliciter velle. » Ac tandem q. 24. a. 2. ad 3. : « Dicendum, quod vita gratiae non habet rationem finis, sed rationem ejus quod est ad finem. Unde ad vitam gratiae non dicitur aliquis eligi, nisi in quantum vita gratiae ordinatur ad gloriam. Et propter hoc illi, qui habent gratiam et excidunt a gloria, non dicuntur esse electi simpliciter, sed secundum quid. » Unde :

1<sup>o</sup> Ordo hominum in beatitudinem juxta generalem providentiam praesupponit etiam in Deo dilectionem et electionem quandam *secundum quid*. Ordo autem hominum in beatitudinem secundum praedestinationem praesupponit in Deo dilectionem et electionem *simpliciter*.

2<sup>o</sup> Electio atque dilectio *secundum quid* pertinent ad voluntatem antecedentem; altera autem dilectio atque electio superaddit voluntatem consequentem.

3<sup>o</sup> Per voluntatem antecedentem homines non discernuntur, quoniam per illam omnes homines ordinantur in beatitudinem, et sic vult Deus omnes homines salvos fieri. Per voluntatem consequentem fit separatio bonorum a malis, non propter diversitatem aliquam inventam in his, qui separantur, sed ex sola Dei misericordia, a qua oriuntur ea ipsa bona, quibus boni a malis discernuntur.

4<sup>o</sup> Voluntas antecedens et voluntas consequens nullam habent distinctionem ex parte actus divinae voluntatis, sed ex parte volitorum. *De Verit.* q. 23. a. 2. ad 1. : « In voluntate divina nec ordo nec distinctio est ex parte actus voluntatis, sed solummodo ex parte volitorum. » Etenim ex parte actus divinae voluntatis nec praedestinatio ponitur pars providen-

liae, quoniam actus divinus nec partis nec totius rationem in se habet; sed quantum ad objecta pars ponitur providentiae.

5<sup>o</sup> Voluntas antecedens et consequens habet distinctionem ex parte volitorum, maxime per comparisonem ad non praedestinos, propter diversa in uno et eodem volito reperta. Deus semper vult id, quod est bonum, et semper adimplet in sua creatura id bonitatis, cujus est capax. Ex parte sua dat naturam, dat quoque gratuita communia, et inter haec gratuita adhuc confert aliqua specialia quibusdam, qui tamen non salvantur, nempe vitam gratiae sanctificantis. At « conditiones, quibus homo efficitur deordinatus a consecutione finis, sub quibus existentem Deus eum salvum esse non vult, sunt ex ipso homine; et ideo totum quod sequitur, sibi imputatur ad culpam. » (*I. Sent.* dist. 46. a. 1. ad 5.)

6<sup>o</sup> Per comparisonem autem ad praedestinos voluntas antecedens et consequens coincidunt simpliciter quoad principale volitum, quod est *hominem salvum fieri*. Deus enim vult praedestinos salvari tam antecedenti quam consequenti voluntate: et in quantum dat naturam, et in quantum dat gratuita communia, et in quantum dat gratuita specialia. Attamen accipitur etiam per comparisonem ad illos distinctio divinae voluntatis in antecedentem et consequentem; quia praedestinatio non includit solam voluntatem antecedentem, qua Deus vult omnes homines salvos fieri, sic enim sequeretur, quod omnes essent praedestinati; sed etiam « includit voluntatem consequentem, quae respicit aliquo modo id, quod est ex parte nostra, non quidem sicut inclinans divinam voluntatem ad volendum, sed sicut id, ad cuius productionem divina voluntas gratiam ordinat; vel etiam sicut id, quod ad gratiam quodammodo disponit et gloriam meretur... Hoc ipsum, quod est velle accipere gratiam, est nobis ex praedestinatione divina. » (*De Verit.* q. 6. a. 2. ad 2. et ad 11.)

---



## VI

**Duplex igitur gratia.**

Quarum altera est effectus voluntatis, qua Deus vult omnes homines salvos fieri; altera vero voluntatis, qua Deus decrevit dilectos, electos et praedestinos salvari. Quarum prima dat *posse* pervenire ad finem vitae aeternae, et alia confert, simul cum potestate perveniendi, ipsummet infallibiliter perveniendi *actum*. Sicut enim in ordine praedestinationis includitur quidquid est perfectionis et bonitatis in ordine generalis providentiae, ita in gratia, quae dat actualitatem boni operis salutaris, includitur facultas tale opus operandi; at non e converso. Praedestinationis effectus sunt gratia et gloria; providentiae autem generalis effectus non est gloria, sed qualiscumque participatio gratiae, per cujus appositionem confertur diversimode potentia gloriam assequendi. Gratia autem, quae non assequitur gloriam, cujus est quaedam inchoatio, etsi magna, etsi in suo genere perfecta, non attingit ad summum gradum efficaciae; non est efficax simpliciter.

Dilectis igitur et electis et praedestinis datur gratia efficax simpliciter, confertur potestas simul cum effectu, posse et agere. Dilectis secundum quid, sed non praedestinis, etsi concedatur potestas, effectus tamen totalis, ad quem praedicta potestas ordinatur, de facto non confertur. Cum voluntate antecedenti salvandi omnes homines adest in Deo voluntas permittendi aliquos cadere in culpam, qua a fine vitae aeternae deficiunt. Cum voluntate consequenti salvandi electos, licet adesse possit voluntas permittendi illos in culpam cadere, non tamen voluntas permittendi ipsos in culpa permanere. Praedestinatio est causa et ejus quod expectatur in futura vita a praedestinis, sc. gloriae, et ejus quod percipitur in praesenti, sc. gratiae. Praedestinatio enim includit voluntatem conferendi gratiam et gloriam.

Aliter se habet reprobatio in causando quam praedestinatio. Reprobatio non est causa ejus quod est in praesenti, sc. culpa, sed est causa derelictionis Dei. Et tamen est causa ejus quod redditur in futuro, sc. poenae aeternae. Sed culpa provenit ex libero arbitrio ejus, qui reprobat et a gratia deseritur. Et secundum hoc verificatur dictum Prophetiae sc. : « Perditio tua, Israel. » Reprobatio Dei non subtrahit aliquid de potentia reprobat. (I. q. 23. a. 3.)

Si enim voluerimus doctrinam S. Augustini et D. Thomae in forma propositionum exprimere, sic dicere oporteret :

Propositio I. Quando Deus vult, voluntate *antecedenti*, salvare animam, quocumque tempore, quocumque loco, effectus indubitabilis non sequitur voluntatem Dei. Quando autem Deus vult voluntate *consequenti*, effectus indubitabilis sequitur voluntatem Dei.

II. Quando Deus vult voluntate antecedenti animam salvam facere et eam tangit interiori gratiae *sufficientis* manu, voluntas humana ei resistere valet. Quando vero Deus vult voluntate consequenti animam salvam facere et eam tangit interiori gratiae *efficacis* manu, voluntas humana non ei resistit, etsi possit ex parte vertibilitatis liberi arbitrii ei resistere.

III. Omnes, quos Deus vult voluntate antecedenti salvare per Christum, non infallibiliter salvantur. Omnes vero, quos Deus vult voluntate consequenti salvare per Christum, salvantur, et quidem infallibiliter.

IV. Desideria Christi, quae fuerunt voluntati antecedenti Dei conformia, non semper habent suum effectum. Desideria vero Christi, conformia ad voluntatem Dei consequentem, semper suum effectum habent juxta illud Joh. 11, 41-42 : « Jesus autem, elevatis sursum oculis, dixit : Pater, gratias ago tibi, quoniam audisti me. Ego autem sciebam quia semper me audis... » Unde D. Thomas *Hebr.* 5. lect. 1. : « Dicendum est, quod Christus in omnibus, quae voluit fieri, fuit exauditus. Ipse autem secundum appetitum sensualitatis et secundum voluntatem, in quantum est quidam appetitus naturalis, refugiebat mortem; et quantum ad hoc orabat,

ut ostenderet se verum hominem. Sed voluntate consequenti rationem deliberatam volebat mori. Unde Math. 26, 39 dicit : *Verumtamen non sicut ego volo, sed sicut tu vis*. Item nolebat, quod ignosceretur omnibus, sed illis tantum, qui crediderunt. Et multi postea conversi sunt. » *III. Sent.* dist. 17. a. 3. q. 4. ad 2. : « Oratio Christi, quae fuit secundum hanc (consequentem) voluntatem, fuit exaudita; non autem quae fuit secundum primam (antecedentem); et ideo dicit Hieronymus, quod Christus exauditus est pro praedestinatis, non autem pro non praedestinatis. »

V. Christus morte sua liberavit quoad *sufficientiam* de manu exterminatoris non modo electos, sed omnes prorsus homines; quoad *efficaciam* autem illos, qui per caritatem cum Christo conjuncti vim passionis suscipiunt. *III. Sent.* dist. 19. q. 1. a. 2. : « Potestatem igitur diaboli, qua victos detinet, ex toto amovit quantum ad sufficientiam, licet non quantum ad efficaciam, nisi in illis, qui vim passionis suscipiunt per fidem et caritatem et sacramenta. »

VI. Quando Jesus se peccatori videndum exhibet lumine suae gratiae *sufficientis* dumtaxat, non oportet, ut peccator se dedat, accurrat et convertatur. Quando autem Jesus se peccatori videndum exhibet lumine salutari suae gratiae *efficacis*, tunc peccator, licet quantumcumque a salute remotus, oportet, non necessitate coactionis, sed necessitate infallibilitatis, ut se dedat libere, et libere accurrat, et exultet libere in Deo Salvatori suo, juxta illud Act. Ap. cap. 9. : « Saulus autem spirans minarum et caedis in discipulos Domini... Subito circumfulsit eum lux de coelo. Et cadens in terram audivit vocem dicentem sibi : Saule, Saule, quid me persequeris? Qui dixit : Quis es, Domine? Et ille : Ego sum Jesus, quem tu persequeris. ... Et tremens ac stupens dixit : Domine, quid me vis facere? » Et cap. 26. : « Dominus autem dixit : Ego sum Jesus, quem tu persequeris. Sed exsurge et sta super pedes tuos; ad hoc enim apparui tibi, ut constituam te ministrum et testem eorum, quae vidisti. »

VII. Datur ergo gratia Jesu Christi, quae a nullo corde




respuitur, et cui nihil resistit; nam proprius hujusmodi gratiae effectus est ipsammet duritiam cordis auferre, et ipsius resistentiae obstaculum remove.

Haec est doctrina S. Augustini, de quo Romanus Pontifex Hormisdas ad Possessorem in hanc sententiam scripsit : « De arbitrio libero et gratia Dei, quid Romana, hoc est Catholica sequatur et servet Ecclesia, ex variis libris B. Augustini, et maxime ad Prosperum et Hilarium, abunde cognosci potest. » Haec etiam est doctrina D. Thomae, de quo Leo XIII. in *Encycl. Aeterni Patris* : « Inter scholasticos doctores, omnium princeps et magister, longe eminet Thomas Aquinas, qui veteres doctores sacros, quia summe veneratus est, ideo intellectum omnium quodammodo sortitus est. »

Concludamus igitur cum Angelico Doctore, qui supra Math. cap. 11. et 19. sic eloquitur : « Artifex potest assignare causam, quare lapides quosdam in fundamento, quosdam superius posuit. Sed quod hunc posuerit hic, alium ibi, non est alia causa nisi voluntas sua. Sic quod Dominus aliquos salvet, hoc est ad suam misericordiam; quod hos damnet, ad justitiam. Sed quare circa illum sic misericorditer agit quam circa alium : hoc solum pertinet ad suam voluntatem. Unde Rom. 9, 18 : *Cujus vult, miseretur; et quem vult, indurat.* Unde sic facit propter beneplacitum. *Ita, Pater, quia sic placitum est ante te.* Quis poterit salvus esse? Aspiciens autem Jesus dixit : Apud homines hoc impossibile est; apud Deum autem omnia suntabilia. Sed quid est, quod dicit? Videtur enim, quod perit liberum arbitrium, si impossibile est apud homines. Verum est, quod homo a se habet, ut possit peccare; sed resurgere et opera salutis facere, hoc non habet a se sine auxilio gratiae Dei. Ipse enim Deus est, qui ita potest. Rom. 9, 6 : *Non est currentis, nec volentis, sed miserentis est Dei.* Unde Job 42, 7 : *Scio, quod omnia potes, et apud te non est impossibile.* Unde secundum potentiam humanam impossibile est hominem salvum fieri, quia potentia humana non immutat voluntatem; sed solius Dei est immutare eam, sicut habetur Philipp. 2, 13 : *Qui operatur in nobis velle et perficere.* »

Quam quidem doctrinam de physica motione, qua Deus immutat voluntatem, et de efficacia gratiae, cui nullus resistit, ita pulchre, bene, recte Cajetanus in suis Comment. supra Math. cap. 4. explicans illa verba : « Et procedens inde, vidit alios duos fratres » scribit : « Non est mirandum, quod isti et illi statim secuti fuerint Jesum ; quia interiori operatione Jesus movebat, motione non invitatoria, sed efficaci, corda eorum ad relinquendum omnia et sequendum Ipsum. Tali enim attractioni interni spiritus nullus umquam resistit ; nullus etiam resistet umquam, quia efficit voluntarium sectatorem, operarium, martyrem. »

Atque haec est illa gratia fortis, potens, invincibilis, efficax, ad quam videntur referri verba Leonis XIII. in Encycl. *Satis cognitum* seu *De Unitate Ecclesiae*, ubi sub fine de Deo habet : « Qui maxime potest animos hominum permovere et, unde vult et quo vult, impellere. »



## CAPUT TERTIUM

### De intrinseca divinae gratiae efficacia.

#### I

#### PRAENOTANDA

PRIMO : **Doctrina S. Augustini et D. Thomae circa efficaciam gratiae.** — Doctrina S. Augustini ac D. Thomae circa gratiam Dei et liberum hominis arbitrium est « argentum igne examinatum, probatum terrae, purgatum septuplum » ; eloquia autem horum Ecclesiae Doctorum revera sunt « eloquia casta ». (Ps. 11.) In circuitu ambulant ex una parte, qui negant efficaciam divinae gratiae ante propriam liberi arbitrii determinationem ; ex alia vero, qui determinationem liberi arbitrii sub efficacia gratiae divinae inficiantur. A sinistris S. Augustini et D. Thomae, Jansenius ac Quesnellius ; post Jansenium et Quesnellium, Calvinus et Lutherus ; post Lutheranos, Manichaei. A dextris, Molina ; post Molinam, Semipelagiani ; deinde Pelagius et Origenes. Ecclesia Romana, damnans propositiones Jansenii, Baji ac Quesnelli circa hanc materiam, jam occludit viam erroris ex sinistro latere, ne quis abutens doctrina Augustini abeat in errores Lutheranorum. Salva fide catholica non videtur posse fieri, ut quis neget esse *gratiam ex se sufficientem*. Via autem erroris ex latere dextro satis firmiter clausa manet manu ipsius Augustini efficaciam divinae gratiae propugnantis contra insultus Pelagianorum atque contra quaecumque doctrinam plumbo Pelagianismi vermiculatam. Attamen non esset fortasse superfluum auctoritative etiam talem viam, ad Pelagianismum respicientem, quadris lapidibus



claudere, id est, damnando propositiones similiter oppositas doctrinae S. Augustini et D. Thomae, et parallelas ipsis propositionibus Jansenii ac Quesnelli jure merito damnatis <sup>1</sup>. Interim sanctam Augustini ac D. Thomae doctrinam,

<sup>1</sup> Ita Bossuet : « La saine doctrine, également opposée à Jansenius et à Molina. La grâce molinistique, c'est-à-dire la grâce d'équilibre et versatile manifestement rejetable comme contraire à saint Augustin et à la vérité. » *Revue Bossuet*, 1<sup>re</sup> année n° 3, 1900.

Verba haec desumpta sunt ex adnotationibus, quas Bossuet apposuit *Generali Praefationi* « in novam editionem operum S. Augustini a Benedictinis adornatam ». Ista tamen *Generalis Praefatio*, quam Mabillon scripserat atque ad Bossuet, ut illam inspiceret, miserat, manebat adhuc inedita quoad maximam ac principaliorum textus partem, quousque publici juris facta fuit in opusculo, cui titulus : « *Documents pour servir à l'histoire religieuse des XVII<sup>me</sup> et XVIII<sup>me</sup> siècles. BOSSUET ET LE JANSÉNISME. Notices historiques publiées par A. M. P. Ingold. Edition augmentée de deux appendices sur Bossuet et l'édition Bénédictine de saint Augustin et sur le Sacré-Cœur d'après Bossuet. Paris 1904.* » Ex adnotationibus a Bossuet apposis, prima sic se habet : « Le but de ce discours doit être de faire paraître dans une telle évidence la saine doctrine, également opposée à Jansenius et à Molina, que la calomnie demeure confondue et sans réplique, et la grâce molinistique, c'est-à-dire la grâce d'équilibre et versatile manifestement rejetable comme contraire à saint Augustin et à la vérité. C'est aussi ce qui paraît dans cet écrit où l'on pose très bien les principes ; mais afin de ne laisser aucun sujet de plainte et de fermer la bouche aux contredisants, les remarques suivantes m'ont paru nécessaires. »

Illam vero principia, quae Bossuet laudat atque approbat, quaeque Mabillon attulerat ad discernendam sanam S. Augustini doctrinam, cui ex aequo licet per diversam viam tam Jansenii quam Molinae doctrina opponitur, sic ad litteram a Mabillon fuerunt conscripta :

« Regula prima. » « *Apud Augustinum, maxime ab exorta Pelagiana haeresi, VERAE GRATIAE, GRATIAE PROPRIE DICTAE, item GRATIAE DEI, seu CHRISTI nomine, non alia passim* <sup>1</sup> *gratia quam efficax designatur.* »

« Regula secunda. » « *GRATIA SUFFICIENS sensu Thomistico probari potest ex Augustino ; at haec fere nunquam GRATIA, GRATIA DEI, GRATIA CHRISTI, appellatur, sed aliquando CARITAS, seu VOLUNTAS PARVA, MINOR, INVALIDA, IMPERFECTA.* »

<sup>1</sup> Bossuet adnotat : « Le mot de *passim* assure la règle et doit être remarqué. »

salva qua non licet rejicere gratiam quoque ex se efficacem, oportet nunc pro viribus ad gloriam ipsius divinae gratiae confidenter sustinere atque proclamare.

« Regula tertia. » « *Augustinus in hoc statu eas non agnovit gratias SUFFICIENTES actuales, quae reddantur EFFICACES ex sola determinatione liberae voluntatis absque alio potentiori adjutorio.* »

« Regula quarta. » « *Hic loquendi formula : PERSEVERARES SI VELLES, significat Augustinus voluntatis culpabilem defectum si quis non perseveret; at gratiae adjutorium affirmare non intendit, quod de aliis similibus formis dicendum.* »

« Regula quinta. » « *Etsi POSSIBILITATEM adimplendorum praeceptorum re ipsa admittat Augustinus, ob errorem tamen Pelagianorum magis institit GRATIAE EFFICACI, quae ipsa praecepta facit adimplere.* »

« Regula sexta. » « *Liberum arbitrium in homine lapso aequilibre ad bonum et malum, ad peccandum vel non peccandum, admittebant Pelagiani, negat Augustinus.* »

« Regula septima. » « *Secundum Augustinum neque gratiae invictissima et potentissima vis, neque peccandi quaedam necessitas, ex peccato, seclusa gratia, consequens, tollit libertatem, nec proinde vel meritum vel demeritum.* »

« Regula octava. » « *Voluntatem salvandi omnes homines in Deo non restringit Augustinus ad sola genera singulorum, seclusa voluntate magis generali de salute universorum*<sup>1</sup>. »

En regulas, quas Mabillon, Bossuet illas approbante ac plaudente, publici juris facere intendebat, atque operibus S. Augustini de novo in lucem edendis praefficiendas curabat, ut sana doctrina in hac de gratia materia discerni posset rectaque via omnibus pateret, a Molina sic ut a Jansenio aequaliter distans. Etenim Mabillon ex ipsis regulis evidenter comprobatis ad hanc quoque perveniebat conclusionem : « *Jam vero, quod attinet ad tertiam, quae Molinistarum est, sententiam, haec a diametro S. Augustini doctrinae repugnat.* » Quare autem octo supradictae regulae adeo sapienter a Mabillon conscriptae atque ex ipsiusmet S. Augustini doctrinae testimoniis in perspicuo positae, in *Praefatione Generali*, quae postea typis mandata est, non legantur, ad historiam pertinet inquirere, atque tale negotium oportet ut historicis relinquatur illustrandum.

<sup>1</sup> Bossuet adnotat : « Pour parler plus précisément contre les Jansénistes, il faudrait ici ajouter : *Ac praecipue justorum.* » Ac paulo post, adnotando verba textus a Mabillon conscripti, addit : « On avouera sans peine que saint Augustin dans ces ouvrages (ab exorta Pelagiana haeresi) insiste

SEGUNDO : Eritne haereticum asserere : 1<sup>o</sup> Nullam dari gratiam divinam ex se efficacem ; 2<sup>o</sup> Gratiam divinam ex se efficacem tollere aut diminuere liberum arbitrium ? — Melchior Cano VI. *De Locis Theol.* cap. 7. scribit ad nostrum propositum : « Huic quaestioni breviter respondemus. Nolumus hic nos Ecclesiae sententiam praevenire, sed si ad generale Concilium referatur, haereseos nota errori illi inuretur. Nec enim video, cur, quid ipse sentiam de hac re, non audeam dicere, quam eo melius cernere mihi videor, quod et eam proprius diligentiusque contemplor et sine affectu perturbationeque contemplor. Quod si in hoc erro, quod Romanae Sedis privilegia a Christo illi concessa et tueor et contradicentes haereseos nomine condemnandos esse credo, non solum tuto, sed libenter erro ; nec mihi errorem utilem, quo etiam delector, sine rationis praesertim vi extorqueri volo. Nam me non solum ratio ac disputatio impulit, ut ita crederem, sed nobilitas etiam summorum theologorum et auctoritas. »

Melchior Cano non erravit, sed prophetavit ; atque in primo concilio generali post Tridentinum Concilium, in quo praestantissimus theologus « verum certamen, spectante orbe, certavit, ubi, inquit, Patribus magnum lumen accendimus, tenebras adversariorum dispulimus, theologi visi sumus » (*XII. de Locis Theol.* cap. 12.) ; in Concilio inquam, generali primo, postquam aureum praeclarissimumque opus *De Locis* elaboratum fuit, haereseos nota errori, quem Cano fortiter rejiciebat, inusta est ; et tamquam dogma divinitus revelatum, fuit definitum : « Romanum Pontificem, cum ex Cathedra loquitur... per assistentiam divinam, ipsi in beato Petro promissam, ea infallibilitate pollere, qua Divinus Redemptor Ecclesiam suam in definienda doctrina de fide vel moribus instructam esse voluit ; ideoque ejusmodi Romani Pontificis definitiones ex sese, non autem ex consensu

principalement à la volonté conséquente ou absolue. Mais en même temps on trouvera à dire qu'on parle si généralement et qu'on omette tant d'endroits des sermons et des traités de (où) saint Augustin, même contre les Pélagiens, a reconnu une volonté générale antécédente. »

Ecclesiae, irreformabiles esse. » Conc. Vat. Const. dogm. *De Eccl. Christi*, sess. 4. cap. 4.

Ac dicimus Melchiorem Cano ad nostrum proprium propositum ita recte respondisse. Primo, quoniam Romani Pontificis infallibilitas fundatur supra assistentiam divinam ipsi in B. Petro promissam; et oportet, quod hujusmodi divina assistentia sit ab intrinseco suae naturae efficax. Deinde, quoniam S. Augustinus ex istamet divina assistentia in B. Petro promissa assumebat unum ex maximis argumentis ad ostendendam intrinsecam divinae gratiae efficaciam. Audiamus magnum gratiae Doctorem sic loquentem : « Si ad liberum arbitrium hominis, quod non secundum Dei gratiam, sed contra eam defendis, pertinere dicis, ut perseveret in bono quisque vel non perseveret, non Deo donante, si perseveret, sed humana voluntate faciente, quid moliturus es contra verba dicentis : *Ego rogavi pro te, Petre, ne deficiat fides tua?* (Luc. 22, 32) An audebis dicere, etiam rogante Christo ne deficeret fides Petri, defecturam fuisse, si Petrus voluisset, hoc est, si eam usque in finem perseverare noluisset? Quasi aliud Petrus ullo modo vellet quam pro illo Christus rogasset ut vellet. Nam quis ignorat tunc fuisse perituram fidem, si ea, qua fidelis erat, voluntas ipsa deficeret? Sed quia praeparatur voluntas a Domino (Prov. cap. 8.), ideo pro illo Christi non potest esse inanis oratio. Quando rogavit ergo, ne fides ejus deficeret, quid aliud rogavit, nisi ut haberet in fide liberriam, fortissimam, invictissimam, perseverantissimam voluntatem? Ecce quemadmodum secundum gratiam Dei, non contra eam, libertas defenditur voluntatis. Voluntas quippe humana non libertate consequitur gratiam, sed gratia potius libertatem, et, ut perseveret, delectabilem perpetuitatem et insuperabilem fortitudinem. » Ita Augustinus *De corrept. et grat.* cap. 8. Unde simul patet esse doctrinam catholicam : 1<sup>o</sup> aliquam dari divinam motionem seu gratiam actualem ex se efficacem; 2<sup>o</sup> gratiam ex se efficacem non tollere nec minuere, sed conservare, augere ac perficere humanam libertatem.



**TERTIO : Determinatur sensus quaestionis.** — Cum ergo gratia efficax sit illa gratia, quae de facto semper et infallibiliter boni operis salutaris habeat effectum, undenam infallibilis haec conjunctio sive effectus intenti assecutio desumenda erit? Diversitas, ratione cujus gratia divina convenienter dividitur in sufficientem et efficacem, tenetne se ex parte ipsius gratiae actualis in esse principii, vel solum oritur ex parte effectus seu consensus liberi arbitrii? Consentitne liberum hominis arbitrium Deo moventi illud ad opus salutare, quia divina motio ex se est efficax; vel e contra, gratia divina dicitur efficax et a gratia pure sufficienti distinguitur ratione effectus subsequentis, quia sc. liberum arbitrium praebuit consensum? Necessitas infallibilitatis in nostra salute operanda provenitne a nostro libero arbitrio sicut a moto, vel est a Deo sicut a movente? En punctum controversiae inter S. Augustinum ac D. Thomam, atque inter Molinam et Suarez.

**QUARTO : Undenam oporteat quaestionem dilucidare ac definire.** — Quaestio dilucidanda est atque definienda :

- 1º Ex ipsa S. Scriptura ;
  - 2º Ex doctrina S. Augustini ;
  - 3º Ex doctrina Conciliorum ;
  - 4º Ex doctrina theologica D. Thomae ;
  - 5º Ex doctrina philosophica D. Thomae circa Deum ut est Primus Motor et Prima Causa efficiens ;
  - 6º Ex doctrina philosophica D. Thomae circa causas secundas, quae sub applicatione Causae Primae agunt instrumentaliter ;
  - 7º Ex ipsa natura physicae praemotionis, de qua per tria subsequencia capita seorsum ex professo agetur.
-

## II

## CONCLUSIO

Gratia actualis seu gratuita motio, qua Deus movet nos ad opus salutare, id est, ad volendum et agendum bonum in ordine ad vitam aeternam, est efficax ex se, ab intrinseco sui, in ratione esse principii : hoc est, habet efficaciam, non ex libero arbitrio hominis sicut a moto, sed a solo Deo ut a movente <sup>1</sup>.

## Argumenta ex ipsa Sacra Scriptura.

Arg. 1<sup>um</sup>. — Atque primum argumentum oportet audire ab ore Domini nostri Jesu Christi. Joh. 10, 27-29 : « Oves meae vocem meam audiunt; et ego cognosco eas, et sequuntur me. Et ego vitam aeternam do eis, et non peribunt in aeternum, et non rapiet eas quisquam de manu mea. Pater meus, quod dedit mihi, majus omnibus est; et nemo potest rapere de manu Patris mei. »

Quae verba declarans S. Augustinus *tract. 48. in Joh.* cap. 10. ait : « Estote oves. Oves credendo sunt; oves pastorem sequendo sunt; oves Redemptorem non contemnendo sunt; oves per ostium intrando sunt; oves vita aeterna perfruendo sunt... Ingressi sumus credendo, egredimur moriendo. Sed quomodo per ostium fidei ingressi sumus, sic

<sup>1</sup> Quotiescumque asseratur gratiam actualem esse ex se vel ex natura sua efficacem, semper venit intelligendus ordo seu relatio ad ipsum Deum moventem, ex cujus divina voluntate oritur tota gratiae efficacia. Quod jam P. LEMOS ipse, ut quaecumque minus rectam interpretationem excluderet ac praeveniret, semel atque iterum admonuit disp. 3. coram Paulo V. et *Panoplia* lib. 4. part. 2. tract. 2. cap. 9. In illa disputatione, quae fuit quadragesima Congregatio *de Auxiliis* habita 26. octob. 1605, iterum de praedeterminatione physica disputatum est, quaesitumque : *Num in Scriptura Sacra fundari possit?*

fideles de corpore exeamus; sic enim per ipsum ostium egredimur, ut pascua invenire possimus. Bona pascua vita aeterna dicitur; ibi nulla herba arescit, totum viret, totum viget..... De illis autem ovibus, de quibus dicit Apostolus : Novit Dominus qui sunt ejus (II Tim. 2, 19) et quos prae-scivit ipsos et praedestinavit; quos autem vocavit, illos et justificavit; quos autem justificavit, ipsos et glorificavit (Rom. 8, 10) : de ovibus istis nec lupus rapit, nec fur tollit, nec latro interficit. Et hoc est quod ait : Non rapiet eas quisquam de manu mea. »

Similiter D. Thomas in *Joh.* 10. lect. 5. : « Hoc enim ipsum, quod credimus, est nobis a Deo. Philipp. 1, 29 : *Vobis datum est non solum ut in ipsum credatis, sed etiam ut pro illo patiamini.* Eph. 2, 8 : *Gratia salvati estis et non ex vobis : Dei donum est.* Quod quidem nulli datur nisi cui praeeparatum est ab aeterno; et ideo illi soli credunt in ipsum, qui ad hoc ordinati sunt a Deo per aeternam praedestinationem. Act. Ap. 13, 48 : *Crediderunt quotquot praedesignati erant ad vitam aeternam.* Et ibid. 15, 11 : *Per gratiam Domini nostri Jesu Christi credimus salvari.....* Et ego cognosco eas, id est, diligo et approbo. I Tim. 2, 19 : *Novit Dominus qui sunt ejus.* Quasi dicat : Hoc ipsum, quod me audiunt, est per hoc, quod ego eas cognosco, ab aeterno eligendo. »

Ecce igitur quomodo efficacia divinae gratiae pertinet ad ordinem specialem praedestinationis ac descendit ab omnipotentia Dei, a voluntate Dei absoluta, decretoria ac consequente. Hoc, quod credamus veniendo ad Christum; hoc, quod praeceptis Christi obediamus; hoc, quod justificemur, quod perseveremus et quod glorificemur, hoc totum est « per hoc, quod ego eas cognosco, ab aeterno eligendo. » En fons, ex quo emanat efficacia divinae gratiae : dilectio et electio Dei. Omnes enim praedesignati sunt electi et dilecti. (I. q. 23. a. 4.) Et sic in collatione gratiae et gloriae attenditur dilectio.

Arg. 2<sup>um</sup>. — Argumentum alterum : a) Esther 13, 9-11 : « Domine, Domine, Rex omnipotens! In ditione enim tua

cuncta sunt posita, et non est, qui possit tuae resistere voluntati, si decreveris salvare Israël. Tu fecisti coelum et terram, et quidquid coeli ambitu continetur. Dominus omnium es; nec est qui resistat Majestati tuae. » *b)* Sap. 11, 22-24 : « Multum enim valere tibi soli supererat semper, et virtuti brachii tui quis resistet? Quoniam tamquam momentum staterae, sic est ante te orbis terrarum, et tamquam gutta roris antelucani, quae descendit in terram. Sed miseris omnium, quia omnia potes. » *c)* Is. 14, 27 : « Dominus enim exercituum decrevit : et quis poterit infirmare? Et manus ejus extenta, et quis avertet eam? » *d)* Prov. 21, 1 : « Cor regis in manu Domini; quocumque voluerit, inclinabit illud. » *e)* Rom. 9, 19 : « ... Voluntati enim ejus quis resistit? »

Quod explanans S. Augustinus *De grat. et lib. arb.* cap. 21. scribit : « Quis non ista judicia divina contremiscat, quibus agit Deus in cordibus etiam malorum hominum quidquid vult, reddens eis tamen secundum merita eorum? His et talibus testimoniis divinorum eloquiorum, quae omnia commemorare nimis longum est, satis, quantum existimo, manifestatur operari Deum in cordibus hominum ad inclinandas eorum voluntates quocumque voluerit.... Quid mirum est, si per Spiritum Sanctum operatur in cordibus electorum suorum bona, qui operatus est ut ipsa corda essent ex malis bona? » Et D. Thomas in Is. cap. 14. : « Hic ostendit divini propositi stabilimentum. Et quantum ad decretum sapientiae : *decrevit*. Et quantum ad expletionem potentiae : *et manus ejus extenta, et quis avertet eam?* » Et Rom. 9. lect. 4. : « Nihil autem in hominis potestate esse videtur secundum praedicta, quibus omnia divinae voluntati videntur adscribi, cui resisti non potest. Unde sequitur : *Voluntati enim ejus quis resistit?* quasi diceret : *Nullus*. Esther 13, 9 : *Non est qui tuae possit resistere voluntati*. Et haec videtur esse intentio Apostoli. »

Igitur impossibile est coexistere simul voluntatem Dei absolutam inclinantem liberum arbitrium hominis ad opus salutare, et liberi arbitrii resistentiam voluntati Dei mo-



ventis. Unde D. Thomas I-II. q. 10. a. 4. ad 3. : « Si Deus movet voluntatem ad aliquid, impossibile est huic positioni, quod voluntas ad illud non moveatur; non tamen est impossibile simpliciter. » Haec ergo sunt impossibilia, nempe : *Deus vult istum justificari, et iste non justificatur; Deus vult istum uti habitibus gratiae et caritatis, et iste non utitur; Deus vult istum perseverare usque in finem, et iste non perseverat.* Unde in sensu composito impotentia resistendi Deo moventi per grātam efficacem designatur manifeste in Sacris Litteris <sup>1</sup>.

Arg. 3<sup>um</sup>. — Jer. 31, 18-19 : « Converte me, et convertar, quia tu Dominus Deus meus. Postquam enim convertisti me, egi poenitentiam. » Ezech. 11, 19-20 : « Et dabo eis cor unum et spiritum novum tribuam in visceribus eorum; et auferam cor lapideum de carne eorum, et dabo eis cor carneum, ut in praeceptis meis ambulent et judicia mea custodiant, faciantque ea; et sint mihi in populum et ego sim eis in Deum. » Quod explicans S. Augustinus *De grat. et lib. arb.* cap. 16. scribit : « Certum est nos facere cum facimus; sed ille facit ut faciamus, praebendo vires efficacissimas voluntati, qui dixit : Faciam ut in justificationibus meis ambuletis et judicia mea observetis et faciatis. Cum dicit : Faciam ut faciatis, quid aliud dicit nisi : auferam a vobis cor lapideum unde non faciebatis, et dabo vobis cor carneum unde faciatis? Et hoc quid est nisi : auferam cor durum unde non faciebatis; et dabo cor obediens unde faciatis? Ille facit ut faciamus, cui dicit homo : Pone, Domine, custodiam ori meo. Hoc est enim dicere : Fac ut ponam custodiam ori meo; quod beneficium Dei jam fuerat consecutus, qui dixit : Posui ori meo custodiam. » (Ps. 38.) Et D. Thomas super Jer. cap. 11. : « Hic ponitur poenitentium susceptio. Secundo ponitur petitio : *Converte me et convertar.* Tertio assignatur petitionis ratio ex poenitentia, quam inchoavit : postquam enim convertisti me, infundendo gratiam. »

<sup>1</sup> Videatur D. Thomas circa distinctionem sensus compositi et sensus divisi : *De Pot.* q. 1. a. 5.; *De Verit.* q. 6. a. 4. ad 8.; q. 2. a. 12. ad 4.; I. q. 14. a. 13. ad 3. et q. 23. a. 6. ad 3.; I-II. q. 10. a. 4. ad 3.

Tales sunt characteres gratiae ab intrinseco efficacis : a) praebere vires efficacissimas voluntati ; b) auferre durtiam ipsam cordis ; c) dare cor obediens ; d) conferre executionem bonorum operum. Et sic ex ipsius gratiae infusione homo convertitur ad Deum per motum liberi arbitrii, qui est credere ac diligere ; ac conversus et vivificatus observat mandata Dei.

Arg. 4<sup>um</sup>. — Joh. 6, 66 : « Nemo potest venire ad me nisi fuerit ei datum a Patre meo. » I Cor. 4, 7 : « Quis enim te discernit ? Quid autem habes, quod non accepisti ? Si autem accepisti, quid gloriaris quasi non acceperis ? » Philipp. 2, 13 : « Deus est enim qui operatur in vobis et velle et perficere, pro bona voluntate. »

Quae omnia explicans S. Augustinus *De grat. et lib. arb.* cap. 5.-9. ait : « Nisi donum Dei esset ipsa ad Deum nostra conversio, non ei diceretur : *Deus virtutum, converte nos* (Ps. 89.) ; et *Deus, tu convertens vivificabis nos* ; et *Converte nos, Deus sanitarum nostrarum* (Ps. 84.) ; et hujusmodi alia, quae commemorare longum est. Nam et venire ad Christum, quid est aliud nisi ad eum credendo converti ? Et tamen ait : *Nemo potest venire ad me, nisi datum fuerit ei a Patre meo. Quis enim te discernit ? Quid autem habes quod non accepisti ? Si autem et accepisti, quid gloriaris quasi non acceperis ?* Prorsus talia cogitanti verissime dicitur : Dona sua coronat Deus, non merita tua ; si tibi a teipso, non ab illo sunt merita tua. Haec enim si talia sunt, mala sunt ; quae non coronat Deus. Si autem bona sunt, Dei dona sunt... Si ergo Dei dona sunt bona merita tua, non Deus coronat merita tua tamquam merita tua, sed tamquam dona sua. Numquid non corona bonis operibus redditur ? Sed quia ipsa bona opera Ille in bonis operatur, de quo dictum est : Deus est enim qui operatur in vobis et velle et operari, pro bona voluntate ; ideo dixit Psalmus : *Coronat te in miseratione et misericordia*, quia ejus miseratione bona operamur, quibus corona redditur. Non enim quia dixit : *Deus est enim qui operatur in vobis et velle et operari, pro bona voluntate*, ideo liberum arbitrium abs-

tulisse putandus est. Quod si ita esset, non superius dixisset : *Cum timore et tremore vestram ipsorum salutem operamini*. Quando enim jubentur, ut operentur, liberum eorum convenitur arbitrium ; sed ideo cum timore et tremore, ne sibi tribuendo quod bene operantur, de bonis tamquam suis extollantur operibus. Tamquam ergo interrogaretur Apostolus et diceretur ei : Quare dixisti : cum timore et tremore ? horum rationem reddit dicens : Deus est enim qui operatur in vobis. Si enim timetis et tremitis, non extollimini tamquam de vestris operibus bonis ; quia Deus est qui operatur in vobis.

Et D. Thomas *De Verit.* q. 28. a. 4. ad 2. : « Tractus ille non importat violentiam, sed operationem divinam, qua operatur in liberum arbitrium, vertendo id quocumque voluerit ; et sic illud, ad quod homo trahitur, aliquo modo ad liberum arbitrium pertinet. » Atque Joh. 6. lect. 5. omnia haec a radice declarantur, et efficacia divinae motionis ad propositum divinae voluntatis iterum refertur. Audiamus Angelicum Doctorem Sacras Litteras interpretantem et doctrinam S. Augustini usque ad ipsius perfectionem evolventem : « Est ergo humana facultasiciens ad veniendum ad Christum per fidem ; et ideo dicit : *Nemo potest venire ad me*. Secundo : divinum auxilium est efficax ad subveniendum ; unde subdit : *nisi Pater, qui misit me, traxerit eum*... Sed quia non solum revelatio exterior vel objectum virtutem attrahendi habet, sed etiam interior instinctus impellens et movens ad credendum, ideo trahit multos Pater ad Filium per instinctum divinae operationis moventis interius cor hominis ad credendum. Philipp. 2, 13 : *Deus est qui operatur in nobis velle et perficere*. Os. 2, 4 : *In funiculis Adam traham eos, in vinculis caritatis*. Prov. 21, 1 : *Cor regis in manu Domini ; quocumque voluerit inclinabit illud*....

Tertia quaestio est de hoc, quod dicit, quod nemo venire potest nisi tractus a Patre. Quia secundum hoc si nullus veniat ad Christum, non imputatur ei, sed ei, qui non trahit eos. Respondeo dicendum, quod vere nullus venire potest

nisi tractus a Patre ; nam sicut grave per naturam non potest per se sursum ferri nisi trahatur ab alio, ita cor humanum ex se ad inferiora tendens non potest sursum elevari nisi tractum. Si vero non elevatur, non est defectus ex parte trahentis, qui, quantum in se est, nulli deficit ; sed est propter impedimentum ejus, qui non trahitur... Deus autem omnibus ad trahendum manum porrigit, quantum in se est ; et quod plus est, non solum attrahit manum recipientis, sed etiam aversos a se convertit, secundum illud Thraen. cap. ult. v. 21 : *Converte nos, Domine, et convertemur* ; et Ps. 84, 7 secundum aliam litteram : *Deus, tu convertens vivificabis nos*. Ex quo ergo Deus paratus est dare omnibus gratiam et ad se trahere, non imputatur ei, si aliquis non accipiat, sed ei, qui non accipit. Quare autem non omnes aversos trahit, sed aliquos, licet sint omnes aequaliter aversi, ratio quidem in generali potest assignari, ut sc. in illis, qui non trahuntur, appareat et refulgeat ordo divinae justitiae ; in illis autem qui trahuntur, immensitas divinae misericordiae. Quare autem in speciali trahat hunc, et illum non trahat, non est ratio aliqua nisi beneplacitum voluntatis divinae. Unde dicit Augustinus : Quem trahat et quem non trahat, quare illum trahat et illum non trahat, noli velle judicare, si non vis errare. Sed accipe et intellige ; nondum traheris, ora ut traharis.

Hoc etiam ostendi potest per exemplum ; nam assignari potest ratio, quare artifex ponit aliquos lapides inferius et aliquos superius et aliquos ex lateribus, ex dispositione domus, cujus complementum hoc exigit. Sed quare hos lapides hic ponat et hos ibi, dependet a sua simplici voluntate. Et inde est, quod prima ratio dispositionis refertur ad voluntatem artificis.

Sic ergo Deus ad complementum universi quosdam quidem trahit, ut in eis appareat sua misericordia ; quosdam vero non trahit, ut ostendatur in eis sua justitia. Sed *hos* trahit, *illos* non trahit secundum suum beneplacitum voluntatis. Similiter etiam quare in Ecclesia aliquos fecit apostolos, alios martyres : ratio est propter Ecclesiae decorem



et complementum. Sed quare Petrum fecit apostolum, Stephanum martyrem, et Nicolaum confessorem : non est alia ratio nisi voluntas sua. Sic ergo patet humanae facultatis defectus et auxilii divini subsidium. » (Vide etiam I. q. 23. a. 5. ad 3.)

Haec est doctrina S. Pauli ad Romanos ; haec doctrina S. Augustini ; haec doctrina D. Thomae, quae passim ubique in omnibus suis scriptis reperitur. Ex ipsa bonitate divina, ex qua sumitur ratio praedestinationis, sumitur quoque efficacia illius gratiae, quae apponitur praedestinis, ut in eis praedestinatio efficiatur quoad executionem. Praedestinatio est quaedam ratio ordinis aliquorum in salutem aeternam in mente divina existens. Executio autem hujus ordinis est passive quidem in praedestinis, active autem est in Deo. Est autem executio praedestinationis *vocatio* et *magnificatio* secundum illud Rom. cap. 8. : « Quos praedestinavit, hos et vocavit ; et quos vocavit, hos et magnificavit. » (I. q. 23. a. 2.)

Iam vero : 1<sup>o</sup> Deus omnibus ad trahendum manum porrigit, quantum in se est, quoniam omnibus dat naturalia ac etiam gratuita omnibus communia. Unde si quis non venit ad Christum, illi, qui non venit, imputandum est. Nam « excaecatio et induratio Dei non intelligitur quasi Deus immittat malitiam vel ad peccandum impellat ; sed per hoc, quod non infundat gratiam, quam quidem gratiam infundit ex sua misericordia ; sed causa hujus, quod non infundit, est ex parte nostra, in quantum sc. in nobis est aliquid gratiae divinae repugnans. Nam ipse, quantum in se est, illuminat omnem hominem venientem in hunc mundum. Et I Tim. 2, 4 : *Vult omnes homines salvos fieri*. Sed quia nos a Deo recedimus, ideo gratiam suam nobis subtrahit. Os. 4, 6 : *Quia tu scientiam repulisti, repellam te*. Et ibid. 13, 9 : *Perditio tua, Israel, ex te ; tantummodo in me auxilium tuum*. » D. Thomas in Joh. 12. lect. 7.

2<sup>o</sup> Deus non solum omnibus ad trahendum manum porrigit, verum etiam, quod plus est, aversos ad se convertit ; et postquam Deus illos convertit ad se, et illi convertuntur

ad Deum. At in hac conversione quidam trahuntur a Deo usque ad fidem vel usque ad attritionem suorum peccatorum; et haec divina motio est quidem *efficax*, si consideremus illos, qui non convertuntur; sed *sufficiens*, si respiciantur illi, qui trahuntur usque ad caritatem per justificationem, in qua motio *efficax ex se* immutat cor per conversionem perfectam ad Deum. Atque motus iste liberi arbitrii in Deum per dilectionem caritatis constituit simpliciter primam manifestationem seu effectum gratiae ab intrinseco efficacis.

3º Inter eos, qui trahuntur usque ad justificationem, quidam quidem perseverant usque in finem, quidam vero excidunt a vita aeterna per amissionem gratiae sanctificantis. Gratia sanctificans et omnes habitus infusi et omnia alia gratuita habent rationem gratiae *sufficientis* respectu perseverantiae finalis; et ipsum perseverantiae donum est motio divina habens rationem gratiae *efficacis* in sui ultimo; quoniam *vocatio*, quae est una pars executionis praedestinationis, attingit ad alteram partem, quae est *glorificatio*.

4º Inter ipsosmet, qui trahuntur per justificationem et perseverantiae donum usque ad consecutionem vitae aeternae, adhuc adinveniuntur diversi gradus sanctitatis, ac proinde diversi gradus *efficaciae* in ipsa gratia, qua Deus trahit ad se praedestinos et facit illos sibi plus vel minus in splendore gloriae appropinquare.

5º Quare illum trahat et illum non trahat; quare inter illos quos trahit, hunc trahat plus et illum trahat minus: noli velle judicare, si non vis errare. Attamen, si adhuc non traheris, ora ut traharis; et si jam a Deo traheris, ora adhuc ut traharis plus. Quoniam in praedestinatione duo sunt consideranda, sc. ipsa praeordinatio divina et effectus ejus. Et licet quantum ad primum nullo modo praedestinatio juvatur precibus sanctorum, non enim precibus sanctorum fit, quod aliquis praedestinetur a Deo; attamen quantum ad secundum praedestinatio juvatur precibus sanctorum et aliis bonis operibus. Unde praedestinis curandum est ad bene operandum et orandum; quia per hujusmodi, praedestinationis effectus certitudinaliter impletur. Propter quod dicitur

II Petri 1, 10: «...Satagite, ut per bona opera certam vestram vocationem et electionem faciatis. » (I. q. 23. a. 8.; II-II. q. 83. a. 2.)

6º « Divinum auxilium est efficax ad subveniendum. » Atque ista efficacia competit divinae gratiae ratione sui, ab intrinseco, prout descendit a voluntate Dei transmittentis nos in vitam aeternam. Non enim est Deus qui accipit ab homine, sed homo qui accipit a Deo; non est motio divina quae impellitur ab humano arbitrio, sed humanum arbitrium quod impellitur impulsu divinae motionis. Ejusdem rationis est efficacia divinae gratiae ad nos justificandum, ad nos conservandum in justitia accepta et ad nos finaliter transmittendum in vitam aeternam per gloriae consecutionem. Unde dicere, quod gratia divina est efficax ex se, ab intrinseco, ratione sui, idem significat ac dicere, quod habet efficaciam ab ipso Deo movente, ab ipsa Dei voluntate, ab ipsa Dei intentione atque proposito; a quo et opera nostra habent vim merendi ipsam vitam aeternam, in quam a Deo moti ac praemoti transmittimur. Sic D. Thomas Rom. 4. lect. 1.: « Corde creditur ad justitiam, et hoc secundum propositum gratiae Dei, id est, secundum quod Deus proponit ex gratia sua homines salvare. *His qui secundum propositum vocati sunt sancti.* Eph. 1, 11: *Qui operatur omnia secundum consilium voluntatis suae...* Opera humana possunt considerari dupliciter: uno modo secundum substantiam operum; et sic non habent aliquid condignum, ut eis merces aeternae gloriae reddatur. Alio modo possunt considerari secundum suum principium, prout sc. ex impulsu Dei aguntur, secundum propositum Dei praedestinantis; et secundum hoc eis debetur merces praedicta secundum debitum; quia, ut infra 8, 14 dicitur: *Qui spiritu Dei aguntur, hi sunt filii Dei; si autem filii, et haeredes.* »

Gratia ex se efficax nihil aliud est nisi impulsus Dei, et impulsus secundum propositum Dei praedestinantis, quo homo fit filius Dei, et quo meretur vitam aeternam, et quo ipsam vitam aeternam, cujus est haeres, assequitur. Iste autem impulsus Dei, ex se efficax, triplicem habet termi-

num : 1<sup>o</sup> gratiam infusam per modum habitus, per quam homo fit formaliter justus; 2<sup>o</sup> opera facta in caritate, per quae caritas ipsa ac gratia augentur et gloriae augmentum meretur; 3<sup>o</sup> ipsam gloriae assecutionem per donum perseverantiae, in quo efficacia divini impulsus maxime manifestatur.

### III

#### Argumenta ex doctrina S. Augustini.

##### § 1

Notae seu characteres gratiae ex se efficacis possunt reduci ad subsequentes :

1<sup>o</sup> *Auferre ipsam duritiam cordis, per quam homo resistit Spiritui Sancto;*

2<sup>o</sup> *Transmutare liberam hominis voluntatem de mala in bonam;*

3<sup>o</sup> *Inclinare liberam hominis voluntatem ad bene agendum indeclinabiliter et insuperabiliter;*

4<sup>o</sup> *Augere ipsam libertatem voluntatis humanae;*

5<sup>o</sup> *Conferre libero hominis arbitrio, ut perseveret in bono;*

6<sup>o</sup> *Discernere bonos a malis.*

Haec sunt praedicata seu attributa essentialia, quae competunt illi divinae motioni, qua Deus movet nos, atque aversos ab ipso convertit nos ad ipsum, et conversos vivificat, et vivificatos facit nos vitam abundantius habere, et conservat nos in esse gratiae usque ad assecutionem gloriae. Iam vero, S. Augustinus in suis fere omnibus scriptis ac praesertim in illis operibus, quae contra Pelagianos ac Semi-pelagianos cunctasque Pelagianismi reliquias elaboravit, conceptis verbis asseverat praedicta essentialia attributa divinae gratiae. Longum esset singula et omnia testimonia adducere; necesse enim foret omnia, quae de gratia et



libero arbitrio scripsit, transcribere. Ad propositum nostrum sufficiat quaedam dumtaxat attingere.

**Primum attributum gratiae efficacis.** — S. Augustinus, *De praedest. sanct.* cap. 7. : « Valde remota est a sensibus carnis haec schola, in qua Deus auditur et docet. Multos venire videmus ad Filium, quia multos credere videmus in Christum; sed ubi et quomodo a Patre audierint hoc et didicerint, non videmus. Nimium gratia ista secreta est; gratiam vero esse quis ambigat? Haec itaque gratia, quae occulte humanis cordibus divina largitate tribuitur, a nullo duro corde respuitur. Ideo quippe tribuitur, ut cordis duritia primitus auferatur. Quando ergo Pater intus auditur et docet, ut veniatur ad Filium, aufert cor lapideum et dat cor carneum, sicut, propheta praedicante, promisit (Ezech. cap. 11.). Sic quippe facit filios promissionis et vasa misericordiae, quae praeparavit in gloriam. » Et in *epist. ad Vitalem*, (epist. 217. edit. Migne) cap. 6. : « Quomodo Deus exspectat voluntates hominum, ut praeveniant eum, quibus det gratiam, cum gratias ei non inmerito agamus de iis, quibus non ei credentibus et ejus doctrinam voluntate impia persequentibus, misericordiam praerogavit, eosque ad seipsum omnipotentissima facilitate convertit, ac volentes ex nolentibus fecit? Ut quid ei inde gratias agimus, si hoc ipse non fecit? Ut quid tanto magis eum magnificamus, quanto magis nolabant credere, quot credidisse gaudemus, si gratia divina voluntas in melius non mutatur humana? Apostolus Paulus : *Eram, inquit, ignotus facie Ecclesiis Judaeae... Et in me magnificabant Deum* (Galat. 1, 22-24). ... Quid est enim : *in me magnificabant Deum*, nisi in me Deum magnificum praedicabant? Quomodo autem eum magnificum praedicabant, si magnum illud factum de Pauli conversione ipse non fecerat? Et quo pacto ipse fecerat, si volentem credere ex nolente ipse non fecerat?... Haec et alia testimonia divina, quae commemorare longum est, ostendunt Deum gratia sua auferre infidelibus cor lapideum, et praevenire in hominibus bonarum merita voluntatum, ita ut voluntas per

antecedentem gratiam praeparetur, non ut gratia merito voluntatis antecedente donetur. »

**Secundum attributum gratiae efficacis.** — S. Augustinus *De grat. et lib. arb.* cap. 20. : « Satis me disputasse arbitror adversus eos, qui gratiam Dei vehementer oppugnant, quae voluntas humana non tollitur, sed ex mala mutatur in bonam; et cum bona fuerit, adjuvatur. Et sic disputasse, ut non magis ego quam divina ipsa Scriptura vobiscum locuta sit evidentissimis testimoniis veritatis; quae Scriptura divina si diligenter inspiciatur, ostendit non solum bonas hominum voluntates, quas Ipse facit ex malis, et a se factas bonas in actus bonos et in aeternam dirigit vitam; verum etiam illas, quae conservant saeculi creaturam, ita esse in Dei potestate, ut eas, quo voluerit, faciat inclinari, vel ad beneficia quibusdam praestanda, vel ad poenas quibusdam ingerendas, sicut ipse judicat occultissimo quidem iudicio, sed sine ulla dubitatione justissimo... » Et ibid. cap. 21. : « Quid mirum est, si per Spiritum Sanctum operatur in cordibus electorum suorum bona, qui operatus est ut ipsa corda essent ex malis bona? »

**Tertium attributum gratiae ex se efficacis.** — S. Augustinus *De corrept. et grat.* cap. 14. : « Cum autem homines per correptionem in viam iustitiae seu veniunt seu revertuntur, quis operatur in cordibus eorum salutem, nisi ille qui, quolibet plantante atque rigante, et quodlibet in agris vel arbustulis operante, dat incrementum, Deus, cui volenti salvum facere nullum hominum resistit arbitrium? Sic enim velle seu nolle in volentis aut nolentis est potestate, ut divinam voluntatem non impediat, nec superet potestatem. Etiam de his enim, qui faciunt quae non vult, facit Ipse quae vult. Non est itaque dubitandum, voluntati Dei, qui in coelo et in terra omnia, quaecumque voluit, fecit (Ps. 84.), et qui etiam illa, quae futura sunt, fecit (Is. cap. 45.), humanas voluntates non posse resistere, quominus faciat ipse quod vult; quandoquidem etiam de ipsis

hominum voluntatibus, quod vult, cum vult, facit... Hoc in eis egit, qui in cordibus hominum, quod voluerit, opératur. Propter quod praemisit Scriptura : Et ambulabat David proficiens, et magnificabatur, et Dominus omnipotens erat cum illo. Ac per hoc Dominus omnipotens, qui erat cum illo, adduxit istos, ut eum regem constituerent. Et quomodo adduxit? numquid corporalibus ullis vinculis alligavit? Intus egit, corda tenuit, corda movit, eosque voluntatibus eorum, quas Ipse in illis operatus est, traxit. Si ergo cum voluerit reges in terra Deus constituere, magis habet in potestate voluntates hominum quam ipsi suas, quis alius facit, ut salubris sit correptio et fiat in correpti corde correctio, ut coelesti constituatur in regno? »

**Quantum attributum gratiae ex se efficacis.** — S. Augustinus *De spiritu et littera* cap. 30. : « Liberum ergo arbitrium evacuamus per gratiam? Absit; sed magis liberum arbitrium statuimus. Sicut enim lex per fidem (Rom. 3.), sic liberum arbitrium per gratiam non evacuatur, sed statuitur. Neque enim lex impletur nisi libero arbitrio; sed per legem cognitio peccati; per fidem impetratio gratiae contra peccatum; per gratiam sanatio animae a vitio peccati; per animae sanitatem libertas arbitrii; per liberum arbitrium iustitiae dilectio; per iustitiae dilectionem legis operatio. Ac per hoc sicut lex non evacuatur, sed statuitur per fidem, quia fides impetrat gratiam, qua lex impleatur, ita liberum arbitrium non evacuatur per gratiam, sed statuitur, quia gratia sanat voluntatem, qua iustitia libere diligitur. Omnia haec, quae velut catenatim connexi, habent voces suas in Scripturis Sanctis. Lex dicit : Non concupisces (Exod. 20, 17). Fides dicit : Sana animam meam, quoniam peccavi tibi (Ps. 40, 5). Gratia dicit : Ecce sanus factus es, jam noli peccare, ne quid tibi deterius contingat (Joh. 5, 14). Sanitas dicit : Domine Deus meus, exclamavi ad te, et sanasti me (Ps. 29, 3). Liberum arbitrium dicit : Voluntarie sacrificabo tibi (Ps. 53, 8). Dilectio iustitiae dicit : Narraverunt mihi iniusti delectationes, sed non sicut lex tua, Domine (Ps. 118,

85). Ut quid ergo miseri homines aut de libero arbitrio audent superbire antequam liberentur, aut de suis viribus si jam liberati sunt? Nec attendunt in ipso nomine liberi arbitrii utique libertatem sonare. Ubi autem Spiritus Domini, ibi libertas (II Cor. 3, 17). Si ergo servi sunt peccati, quid se jactant de libero arbitrio? A quo enim quis devictus est, huic et servus addictus est (II Petri. 2, 19). Si autem liberati sunt, quid se jactant velut de opere proprio, et glorianur quasi non acceperint? An ita sunt liberi, ut nec illum velint habere Dominum, qui eis dicit : Sine me nihil potestis facere (Joh. 15, 5) et : Si vos Filius liberaverit, tunc vere liberi estis (ib. 8, 36)? » *Epist. ad Hilarium* (157. edit. Migne) : « Haec enim voluntas libera tanto erit liberior, quanto sanior; tanto autem sanior, quanto divinae misericordiae gratiaeque subjectior... Neque enim voluntatis arbitrium tollitur, quia adjuvatur; sed ideo adjuvatur, quia non tollitur. » Et *De corrept. et grat.* cap. 8. : « Ecce quemadmodum secundum gratiam, non contra eam, libertas defenditur voluntatis! Voluntas quippe humana non *libertate* consequitur *gratiam*, sed *gratia* potius *libertatem*; et, ut perseveret, delectabilem perpetuitatem et insuperabilem fortitudinem. »

**Quintum attributum gratiae efficacis.** — S. Augustinus *De corrept. et grat.* cap. 12. : « Ac per hoc nec de ipsa perseverantia boni voluit Deus sanctos suos in viribus suis, sed in ipso gloriari, qui eis non solum dat adjutorium, quale primo homini dedit, sine quo non possint perseverare, si velint; sed in eis etiam operatur et velle, ut, quoniam non perseverabunt nisi et possint et velint, perseverandi eis et *possibilitas* et *voluntas* divinae gratiae largitate donetur. Tantum quippe Spiritu Sancto accenditur voluntas eorum, ut ideo possint, quia sic volunt; ideo sic velint, quia Deus operatur ut velint. Nam si in tanta infirmitate vitae hujus (in qua tamen infirmitate propter elationem reprimendam perfici virtutem oportebat) ipsis relinqueretur voluntas sua, ut in adjutorio Dei, sine quo perseverare non possent,



manerent si vellent : nec Deus in eis operaretur, ut vellent ; inter tot et tantas tentationes infirmitate sua voluntas ipsa succumberet, et ideo perseverare non possent, quia deficientes infirmitate nec vellent, aut non ita vellent infirmitate voluntatis, ut possent. Subventum est igitur infirmitati voluntatis humanae, ut divina gratia indeclinabiliter et insuperabiliter ageretur ; et ideo quamvis infirma, non tamen deficeret, nec adversitate aliqua vinceretur. Ita factum est, ut voluntas hominis, invalida et imbecilla in bono adhuc parvo, perseveraret per virtutem Dei, cum voluntas primi hominis, fortis et sani in bono ampliore, non perseveraverit, habens virtutem liberi arbitrii, quamvis non defuturo adiutorio Dei, sine quo non posset perseverare, si vellet, non tamen tali, quo in illo Deus operaretur ut vellet. Fortissimo quippe dimisit atque permisit facere quod vellet ; infirmis servavit, ut, ipso donante, invictissime, quod bonum est, vellent, et hoc deserere invictissime nollent. Dicente ergo Christo : Rogavi pro te, ne deficiat fides tua (Luc. 22, 32), intelligamus ei dictum, qui aedificatur super petram. Atque ita homo Dei non solum quia misericordiam consecutus est, ut fidelis esset, verum etiam quia fides ipsa non deficit ; qui gloriatur, in Domino gloriatur. »

**Sextum attributum gratiae ex se efficacis.** — S. Augustinus, *De corrept. et grat.* cap. 13. : « Haec de his loquor, qui praedestinati sunt in regnum Dei, quorum ita certus est numerus, ut nec addatur eis quisquam, nec minuat ex eis ; non de his, qui, cum annuntiasset et locutus esset, multiplicati sunt super numerum (Ps. 39.). Ipsi enim vocati dici possunt, non autem electi ; quia non secundum propositum vocati. » Et *De praedest. sanct.* cap. 17. : « Electi sunt autem de mundo ex vocatione, qua Deus id, quod praedestinavit, implevit. Quos enim praedestinavit, ipsos et vocavit ; illa sc. vocatione secundum propositum ; non ergo alios, sed quos praedestinavit, ipsos vocavit ; nec alios, sed quos ita vocavit, ipsos et justificavit ; nec alios, sed quos praedestinavit, vocavit, justificavit, ipsos et glorificavit : illo utique

fine, qui non habet finem. Elegit ergo Deus fideles, sed ut sint, non quia jam erant. »

Et *De corrept. et grat.* cap. 9. : « Nemo ergo dicat non esse corripiendum, qui exorbitat de via justa, sed ei redditum et perseverantiam a Domino tantum esse poscendam; nemo prudens et fidelis hoc dicat. Si enim secundum propositum vocatus est iste, procul dubio illi, etiam quod corripitur, Deus cooperatur in bonum. Utrum autem ita sit vocatus, quoniam qui corripit, nescit, faciat ipse cum caritate, quod scit esse faciendum; scit enim talem corripiendum; futuro Deo aut misericordiam aut iudicium; misericordiam quidem, si a massa perditionis ille, qui corripitur, gratiae largitate discretus est; et non est inter vasa irae, quae perfecta sunt in perditionem, sed inter vasa misericordiae, quae praeparavit Deus in gloriam (Rom. cap. 9.); iudicium vero, si in illis est damnatus, in his non est praedestinatus. »

Et *II. Contra duas epist. Pelag.* cap. 7. : « Ergo ille discernit, qui, unde discernaris, impertit, poenam debitam removendo, indebitam gratiam largiendo; ille discernit, qui cum tenebrae essent super abyssum, dixit : *Fiat lux, et facta est lux*; et *divisit*, hoc est, discrevit, *inter lucem et tenebras*. Non enim cum solae essent tenebrae, quid discerneret, invenit; sed lucem faciendo discrevit, ut justificatis impiis dicatur : Fuistis enim aliquando tenebrae, nunc autem lux in Domino (Ephes. 5, 8); ac sic, qui gloriatur, non in seipso, sed in Domino gloriatur. »

Et *XI. De Civit. Dei* cap. 19. : « Non mihi videtur ab operibus Dei absurda sententia, si, cum lux illa prima facta est, angeli creati intelliguntur, ubi dictum est : *Et divisit Deus inter lucem et tenebras; et vocavit Deus lucem diem, et tenebras vocavit noctem*. Solus quippe ille ista discernere potuit, qui potuit etiam priusquam caderent, praescire casuros, et lumine privatos veritatis in tenebrosa superbia remansuros... Inter illam vero lucem, quae sancta societas angelorum est illustratione veritatis fulgens, et ei contrarias tenebras, id est, malorum angelorum aversorum a luce justitiae deterrimas mentes, ipse dividere potuit, cui etiam

futurum, non naturae, sed voluntatis malum, occultum aut incertum esse non potuit. »

Et *XII.* cap. 9. : « Nam et hoc discutiendum est, si boni angeli ipsi in se fecerunt voluntatem bonam, utrum aliqua eam an nulla voluntate fecerunt. Si nulla, utique nec fecerunt. Si aliqua, utrum mala an bona? Si mala, quomodo esse potuit mala voluntas bonae voluntatis effectrix? Si bona, jam ergo habebant. Et istam quis fecerat, nisi ille, qui eos cum bona voluntate, id est, cum amore casto, quo illi adhaererent, creavit, simul eis et condens naturam et largiens gratiam? Unde sine bona voluntate, hoc est, Dei amore, numquam sanctos angelos fuisse credendum est. Isti autem, qui cum boni creati essent, tamen mali sunt mala propria voluntate, quam bona natura non fecit, nisi cum a bono sponte defecit, ut mali causa non sit bonum, sed defectus a bono, aut minorem acceperunt amoris divini gratiam quam illi, qui in eadem perstiterunt; aut si utrique boni *aequaliter* creati sunt, istis mala voluntate cadentibus, illi *amplius adjuti* ad eam beatitudinis plenitudinem, unde se numquam casuros certissimi fierent, pervenerunt. » Et *De dono persever.* cap. 6. : « Cum enim perseveraverit quisque usque in finem, neque hoc donum potest amittere nec alia, quae poterat ante finem. Quomodo igitur potest amitti, per quod fit, ut non amittatur etiam quod posset amitti? » Et *ibid.* cap. 8. : « Voluntate autem sua cadit, qui cadit; et voluntate Dei stat, qui stat. *Potens est enim Deus statuere illum* (Rom. 14, 4); non ergo se ipse, sed Deus. »

## § 2

Ex supra dictis jam videtur satis constare dari gratiam divinam ex se, ratione sui, ab intrinseco efficacem; ac proinde in ipsa entitate gratiae efficacis aliquam reperiri vim peculiarem, aliquod speciale robur, quandam intrinsecam rationem, per quam a gratia pure sufficienti distinguatur. Differentia ergo inter gratiam sufficientem et efficacem non est quidem desumenda ab effectu, sed revera accipienda est

ex diversitate ipsius gratiae in esse principii actus salutaris, in ratione virtutis causantis effectum majorem, effectum perfectione diversum. Quod quidem, ut magis adhuc luceat, oportet rursus audire Augustinum divinae gratiae Doctorem, qui praedicata intrinseca seu essentiales proprietates divinae gratiae ex se efficacis multipliciter declaravit.

**Proprietas prima distinguens inter gratiam sufficientem et efficacem.** — *Gratia sufficiens dat posse pie cogitare, velle et operari; gratia efficax dat praeterea ipsum pie operari et cogitare.* — Utraque est gratia; at una minor, altera major. Unde S. Augustinus, *De gratia Christi* cap. 25. ac 26. : « Desinat itaque jam Pelagius et seipsum et alios fallere, contra Dei gratiam disputando. Non propter illorum trium unum, id est, propter *possibilitatem* bonae voluntatis atque operis, sed etiam propter *voluntatem* et *operationem bonam* erga nos Dei gratia praedicanda est... Cognitionem et dilectionem, sicut sunt discernenda, discernat... Et cum sit utrumque donum Dei, sed unum minus, alterum majus, non sic justitiam nostram super laudem Justificatoris nostri extollat, ut horum duorum quod minus est, divino tribuat adjutorio; quod autem majus est, humano usurpet arbitrio. » Et *Epist. ad Vitalem* : « *Praeparatur voluntas a Domino; et Deus est enim qui operatur in vobis et velle*; et multa hujusmodi, quibus commendatur vera Dei gratia, hoc est, quae non secundum merita nostra datur, sed dat merita ipsa cum datur; quia praevenit hominis voluntatem bonam, nec eam cujusquam invenit in corde, sed facit... Opus est hoc gratiae, quam qui accipiunt, doctrinae salutari Scripturarum Sanctarum, etsi fuerint inimici, fiunt amici; non opus ejusdem doctrinae, quam qui audiunt et legunt sine gratia Dei, pejores ejus efficiuntur inimici. Non est igitur gratia Dei in natura liberi arbitrii et in lege atque doctrina, sicut Pelagiana perversitas desipit;... quia et liberum arbitrium ad diligendum Deum primi peccati granditate perdidimus, et lex Dei atque doctrina, quamvis sancta et justa et bona, tamen occidit, si non vivificet Spiritus, per quem



fit, non ut audiendo, sed ut obediendo, neque ut lectione, sed ut dilectione teneatur... Quapropter, ut in Deum credamus et pie vivamus, non volentis neque currentis, sed miserentis est Dei; non quia velle non debemus et currere, sed quia ipse in nobis et velle operatur et currere... Agnoscamus gratiam, quae facit prodesse doctrinam; quae gratia si desit, videmus etiam obesse doctrinam. »

**Secunda proprietas gratiae ex se efficacis est non modo bonam voluntatem in nobis causare, sed etiam cor nostrum, quocumque Deus voluerit, vertere.** — Unde S. Augustinus, *De gratia Christi* cap. 23. et 24. : « Legant ergo atque intelligant, intueantur atque fateantur, non lege atque doctrina insonante forinsecus, sed interna et occulta, mirabili atque ineffabili potestate operari Deum in cordibus hominum, non solum veras revelationes, sed bonas etiam voluntates. Magnum profecto adjutorium divinae gratiae, ut cor nostrum, quo voluerit Deus, ipse declinet. Sed hoc tam magnum adjutorium, sicut iste (Pelagius) desipit, tunc meremur, cum sine ullo adjutorio non nisi de arbitrii libertate ad Dominum currimus, ab eo non regi cupimus, voluntatem nostram ex ejus voluntate suspendimus, eique adhaerendo jugiter, unus cum illo efficimur spiritus. Haec sc. tam ingentia bona non nisi de arbitrii, secundum istum, efficimus libertate, ut, his praecedentibus meritis, sic ejus gratiam consequamur, ut cor nostrum, quo voluerit, ipse declinet. »

**Tertia proprietas gratiae ex se efficacis est liberum hominis arbitrium eripere a servitute peccati, et appetitum rationalem, qui est voluntas, exaltare supra passiones, ut homo transferatur in libertatem gloriae filiorum Dei, et sub imperio rationis ac voluntatis sit appetitus sensibilis, et homo dominetur illius.** — Unde S. Augustinus *I. Contra duas epist. Pelag.* cap. 3. : « Ille quippe trahitur ad Christum, cui datur ut credat in Christum. Datur ergo potestas, ut filii Dei fiant, qui credunt in eum, cum hoc ipsum datur ut credant in eum. Quae potestas nisi detur a

Deo, nulla esse potest ex libero arbitrio ; quia nec liberum in bono erit, quod Liberator non liberavit ; sed in malo liberum habet arbitrium, cui delectationem malitiae vel occultus vel manifestus deceptor insevit, vel sibi ipse persuasit. Ad fidem autem pertinet credere in Christum. Et nemo potest credere in eum, hoc est, venire ad eum, nisi fuerit illi datum. Nemo igitur potest habere voluntatem justam, nisi nullis praecedentibus meritis acceperit veram, hoc est, gratuitam gratiam. Hoc isti (Pelagiani) nolunt, elati et superbi ; nec purgando defensores, sed extollendo praecipitatores liberi arbitrii. Qui non ob aliud nobis hoc dicentibus indignantur, nisi quia gloriari in Domino dedignantur. »

**Quarta proprietas gratiae ex se efficacis est sic physice atque intrinsece immutare liberam hominis voluntatem, ut homines ex nolentibus fiant volentes, et quidem liberissime.** — Unde S. Augustinus, *I. Contra duas epist. Pelag.* cap. 19. et 20. : « Quam multi inimici Christi quotidie subito Dei occulta gratia trahuntur ad Christum ! Quod verbum si non ex Evangelio posuisssem, quanta de me propter hoc iste (Pelagius) dixisset ; cum etiam nunc obluctetur, non mihi, sed illi qui clamat : *Nemo potest venire ad me, nisi Pater, qui misit me, traxerit eum* (Joh. 6, 44) ? Non enim ait : *duxerit*, ut hic aliquo modo intelligamus praecedere voluntatem. Quis trahitur, si jam volebat ? Et tamen nemo venit, nisi velit. Trahitur ergo miris modis, ut velit, ab illo, qui novit intus in ipsis hominum cordibus operari ; non ut homines, quod fieri non potest, nolentes credant, sed ut volentes ex nolentibus fiant. Hoc verum esse non conjectura suspicamur humana, sed evidentissima divinarum Scripturarum auctoritate dignoscimus... Qui (Deus) cor regis occultissima et efficacissima potestate convertit et transtulit ab indignatione ad lenitatem, hoc est, a voluntate laedendi ad voluntatem favendi, secundum illud Apostoli : *Deus operatur in vobis et velle*. Numquid homines Dei, qui haec scripserunt, imo ipse Spiritus Dei, quo auctore per eos ista conscripta sunt, oppugnavit liberum hominis arbi-

trium? Absit; sed omnipotentis in omnibus et iudicium justissimum et auxilium misericordissimum commendavit. Sufficit enim scire homini, quod non est iniquitas apud Deum. Jam quomodo ista dispenset, faciens alios secundum meritum vasa irae, alios secundum gratiam vasa misericordiae (Rom. 9.): quis cognovit sensum Domini, aut quis ejus consiliarius fuit? Si ergo ad honorem gratiae pertinemus, non simus ingrati,tribuendo nobis, quod accepimus. Quid enim habemus, quod non accepimus?» (I Cor. 4, 7)

**Quinta proprietas gratiae ex se efficacis est habere :**  
*1<sup>o</sup> suam virtutem ab ipsa Dei voluntate vel ex proposito Dei vocantis, id est, ex decreto praedestinationis; 2<sup>o</sup> virtutem adeo potentissimam atque irresistibilem, ut si Deus voluerit illam conferre non praedestinati, omnes isti converterentur et venirent ad Christum et salvi fierent.*

*Quoad primum.* — S. Augustinus, *De dono persever.* cap. 12. et 18. : « Haec itaque dona Dei, quae dantur electis, secundum Dei propositum vocatis, in quibus donis est et *incipere* credere, et in fide *usque ad finem perseverare*, sicut tanta rationum atque auctoritatum contestatione probavimus; haec, inquam, Dei dona, si nulla est praedestinatio, quam defendimus, non praesciuntur a Deo; praesciuntur autem. Haec est igitur praedestinatio, quam defendimus... Haec est illa electio, qua eos, quos voluit, elegit in Christo ante constitutionem mundi, ut essent sancti et immaculati in conspectu ejus, in caritate, praedestinans eos in adoptione filiorum... Sine dubio enim praescivit, si praedestinavit; sed praedestinasse est hoc praescisse, quod fuerat ipse facturus. »

*Quoad secundum.* — S. Augustinus, *De nat. et grat.* cap. 7. : « Nam prius distinguit (Pelagius) aliud esse quaerere an possit aliquid esse, quod ad solam possibilitatem pertinet; aliud, utrumne sit. Hanc distinctionem veram esse nemo ambigit; consequens enim est, ut quod est, esse potuerit; non est autem consequens, ut quod esse potest, etiam sit. Quia enim Dominus Lazarum suscitavit, sine dubio potuit; quia vero Judam non suscitavit, numquid dicendum est : non

potuit? Potuit ergo, sed noluit. Nam si voluisset, eadem etiam hoc potestate fecisset, quia et Filius, quos vult, vivificat. » (Joh. 5, 21) Et *XI. De Genesi ad litt.* cap. 10. : « Sed posset Deus, inquiunt, etiam ipsorum (daemonum) voluntatem in bonum convertere, quoniam omnipotens est? Posset plane. Cur ergo non fecit? Quia noluit. Cur noluerit, penes ipsum est. Debemus enim non plus sapere quam oportet sapere (Rom. 12, 3).

**Sexta proprietas gratiae ex se efficacis est praevenire liberam hominis voluntatem a principio operis salutaris usque ad finem, et operari omnia in homine, cui datur.** — Unde S. Augustinus, *De dono persever.* cap. 16. : « Praevenit ergo et fidem gratia; alioquin si fides eam praevenit, procul dubio praevenit et voluntas, quoniam fides sine voluntate non potest esse. Si autem gratia praevenit fidem, quoniam praevenit voluntatem, profecto praevenit omnem obedientiam; praevenit etiam caritatem, qua una Deo veraciter et suaviter obeditur; et haec omnia gratia in eo, cui datur et cujus haec omnia praevenit, operatur. » Et cap. 24. : « Sed quid plura? Satis docuisse me existimo, vel potius plus quam satis, dona Dei esse et incipere in Dominum credere et usque in finem in Domino permanere. »

Et *De praedest. Sanct.* cap. 8. : « Secundum quendam modum omnes Pater docet venire ad suum Filium. » (En gratia sufficiens.) « Si et illos, quibus stultitia est verbum crucis, ut ad Christum venirent, docere voluisset, procul dubio venirent et ipsi. » (En gratia efficax.) Et ibid. cap. 17. : « Intelligamus ergo vocationem, qua fiunt electi, non qui eliguntur, quia crediderunt, sed qui eliguntur, ut credant. Hanc enim et Dominus ipse satis aperit, ubi dicit : *Non vos me elegistis, sed ego elegi vos* (Joh. 15, 16). » Et cap. 10. : « Item quod dixi : salutem religionis hujus nulli umquam defuisse, qui dignus fuit; et dignum non fuisse, cui defuit, si discutiatur et quaeratur, unde quisque sit dignus, non desunt qui dicant : *voluntate humana*. Nos autem dicimus : *gratia vel praedestinatione divina*. Inter gratiam porro et



praedestinationem hoc tantum interest, quod praedestinatio est gratiae praeparatio; gratia vero jam ipsa donatio... Praedestinatio Dei, quae in bono est, gratiae est, ut dixi, praeparatio; gratia vero est ipsius praedestinationis effectus. »

Et II. *Cont. duas Epist. Pelag.* cap. 8. : « Ecce Deus admonet, ut praeparemus voluntatem in eo, quod legimus : *Hominis est praeparare cor*; et tamen ut hoc faciat homo, adjuvat Deus, quia *praeparatur voluntas a Domino*. Et *Aperi os*, ita dicit jubendo, ut nemo possit, nisi ipse id faciat adjuvando, cui dicitur : *Labia mea aperies*. Numquid istorum aliqui ita desipiunt, ut aliud *os*, aliud *labia* esse contendant, et mirabili vanitate hominem dicant os aperire, labia hominis Deum? Quamquam Deus illos et ab absurditate compescit, ubi ad Moysem famulum suum dicit : *Ego aperiam os tuum et instruam te, quae debeas loqui*. (Exod. 4, 12) In sententia ergo illa ubi dicitur : *Aperi os, et adimplebo illud*, quasi unum eorum videtur ad hominem pertinere, alterum ad Deum; in hac autem ubi dicitur : *Ego aperiam os tuum et instruam te*, utrumque ad Deum. Quare hoc, nisi quia in uno istorum cooperatur homini facienti, alterum solus facit? Quapropter multa Deus facit in homine bona, quae non facit homo; nulla vero facit homo, quae non facit Deus ut faciat homo. Proinde cupiditas boni non homini a Deo esset, si bonum non esset; si autem bonum est, non nisi ab illo nobis est, qui summe atque incommutabiliter bonus est. Quid est enim boni cupiditas nisi caritas, de qua Joannes Apostolus sine ambiguitate loquitur dicens : *Caritas ex Deo est?* (I Joh. 4, 7) Nec initium ejus ex nobis et perfectio ejus ex Deo; sed si caritas ex Deo, tota nobis ex Deo est. Avertat enim Deus hanc amentiam, ut in donis ejus nos priores faciamus, posteriorem ipsum... Si enim sine illo nihil possumus facere, profecto nec incipere nec perficere; quia, ut incipiamus, dictum est : *Misericordia ejus praeveniet me*; ut perficiamus, dictum est : *Misericordia ejus subsequetur me* (Ps. 22, 6). »

Et ibid. cap. 9. : « Quae cum ita sint, nihil in Scripturis Sanctis homini a Domino video juberi, propter probandum

liberum arbitrium, quod non inveniatur vel dari ab ejus bonitate vel posci propter adjutorium gratiae demonstrandum; nec omnino incipit homo ex malo in bonum per initium fidei commutari, nisi hoc in illo agat indebita et gratuita misericordia Dei. De qua suam cogitationem recolens quidam sicut legimus in Psalmis : *Numquid obliviscetur*, inquit, *misereri Deus, aut continebit in ira sua miserationes suas? Et dixi : Nunc coepi; haec mutatio dexterarum Excelsi.* (Ps. 76, 10-11) Cum ergo dixisset : *Nunc coepi*, non ait : *Haec mutatio arbitrii mei*; sed *dexterarum Excelsi*. Sic itaque Dei gratia cogitetur, ut ab initio bonae mutationis suae usque in finem consummationis, qui gloriatur, in Domino gloriatur (II Cor. 10, 17). Quia sicut nemo potest bonum perficere sine Domino, sic nemo incipere sine Domino. »

## IV

### Argumenta ex auctoritate Conciliorum atque Romanorum Pontificum.

#### § 1

Doctrinam S. Augustini circa efficaciam divinae gratiae contra Pelagianos eorumque reliquias approbarunt et amplexati sunt Coelestinus I., Leo I., Gelasius et Joannes II.; atque ea ipsa doctrina sustinetur ac propugnatur per diversa concilia ab Araus. II. usque ad Trident. Cum de gratia et libero arbitrio est sermo, aut de praedestinatione et scientia Dei peragitur, auctoritas S. Augustini est maxima, ac summo-pere a Romanis Pontificibus commendatur. In epistola enim Coelestini I. ad episcopos Galliae *De erroribus Semipelagianorum* a. 431. cap. 2. legimus : « Augustinum sanctae recordationis virum pro vita sua atque meritis in nostra communione semper habuimus, nec umquam hunc sinistrae suspicionis saltem rumor aspersit; quem tantae scientiae olim fuisse meminimus, ut inter magistros optimos etiam

antea a meis semper decessoribus haberetur. » Sit ergo ex hac Coelestini I. epistola :

Arg. 1<sup>um</sup>. — Cap. 12. : « His ergo ecclesiasticis regulis et ex divina sumptis auctoritate documentis ita adjuvante Domino confirmati sumus, ut omnium bonorum affectuum atque operum et omnium studiorum omniumque virtutum, quibus ab initio fidei ad Deum tenditur, Deum profiteamur auctorem, et non dubitemus ab ipsius gratia omnia hominis merita praeveniri, per quem fit, ut aliquid boni et velle incipiamus et facere. Quo utique et munere Dei non aufertur liberum arbitrium, sed liberatur, ut de tenebroso lucidum, de pravo rectum, de languido sanum, de imprudente sit providum. Tanta ergo est erga omnes homines bonitas Dei, ut nostra velit esse merita, quae sunt ipsius dona, et pro his, quae largitus est, aeterna praemia sit donaturus. Agit quippe nobis, ut quod vult, et velimus et agamus; nec otiosa in nobis esse patitur, quae exercenda, non negligenda donavit, ut et nos cooperatores simus gratiae Dei. » Ex quibus habetur : 1<sup>o</sup> Quod gratia Dei praevenit liberum hominis arbitrium in omnibus studiis et affectibus, quibus ad Deum tendimus; 2<sup>o</sup> quod per Deum moventem liberam nostram voluntatem aliquid boni et velle incipimus et facimus; 3<sup>o</sup> quod talis motio Dei non aufert liberum arbitrium, sed auget ac perficit in ratione suae libertatis, dum de tenebroso facit lucidum, de pravo rectum, de languido sanum, de imprudente providum; 4<sup>o</sup> quod hujusmodi auxilium seu divina motio non est indifferens, non confert solummodo posse bene agere, non fit efficax per consensum liberi arbitrii; sed hunc consensum infert atque causat, et ita in potentiam liberi arbitrii agit, ut quod Deus vult, et nos velimus et agamus.

Arg. 2<sup>um</sup>. — Ex Conc. Araus. II. ann. 529. contra Semipelagianos, confirmato a Bonifacio II., can. 4. : « Si quis, ut a peccato purgemur, voluntatem nostram Deum expectare contendit, non autem ut etiam purgari velimus per Sancti Spiritus infusionem et operationem in nobis fieri confitetur, resistit ipsi Spiritui Sancto per Salomonem dicenti:

*Praeparatur voluntas a Domino*; et Apostolo salubriter praedicanti : *Deus est qui operatur in nobis et velle et perficere pro bona voluntate.* » Unde habetur : 1<sup>o</sup> quod Deus non exspectat determinationem nostri liberi arbitrii ad hoc, quod a peccato purgemur per gratiae infusionem; 2<sup>o</sup> quod Deus operatur in potentiam liberi arbitrii et ita operando facit, ut nos ipsi purgari velimus; 3<sup>o</sup> quod in nostra justificatione liberum arbitrium immutatur per Spiritus Sancti infusionem atque operationem in nobis factam. Praeterea, definitio praedicta militat contra Semipelagianos, quorum saltem nonnulli admittebant gratiam indifferentem ac determinabilem per liberum arbitrium, et concursum simultaneum non rejiciebant. Et tamen Concilium damnat illos, qui contendunt voluntatem nostram Deum exspectare, ut a peccato purgemur. Si ergo determinatio liberi arbitrii ad donum gratiae sanctificantis acceptandum non causatur a Deo, abs dubio Deus exspectat voluntatem nostram, ut a peccato purgemur; nam sine consensu liberae voluntatis adultus non purgatur a peccato. Haec est igitur gratia ex se efficax, quae non exspectat consensum liberi arbitrii, sed producit atque efficit, ut causa principalis. Haec est, inquam, divina motio ab intrinseco efficax, quae non solum excitat, verum etiam ad operandum liberum arbitrium applicat. Haec est gratia efficax, quae *posse* agere cum ipsa operatione conjungit.

Arg. 3<sup>um</sup>. — Ex Conc. Trid. sess. 6. cap. 5. : « Declarat praeterea ipsius justificationis exordium in adultis a Dei per Christum Jesum *praeveniente gratia* sumendum esse, hoc est, ab ejus vocatione, qua nullis eorum existentibus meritis vocantur; ut qui per peccata a Deo aversi erant, per ejus *excitantem* atque *adjuvantem gratiam* ad convertendum se ad suam ipsorum justificationem, *eidem gratiae* libere assentiendo et cooperando, disponantur. » Ex quibus constat : 1<sup>o</sup> quod gratia *praeveniens*, a qua sumendum est exordium justificationis, dividitur deinde in *excitantem* et *adjuvantem*; 2<sup>o</sup> quod ista duplex gratia excitans et adjuvans praevenit liberum assensum voluntatis; 3<sup>o</sup> quod tam gratia excitans quam adjuvans, praeveniundo liberum hominis arbitrium,



operantur ex se, per se, ante consensum voluntatis; 4<sup>o</sup> quod utraque gratia est consequenter gratia operans, in cujus effectu voluntas nostra est mota et non movens, solus autem Deus movens; 5<sup>o</sup> quod hujusmodi gratiae effectus est liber assensus liberi arbitrii, per quem homo gratiae eidem praevenienti cooperatur, et cooperando disponitur ad gratiam gratum facientem suscipiendam. Gratia itaque praeveniens, quae excitat cor illuminando intellectum, dat posse se convertere ad Christum; est gratia ex se sufficiens. Gratia autem praeveniens, quae tangit ipsum cor adjuvando, id est, complendo potentiam se convertendi, dat ipsum actum se convertendi, efficit in potentia liberi arbitrii ipsum libere assentire; est gratia ex se efficax.

Arg. 4<sup>um</sup>. — Ex ipso Conc. Trid. sess. 6. can. 4. : « Si quis dixerit liberum hominis arbitrium a Deo motum et excitatum nihil cooperari assentiendo Deo excitanti atque vocanti, quo ad obtinendam justificationis gratiam se disponat ac prae-  
paret, neque posse dissentire, si velit, sed velut inanime quoddam nihil omnino agere mereque passive se habere : A. S. » Ubi iterum Concilium edocet dari duplicem gratiam Dei praevenientem determinationem liberi arbitrii ad gratiae justificantis susceptionem. Duplicem, inquam, gratiam praevenientem : quarum altera liberum hominis arbitrium *excitatur*, altera vero *movetur*, id est, reducitur de potentia in actum. Per utramque gratiam homo se disponit ac praeparat ad obtinendam justificationis gratiam; ac utriusque gratiae praevenientis effectus est immutatio liberi arbitrii de malo in bonum, de aversione a Deo in conversionem ad Deum. Unde ipsa determinatio liberi arbitrii, per quam homo libere cooperatur assentiendo Deo excitanti atque vocanti, causatur primo et principaliter ab ipsa Dei excitatione et motione. Unde Conc. Trid. evolvit atque confirmavit doctrinam Concilii Arausicani, dum ex una parte definivit contra Semipelagianos dari gratiam praevenientem non modo excitantem, sed etiam moventem cor; et ex alia parte definivit contra Lutheranos liberum hominis arbitrium a Deo motum non tolli, non minui, non laedi, non mere

passive se habere, sed activitatem suam exercere sub Dei motione, a qua vires efficacissimas ac supernaturalem energiam recipit. Sine gratia Dei movere se ad justitiam coram Deo libera hominis voluntas non potest : en gratia excitans, sufficiens. Sine gratia Dei se ad justitiam coram Deo libera hominis voluntas non se movet : en gratia movens, gratia adjuvans, gratia efficax.

Haec est doctrina S. Augustini contra Semipelagianos, qui, etsi gratiam praevenientem excitantem non negarent, gratiam nempe illam indifferentem et determinabilem per hominis voluntatem ; attamen veram illam gratiam praevenientem, quae movet voluntatem hominis et reducit de potentia in actum, et quae est necessaria ad singulos actus et ad initium fidei, inficiabantur. Semipelagiani enim contendebant Deum expectare determinationem liberi arbitrii, non ipsam efficere ; contendebant gratiam Dei moventis esse concomitantem tantum et pedissequam humanae voluntatis. Unde gratiam praevenientem, quae movet et causat liberi arbitrii consensum, non admittebant ; et haec est gratia vere praeveniens, movens et adjuvans. Quamobrem tamquam falsa et haeretica haec propositio Jansenii ab Innocentio X. damnata est : *Semipelagiani admittebant praevenientis gratiae interioris necessitatem ad singulos actus etiam ad initium fidei ; et in hoc erant haeretici, quod vellent eam gratiam talem esse, cui posset humana voluntas resistere et obtemperare*. Gratia enim ex se efficax, gratia movens et adjuvans, gratia revera praeveniens, non exspectans hominis voluntatem, est quidem necessaria ad singulos actus, etiam ad initium fidei ; at huiusmodi gratia confert libero arbitrio non tantum *posse* obtemperare, sed ipsum quoque actum obtemperandi, absque eo, quod auferat flexibilitatem humanae voluntatis ad malum, quod est *posse* resistere, si velit. Unde sub divina gratia ex se efficaci potentia *activa* liberi arbitrii augetur atque exaltatur ; potentia vero *defectiva*, quae est potentia resistendi, potentia peccandi, potentia ipsam gratiam rejiciendi, nondum tollitur, tamdiu homo remanet in statu viae.

Haec est doctrina Concilii Tridentini, duplicem gratiam praevenientem distinguentis : gratiam videlicet excitantem interius, et gratiam moventem sive adjuvantem. Primae gratiae nonnumquam resistitur; atque de illa verificatur, quod negabat Jansenius in illa propositione ab Innocentio X. damnata : *Interiori gratiae in statu naturae lapsae numquam resistitur*. Alteri vero gratiae, qua liberum arbitrium reducitur de potentia in actum, numquam resistitur; attamen de illa verificatur, quod negabat Jansenius in illa propositione similiter damnata, cujus secunda pars sic se habet : « *Et in hoc erant haeretici (Semipelagiani) quod vellent eam gratiam talem esse, cui posset humana voluntas resistere* »; quoniam, licet huic gratiae liberum arbitrium numquam resistit, eo ipso, quod per talem gratiam aufertur etiam ipsa duritia cordis, per quam resistitur, verumtamen per ipsammet gratiam, cui non resistitur, nondum aufertur *potentia resistendi*. Unde Conc. Trid. ait liberum hominis arbitrium a Deo motum « posse dissentire, si velit ».

## § 2

De ista duplici gratia praeveniente loquitur Andreas de Vega, theologus Ordinis S. Francisci, qui huic Concilii determinationi interfuit, et ita VI. *In Trid.* cap. 6. declarat mentem Concilii : « Illud serio et magna attentione advertendum est duplicem asseruisse Patres in 5<sup>o</sup> capite gratiam, qua disponimur ad justificationem, excitantem et adjuvantem. Excitat namque Deus vocatione sua sancta et illuminatione, ut surgamus a peccato. Neque contentus excitare, quadam nobis ignota sua virtutis applicatione et nostrae voluntatis mirifica inclinatione et inflexione benigne nos adjuvat, ut consentiamus et obediamus vocationi suae. »

Magna itaque attentione et serio advertere debent theologi duplicem gratiam, quam Patres Concilii Tridentini asserunt atque definiunt : gratiam nimirum excitantem et gratiam adjuvantem, ac utramque praevenientem determinationem liberi arbitrii. At praesertim notent theologi ac mirentur

« *illam nobis ignotam suam virtutis applicationem et nostrae voluntatis mirificam inclinationem et inflexionem, qua Deus, non contentus excitare liberum hominis arbitrium, nos adjuvat, ut consentiamus et obediamus vocationi suae* ». Quid ergo est ignota illa divinae virtutis applicatio, quae a Patribus Concilii Tridentini asseritur, et quae a gratia excitante distinguitur? Quid denique est mirifica illa nostrae voluntatis inclinatio atque illa liberi arbitrii inflexio, qua Deus adjuvat nos ad consentiendum? Admittenda est igitur praeter gratiam praevenientem excitantem alia gratia diversa etiam praeveniens, qua liberum hominis arbitrium mirifice inclinatur atque flectitur ad consentiendum; quae quidem inflexio et inclinatio efficitur in nostra voluntate a Deo quadam nobis ignota suae virtutis applicatione.

De hac etiam duplici gratia praeveniente loquitur Dominicus Soto, quem ad Patres Concilii velut Theologum Carolus Germanorum Imperator destinavit, quique opus *De natura et gratia* scripsit ad ipsos Concilii Patres nuncupatum, in tres libros divisum, ita « ut primus sit veluti quintae sessionis commentarius; reliqui vero sextae ». In 1. enim libro cap. 16. loquens de prima gratia praeveniente, quam Patres Concilii appellant *excitantem*, ait: « Si de illa fiat interrogatio, utpote de inspirationibus et splendoribus veritatis, quas Deus in nobis sine nobis libere assentientibus repente operatur, procul dubio majora subsidia pro sua misericordia confert unis Deus quam aliis. Adest enim omnium cordibus pulsans; impariter tamen... Huc pertinet, quod ait Christus Bethsaidae et Corozain: Si in Tyro et Sidone factae essent virtutes, quae factae sunt in vobis, olim in cilicio et cinere poenitentiam egissent. »

De altera vero gratia etiam praeveniente, quam Patres Concilii nominant moventem et adjuvantem, scribit: « Si vero quaestio proponatur de auxiliis secundi ordinis, quae liberam in nobis dicunt motionem, ut *trahere, convertere, promovere* et similia, inaequalia quidem largitur diversis hominibus Deus; sed tamen quo sunt in aliquo auctiora, eo magis meliusque movetur. Aliud profecto non est intelligibile.



Quoniam movere et moveri relativa sunt. Nec aliud est me Deum hoc modo movere quam mecum concurrere ad eliciendum liberum actum. Ob idque veluti in naturalibus rebus, quo Deus celerius movet primum orbem quam infimum, celerius et ipse orbis movetur : ita et in auxilio speciali, quanto Deus Magdalenam et Paulum vehementius movit quam alios tepidos et remissos, impensius etiam ipsi ardentiusque venerunt, majorique et cumulationi sunt gratia justificati. Neque cohaerent, ut Deus eum magis moveat, qui minus movetur. »

De prima gratia praeveniente verificatur, quod sit vel possit esse aequalis et etiam major in illo qui non convertitur, quam in illo qui convertitur. De secunda gratia praeveniente nequit hoc verificari; sed quibus datur, omnes convertuntur, quoniam omnes moventur, et tanto magis, quanto magis Deus eos movet. Excitans Deus prima gratia, stat ad ostium et pulsatur; movens Deus secunda gratia, aperit. « Ipse quidem est, qui aperit corda nostra » ait Soto (cap. 15.). « Ipse non solum est causa volitionis nostrae et operis boni, sed est causa ita praeveniens, quae facit, ut nos possimus ac velimus. »

Denique lib. 2. cap. 3. rursus evolvens hanc doctrinam Concilii Tridentini declarat, quomodo ipsa gratia praeveniens, quae dicitur *movens* et *adjuvans*, potest habere diversos gradus perfectionis, et comparat doctrinam Concilii cum doctrina D. Thomae. Ait enim : « Haec est confessio S. Synodi praesentis Tridentini. Qua statim cap. 5. sess. 6. declarat justificationis exordium in adultis a Deo per Christum Jesum praeveniente gratia sumendum esse, per quam excitantem et adjuvantem gratiam ad convertendum se homines ad suamque ipsorum justificationem eidem gratiae libere assentiendo et cooperando disponantur. In qua confessione adnotandum est, quod nullae proprie appellantur dispositiones, nisi quae a Deo praeveniente et nobis assentientibus fiunt. Ait enim Concilium, quod sine gratia Dei movere se homo ad justitiam coram illo non potest. Tametsi can. 7. censuerit non omnia opera ante justificationem, quacumque ratione facta sint, esse peccata; quia etiam si fiant naturaliter,

sunt saltem moraliter bona, ut praecedenti libro dictum est. At vero dispositio haec in nobis divina non uno certe modo fit, sed duobus. Est enim, ut I-II. q. 112. a. 2. auctor est S. Thomas, alia imperfecta, alia vero perfecta. Imperfecta quidem, non quod omnis motio Dei non sit perfecta relata ad suum finem, sed quod Deus nos per ipsam non proxime ad gratiam, sed ad alia praecedentia bona appellit, per quae gradatim paulatimque in tempore ad ipsam perducatur. Quae quidem dispositio nec gratiae quidem est meritoria nec gloriae. Alia vero est, quae simul tempore est cum gratia, tantum natura praecedens. Quemadmodum in igne aliae sunt dispositiones antecedentes generandam formam, aliae vero simul tempore coeuntes, natura tamen praeviae. Atque haec nimirum secunda semper est necessaria, ut ex repentina conversione Pauli compertum fit; illa vero prior non item. Adde, quod haec necessaria prae-paratio, licet non sit meritoria gratiae, est tamen meritoria gloriae, quatenus gratia informatur. »

Unde patet, quomodo Conc. Trid. dum damnavit Protestantibus dicentes sub divina gratia, quam docuerant Augustinus et D. Thomas, liberum arbitrium tolli, nihil agere, mere passive se habere, iterum damnavit Semipelagianos renuentes admittere gratiam Dei praevenientem, qua Deus et pulsatur simul atque aperitur quoque ostium liberae voluntatis. Haec igitur tenenda sunt velut doctrina catholica tradita ab Augustino et Angelico Doctore et propugnata per Conc. Trid. :

1<sup>o</sup> Opera moraliter bona, facta naturaliter ab homine, non sunt, proprie loquendo, dispositiones ad gratiam.

2<sup>o</sup> Nullae proprie sunt dispositiones, nisi quae a Deo praeveniente et nobis assentientibus fiunt.

3<sup>o</sup> « Lex autem nulla est conferendi gratiam, nisi ei, quem Deus ad se traxerit. »

4<sup>o</sup> Deus trahit ad se homines duplici gratia praeveniente, excitante videlicet et movente.

5<sup>o</sup> Gratia praeveniens, quae movet intrinsece inclinando potentiam liberi arbitrii, est semper dispositio ad gratiam justificantem consequendam.

6° Gratia movens seu dispositio aliquando est non proxime ad ipsam gratiam justificantem suscipiendam, sed ad alia praecedentia bona, per quae gradatim Deus perducit hominem ad ipsam.

7° Gratia praeveniens movens aliquando est simul tempore cum ipsa gratia justificante, tantum natura praecedens.

8° Motus liberi arbitrii in Deum per fidem et dilectionem causatus a gratia praeveniente, quae non est simul tempore cum gratia justificante, non est meritorius de condigno nec gratiae sanctificantis, nec gloriae.

9° Motus liberi arbitrii in Deum per fidem et dilectionem causatus a gratia praeveniente, quae est simul tempore cum gratia sanctificante, est quidem meritorius de condigno, non ipsius gratiae, sed gloriae; quoniam gratia sanctificante est jam informatus.

10° Motus tamen liberi arbitrii causatus a gratia praeveniente, quae movet ad bona praecedentia, per quae Deus paulatim in tempore perducit hominem ad justificationem, potest dici quodam sensu large accepto meritorius de congruo, ut Deus conferat iterum iterumque suam gratiam praevenientem, usquequo ipsa gratia justificans infundatur. In eo videlicet sensu, in quantum facientibus quod est in se viribus gratiae, Deus non denegat ulteriorem gratiam. Atque, ut D. Thomas docet I-II. q. 112. a. 2. ad 1. : « Divinam motionem justum est non deficere. »

11° Tam gratia *movens* et *adjuvans*, quam gratia *excitans* est gratia *praeveniens*; et voluntas nostra est omnino pedissequa respectu divinae gratiae excitantis ac moventis atque adjuvantis. (*I. Sent.* dist. 17. q. 1. a. 1. solut. 2. ad 2.) Inter gratiam autem moventem seu adjuvantem, et gratiam excitantem, quarum utraque a Tridentino Concilio denominatur praeveniens, duplicem differentiam valde notandam esse admonent praeclari illi theologi, Andreas Vega (*Trid. Conc.* lib. 6. cap. 5.) et Dominicus Soto (*De nat. et grat.* cap. 16.), qui Tridentino Concilio interfuerunt et circa materiam ex professo tractaverunt.

a) « Primo enim excitantis gratiae adjutorium saepe propter

libertatem nostram frustramus. Vocavi, inquit, et renuistis. Verum adjuvans gratia semper habet effectum immediatum, ad quem datur. Si Deus adjuvat nos ad credendum, credimus; si ad diligendum, diligimus; si ad poenitendum, poenitemus. »

b) « Secunda inter excitantem et adjuvantem gratiam differentia, eaque magis praecipua est. Non omnes, quibus Deus excitante gratia magis favet, melius in ipsum convertuntur; omnes tamen illi melius et ferventius, quibus Deus magis favet gratia adjuvante..... Majora auxilia praevenientis gratiae (excitantis) communicata fuisse Bethsadae et Corozain quam Tyro et Sidoni, et Scribis et Phariseis quam Ninivitis; et tamen nec Bethsaida nec Corozain, nec Scribas nec Phariseos plus, sed minus omnino profecisse. Quod vero illi melius semper convertuntur, quibus Deus benignius impertitur gratiae adjuvantis auxilium, ratio naturalis ostendit. Movere enim et moveri correlativa sunt. Neque fieri potest, imo neque intelligi, ut Petrum et Paulum vehementius moverit Deus ad poenitentiam gratia ista secundi generis, quin et ipsi ardentius et perfectius fuerint conversionem suam operati. »

Haec igitur gratia, qua « liberum hominis arbitrium a Deo motum » cooperatur assentiendo Deo moventi, et qua quanto vehementius a Deo movetur, ardentius et perfectius cooperatur assentiendo: dicitur atque est efficax ex se, ab intrinseco sui in ratione esse principii. Habet efficaciam, habet necessitatem ad id quod ordinatur a Deo, non quidem coactionis, sed infallibilitatis; non a libero arbitrio sicut a moto, sed a solo Deo sicut a movente.



## V

**Argumenta ex doctrina theologica D. Thomae.**

Arg. 1<sup>um</sup>. — Gratiam divinam praevenientem esse efficacem ab intrinseco nihil aliud vult dicere nisi quod gratuita motio, qua Deus movet nos ad opus salutare, exempli causa, ad justificationem consequendam, habet necessitatem ad gratiae justificantis consecutionem non a libero arbitrio sicut a moto, sed a Deo sicut a movente. Sed D. Thomas, I-II. q. 112. a. 3. conceptis verbis edocet divinam motionem, quae in nostro libero arbitrio est motus, et qua movemur ad justitiae consecutionem, habere necessitatem non quidem coactionis, sed infallibilitatis ad ipsam justitiam consequendam, a Deo sicut a movente, non a nostro libero arbitrio sicut a moto. Juxta doctrinam ergo D. Thomae oportet admittere gratiam actualem ex se efficacem.

OBSERVATIO. — Hocce primum argumentum tangit radicem totius controversiae atque exhibet differentiam essentialem inter illos qui ponunt gratiam ex se efficacem, et eos qui stabiliunt gratiam efficacem non ex se, sed ex alio, id est, ex ipsa innata libertate voluntatis vel ex circumstantiis congruis. Asserere gratiam efficacem ex se, est affirmare nexum infallibilitatis inter motionem et terminum motus esse a Deo, *quia vult et movet*. Asserere autem gratiam efficacem ex circumstantiis congruis et ex ipso libero arbitrio, est dicere gratiam efficacem ex ipsa libertate voluntatis, et affirmare nexum infallibilitatis inter motionem et terminum motus esse a Deo, *quia praescivit* ante omnem actum liberum suae voluntatis; quia praescivit, non quidem scientia quae, adjuncta voluntate, est causa efficiens rerum scitarum, sed scientia, quae nec causat nec efficit res scitas, nimirum *scientia media*.

Arg. 2<sup>um</sup>. — De essentia gratiae praevenientis ex se efficacis est : 1<sup>o</sup> quod talis motio semper sit efficax secundum

intentionem Dei; 2<sup>o</sup> quod homo, hac divina motione motus, infallibiliter operetur, quodcumque Spiritus Sanctus vult; 3<sup>o</sup> quod, licet homo *possit* peccare ex parte vertibilitatis liberi arbitrii, tamen *non potest* peccare ex parte virtutis motivae: 4<sup>o</sup> quod impossibile sit simul esse quod homo gratia ex se efficaci moveatur, et quod ipse homo resistat vel deficiat peccando. Jam vero, omnes ac singulae praefatae divinae motionis conditiones ad litteram a D. Thoma traduntur II-II. q. 24. a. 11.: « Ex parte Spiritus Sancti moventis animam ad diligendum Deum, ex hac parte caritas impeccabilitatem habet ex virtute Spiritus Sancti, qui infallibiliter operatur, quodcumque voluerit. Unde impossibile est haec duo simul esse vera, quod Spiritus Sanctus velit aliquem movere ad actum caritatis, et quod ipse caritatem amittat peccando. » Ac *De Carit.* a. 12.: « Ex parte Spiritus Sancti moventis animam ad dilectionem Dei et proximi; et quantum ad hoc necesse est dicere, quod motio Spiritus Sancti semper est efficax secundum suam intentionem. Operatur enim in anima Spiritus Sanctus dividens singulis prout vult, ut dicitur I Cor. 1, 12; et ideo quibus Spiritus Sanctus pro suo arbitrio vult dare perseverantem divinae dilectionis motum, in his peccatum caritatem excludens esse non potest. Dico: *Non posse* ex parte virtutis motivae, quamvis possit ex parte vertibilitatis liberi arbitrii. »

Arg. 3<sup>um</sup>. — Ad tres possunt reduci actus liberi arbitrii, in quibus manifestatur perfecte efficacia divinae praevenientis gratiae, qua Deus movet nos ad opus salutare, sc.: 1<sup>o</sup> motus liberi arbitrii in Deum in justificatione adulti; 2<sup>o</sup> motus liberi arbitrii, quo homo justificatus utitur fide, spe, caritate, ceterisque simul cum gratia infusis habitibus ad meritorie operandum; 3<sup>o</sup> motus liberi arbitrii, quo homo justificatus perseverat usque in finem vitae, jungendo gratiam cum gloria. Sed gratuita Dei motio, qua Deus movet nostrum liberum arbitrium ad bonum meritorium vitae aeternae in justificatione, et post justificationem, et in ultimo motu liberi arbitrii, quo pervenit ad terminum viae et meretur

ipsam vitae consecutionem, haec, inquam, gratia praeveniens movens est efficax ex ipsa Dei intentione atque proposito.

*Quoad motum liberi arbitrii in justificatione.* — In justificatione enim hominis adulti est motus liberi arbitrii duplex: unus, quo per desiderium tendit in Dei justitiam, et alius, quo detestatur peccatum, ut ex professo supra q. 113. explanatum fuit. Sed in hujusmodi actibus fidei, caritatis, timoris filialis, humilitatis atque detestationis culpaе, libera hominis voluntas « est mota et non movens, solus autem Deus movet »; quoniam justificatio est effectus *gratiae operantis*; et motus liberi arbitrii, dum justificamur ac Dei justitiae consentimus, « non est causa gratiae, sed effectus; unde tota operatio pertinet ad gratiam », ut ostensum manet per totam q. 113. et q. 111. a. 2.

*Quoad motum liberi arbitrii post justificationem.* — Hujusmodi autem actus liberi nihil aliud sunt nisi usus gratiae sanctificantis, quae mediantibus habitibus infusis operatur meritorie. « Rectus autem gratiae usus est per opera caritatis; quae quidem, secundum quod sunt de necessitate virtutis, pertinent ad praecepta moralia. » (I. q. 108. a. 2.) Sed, ut D. Thomas docet Rom. 9. lect. 3. : « Divinum beneficium non solum extendit se ad infusionem gratiae, qua homo justificatur, sed etiam ad gratiae usum... Sic igitur ipse usus gratiae est a Deo. » Ac I Cor. 15. lect. 1. : « Deus enim non solum infundit gratiam, qua nostra opera grata fiunt et meritoria, sed etiam movet ad bene utendum gratia infusa, et haec vocatur gratia cooperans... Ostendit (Apostolus) usus efficaciam, quia hoc non a se solo, sed ex instinctu et adjutorio Spiritus Sancti; et ideo dicit : Non autem ego solus operor, sed gratia Dei mecum, quae movet voluntatem ad hoc. Is. 26, 12 : *Omnia opera nostra operatus es nobis, Domine.* » Praeterea, D. Thoma docente I-II. q. 16. a. 2. : « Uti est applicare aliquod principium actionis ad actionem... Applicare autem aliquid ad alterum non est nisi ejus, quod habet super illud arbitrium. » Et a. 1. : « Usus rei importat applicationem rei illius ad aliquam operationem; unde et operatio, ad quam applicamus rem aliquam, dicitur usus ejus,

sicut equitare est usus equi, et percutere usus baculi. » Nos itaque per liberum arbitrium utimur gratia sanctificante et applicamus habitus infusos fidei, spei et caritatis aliarumque virtutum ad bene et meritorie operandum; sed Deus per suam gratiam praevenientem utitur nobis et applicat potentiam nostrae liberae voluntatis ad ipsum usum gratiae sanctificantis et operationem. Nos habemus arbitrium super gratiam habituales infusam ac virtutum habitus; sed Deus habet arbitrium super ipsum nostrum liberum arbitrium, et movens ipsum actuali gratia applicat et praedeterminat; et non nisi applicati seu praedeterminati a Deo per suam gratiam actualem nos utimur gratia habituali.

*Quoad motum liberi arbitrii, quo finaliter homo in gratia sanctificante perseverat.* — D. Thomas, I. q. 104. a. 1. ad 4. ait : « Conservatio rerum a Deo non est per aliquam novam actionem, sed per continuationem actionis, quae dat esse,... sicut etiam conservatio luminis in aere est per continuatum influxum a sole. » Cum ergo perseverantia consistat in gratiae sanctificantis conservatione; conservatio autem gratiae justificantis sit ejus continuata productio; productio autem gratiae sit illa motio, qua Deus infundit illam in essentia animae, et habitus caritatis ac reliquarum supernaturalium virtutum in animae potentiis; motio autem ista sit, qua liberum arbitrium inclinatur ad bonum usque ad finem : manifestum est, quod ista admirabilis inclinatio liberi arbitrii usque in finem efficitur a gratuita Dei motione ex intrinseca virtutis propriae efficacia. Praeterea, ut docet D. Thomas I-II. q. 114. a. 9. : « Deus gratis perseverantiae donum largitur, cuicumque largitur. » Et II Tim. 2. lect. 3. : « Si enim quaeras in singulari, quare Deus dat huic donum perseverantiae et non illi, non habet rationem nisi solam Dei voluntatem. » Et *De Carit.* a. 12. ad 15. : « Caritas... est inamissibilis... ex sola virtute motionis Spiritus Sancti; et sic dicuntur confirmati, quicumque fuerunt confirmati in statu viae. »

Arg. 4<sup>um</sup>. — De ratione gratiae ab intrinseco efficacis est :



1<sup>o</sup> quod ex ipsius efficacia procedat hoc ipsum, quod homo non ponit obstaculum Deo moventi; 2<sup>o</sup> quod, si homo obstaculum ponat, ab illo, cui gratia ex se efficax confertur, istud obstaculum removeatur; 3<sup>o</sup> quod Deus per motionem ex se efficacem immutet interius potentiam liberae voluntatis, et faciat nos Deus velle quod placet ei.

Sed omnes ac singulae proprietates praedictae attribuuntur ab Angelico Doctore gratiae actuali, qua Deus nos movet ad bonum. Hebr. 12. lect. 3. : « Respondeo dicendum, quod hoc ipsum, quod aliquis non ponit obstaculum, ex gratia procedit. Unde si aliquis ponat, et tamen moveatur cor ejus ad removendum illud, hoc est ex dono gratiae Dei vocantis per misericordiam suam. Gal. 1, 15 : *Cum autem placuit ei, qui me segregavit ex utero matris meae et vocavit per gratiam suam.* Hoc autem donum gratiae non est gratum faciens. Quod ergo a quibusdam removetur istud obstaculum, hoc est ex misericordia Dei; quod autem non removetur, hoc est ex justitia ejus. » Ac ibid. 13. lect. 3. : « Dupliciter autem aptatur homo ad bene faciendum. Uno modo exterius operando, et sic unus homo aptat alium persuadendo vel comminando; alio modo, aliquid interius exhibendo, et sic solus Deus aptat voluntatem, qui solus ipsam potest immutare. Prov. 21, 1 : *Cor regis in manu Domini; quocumque voluerit, inclinabit illud.* Unde dicitur : *faciens in vobis.* Philipp. 2, 13 : *Deus est qui operatur in nobis velle et perficere.* Quid autem faciet? Quod placitum est coram se, id est, faciet vos velle, quod placet ei. Haec autem sunt fides et mansuetudo et timor Domini. Haec autem omnia habentur per Christum; nihil enim a Patre impetratur nisi per Filium. »

Arg. 5<sup>um</sup>. — Joh. cap. 1. : « Quotquot autem receperunt eum, dedit eis potestatem filios Dei fieri, his, qui credunt in nomine ejus; qui non ex sanguinibus, neque ex voluntate carnis, neque ex voluntate viri, sed ex Deo nati sunt. » Supra quae D. Thomas Joh. 1. lect. 5. : « Dedit autem hanc potestatem suscipiendi gratiam dupliciter : 1<sup>o</sup> praeparando et

hominibus proponendo. Sicut enim qui facit librum et proponit homini ad legendum, dicitur dare potestatem legendi, ita Christus, per quem gratia facta est, ut dicitur infra, et qui operatus est salutem in medio terrae, ut dicitur Ps. 73. dedit nobis potestatem filios Dei fieri per gratiae susceptionem. 2º Quia hoc non sufficit, cum etiam liberum arbitrium indigeat ad hoc, quod moveatur ad gratiae susceptionem, auxilio gratiae divinae, non quidem habitualis, sed moventis : ideo dat potestatem movendo liberum arbitrium hominis, ut consentiat ad susceptionem gratiae, juxta illud Thren. 5, 21 : *Converte nos, Domine, ad te* (movendo voluntatem nostram ad amorem tuum), *et convertemur*. Et hoc modo vocatur interior vocatio, de qua dicitur Rom. 8, 30 : Quos vocavit interius voluntatem instigando ad consentiendum gratiae, hos et justificavit gratiam infundendo. Quia vero per hanc gratiam habet homo hanc potestatem conservandi se in divina filiatione, potest et aliter dici : Dedit eis, id est eum recipientibus, potestatem filios Dei fieri, id est gratiam, per quam potentes sunt in divina filiatione conservari. I Joh. 5, 18 : Omnis qui natus est ex Deo, non peccat, sed gratia Dei, per quam regeneramur in filios Dei, conservat eum. Sic ergo dedit eis potestatem filios Dei fieri per gratiam gratum facientem, per operum perfectionem, per gloriae adeptionem ; et haec praeparando, movendo et conservando gratiam. »

Unde haec permagna potestas, quam Deus dat nobis, filios Dei fieri, filios Dei esse, in esse filiorum Dei crescere, atque nos in divina filiatione conservare, tota, quanta est, a Deo est ; et non est volentis neque currentis, sed miserentis est Dei. 1º : Primo namque Deus dat istam maximam potestatem omnibus hominibus ; quoniam omnes vult salvos fieri, et pro omnibus Verbum caro factum est et habitavit in nobis. Pro omnibus enim hominibus Christus est natus, pro omnibus passus, pro omnibus mortuus, et pro omnibus oravit.

Iste est primus modus dandi potestatem filios Dei fieri : praeparando et hominibus proponendo. Sed hoc adhuc non sufficit ad hoc, quod homo formaliter fiat et sit filius Dei. Unde D. Thomas, *III. Sent. dist. 19. q. 1. a. 1.* : « Ex

parte autem nostra requiritur, ut nos praeparemus ad meriti Christi effectum in nobis suscipiendum per fidem intellectus et caritatis affectus et per imitationem operis, quod quidem non contingit in omnibus; et ideo quoad sufficientiam satisfactionis et meriti, omnia peccata per Christi passionem deleta sunt, non autem quoad efficientiam. » Similiter III. q. 49. a. 1. ad 4. et ad 5. : « Quia passio Christi praecessit ut causa quaedam universalis remissionis peccatorum, necesse est, quod singulis adhibeatur ad deletionem propriorum peccatorum. Hoc autem fit per baptismum et poenitentiam et alia sacramenta, quae habent virtutem ex passione Christi... Ut sic passio Christi nobis applicetur non solum quantum ad intellectum, sed etiam quantum ad effectum. » Ac Joh. 17. lect. 2. : « Dicendum, quod Christus, quantum est de se, pro omnibus oravit, quia oratio sua, quantum est de se, efficax est, ut valeat toti mundo; sed tamen non in omnibus sortitur effectum, nisi in sanctis et electis Dei, et hoc propter impedimentum mundanorum. »

2<sup>o</sup> Deus dat potestatem filios Dei fieri, movendo liberum hominis arbitrium, ut consentiat ad gratiae sanctificantis susceptionem, et movendo voluntatem nostram ad amorem ipsius; atque hujusmodi instigationis et motionis terminus est ipsemet consensus liberi arbitrii ad susceptionem gratiae habitualis. Dum gratia infunditur, immutantur intrinsece interiora hominis, immutatur ipsa essentia animae per gratiae infusionem, immutatur intellectus per fidem et prudentiam infusam, immutatur potentia voluntatis per infusionem caritatis; et terminus horum omnium immutationum est inhaesio gratiae sanctificantis in essentia animae velut in subjecto, et actus fidei, quae operatur per caritatem, in intellectu et libera voluntate. Et tunc potestas *fieri filios Dei* terminatur in potestatem *filiis Dei esse*.

3<sup>o</sup> Eo ipso, quod homo jam est regeneratus in filium Dei per ipsam gratiam sanctificantem, habet in semetipso potestatem meritorie operandi et potestatem perseverandi usque in finem; sed tamen liberum hominis arbitrium indiget divina motione, qua reducatur de potentia in actum, de posse recte

ac meritorie agere ad ipsam actionem rectam et meritoriam, ut supra ostensum est q. 109. a. 9. Similiter, ut liberum arbitrium potestatem perseverandi non amittat, indiget, ut Deus illam conservet, et ut per divinam motionem inclinetur a Deo ad hoc, quod actualiter perseveret.

Sunt ergo tres principales liberi arbitrii gratuitae motiones, sc. : motio, qua movetur ad gratiae sanctificantis consecutionem; motio, qua movetur ad utendum gratia sanctificante; et motio, qua movetur ut perseveret. Multis enim datur gratia sanctificans, quibus non datur uti gratia; et multis datur gratia et etiam uti ea, quibus non datur perseverare in gratia, ut D. Thomas docet supra q. 109. a. 9. et 10.

Motus ergo, quo liberum arbitrium movetur ad gratiae sanctificantis susceptionem, et ad ipsius gratiae usum, et ad perseverantiam in ipsa gratia, dicitur gratia praeveniens movens, et est ex se efficax. Quoniam ista efficacia, ex qua derivatur firmitas et robur liberae voluntatis nostrae, descendit ex ipsa voluntate Dei praedestinantis, vocantis, iustificantis et glorificantis nos.

Arg. 6<sup>um</sup>. — D. Thomas Rom. 8. lect. 6. : « Cum dicit (Apostolus) : *Quos praedestinavit* etc., ponit ea, quae ex tempore sancti divinitus consequuntur; et primo ponit vocationem, cum dicit : *Quos praedestinavit, hos et vocavit*. Praedestinatio autem ejus irrita esse non potest, secundum illud Is. 14, 24 : *Juravit Dominus exercituum dicens : Si non ut putavi, ita erit, et quomodo mente tractavi, sic eveniet*. Primum autem, in quo incipit praedestinatio impleri, est vocatio hominis; quae quidem est duplex. Una exterior, quae fit ore praedicatoris; Prov. 9, 3 : *Misit ancillas suas, ut vocarent ad arcem*. Hoc modo Deus vocavit Petrum et Andream, ut dicitur Math. cap. 4. Alia vero vocatio est interior, quae nihil aliud est quam quidam mentis instinctus, quo cor hominis movetur a Deo ad assentiendum his, quae sunt fidei vel virtutis; Is. 41, 2 : *Quis suscitavit ab oriente justum et vocavit, ut sequeretur se?* Et haec vocatio necessaria est, quia cor nostrum non se ad Deum converteret,



nisi ipse Deus nos ad se traheret. Joh. 6, 44 : *Nemo potest venire ad me, nisi Pater, qui misit me, traxerit eum.* Thren. 5, 21 : *Converte nos, Domine, ad te, et convertemur.* Et etiam haec vocatio est efficax in praedestinis, quia hujusmodi vocationi assentiunt. Joh. 6, 45 : *Omnis, qui audivit a Patre meo et didicit, venit ad me.* Unde secundo ponit justificationem, cum dicit : *Quos vocavit, hos et justificavit*, sc. gratiam infundendo. Supra 3, 24 : *Justificati gratis per gratiam ipsius.* Haec autem justificatio, etsi in aliquibus frustretur, quia non perseverant usque ad finem, in praedestinis tamen numquam frustratur. Unde tertio ponit magnificationem cum subdit : *Hos et magnificavit.* Et hoc dupliciter, sc. uno quidem modo per profectum virtutis et gratiae ; alio autem modo per exaltationem gloriae. » Ex hac altissima D. Thomae doctrina manifeste apparet quaestionem de *efficacia* divinae gratiae resolvi in quaestionem de praedestinatione. Quod quidem S. Thomas jam docuerat, dum I. q. 23. a. 5. scripsit : « Non est autem distinctum, quod est ex libero arbitrio et ex praedestinatione ; sicut nec est distinctum, quod est causa secunda et causa prima. Divina enim providentia producit effectus per operationes causarum secundarum, ut supra dictum est q. 19. a. 5. Unde et id, quod est per liberum arbitrium, est ex praedestinatione. »

Jam vero hominis est : determinare semetipsum ad bene operandum, movere semetipsum ad obediendum Deo vocanti, et hujusmodi vocationi assentire et gratiam in vacuum non accipere, et Spiritui Sancto non resistere neque Spiritum Sanctum contristare, talenta gratiae duplicare, atque in gratia sanctificante accepta velle perseverare usque ad finem. Omnia ergo haec per liberum arbitrium sunt, ab homine ex libera voluntate sua fiunt ; verumtamen sunt ex praedestinatione, et fiunt primo et principaliter a causa prima. Unde D. Thomas, II Tim. 2. lect. 3. : « Hujus firmitas dependet primo ex divina praedestinatione ; secundo, ex libero arbitrio nostro ; et ideo quantum ad primum dicit : Hoc firmum fundamentum habens hoc signaculum, id est, hoc est signum

hujus firmitatis. Et haec est prima pars signaculi, sc. ex divina praedestinatione; quia novit Dominus qui sunt ejus; et haec est notitia divinae praedestinationis. Joh. 10, 14 : *Ego cognosco oves meas...* Sed quantum ad secundum dicit : *Discedat ab iniquitate omnis, qui invocat nomen Domini*, quasi dicat : Sic praedestinati sunt a Deo, quod per liberum arbitrium salvabuntur, quia ex quo aliquis finaliter non adhaeret peccato, ostendit se esse praedestinatum. »

Divina autem vocatio dicitur etiam efficax in praedestinis, quia ipsi hujusmodi vocationi assentiunt; etenim in praedestinis nec vocatio, nec justificatio, nec bonus usus gratiae justificantis umquam frustrantur. Quare? Ratio immediata est : quia liberum hominis arbitrium vult assentire Deo vocanti, justificationis donum acceptare, et uti gratia, et in ipsa perseverare. Quare autem perseverare, uti et assentire vult? Ratio suprema est : quia Deus vult voluntate absoluta ac decretoria liberum hominis arbitrium ad se trahere. Nam praedestinatio ejus irrita esse non potest; et praeterea cor nostrum non se ad Deum converteret, nisi ipse Deus nos ad se traheret. Cum autem Deus nos ad se trahit, quomodo se habet libera nostra voluntas ad voluntatem Dei? Sub qua relatione comparantur ad invicem Dei gratia movens cor nostrum et cor nostrum movens etiam se sub gratia Dei movente? Fortasse velut duae causae parallelae, quasi duo portantes lapidem aut tamquam duo trahentes currum? Minime; quoniam concursus simultaneus in ordine supernaturali est error Pelagianorum plane manifestus.

Cum ergo oporteat dicere, quod gratuita Dei motio sit semper praeveniens liberum hominis arbitrium, quomodo praemovet liberi arbitrii potentiam dumtaxat moraliter, in ordine causae finalis, vel etiam physice in ordine quoque causae efficientis? Si tantummodo moraliter, alliciendo, tenendo, etc., tunc habebitur : 1º quod sub eodem auxilio unus homo convertetur, et alter non convertetur; vel forsán majora a Deo accepit auxilia qui non convertitur, quam qui convertitur; 2º quod proinde non est Deus, qui discernit per

gratiam suam hominem, sed homo, qui discernit semetipsum per suam liberam voluntatem; 3<sup>o</sup> quod ratio suprema, quare inter eos, qui convertuntur, in uno est major quam in altero gratia et caritas, est non Deus, sed homo; 4<sup>o</sup> quod certitudo praedestinationis venit reducenda non in voluntatem Dei, sed in voluntatem hominis ante omne decretum praevisam; 5<sup>o</sup> quod, « cum etiam gratia (ait D. Thomas, Rom. 9. lect. 3.)... non velit, neque currat, potuisset Apostolus e converso dicere : Non est misereantis Dei, sed volentis et currentis; quod aures pie non ferunt. Unde plus aliquid ex his verbis intelligendum, ut sc. principalitas gratiae Dei attribatur; semper enim actio magis attribuitur principali agenti quam secundario : puta, si dicamus, quod securis non facit arcem, sed artifex per securim; voluntas autem hominis movetur a Deo ad bonum : unde supra 8, 14 dictum est : *Qui spiritu Dei aguntur, hi sunt filii Dei*. Et ideo hominis operatio interior non est homini principaliter, sed Deo attribuenda; Philipp. 2, 13 : *Deus est qui operatur in nobis velle et perficere pro bona voluntate*. »

Assensus itaque liberi arbitrii nostri ad Dei vocationem est magis Deo attribuendus quam nobis; Deus est enim, qui intrinsece inclinat potentiam liberi arbitrii; Deus, qui physice immutat cor et vertit illud quocumque vult; Deus, qui reducit liberam hominis voluntatem de potentia in actum. Ex eo, quod praesdestinati assentiunt vocationi Dei, ostendunt vocationem Dei esse ex se efficacem; assensus liberi arbitrii est effectus praedestinationis, quae irrita esse non potest, et quae incipit impleri per vocationem interiorem, qua Deus nos ad se trahit. Unde D. Thomas in Joh. 6. lect. 5. : « Attractio autem Patris efficacissima est; quia omnis qui audivit a Patre et didicit, venit ad me. » Et 10. lect. 5. : « Quod quidem nulli datur, nisi cui praeparatum est ab aeterno; et ideo illi soli credunt in ipsum, qui ad hoc ordinati sunt a Deo per aeternam praedestinationem. » Et 18. lect. 6. : « Qui est ex veritate, audit vocem meam, non solum exterius, sed credendo interius et amando, ac opere implendo. Supra 6, 45 : *Omnis qui audivit a Patre et didicit, venit ad me*. »

Sed unde hoc homini, ut audiat vocem meam? Inde sc. quia est ex veritate, quae est Deus..... Ille ergo audit vocem credendo et amando, qui sc. est ex veritate, id est, qui accepit hoc munus, ut veritatem amet. Sed attende, quod non dicit: Omnis, qui audit vocem, est ex veritate; quia sequeretur, quod ideo essemus ex veritate, quia credimus; cum tamen ideo credamus, quia sumus ex veritate, in quantum sc. accepimus donum Dei, per quod credimus et amamus veritatem. Ephes. 2, 8: *Gratia salvati estis per fidem, et hoc non ex vobis; Dei enim donum est.* »

Sic ergo qui consentit vocationi, et qui non consentit, ostendunt, quod gratia illis collata fuit efficax, vel non fuit efficax. Adhaerere bono et in illo perseverare, signum est praedestinationis et gratiae efficacis. Resistere Deo vocanti, vel a gratia excidere, signum est huiusmodi hominem carere gratia efficaci. Unde D. Thomas, II Cor. 13. lect. 2.: « Quando aliquis non tendit ad suam perfectionem, signum est, quod non habet satis de gratia Dei. » Et II Tim. 2. lect. 3.: « Ex hoc, quod aliquis finaliter non adhaeret peccato, ostendit se esse praedestinatum. » Sed haec est differentia, quod non consentire gratiae est solummodo *signum*, quod talis gratia non fuit efficax, nullo modo est *effectus*; et consensus gratiae moventi est *signum* ostendens gratiae efficaciam, et *effectus*. Qui resistit, resistit per defectum propriae voluntatis, non ex carentia gratiae; qui autem consentit, consentit quidem propria sua voluntate, sed virtute etiam propria divinae gratiae moventis. Unde D. Thomas Ephes. 5. lect. 5.: « Dicendum est, quod ad justificationem impii duo requiruntur, sc.: liberum arbitrium cooperans ad resurgendum, et ipsa gratia. Et certe hoc ipsum habet liberum arbitrium a gratia praeveniente, et postea meritorie operari, a gratia subsequente. Unde dicitur Thren. 5, 21: *Converte nos Deus, et convertemur.* » Et Joh. 20. lect. 3.: « Licet tamen quadam generali motione omnes res moveantur a Deo, specialiter tamen ad hominis justificationem necessaria est gratia specialis. Effectus vocationis ponitur, cum dicit: *conversa illa* (Maria Magdalena) *dicit ei: Rabboni, quod dicitur*



*magister*... Et ideo statim vocata ex nomine recognovit auctorem dicens : *Rabboni, quod dicitur magister* ; sic enim eum consueverat vocare. In quo datur intelligi, quod vocatio Christi est causa justificationis nostrae et confessionis verae. »

Arg. 7<sup>um</sup>. — Joh. 5, 2-9 : « Est autem Hierosolymis probatica piscina... Erat autem quidam homo ibi triginta et octo annos habens in infirmitate sua. Hunc cum vidisset Jesus jacentem et cognovisset, quia jam multum tempus haberet, dixit ei : Vis sanus fieri ? Respondit ei languidus : Domine, hominem non habeo... Dicit ei Jesus : Surge, tolle grabatum tuum, et ambula. Et statim sanus factus est homo ille, et sustulit grabatum suum et ambulabat. »

Quae verba declarans D. Thomas, lect. 1. : « Praecepit autem Dominus *naturae* et *voluntati* hominis ; haec enim duo sub potestate ejus sunt. Naturae praecepit, cum dicit : *Surge* ; non enim hoc voluntati praecipitur, quia hoc non erat in ejus potestate, sed naturae, quam Dominus praeci-  
piendo immutavit, dando ei virtutem, qua surgere posset. Voluntati vero duo praecepit, sc. : *Tolle grabatum et ambula*..... Haec tria in justificatione Dominus praecepit. Primo, quod surgat, recedendo a peccato. Eph. 5, 14 : *Surge, qui dormis, et exsurge a mortuis*. Secundo praecipitur : *Tolle grabatum*, satisfaciendo de commissis. Per grabatum enim, in quo homo requiescit, significatur peccatum. Tollit ergo homo grabatum suum, quando fert onus poenitentiae sibi pro peccato impositum. Mich. 7, 9 : *Iram Domini portabo, quoniam peccavi ei*. Tertio, ut ambulet proficiendo in bono, secundum illud Ps. 83, 8 : *Ibunt de virtute in virtutem*. »

En gratiam ab intrinseco efficacem, nempe : 1<sup>o</sup> qua Dominus praecipit voluntati, sicut praecipit omni naturae creatae, ut Dominus ac Factor omnium rerum et Creator ipsius liberi arbitrii ; 2<sup>o</sup> qua libera hominis voluntas fit actu, operatione voluntatis propria sub potestate Dei moventis ; 3<sup>o</sup> qua Dominus praeci-  
piendo immutat ipsam liberi arbitrii potentiam, dando ei virtutem, qua surgere valeat, et surgat recedendo a peccato ; 4<sup>o</sup> qua homo justificatus satisfacit,

meritorie operando, pro peccatis commissis; et 5<sup>o</sup> qua homo, utens ipsa gratia justificante, ambulat proficiendo in bono, et merendo augmentum ipsius gratiae et gloriae.

Arg. 8<sup>um</sup>. — Apostolus, Rom. 8, 35-38 ait: « Quis ergo nos separabit a caritate Christi? Tribulatio, an angustia, an fames, an nuditas, an periculum, an persecutio, an gladius?... Sed in his omnibus superamus propter eum, qui dilexit nos. Certus sum enim, quia neque mors, neque angeli, neque principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia potest nos separari a caritate Dei, quae est in Christo Jesu Domino nostro. »

Quae Apostoli verba sic explicat D. Thomas lect. 7. : « Potest autem haec quaestio ex praemissis duplici ratione concludi; primo quidem sic : tot beneficia sunt nobis divinitus collata et tam efficacia, ut nullus contra ea possit. Omnia autem praedicta beneficia ad hoc tendunt, ut nos simus in caritate radicati et fundati, ut dicitur Ephes. 3. : *Quis ergo nos separabit a caritate Christi?* qua sc. Christum diligimus et proximum, secundum quod ipse praecepit. Joh. 13. : *Mandatum novum do vobis, ut diligatis invicem.* Alio modo sic : Dictum est, quod magna beneficia Deus sanctis suis confert, ex quorum consideratione adeo caritas Christi in cordibus nostris fervet, quod nihil eam extinguere potest. Cantic. 8, 7 : *Aquae multae non potuerunt extinguere caritatem.* »

Jam vero ipse D. Thomas lect. 6. indicat expresse, quod certitudo Apostoli proveniebat ex consideratione efficaciae caritatis atque ex efficacia ipsa, qua Deus movet praedestinos. Unde scribit : « Et ideo Deus omnia convertit in bonum his, qui eum diligunt. Secundo attenditur id, quod est ex parte Dei, qui primo fideles ab aeterno praedestinavit; secundo ex tempore vocat, et tertio sanctificat; et haec tria tangit cum dicit : *His, qui secundum propositum vocati sunt sancti*, id est, praedestinis, vocatis et sanctificatis, ut propositum referatur ad praedestinationem, quae secundum

Augustinum est propositum miserandi... Hoc autem Apostolus se scire dicit ex persona sanctorum, dicens : *Scimus*. Procedit autem haec scientia tum ex experimento, tum etiam ex consideratione efficaciae caritatis et etiam praedestinationis aeternae. Is. 46. : *Omnis voluntas mea implebitur, et omne consilium meum fiet*. Deinde cum dicit : *Nam quos praescivit* etc., probat, quod dixerat, tali ratione : Nullus potest nocere his, quos Deus promovet; sed praedestinos diligentes Deum Deus promovet; ergo nihil potest eis nocere, sed omnia cedunt eis in bonum. » Ex quo patet, quomodo firmitas voluntatis, fortitudo virtutis, ac robur ipsum liberi arbitrii, atque efficacia ceterorum beneficiorum, quae nobis divinitus conferuntur, procedunt ex praedestinatione et fundantur in praemotione, qua Deus praedestinos Deum ipsum diligentes promovet.

Arg. 9<sup>um</sup>. — D. Thomas, *III. Sent.* dist. 3. q. 1. a. 2. loquens de gratia atque de efficacia ipsius gratiae, quam Deus contulit Beatissimae Virgini, ait : « In prima sanctificatione, inquit, gratia collata fuit ad bonum efficaciter liberum arbitrium inclinans, quamvis non esset sufficiens ad tollendum flexibilitatem liberi arbitrii in malum, quam etiam in primo statu habuit. In secunda vero sanctificatione gratia superaddita fuit, quae ita potentiam liberi arbitrii impleteret, ut in contrarium flecti non posset, non quidem tollendo naturam libero arbitrio, sed defectum; sicut materia coeli ex eo, quod subsistit formae, quae omnem privationem ab ea excludit, non est in potentia ad corruptionem. Sed in tertia exaltatione ejus per gratiam perfectam in gloriam transeuntem fini conjuncta est, ex quo perfecta immobilitas causatur. Potentia peccandi aufertur dupliciter. Vel per hoc, quod liberum arbitrium ultimo fini conjungitur, qui ipsum superimplet, ut nullus defectus in eo remaneat; et hoc fit per gloriam; unde in nullo puro viatore sic peccandi potentia solvitur, ut cum ablatione potentiae peccandi tollatur potentia moriendi, nisi in Christo, in quo dispensative remansit ad opus redemptionis complendum. Alio modo aufertur per hoc, quod

gratia tanta infunditur, quae omne defectum tollat; et sic in Beata Virgine, quando concepit Dei Filium, ablata est peccandi potentia, quamvis in statu viae ipsa Virgo permaneret. »

Et ibid. *III.* dist. 12. q. 2. a. 1. : « Respondeo dicendum, quod simpliciter loquendo Christus nullo modo peccare potuit... Et ideo ipse Christus tantam gratiae plenitudinem habuit, ut etiam in quantum viator peccare non potest. Unde etiam et illi, qui proximi sibi fuerunt, confirmati sunt, ut Apostoli, etiam viatores existentes, mortaliter peccare non potuerint, quamvis potuerint peccare venialiter. »

Et *De Verit.* q. 24. a. 9. : « Per gratiam viae ita potest homo bono astringi, quod non nisi valde de difficili peccare possit, per hoc, quod ex virtutibus infusis inferiores vires refrenantur, et voluntas in Deum fortius inclinatur, et ratio perficitur in contemplatione veritatis divinae, cujus continuatio ex fervore amoris proveniens hominem retrahit a peccato. Sed totum, quod deficit ad confirmationem, completur per custodiam divinae providentiae in illis, qui confirmati dicuntur; ut sc. quandocumque occasio peccati se ingerit, eorum mens divinitus excitetur ad resistendum. »

Et II Cor. 1. lect. 5. : « Licet enim homo ex libero arbitrio *possit* uti lingua sua ad verum vel ad falsum loquendum, nihilominus tamen Deus potest confirmare hominem sic in vero, ut non nisi vera loquatur. Si ergo Deus aliquem confirmaret in vero, manifestum est, quod non diceret falsum. »

Ex supra positis manifeste apparet, quomodo per gratiam viae ita potest homo bono astringi, et ita ejusdem mens ad resistendum peccato divinitus excitari, et ad bene operandum voluntatis humanae affectus inclinari, ut :

1<sup>o</sup> Quamvis de facto non tollat flexibilitatem liberi arbitrii ad malum, tamen gratia ad bonum efficaciter liberum arbitrium inclinet.

2<sup>o</sup> Ita etiam potentiam liberi arbitrii impleat, quod aufertur ipsa peccandi potentia seu potentialis flexibilitas ad malum.



3<sup>o</sup> Quod perfecta immobilitas voluntatis humanae in bono causetur, atque sic in vero atque in bono confirmetur, ut homo non nisi vera loquatur et non nisi bona desideret atque faciat. Unde Apostoli, etiam viatores existentes, post Pentecosten ita fuerunt confirmati in bono, ut mortaliter peccare non potuerint, quamvis potuerint peccare venialiter. Beatissima autem Virgo Maria ita a gratia Dei fuit semper praeventa, ut nec mortaliter nec venialiter peccare potuerit, quamvis in statu viae ipsa Virgo permaneret.

Et hoc facit gratia Dei, « non quidem tollendo *naturam* libero arbitrio, sed *defectum* ». « Vertibilitas liberi arbitrii perficitur per gratiae plenitudinem, sicut et potentia materiae terminatur per actum formae totam potentialitatem materiae tollentis. » « Impotentia peccandi, quae est ex perfectione in bonitate, non tollit rationem meriti, nec voluntarium tollit ; sed ponit voluntatem confirmatam ad unum. » « Affectus pervenit ad finem, non solum quando finem perfecte possidet, sed etiam quodammodo quando ipsum intense desiderat ; et per hunc modum aliquo modo in statu viae aliquis potest confirmari in bono. » « Gratia secundum esse suum est in libero arbitrio per modum ejus, sicut accidens in subjecto ; sed tamen ad rationem suae immutabilitatis liberum arbitrium pertrahit, ipsum Deo conjungens. » Atque ita caritas viae est « inamissibilis, non ex modo inhaerentiae ipsius ad subjectum, sed *ex sola virtute motionis* Spiritus Sancti ; et sic dicuntur confirmati, quicumque fuerunt confirmati in via ».

Ecce fundamenta verae concordiae inter libertatem hominis et gratiam Dei illuminantis intellectum ad cognoscendum et ad bene operandum inclinantis affectum, et facientis nos libere omnia praecepta implere <sup>1</sup>.

<sup>1</sup> Vide I-II. q. 108. a. 1. ad 2. ; Hebr. 8. lect. 2. et 12. lect. 5. ; II. Cor. 3. lect. 1. ; III. Sent. locis citatis ; De Verit. q. 24. a. 8. et a. 9. Et III. q. 27. a. 4. et De Carit. a. 12. ad 15.

## VI

**Argumenta ex doctrina philosophica D. Thomae circa Deum ut est Primus Motor et Prima Causa.**

Gratiam itaque praevenientem, qua Deus nos movet et ad gratiae sanctificantis donum libere acceptandum, et ad ipsius jam susceptae in nobis gratiae habitu utendum, et ad usque in finem in bono usu gratiae perseverandum, esse ex se et per se efficacem, ab intrinseco sc. ipsius divinae virtutis motivae : doctrina quidem est in S. Scripturis tradita, per Romanos Pontifices commendata, a Conciliis in suis definitionibus contra Semipelagianos simul ac contra Lutheranos praesupposita et propugnata, a S. Augustino vehementer inculcata firmiterque retenta, et tandem a D. Thoma in terminis expresse tradita miroque lucis splendore multis in locis explanata. Nunc autem oportet etiam ostendere hanc de efficacia intrinseca divinae motionis doctrinam intimum necessariumque habere nexum cum scientifica demonstratione existentiae Dei, creationis rerum, rerumque in esse creato conservatione.

Deum enim existere ; a Deo omne ens, quod quocumque modo est, esse ; Deum non solum dare formas rebus, sed etiam eas in esse conservare et eas applicare ad agendum : veritates sunt in philosophia christiana fundamentales ; atque argumenta, quibus a D. Thoma demonstrantur, ita inter se ad invicem connectuntur, ut demonstratio processionis rerum a Deo per creationem compleat revera demonstrationem scientificam pro existentia Dei ; et demonstratio conservationis rerum creatarum derivetur ex ipsa vera genuinaque rerum creationis notitia ; et necessitas divini influxus in potentias creaturarum omnium praevis, prioritatem naturae et causalitatis, agentis ad omnem prorsus operationem cunctosque effectus constituat velut coronam ipsorum argumentorum pro existentia Dei plene ostendenda. Deum

operari in quolibet operante, atque ad omnem operationem creaturae esse necessarium praevium influxum divinum physice potentiam creaturae immutantem atque de posse agere ad agere actu reducentem : hoc necessario admittendum, sive attendatur ratio *Causae Primae*, sive consideretur ratio *causae secundae*.

## § 1

### Argumentum ex doctrina

#### D. Thomae circa Deum ut est Primus Movens.

« Respondeo dicendum, quod Deum esse quinque viis probari potest. Prima autem et manifestior via est, quae sumitur ex parte motus. Certum est enim et sensu constat aliqua moveri in hoc mundo. Omne autem quod movetur, ab alio movetur ; nihil enim movetur nisi secundum quod est in potentia ad illud ad quod movetur. Movet autem aliquid secundum quod est actu ; movere enim nihil aliud est quam educere aliquid de potentia in actum. De potentia autem non potest aliquid reduci in actum nisi per aliquod ens in actu ; sicut calidum in actu, ut ignis, facit lignum, quod est calidum in potentia, esse actu calidum, et per hoc movet et alterat ipsum. Non autem est possibile, ut idem sit simul in actu et potentia secundum idem, sed solum secundum diversa. Quod enim est calidum in actu, non potest simul esse calidum in potentia, sed est simul frigidum in potentia. Impossibile est ergo, quod secundum idem et eodem modo aliquid sit movens et motum, vel quod moveat seipsum. Omne ergo, quod movetur, oportet ab alio moveri. Si ergo id, a quo movetur, moveatur, oportet et ipsum ab alio moveri, et illud ab alio. Hic autem non est procedere in infinitum ; quia sic non esset aliquod primum movens, et per consequens nec aliquod aliud movens ; quia moventia secunda non movent nisi per hoc, quod sunt mota a primo movente, sicut baculus non movet nisi per hoc, quod est motus a manu. Ergo necesse est devenire ad aliquod primum movens, quod a nullo movetur ; et hoc omnes intelligunt Deum. » (I. q. 2. a. 3.)

In hac enim prima et manifestiori via ad existentiam Dei demonstrandam reperiuntur omnia mobilia, omnia quae educuntur de potentia in actum, et innumera genera motuum omnium rerum, quae moventur, a motu locali corporum usque ad motum spiritualium substantiarum, quae transeunt de potentia in actum intelligendo et volendo. In hac ergo prima via, quae sumitur ex parte motus, adest motus liberi arbitrii, quae est facultas voluntatis et rationis. Unde D. Thomas in responsione ad 2. : « Necesse est, quae a natura fiunt, etiam in Deum reducere sicut in primam causam. Similiter etiam, quae ex proposito fiunt, oportet reducere in aliquam altiore causam, quae non sit ratio et voluntas humana; quia haec mutabilia sunt et defectibilia. » Oportet itaque reducere in Deum sicut in primum movens atque in primum determinans motum liberi arbitrii, quo homo per rationem et voluntatem determinat seipsum ad volendum hoc vel illud, et adducit seipsum de potentia consentiendi vel eligendi ad actum consensus vel electionis.

Ad cujus intelligentiam sciendum est duplicem esse motum voluntatis, ac duplicem proinde transitum ipsius de potentia in actum, nempe : motum voluntatis, qui consequitur rationem apprehendentem bonum vel malum, non consideratis omnibus circumstantiis, sed ipsum *nudum objectum bonum* (puta vitam, sanitatem) vel *malum* (puta mortem, infirmitatem); et motum voluntatis, qui consequitur rationem deliberantem; quae quidem ratio, omnibus consideratis, concludit aliquid esse bonum vel malum, aliquid esse fugiendum vel faciendum; exempli causa : *mori propter justitiam est bonum, vita cum detrimento justitiae seu virtutis est malum*. Motus voluntatis consequens intellectum apprehendentem bonum vel malum est *actus voluntarius*; motus vero voluntatis consequens deliberationem rationis est *actus liber*. Primus motus vocatur naturalis voluntas seu voluntas ut natura; alter motus denominatur voluntas deliberata, seu voluntas ut voluntas. In utroque motu voluntas reducitur de potentia in actum; in utroque motu voluntas movetur,



et consequenter ab alio movetur ; quia omne quod movetur, oportet ab alio moveri.

Attamen haec est inter utrumque voluntatis motum differentia, videlicet, quod in primo motu voluntas movetur, at non movet seipsam ad volendum ; et in secundo motu voluntas et movetur ac simul seipsam etiam movet. Unde quamvis motus primus voluntatis humanae reducatur in Deum sicut in primum movens, quod a nullo movetur, quaerere adhuc oportet, utrum motus voluntatis deliberatae sit quoque in Deum tamquam in primum volens ac movens reducendus.

Motus autem voluntatis deliberatae opus est ut reducatur in Deum ut in primum movens immobile, non secus ac motus voluntatis naturalis et motus naturarum inferiorum ; quoniam in omni genere motuum vel actionum semper verificatur, quod omne quod movetur, ab alio movetur. Necessitas enim reducendi motum liberi arbitrii creati in Deum supremum movens apparet ex triplici causa :

1<sup>o</sup> Quoniam voluntas ut libera etiam indiget moveri ab alio, quod est Deus. Etenim quandoque est agens in actu, quandoque in potentia. Unde cum liberum arbitrium creaturae quandoque sit dumtaxat in potentia consentiendi vel eligendi, indiget reduci in ipsum actum electionis vel consensus per aliquod libere volens semper in actu ; et hoc est Deus.

2<sup>o</sup> Quoniam voluntas ut libera accipit ab ipso primo movente non tantum posse determinare seipsam ad unum, sed etiam quod de facto seipsam ad unum determinet. Primum accipit a Deo ex eo, quod a Deo facta est et in esse proprio conservatur. Alterum accipit quoque a Deo ex eo, quod a Deo applicatur et determinatur. Et hoc est, quod D. Thomas expresse docet *De Malo* q. 3. a. 2. ad 4. : « Cum dicitur aliquid movere seipsum, ponitur idem esse movens et motum ; cum autem dicitur, quod aliquid movetur ab altero, ponitur aliud esse movens et aliud motum. Manifestum est autem, quod cum aliquid movet alterum, non ex hoc ipso, quod est movens, ponitur quod est primum mo-

vens; unde non excluditur, quin ab altero moveatur et ab altero habeat similiter hoc ipsum, quod movet. Similiter cum aliquid movet seipsum, non excluditur quin ab alio moveatur, a quo habet hoc ipsum, quod seipsum movet; et sic non repugnat libertati, quod Deus est causa actus liberi arbitrii. »

3<sup>o</sup> Quoniam si per viam motus liberae voluntatis creatae non deveniatur ad aliquod primum movens superius, quod a nullo movetur, id est, ad Primam Liberam Voluntatem, quae semper est volens actu et quae est ipse Deus, non potest vitari, quin liberum arbitrium creatum sit primum agens non modo in ordine causae secundae, sed absolute et simpliciter. Quod est absurdum. (*II. Sent. dist. 37. q. 2. a. 2.*)

Oportet itaque, quod motus voluntatis deliberatae sit a primo volente, cujus motio in potentia liberi arbitrii recepta est motus, quo potentia prorumpit in actum. Per motionem namque primi motoris immobilis potentialitas *activa* voluntatis creatae completur, et potentialitas *passiva*, quae consistit in carentia actus, tollitur per actum liberum, cujus inchoatio est ipsa divina motio. Actiones igitur liberae nostrae voluntatis, quantum habent de esse, id est, in quantum actiones, et in quantum liberae, et in quantum moraliter bonae, reducuntur in Deum, qui per suam virtutem motivam dat nobis vitam, inspirationem et omnia; confert potentiae liberae voluntatis et agere, et agere libere, et agere bene, et agere meritorie in vitam aeternam. Gratia autem divina ex se et ab intrinseco efficax nihil aliud est nisi virtus motiva, qua primum movens immobile transmittit creaturam rationalem in vitam aeternam. (*I. q. 23. a. 1. ; I. Sent. dist. 40. q. 2.*)

## § 2

### Argumentum ex ratione causae primae efficientis.

« Secunda via, addit D. Thomas, est ex ratione causae efficientis. Invenimus enim in istis sensibilibus esse ordinem causarum efficientium; nec tamen invenitur, nec est possibile, quod aliquid sit causa efficiens sui ipsius, quia esset prius

seipso, quod est impossibile. Non autem est possibile, quod in causis efficientibus procedatur in infinitum, quia in omnibus causis efficientibus ordinatis primum est causa medii, et medium est causa ultimi, sive media sint plura sive unum tantum. Remota autem causa, removetur effectus. Ergo, si non fuerit primum in causis efficientibus, non erit ultimum nec medium. Sed si procedatur in infinitum in causis efficientibus, non erit prima causa efficiens; et sic non erit nec effectus ultimus nec causae efficientes mediae; quod patet esse falsum. Ergo est necesse ponere aliquam causam efficientem primam, quam omnes Deum nominant. » (I. q. 2. a. 3.)

Causae autem efficientes per se ordinatae et quae simul agunt ad effectum producendum, quod est consentire vel eligere, sunt liberum arbitrium Dei et liberum arbitrium hominis. Liberum arbitrium Dei est causa prima; liberum vero arbitrium hominis est causa secunda, causa media; consensus vel electio est actus, qui simul efficitur ab utraque causa. Sed causa secunda seu media ex eo, quod est media vel secunda, necessario dependet a prima, non solum in ratione entis et in conservatione sui esse, sed in causando, in ratione causae; quia in omnibus causis efficientibus ordinatis primum est causa medii, et medium est causa ultimi, sive media sint plura sive unum tantum.

« Ad cujus evidentiam (ait Cajetanus I. q. 2. a. 3.) oportet recolere, quod de ratione causae est *efficacia*; nisi enim causa aliquid efficiat, causa in actu, de qua est sermo, dici non potest. Efficacia namque causae in illius causalitate actuali consistit; et propterea, nisi causalitas compleatur, neque causa in actu neque efficacia seu efficientia aliqua salvatur. Oportet ergo ad hoc, quod causae ratio salvetur, ut causalitas illius compleatur; ac per hoc quidquid repugnat complemento causalitatis alicujus causae, repugnat causae illi. Cum igitur causa media vere causa sit, oportet ipsam habere propriam causalitatem completam... Impossibile est mediam causalitatem perfici nisi sustentetur in prima. »

Oportet ergo ad hoc, quod causae ratio salvetur in libero arbitrio creato, ut causalitas illius compleatur per influxum praeivium primae causae. Unde qui tollunt praemotionem physicam, tollunt complementum causalitatis in omnibus causis secundis, quae sunt causae mediae, per quas virtus primi agentis attingit a fine usque ad finem omnium effectuum omniumque operationum. Liberum itaque arbitrium hominis habet propriam causalitatem completam per virtutem descendantem a libero arbitrio Dei, a quo dum determinatur, perficitur ut determinet seipsum.

Gratia autem ex se et per se efficax nihil aliud est nisi physica praemotio, qua Deus, ut auctor ordinis supernaturalis, elevat potentiam liberi arbitrii ad libere acceptandum donum gratiae sanctificantis in justificatione; et qua Deus post justificationem complet causalitatem liberi arbitrii ad utendum habitu gratiae gratum facientis, meritorie operando; et qua Deus inclinat actu cor nostrum ad bonum usque in finem.

### § 3

#### **Argumentum ex ratione entis per essentiam.**

« Respondeo dicendum, quod necesse est dicere omne ens, quod quocumque modo est, a Deo esse. Si enim aliquid invenitur in aliquo per participationem, necesse est, quod causetur in ipso ab eo, cui essentialiter convenit; sicut ferrum fit ignitum ab igne. Ostensum est autem supra q. 3. a. 4. cum de divina simplicitate ageretur, quod Deus est ipsum esse per se subsistens. Et iterum ostensum est q. 11. a. 3. et 4. quod esse subsistens non potest esse nisi unum; sicut si albedo esset subsistens, non posset esse nisi una, cum albedines multiplicentur secundum recipientia. Relinquitur ergo, quod omnia alia a Deo non sint suum esse, sed participant esse. Necesse est igitur omnia, quae diversificantur secundum diversam participationem essendi, ut sint perfectius vel minus perfecte, causari ab uno primo ente, quod perfectissime est. » (I. q. 44. a. 1.)



Haec est ratio, quam ipse Angelicus Doctor, *De Malo* q. 3. a. 2. appellat *communem*; quoniam est velut centrum, unde exeunt et quo iterum redeunt per viam resolutionis cuncta argumenta specialia, quibus probatur omnia ac singula, quaecumque sunt, sive substantiae sive accidentia, sive potentiae aut virtutes operandi, sive operationes, a Deo esse, a Deo causari, a Deo conservari, a Deo augeri atque perfici. Cum ipse Deus sit ens per suam essentiam, quia sua essentia est suum esse, oportet quod omne, quod quocumque modo est, derivetur ab ipso. Et statim determinans hanc rationem *communem* per rationem *specialem*, addit : « Necesse est enim omnes motus secundarum causarum causari a primo movente, sicut omnes motus inferiorum corporum causantur a motu coeli. Deus autem est primum movens respectu omnium motuum et spiritualium et corporalium, sicut corpus coeleste est principium omnium motuum inferiorum corporum. Unde cum actus peccati sit quidam motus liberi arbitrii, necesse est dicere, quod actus peccati, in quantum est actus, sit a Deo. »

Si ergo *actus* peccati, in quantum est *ens*, in quantum est *actus*, in quantum est *motus* liberi arbitrii, oportet quod deriveetur a primo ente, quod causetur a primo actu, quod reducatur in primum liberum et in primum movens, quod est per essentiam suam actus (I-II. q. 89. a. 2.) : quanto magis necesse erit dicere, quod sit a Deo motus liberi arbitrii, qui est actus virtutis; quod procedat a Deo consensus liberae voluntatis ad acceptandum iustitiae donum, et electio illius ad utendum habitibus infusis; et quod causetur a Deo ipsa determinatio ad unum, qua libera voluntas operatur opera bona et salutaria? Et a Deo *mediante potentia* liberi arbitrii, quae est facultas voluntatis et rationis; at *immediate* immediatione virtutis. Quoniam inferius agens agit virtute superioris, et non e converso.

Haec igitur est praemotio physica, virtus divinae causalitatis recepta in potentia liberi arbitrii, qua virtus propria ipsius conjungitur actioni. Haec est gratia ex se et per se efficax, virtus divina, quae pervadens atque intrinsece immu-

tans liberam voluntatem, conjungit virtutem naturalem ipsius atque omnem virtutem infusam, superadditam per modum habitus, actionibus meritoriis vitae aeternae; et conjungit infallibiliter, insuperabiliter ac indeclinabiliter, quoniam conjungit maxima libertatis perfectione.

#### § 4

**Argumentum ex eo, quod Deus est causa nostrae virtutis volendi.**

« Respondeo dicendum, quod sicut intellectus movetur ab objecto et ab eo, qui dedit virtutem intelligendi, ita voluntas movetur ab objecto, quod est bonum, et ab eo, qui causat virtutem volendi. Potest autem voluntas moveri sicut ab objecto a quocumque bono, non autem sufficienter et efficaciter nisi a Deo; non enim sufficienter aliquid potest movere aliquid mobile, nisi virtus activa moventis excedat vel saltem adaequet virtutem passivam mobilis. Virtus autem passiva voluntatis se extendit ad bonum in universali; est enim ejus objectum bonum universale, sicut et intellectus objectum est ens universale. Quodlibet autem bonum creatum est quoddam particulare bonum; solus autem Deus est bonum universale. Unde ipse solus implet voluntatem et sufficienter eam movet ut objectum. Similiter autem et virtus volendi a solo Deo causatur. Velle enim nihil aliud est quam inclinatio quaedam in objectum voluntatis, quod est bonum universale. Inclinare autem in bonum universale est primi moventis, cui proportionatur ultimus finis; sicut in rebus humanis dirigere ad bonum commune est ejus, qui praeest multitudini. Unde utroque modo proprium est Dei movere voluntatem; sed maxime secundo modo, interior eam inclinando. » (I. q. 105. a. 4.)

Postquam D. Thomas I. q. 2. a. 3. ostendit Deum existere, et q. 3. a. 4. ostendit in Deo existentiam identificari realiter cum ipsius natura vel essentia, et q. 11. a. 3. et 4. ostendit ens, in quo essentia et existentia realiter identificantur, non posse esse nisi unum, et q. 44. a. 1. ostendit omnia, quae sunt, quocumque modo sint, ab isto uno, quod est ens per

essentiam, causari ac procedere : nunc iterum reassumit quinque vias, quibus Dei existentia ostendi potest ; quae quidem omnes includuntur in latitudine viae ex parte motus. Etenim omnes viae reducuntur ad viam motus ex parte causae efficientis, et ad viam motus ex parte causae finalis ; et istae viae non sunt nisi una sola via, in qua sibi ad invicem necessario correspondent terminus *a quo* et terminus *ad quem*, ut in subsequenti argumento declarabitur a D. Thoma.

Jam vero, utroque modo, proprium est Dei movere voluntatem ; sed maxime secundo modo, interius eam inclinando. Movere in ratione objecti, in ordine finis, est quidem proprium Dei, sed tamen communicabile creaturis. Nam voluntas potest moveri, sicut ab objecto, a quocumque bono ; et hanc virtutem movendi habet a Deo participatam, sicut et ipsam rationem boni. Et hoc modo Deus operatur in quolibet operante secundum rationem finis. Omnis enim operatio est propter aliquod bonum verum vel apparens ; nihil autem est vel apparet bonum nisi secundum quod participat aliquam similitudinem summi boni, quod est Deus ; consequenter ipse Deus est cujuslibet operationis *causa ut finis*. Attamen nulla creatura potest movere voluntatem sufficienter et efficaciter ; hoc est proprium Dei, qui est bonum infinitum, et cujus virtus activa ad movendum non tantum adaequat, sed longe excedit capacitatem voluntatis creatae.

Movere autem secundo modo est maxime proprium Dei, quoniam iste modus movendi minime est communicabilis creaturae. Inclinare interius potentiam liberi arbitrii, dare voluntati ejus propriam inclinationem, hoc est proprium illius, cujus manus formaverunt ipsam liberi arbitrii naturam. Deus operatur in quolibet operante secundum rationem causae efficientis, quam sic indicat D. Thomas in hac q. 105. a. 5. : « Considerandum est, quod, si sint multa agentia ordinata, semper secundum agens agit in virtute primi agentis. Nam primum agens movet secundum ad agendum ; et secundum hoc omnia agunt in virtute ipsius Dei, et ita ipse est causa omnium actionum agentium. Considerandum est, quod Deus movet non solum res ad

operandum, quasi applicando formas et virtutes rerum ad operationem (sicut etiam artifex applicat securim ad scindendum, qui tamen interdum formam securi non tribuit), sed etiam dat formas creaturis agentibus et eas tenet in esse... Deus non solum dat formas rebus, sed etiam conservat eas in esse et applicat eas ad agendum, et est finis omnium actionum. »

Itaque : 1<sup>o</sup> Movere sufficienter et efficaciter voluntatem creatam est proprium Dei, et solius Dei, tam secundum motionem causae finalis quam secundum motionem causae efficientis ; 2<sup>o</sup> in ordine causae finalis tunc movet Deus sufficienter et efficaciter, cum movet per se, id est, immediate, absque intermedio ullius creaturae, ut in visione divinae essentiae ; 3<sup>o</sup> in ordine causae efficientis Deus semper movet immediate, per se, sine alia causa media, voluntatem creatam ; 4<sup>o</sup> consequenter motio, qua Deus movet voluntatem in ratione causae efficientis, semper est sufficiens et efficax ad illud, quod Deus vult. Gratia autem divina ex se et per se efficax nihil aliud est nisi gratuita motio, qua Deus interiorius potentiam liberi arbitrii inclinât, et sufficienter simul ac efficaciter movet creaturam rationalem, transmittendo illam in vitam aeternam.

## § 5

### **Argumentum ex ratione Primi Moventis in ordine supernaturali.**

« Necesse est enim, cum omne agens agat propter finem, quod omnis causa convertat suos effectus ad suum finem ; et ideo, cum secundum ordinem agentium sive moventium sit ordo finium, necesse est, quod ad ultimum finem convertatur homo per motionem primi moventis, ad finem autem proximum per motionem alicujus inferiorum moventium ; sicut animus militis convertitur ad quaerendum victoriam ex motione ducis exercitus ; ad sequendum autem vexillum alicujus aciei, ex motione tribuni. Sic igitur, cum Deus sit primum movens simpliciter, ex ejus motione est quod omnia in ipsum convertantur secundum communem



intentionem boni, per quam unumquodque intendit assimilari Deo secundum suum modum. Unde Dionysius, *De Div. Nom.* 4. dicit, quod *Deus convertit omnia ad seipsum*. Sed homines justos convertit ad seipsum sicut ad specialem finem, quem intendunt et cui cupiunt adhaerere sicut bono proprio, secundum illud Ps. 72, 27 : *Mihi adhaerere Deo bonum est*. Et ideo quod homo convertatur ad Deum, hoc non potest esse nisi Deo ipsum convertente. Hoc autem est praeparare se ad gratiam, quasi ad Deum converti; sicut ille, qui habet oculum aversum a lumine solis, per hoc se praeparat ad recipiendum lumen solis, quod oculos suos convertit versus solem. Unde patet, quod homo non potest se praeparare ad lumen gratiae suscipiendum nisi per auxilium gratuitum Dei interius moventis. » (I-II. q. 109. a. 6.)

In isto argumento D. Thomas complet doctrinam, cujus fundamenta posuit I. q. 2. a. 3. et cujus generalem applicationem fecit I. q. 105. a. 3., 4. et 5. per relationem ad intellectum et voluntatem creatam. Hoc in loco perficiuntur illae quinque viae, quibus Deum esse probari potest, et manifeste patet, quomodo illud primum movens, quod a nullo movetur, et illud intelligens, a quo omnes res creatae ordinantur ad finem, sunt unum et idem, sunt Deus, qui operatur in nobis omnia opera nostra, et operatur in omni operante propriam habente operationem secundum haec tria, nempe : finem, agens et formam. (I. q. 105. a. 5.) Hic enim declaratur a D. Thoma, quomodo secundum ordinem agentium seu moventium est ordo finium, et quomodo proinde nulla creatura pervenit ad ultimum finem nisi per motionem primi moventis. Primum movens, sine quo nihil potest fieri, et cujus motio recepta in re mobili est motus atque operatio, dum omnia movet, confert virtutem, qua in rebus omnibus verificatur exsecutio illius ordinis in mente Summi Intelligentis praeexistentis. Ratio autem ordinandorum in finem vocatur *providentia*.

Sed hic quinque viae, quibus Deum esse probari potest, intrans in novam regionem perfusam nova luce, lumine sc. rationis, aucto atque adjuto lumine supernaturali fidei. Hic

primus motor est Deus, non tantum ut auctor naturae, verum etiam ut auctor gratiae; et ultimus finis est summum bonum in propria essentia, Deus ut auctor gloriae. Reperitur etiam in hoc supernaturali ordine duplex modus movendi voluntatem, sc. ab objecto, quod est bonum cognitum lumine revelationis, et ab eo, qui dedit virtutem volendi. Utroque isto superiori modo proprium est Dei movere voluntatem, et proprium unice solius Dei movere sufficienter et efficaciter.

At dum sumus in statu viae, non movemur a Deo, sicut ab objecto, immediate; quia Deum per essentiam non videmus, sed in speculo et in aenigmate. Unde voluntas in hac vita non ex necessitate infallibilitatis Deo adhaeret, dum movetur solummodo in ratione causae finalis a Deo. Haec motio ex se et per se non est efficax, licet sit sufficiens. In statu autem patriae cum videbimus Deum sicuti est, et voluntas nostra movebitur immediate a divina essentia sicut ab objecto: tunc voluntas nostra non poterit Deo non adhaerere, sicut voluntas nostra nec potest nunc beatitudinem non velle. (*De Malo*, q. 3. a. 3.; I-II. q. 4. a. 4.)

Dum autem movemur a Deo sicut ab eo, qui dedit virtutem volendi, semper movemur immediate, tam in ordine naturali quam supernaturali, tam in via quam in patria. Perinde cum Deus movet nos hoc secundo modo, movet nos interiorius voluntatem inclinando; et hoc est proprium Dei, et maxime proprium Dei, utpote incommunicabile creaturae. Et hoc modo movere est movere sufficienter et efficaciter. (I. q. 105. a. 4.) De hoc itaque modo movendi loquitur D. Thomas I-II. q. 109. a. 6. Quapropter ait: « Patet, quod homo non potest se praeparare ad lumen gratiae suscipiendum nisi per auxilium gratuitum Dei interiorius moventis. »

Unde haec motio est a primo movente: 1<sup>o</sup> secundum rationem causae efficientis; 2<sup>o</sup> secundum rationem causae efficientis in ordine supernaturali; 3<sup>o</sup> secundum rationem causae efficientis in ordine supernaturali « homines justos convertentis ad seipsum sicut ad specialem finem, quem intendunt et cui cupiunt adhaerere sicut bono proprio ». Haec igitur

est motio, qua Deus, quos praescivit et praedestinavit conformes fieri imaginis Filii sui, hos interius ipsorum voluntatem inclinando vocavit; quos autem vocavit, hos et justificavit; quos autem justificavit, hos et glorificavit.

Secundum ordinem itaque agentium seu moventium est ordo finium; gratia autem ex se et per se efficax est illa motio primi moventis, per quam homo convertitur ad ultimum finem, prout Deus est in se; per quam homo convertitur ad ipsum Deum sicut ad finem specialem, et perseverat in hac conversione ad Bonum Incommutabile usquequo apparuerit gloria ejus.

Haec est enim gratia ex se efficax, motio Primi Moventis, respondens illi Supremo Intelligenti, in cujus divina mente praeexistit ratio transmissionis creaturae rationalis in finem vitae aeternae, quae praedestinatio nominatur. Haec, inquam, est gratia ab intrinseco efficax, sc. : *Virtus, qua rationalis creatura, quae est capax vitae aeternae, perducitur in ipsam, quasi a Deo transmissa; sicut sagitta a sagittante mittitur in signum.* (I. q. 23. a. 1.)

## VII

**Argumenta ex doctrina philosophica D. Thomae circa liberum arbitrium creatum, ut est causa secunda et habens rationem instrumenti sub Deo, qui est primus intellectus et primum volens.**

Nunc vero si respiciamus ipsam voluntatem creatam, patefiet quoque necessitas ponendi praemotionem physicam et gratiam ab intrinseco efficacem ex iisdem argumentis jam expositis; quae ad examen rursus revocata atque ex opposita regione considerata, ad sequentia possunt breviter reduci :

1<sup>o</sup> *Quia liberum arbitrium creatum non est actus purus.*

2<sup>o</sup> *Quia liberum arbitrium creatum habet rationem causae instrumentalis.*

3<sup>o</sup> *Quia liberum arbitrium creatum est liberum per participationem.*

4<sup>o</sup> *Quia liberum arbitrium creatum est causa subordinata.*

5<sup>o</sup> *Quia liberum arbitrium creatum ex viribus naturalibus nullam habet potentiam ad opera salutis nisi potentiam obedientialem.*

## § 1

**Argumentum : Quia liberum arbitrium creatum non est actus purus.**

D. Thomas, I-II. q. 9. per totum evolvit hoc argumentum. In a. 1. ostendit voluntatem movere intellectum et alias hominis potentias quantum ad exercitium vel usum actus. In a. 3. ostendit voluntatem per hoc, quod vult finem, movere seipsam ad volendum ea quae sunt ad finem, et movere seipsam quantum ad exercitium actus. Attamen voluntas non secundum idem movet et movetur; unde nec secundum idem est in actu et in potentia; sed in quantum actu vult finem, reducit se de potentia in actum respectu eorum quae sunt ad finem, ut sc. actu ea velit. In a. 4. ostendit, quod « eo modo, quo movetur quantum ad exercitium actus, adhuc necesse est ponere voluntatem ab aliquo principio exteriori moveri ». Ac postremo in a. 6. concludit voluntatem eo modo, quo movet seipsam, quantum ad exercitium actus, non moveri nisi a solo Deo, sicut ab exteriori principio. En fundamentale argumentum ad ostendendam necessitatem hujusce divinae motionis :

« Omne enim, quod quandoque est agens in actu et quandoque in potentia, indiget moveri ab aliquo movente. Manifestum est autem, quod voluntas incipit velle aliquid, cum hoc prius non vellet. Necesse est ergo, quod ab aliquo moveatur ad volendum. Et quidem, sicut dictum est a. antecedenti, ipsa movet seipsam in quantum per hoc, quod vult finem, reducit seipsam ad volendum ea quae sunt ad finem.



Hoc autem non potest facere nisi consilio mediante. Cum enim aliquis vult sanari, incipit cogitare, quomodo hoc consequi possit; et per talem cogitationem pervenit ad hoc, quod potest sanari per medicum, et hoc vult. Sed quia non semper sanitatem actu voluit, necesse est, quod inceperit velle sanari ab aliquo movente. Et si quidem ipsa moveret seipsam ad volendum, oportuisset, quod mediante consilio hoc ageret ex aliqua voluntate praesupposita. Non autem est procedere in infinitum. Unde necesse est ponere, quod in primum motum voluntatis voluntas prodeat ex instinctu alicujus exterioris moventis. » (I-II. q. 9. a. 4.)

Ut patet, haec via est illa prima et manifestior via, quae sumitur ex parte motus ad demonstrandam Dei existentiam. Unde primum movens, quod a nullo movetur et quod est principium extrinsecum efficiens omnes motus, tam naturales quam voluntarios, tam necessarios quam liberos et contingentes voluntatis creatae, est solus Deus; quia « nihil aliud potest esse voluntatis causa nisi ipse Deus, qui est universale bonum » (I-II. q. 9. a. 6.); « quia voluntas rationalis creaturae soli Deo subjacet, et ipse solus in eam operari potest, qui est principale ejus objectum et ultimus finis » (I. q. 57. a. 4.); « quia sola Trinitas menti illabitur » (III. q. 8. a. 8. ad 1.); quia « in voluntatem solus Deus imprimere potest ». (*Comp. Theol.* cap. 130.)

At D. Thomas, qui I-II. q. 9. jacet fundamenta omnium argumentorum, quae ex parte ipsius voluntatis creatae possunt afferri ad ostendendam necessitatem alicujus principii exterioris moventis potentiam liberi arbitrii per modum agentis, sicut alterans movet alteratum, et impellens movet impulsum: in hoc loco satis habet concludere necessitatem ponendi physicam praemotionem saltem in primum tum motum voluntatis. Sed quamvis non sic adeo manifestum, ejusdem tamen rationis est stabilire hanc necessitatem primi motoris efficientis pro omnibus ac singulis motibus liberae voluntatis, quotiescumque voluntas creata reducit se de potentia in actum.

1<sup>o</sup> Quoniam ipse Angelicus Doctor in a. 4. ad 3. dicit,

quod « voluntas quantum ad aliquid sufficienter se movet, et in suo ordine, sc. sicut agens proximum; sed non potest seipsam movere quantum ad omnia, ut ostensum est; unde indiget moveri ab alio sicut a primo movente ». Et hic agitur de motu libero, in quo voluntas movet seipsam; nam de motu non libero nulla est quaestio, cum voluntas non moveatur nisi a solo Deo.

2<sup>o</sup> Quoniam postea D. Thomas, I-II. q. 109. a. 2. ad 1. complens doctrinam hujus q. 9. et evolvens istudmet argumentum, concludit sic: « Oportet, quod finaliter deveniatur ad hoc, quod liberum arbitrium hominis moveatur ab aliquo exteriori principio, quod est supra mentem humanam, sc. a Deo. »

3<sup>o</sup> Quia D. Thomas, III. C. *Gent.* cap. 89. inter alia plura affert hoc ipsum argumentum ad demonstrandum, quod Deus « est primum principium nostrorum consiliorum et voluntatum » et « causat in nobis velle et perficere, sic quod faciat nos velle hoc vel illud ». Quod est determinare liberum arbitrium creatum ad unum, non tamen de necessitate, sed libere.

4<sup>o</sup> Quia D. Thomas, *De Malo* q. 6. a. unico, in quo ex professo agit de electione humana seu libero arbitrio, hoc quoque conceptis verbis edocet. Unde ad 17. dicit: « Voluntas quando de novo incipit eligere, transmutatur a sua priori dispositione quantum ad hoc, quod prius erat eligens in potentia, et postea fit eligens actu; et haec quidem transmutatio est ab aliquo movente, in quantum ipsa voluntas movet seipsam ad agendum, et in quantum etiam movetur ab aliquo exteriori agente, sc. Deo. Non tamen ex necessitate movetur, ut dictum est in c. a. »

5<sup>o</sup> Quia D. Thomas considerans multiplicitatem, variabilitatem et defectibilitatem electionum nostrarum, ex eo precise, quod liberum arbitrium creatum non est actus purus, sed constans ex actu et potentia, infert, quod electiones et voluntates immediate a Deo disponuntur. Ait ergo: « Patet enim, quod electiones nostrae *multiplicitatem* habent, cum in diversis et a diversis diversa eligantur;

*mutabiles* etiam sunt, tum propter animi levitatem, qui non est firmatus in fine ultimo, tum etiam propter mutationem rerum, quae nos extra circumstant; quod autem *defectibiles* sint, hominum peccata testantur. Divina autem voluntas *uniformis* est, quia unum volendo omnia alia vult; et *immutabilis* et *indeficiens*, ut ostensum est lib. I. cap. 23., 25. et 26. Oportet ergo omnium voluntatum et electionum motus in divinam voluntatem reduci, non autem in aliquam aliam causam; quia solus Deus nostrarum voluntatum et electionum causa est. » (*III. C. Gent.* cap. 91.)

Haec est igitur gratia ab intrinseco efficax, motio sc. qua liberum arbitrium hominis movetur a Deo per modum alterantis et impellentis; qua liberi arbitrii potentia transmutatur a sua priori dispositione et convertitur in bonum incommutabile; qua Deus facit nos velle hoc vel illud in ordine ad vitam aeternam; qua denique liberum arbitrium creaturae rationalis accedit quodammodo ad liberum arbitrium increatum, per quamdam participationem divinae uniformitatis et immutabilitatis.

## § 2

**Argumentum : Quia liberum arbitrium creatum habet rationem causae instrumentalis.**

D. Thomas, *III. C. Gent.* cap. 67., ubi ostenditur, quod Deus est causa operandi omnibus operantibus, inter alia plura argumenta istud adducit : « Quidquid applicat virtutem activam ad agendum, dicitur esse causa illius actionis; artifex enim applicans virtutem rei naturalis ad aliquam actionem, dicitur esse causa illius actionis, sicut coquus decoctionis, quae est per ignem. Sed omnis applicatio virtutis ad operationem est principaliter et primo a Deo; applicantur enim virtutes operativae ad proprias operationes per aliquem motum, vel corporis vel animae; primum autem principium utriusque motus est Deus; est enim primum movens omnino immobile, ut supra I. cap. 13. ostensum est. Et similiter omnis motus voluntatis, quo applicantur

aliquae virtutes ad operandum, reducitur in Deum sicut in primum appetibile et in primum volentem. Omnis igitur operatio debet attribui Deo sicut primo et principali agenti. » Atque ibid. c. 147. ubi probatur, quod homo indiget divino auxilio ad beatitudinem consequendam, scribit : « Nullum instrumentum secundum virtutem propriae formae potest ad ultimam perducere perfectionem, sed solum secundum virtutem principalis agentis... Sub Deo autem, qui est primus intellectus et volens, ordinantur omnes intellectus et voluntates sicut instrumenta sub principali agente. »

Ipse Angelicus Doctor diversimode explanans hoc argumentum ubique passim in suis operibus, ad tollendam omnem aequivocationem et quaecumque in hac materia ambiguitatem, saepe saepius admonet, quod : *a)* « Instrumentum dupliciter dicitur : uno modo proprie, quando sc. aliquid ita ab altero movetur, quod non confertur ei a movente aliquod principium talis motus, sicut serra movetur a carpentario ; et tale instrumentum est expers libertatis. Alio modo dicitur instrumentum magis communiter quidquid est movens ab alio motum, sive sit in ipso principium sui motus sive non ; et sic ab instrumento non oportet quod omnino excludatur ratio libertatis, quia aliquid potest esse ab alio motum, quod tamen seipsum movet ; et ita est de mente humana. » (*De Verit.* q. 24. a. 1. ad 5.) *b)* Rursus : « Humanitas Christi est instrumentum Divinitatis ; non quidem sicut instrumentum inanimatum, quod nullo modo agit sed solum agitur ; sed tamquam instrumentum anima rationali animatum, quod ita agitur, quod etiam agit. » (III. q. 7. a. 1. ad 3.) *c)* Iterum : « Ratio illa procedit de instrumento, cujus non est agere, sed solum agi. Tale autem instrumentum non est homo, sed sic agitur a Spiritu Sancto, quod etiam agit in quantum est liberi arbitrii. » (I-II. q. 68. a. 3. ad 2.) Et « homo sic movetur a Deo ut instrumentum, quod tamen non excluditur, quin moveat seipsum per liberum arbitrium, ut ex supra dictis patet q. 10. a. 4. » (I-II. q. 21. a. 4. ad 2.)

Unde habetur : 1<sup>o</sup> quod omnes creaturae, etiam rationales,



operantur ut causae instrumentales sub Deo, qui est causa principalis omnium actuum et effectuum; 2<sup>o</sup> quod etiam potentia liberi arbitrii operatur velut instrumentum sub voluntate Dei; 3<sup>o</sup> quod potentia liberi arbitrii creati habet in se virtutem, quae est principium sui motus suaeque operationis; 4<sup>o</sup> quod applicatio hujus virtutis ad operationem est principaliter et primo a Deo, a Dei voluntate; 5<sup>o</sup> quod ista applicatio virtutis operativae liberi arbitrii ad propriam operationem fit per motum, cujus principium est Deus, primus intellectus et primum volens; 6<sup>o</sup> quod liberum arbitrium hominis sic agitur a Deo, ut ipse homo agat; sic movetur, ut ipse homo moveat seipsum; sic applicatur, ut seipsum applicet; sic determinatur, ut seipsum determinet. Uno verbo: juxta D. Thomae doctrinam circa causas instrumentales, impossibile est instrumentum quidquam agere absque praevia motione et applicatione causae principalis. Causa secunda non agit ex virtute propria, nisi agatur prioritate naturae et causalitatis a causa prima; causa secunda non movet, nisi moveatur; quamvis cum movetur a Deo, movetur etiam ex virtute propria, quae completur ex virtute Dei moventis. Nam ut recte explicat Cajetanus in I. q. 19. a. 8.: « Sic movere causae secundae provenit non ex moveri tantum, sed ex moveri et modo proprio ipsius causae secundae. Illa autem propositio adjuncta sc.: *Causa secunda nihil agit nisi in virtute primae*, non juvat, quoniam non est sensus, quod causa secunda nullam virtutem habeat nisi primae; sed quod ipsa secunda nullum effectum producit nisi virtute primae concurrente et conjungente virtutem secundae suo effectui; quoniam prima omnia attingit immediate immediatione virtutis, ut in q. 8. a. 1. declaratum est... Attingit enim prima causa effectum secundae et independentius et intimius quam secunda, ut patet in principio *De Causis*; et propterea dicitur respicere prius. » Quia ergo homo movetur a Deo ut instrumentum, impossibile est hominem quidquam agere absque praevia motione et applicatione sui liberi arbitrii facta prius a Deo. Quia tamen homo est instrumentum, in quo est principium talis motus liberi, non excluditur per

praemotionem physicam ratio libertatis, sed completur et in actum reducitur.

Haec ergo est gratia ab intrinseco efficax, motio divina, qua potentia liberi arbitrii agitur a Deo, ut ipse homo operetur opera salutis; motio divina, quae in libero arbitrio est *motus et applicatio* virtutis ipsius operativae ad operationem supernaturalem et vitae aeternae meritoriam; motio divina seu virtus primae causae conjungens virtutem ipsius liberae voluntatis omnibus suis effectibus et operationibus, quibus tendit in Deum ut in finem supernaturalis beatitudinis; in Deum, « cui omnis operatio debet attribui sicut primo et principali agenti », ut ait D. Thomas.

### § 3

#### **Argumentum : Quia liberum arbitrium creatum est liberum per participationem.**

D. Thomas, *I. C. Gent.* cap. 88. exponit sic hoc argumentum : « Homo per hoc, quod habet liberum arbitrium, dicitur suorum actuum dominus. Hoc autem maxime competit primo agenti, cujus actus ab alio non dependet. Ipse igitur Deus liberum arbitrium habet. Hoc etiam ex ipsa nominis ratione haberi potest. Nam liberum est, quod sui causa est, ut patet per Philosophum, *Metaph. I.* Hoc autem nulli magis competit quam primae causae, quae Deus est. »

Ex hoc igitur, quod Deus habet liberum arbitrium per se, creatura autem rationalis liberum arbitrium per participationem, consequuntur necessario haec corollaria :

1<sup>o</sup> Liberum arbitrium Dei est causa efficiens omnium, quae fiunt per liberum arbitrium creatum; causa, inquam, efficiens ipsius *potentiae* liberi arbitrii, ipsius *actus*, atque ipsius *transitus* de potentia in actum; nam quod per essentiam dicitur, est causa omnium, quae per participationem dicuntur. (*I. q. 44. et II. C. Gent.* cap. 15.)

2<sup>o</sup> Liberum arbitrium Dei est actus purus; liberum autem arbitrium creatum habet aliquid de potentia admixtum. Consequenter oportet, quod liberum arbitrium Dei comparetur

ad omnem liberam voluntatem creaturae sicut movens ad motum, et activum ad id, quod est in potentia.

3<sup>o</sup> Prima mensura essentiae vel naturae liberi arbitrii creati est ipsum liberum arbitrium Dei, sicut primum ens, quod est omnibus causa essendi. Ac proinde hoc erit naturale (id est, conveniens ac perfectivum) unicuique libero arbitrio, quod a Deo ei inditum est, et a Deo ei imprimitur per modum transeuntis. (I. q. 105. a. 1. et III. C. Gent. cap. 100.)

4<sup>o</sup> Liberum arbitrium Dei ut potentia agendi et ut actus realiter identificantur; liberum arbitrium creaturae ut potentia agendi et ut actus realiter distinguuntur. Quia in solo Deo sua substantia est suum *esse* et suum *agere*; et actio Dei non est aliud ab ejus potentia, sed utrumque est essentia divina, quia nec *esse* ejus est aliud ab ejus essentia. Unde potentia in rebus creatis non solum est *principium actionis*, sed etiam *effectus*; in Deo autem salvatur ratio potentiae quantum ad hoc, quod est *principium effectus*, non autem quantum ad hoc, quod est *principium actionis*, quae est ipsamet divina essentia. (I. q. 25. a. 1. et q. 54. a. 2. et 3.)

5<sup>o</sup> Deus ita est Dominus sui actus et causa sui, quod ab alio nec dependet nec dependere potest in agendo, et omnia absolute dependeant ab illo, sicut in essendo, ita in operando. Liberum autem arbitrium creatum non ita est causa sui, quod non etiam causetur a prima causa; non sic habet dominium sui actus, quin indigeat moveri a Deo. (I. q. 83. a. 1. ad 3.; I-II. q. 109. a. 2. ad 1.)

6<sup>o</sup> In libero arbitrio Dei non potest esse defectus aliquis, nec quantum ad *esse* nec quantum ad *bonitatem*; unde nullo modo est flexibile ad malum; etenim natura divina est suum *esse* et sua *bonitas*. Liberum autem arbitrium hominis et angeli, in suis naturalibus consideratum, in malum flexibile est; et quantum est de se, possibile est ad defectum, quamvis posse eligere malum non est de ratione liberi arbitrii. (*De Verit.* q. 24. a. 3.)

7<sup>o</sup> Quae conveniunt libero arbitrio Dei *ex natura*, sc.

ita tendere in bonum, quod nullo modo potest tendere in malum, non conveniunt libero arbitrio creato nisi ex *perfectione gratiae*.

8<sup>o</sup> Omnia, quae potest liberum arbitrium creatum supra seipsum et supra suum actum proprium, multo magis potest liberum arbitrium Dei. Sic homo et angelus sunt domini suorum actuum, possunt movere seipsos, et libera eorum voluntas potest immutare actum suum de uno in aliud. Ista omnia multo amplius conveniunt Deo; nam conveniunt Deo per se, et creaturis non conveniunt nisi per participationem ab ipso Deo. Unde D. Thomas, *De Verit.* q. 22. a. 8. : « Potest autem Deus voluntatem immutare ex hoc, quod ipse in voluntate operatur sicut in natura; unde sicut omnis actio naturalis est a Deo, ita omnis actio voluntatis, in quantum est actio, non solum est a voluntate ut immediate agente, sed a Deo ut a primo agente, qui vehementius imprimit; unde sicut voluntas potest immutare actum in aliud, ita et multo amplius Deus. » Et *De Malo* q. 16. a. 5. : « Deus immutat voluntatem hominis per gratiam de malo in bonum, secundum illud Prov. 21, 1 : *Cor regum in manu Dei, et quocumque voluerit, vertet illud.* » Et ibid. ad 13. « Movere voluntatem solus Deus potest, qui etiam secundum absolutam potentiam potest mutare voluntatem daemonis in bonum. »

Omnia in hac q. de influxu divino, reducuntur ad illam rationem communem, ad quam reducuntur quaestiones fundamentales de creatione et conservatione rerum : « Quia cum ipse Deus sit ens per suam essentiam, quia sua essentia est suum esse, oportet, quod omne, quod quocumque modo est, derivetur ab ipso. Nihil enim aliud est quod sit suum esse, sed omnia dicuntur entia per quandam participationem. Omne autem, quod per participationem dicitur tale, derivatur ab eo, quod est per essentiam; sicut omnia ignita derivantur ab eo, quod est per essentiam ignis. » (*De Malo*, q. 3. a. 2.)

Manifestum est autem, quod actio liberi arbitrii creati est quoddam ens, quod potentia ipsa est quoddam ens, quod transitus de potentia in actum est quoddam ens, quod deter-



minare seipsum ad unum est quoddam ens, quod immutare seipsum est quoddam ens, quod operari libere est quoddam ens, quod operari libere et bene est quoddam majus ens. Unde necesse est dicere, quod omnia et singula haec, in quantum habent de *esse*, de *bonitate* et de *libertate*, sunt a Deo, primo ente, primo bono et prima libertate, cujus virtus operativa vehementius ingreditur in effectus causarum secundarum quam ipsa virtus causae secundae, quantumvis perfecta, quantumvis libera.

#### § 4

**Argumentum : Quia liberum arbitrium creatum est causa subordinata.**

D. Thomas, *III. C. Gent.* cap. 67. sic istud argumentum explanat : « In omnibus causis agentibus ordinatis semper oportet, quod causae sequentes agant in virtute causae primae; sicut in rebus naturalibus corpora inferiora agunt in virtute corporum coelestium, et in rebus voluntariis omnes artifices inferiores operantur secundum imperium architectoris. In ordine autem causarum agentium Deus est prima causa, ut ostensum est lib. 1. cap. 13. Ergo omnes causae inferiores agentes agunt in virtute ipsius. Causa autem actionis magis est id, cujus virtute agitur, quam etiam illud, quod agit; sicut principale agens magis agit quam instrumentum. Deus igitur principalius est causa cujuslibet actionis quam etiam secundae causae agentes... Hinc est quod dicitur Is. 26, 12 : *Omnia opera nostra operatus es nobis, Domine.* Joh. 15, 5 : *Sine me nihil potestis facere.* Philipp. 2, 13 : *Deus est, qui operatur et velle et perficere pro bona voluntate sua.* Et hac ratione frequenter in Scriptura naturae effectus operationi divinae attribuuntur; quia ipse est, qui operatur in omni operante per naturam vel per voluntatem. »

Causae autem subordinatae per se in agendo possunt esse in duplici genere, nempe : causa subordinata, in qua nulla est virtus operativa ad agendum, nisi illa, quae communicatur a causa principali per suam motionem transeuntem et

applicantem ad operandum. Hoc modo baculus movet lapidem motus a manu; in baculo enim nihil virtutis est ad actionem movendi lapidem nisi praecise illa, quam manus per suam motionem transeuntem confert ei. Alterius generis causa subordinata est illa, in qua reperitur virtus propria operativa; vera forma, quae est principium intrinsecum operandi; et praeterea communicatur illa a causa principali ultima actualitas, complementum suae propriae virtutis, applicatio propriae formae ad agendum.

In hoc inter se differunt utraque causa subordinata : 1<sup>o</sup> quod in primo genere causae secunda causa movetur a prima, motione *praevia simpliciter quoad omnia*, ita ut nihil virtutis supponat in causa subordinata, cui cooperetur; in secundo autem genere causae secunda causa movetur a prima, motione *praevia secundum aliquid*, quoniam complet virtutem activam potentiae, in qua recipitur; tamen *non praevia* simpliciter quoad omnia, etenim praesupponit principium intrinsecum operandi, quod causa prima applicat per suam motionem, per quam cooperatur intrinsece, concurrens simul tempore ad operationem cum causa secunda; 2<sup>o</sup> quod in primo genere causae subordinatae praemotio causae primae est tota ratio actionis, cum non supponat in causa mota virtutem agendi, quam compleat et cui cooperatur; in secundo autem genere praemotio supponit in causa mota virtutem agendi, quam applicat et perficit; ac proinde tota ratio actionis exsurgit ex virtute propria causae secundae completa per virtutem transeuntem, quam confert causa prima movens secundam; 3<sup>o</sup> quod in primo genere causa secunda movet ob hoc praecise, quia movetur; unde movere causae secundae provenit ex moveri tantum. In secundo autem genere causa secunda subordinata movet ex eo, quod movetur, atque ex virtute propria. Unde movere causae hujusce provenit ex duobus : 1<sup>o</sup> ex moveri a causa prima; 2<sup>o</sup> ex modo proprio seu virtute activa ipsius causae secundae subordinatae.

Planum est, quod potentia liberi arbitrii collocanda venit in secundo genere causarum subordinatarum; etenim et habet

virtutem propriam agendi, quam Deus contulit per creationem et tenet in esse per conservationem; et insuper accipit novam virtutem a motione causae principalis, quae est Deus. Haec virtus de novo accepta complet ac perficit primam virtutem, et conjungens illam cum effectui intrinsece ei cooperatur. Sic liberum arbitrium creatum agit in virtute quidem propria, sed completa ac perfecta per virtutem Dei transeuntem. Unde *movere* liberae voluntatis procedit ex duobus : 1<sup>o</sup> ex *moveri* a Deo ; 2<sup>o</sup> ex forma seu principio intrinseco ipsius potentiae libere operandi et seipsam movendi. Quod expresse docet D. Thomas multis in locis. Sic *De Malo*, q. 6. a. unico ad 4. : « Dicendum, quod voluntas aliquid confert, cum a Deo movetur ; ipsa enim est, quae operatur, sed mota a Deo ; et ideo motus ejus quamvis sit ab intrinseco sicut a primo principio, non tamen est violentus. »

## § 5

**Argumentum : Quia liberum arbitrium  
creatum ex viribus naturalibus nullam habet potentiam  
ad opera salutis nisi potentiam obedientialem <sup>1</sup>.**

« Manifestum est autem, quod sicut motus omnes corporales reducuntur in motum coelestis corporis sicut in primum movens corporale, ita omnes motus, tam corporales quam spirituales, reducuntur in primum movens simpliciter, quod est Deus. Et ideo quantumcumque natura aliqua, corporalis vel spiritualis, ponatur perfecta, non potest in suum actum procedere, nisi moveatur a Deo ; quae quidem motio est secundum suae providentiae rationem, non secundum necessitatem naturae sicut motio corporis coelestis. Non solum autem a Deo est omnis motio sicut a primo movente, sed etiam ab ipso est omnis formalis perfectio sicut a primo actu. Sic igitur actio intellectus et cujusque entis creati dependet a Deo quantum ad duo : uno modo, in quantum ab ipso

<sup>1</sup> Vide *Part. Prim.* q. 4. a. 2. *Praenot* ; et q. 5. a. 10. § III. *Septimo*, et § IV. *Quarto*.

habet perfectionem sive formam per quam agit; alio modo, in quantum ab ipso movetur ad agendum. » (I-II. q. 109. a. 1.)

In argumento antecedenti ostensum fuit, quod *movere* liberi arbitrii causatur ex duobus, nempe : 1<sup>o</sup> ex moveri a Deo; 2<sup>o</sup> ex intrinseca virtute operativa, quae completur a Deo per physicam praemotionem. Quapropter *physica praemotio* non est *tota ratio* liberae actionis. Nunc in isto quinto argumento ostendit Angelicus Doctor, quomodo ex omni parte pendet absolute a Deo actio cujuscumque entis creati. Unde etsi *physica praemotio* non sit *tota ratio* liberae actionis, semper erit verum, quod *tota ratio* liberae actionis est a Deo; quoniam a Deo est omnis motio sicut a primo movente, et etiam ab ipso est omnis formalis perfectio sicut a primo actu. A Deo igitur est tota actio liberi arbitrii, quoniam a Deo similiter sunt illa duo, ex quibus resultat tota ratio liberae actionis. A Deo est motio, qua virtus operativa liberi arbitrii applicatur ad operandum, et a Deo similiter ipsa operativa liberi arbitrii virtus, qua a Deo praemota homo seipsum movet. Unde D. Thomas, III. q. 72. a. 3. ad 2. : « Instrumentum virtutem instrumentalem acquirit dupliciter, sc. quando accipit formam instrumenti, et quando movetur a principali agente ad effectum. »

Docet quoque Angelicus Doctor omnem naturam spiritua-lem, quantumvis perfectam, in actum suum procedere non posse, nisi moveatur a Deo, qui est actus purus; et consequenter in actum liberi arbitrii, quod est facultas voluntatis et rationis, nullam creaturam rationalem, etsi perfectam, transire valere, nisi per divinam motionem reducatur de potentia in actum. Perfectio autem in libero arbitrio potest provenire ex ipsa natura; nam facultas liberi arbitrii duo praesupponit, naturam et vim cognitivam; et cognitio alterius modi invenitur in homine quam in angelis. Homo enim habet cognitionem obumbratam et cum discursu veritatis notitiam sumentem. Unde liberum arbitrium est excellentius in angelis quam in hominibus, sicut et intellectus. (I. q. 59. a. 3.; *De Verit.* q. 24. a. 3.) Potest etiam procedere ex diverso statu naturae; et sic liberum arbitrium hominis post pecca-



tum est debilitatum suis viribus, et in statu innocentiae erat fortior mens hominis sani. Potest quoque procedere ex repetitione bonorum actuum, ex acquisitione habituum moralium, et praesertim ex infusione gratiae sanctificantis et virtutum supernaturalium; nam medium inter puram potentiam et actum completum est habitus. (III. q. 11. a. 5.)

Si ergo adhuc in statu gloriae, quando gratia erit omnino perfecta et nulla dabitur pronitas ad malum nec difficultas ad bonum, homo divino auxilio indigebit (I-II. q. 109. a. 1. ad 1.): quanto magis indigebit divina motione liberum hominis arbitrium viribus suis fractum et per peccata deordinatum ac male inclinatum, et ab ipso Deo aversum per vitiosam conversionem in bonum commutabile? Adhuc inter liberum arbitrium sanum atque in sua propria naturali conditione consideratum, et inter gratiam acquirendam, nulla datur proprie loquendo proportio, nulla ex viribus suis naturalibus dispositio, nullaque activa potentia. In libero arbitrio creato per comparisonem ad ordinem supernaturalem gratiae non est invenire nisi potentiam passivam; potentiam, per comparisonem ad agens primum, quod potest quamlibet creaturam reducere in actum aliquem altiore actu, in quem reducitur per agens naturale; et haec consuevit vocari potentia obedientiae in creatura. (III. q. 11. a. 1. et q. 1. a. 3. ad 3.)

Creatura itaque rationalis: 1<sup>o</sup> quantumvis perfecta, indiget, ut physice a Deo moveatur ad hoc, quod possit procedere in actum suum, tam intellectus quam voluntatis; 2<sup>o</sup> posita jam in actu liberae voluntatis, adhuc est in vera potentia passiva per respectum ad actus supernaturales fidei et caritatis; etenim ex una parte opus moraliter bonum, quod fit ex viribus naturalibus liberi arbitrii praemoti auxilio generali Dei, non est dispositio propria<sup>1</sup>, utpote actus commensuratus naturae viribus; et ex alia parte, hic non solum reperitur transitus liberi arbitrii de potentia in actum sibi naturaliter correspondentem, sed transitus, qui est elevatio liberae

<sup>1</sup> Vide *Part. Prim.* q. 1. a. 6. *Praenotanda.*

voluntatis et velut quaedam translatio ex ordine naturali ad ordinem superiorem, in quo mens humana induet novum esse et novum operari. In hac itaque translatione seu ascensione creaturae rationalis ad ordinem supernaturalem in essendo et in operando verificatur transitus majoris amplitudinis, et liberum arbitrium movetur quodam efficaciori motu, cujus terminus est gratiae sanctificantis consecutio et caritatis ceterarumque virtutum infusarum susceptio. Hic tota mens hominis innovatur; innovatur quoque et regeneratur ac elevatur tota facultas liberi arbitrii, quae formaliter est in voluntate, radicaliter autem in intellectu. Hic creatura rationalis acquirit *novam naturam* per gratiam justificantem, et *novas potentias* operandi per fidem, spem et caritatem : novum, inquam, esse et novum operari.

Ergo sicut in ordine naturae voluntas movetur a solo Deo sicut ab exteriori principio quantum ad exercitium actus, secundum rationem causae efficientis, quoniam solus Deus, qui est universale bonum, potest dare voluntati universalem ad bonum inclinationem; et quoniam solus Deus, qui creavit potentiam liberi arbitrii, potest illam intrinsece innovare, physice inclinare et quocumque voluerit transmutare et intra ipsam agere et imprimere : ita in ordine supernaturali solus Deus, qui est bonum universale specialiter desideratum a voluntate justificati, potest elevare mentem hominis et ipsius liberam voluntatem movere non modo physica motione generali, omnibus et singulis creaturis rationalibus communi, sed physica speciali transmutatione, qua liberum arbitrium creatum non solum transit de potentia in actum, sed acquirit novam permanentem virtutem, novosque longe excellentiores actus essendi et operandi. Et sicut Deus movet voluntatem hominis ut universalis motor ad universale objectum voluntatis, quod est bonum, et sine hac universali motione homo non potest aliquid velle : ita Deus in isto novo ordine homines justos convertit ad seipsum sicut ad specialem finem, quem intendunt et cui cupiunt adhaerere sicut bono proprio; et sine hac universali motione

in ordine supra naturam homo non potest aliquid velle, vel intendere, vel desiderare, quod sit vitae aeternae dignum.

Pariter, sicut in ordine naturae voluntas hominis ad bonum universale, quod est esse beatum quodque voluntas naturaliter et necessario vult, voluntas tametsi active agat et exerceat suam propriam virtutem, movetur a solo Deo et non movet seipsam : ita in ordine supernaturali gratiae voluntas hominis se ad Deum convertentis, ad illum tamquam finem specialem, quod est esse beatum, diligendo Deum super omnia, voluntas hominis, libera, inquam, hominis voluntas movetur a solo Deo; et in illo motu, quo in ipso justificationis momento tendit in Deum credendo, sperando et amando, voluntas se habet ut mota et non movens, solus autem Deus movens.

Hanc vero sublimem harmoniam inter ordinem naturae et ordinem gratiae, inter motionem, qua Deus movet ad beatitudinem in communi et ad beatitudinem in speciali prout est in ipso Deo; inter motionem, inquam, universalem, sine qua homo nihil potest velle, et motionem specialem, sine qua homo nihil potest velle in ordine ad vitam aeternam, indicavit Angelicus Doctor I-II. q. 9. a. 6.; ostendit postea q. 109. a. 6. et clare manifestavit deinde q. 111. a. 2. et postremo patefecit q. 113. a. 3., 6. et 8. <sup>1</sup>.

Primus itaque effectus, in quo refulget intrinseca efficacia gratiae actualis seu gratuita motionis, est effectus gratiae operantis, cum « per motum liberi arbitrii, dum justificamur, Dei iustitiae consentimus. Ille tamen motus non est causa gratiae, sed effectus; unde tota operatio pertinet ad gratiam ». (I-II. q. 111. a. 2. ad 2.) Quod jam ipse D. Thomas, a longe perspicuus hujus profundissimae doctrinae extrema capita, innuit quasi per transennam istum adeo mirandum parallelismum inter motionem Dei ut universalis motoris, et motionem Dei ut universalis motoris omnium justorum. Motio ad universale bonum est principium efficiens in humana volun-

<sup>1</sup> Vide *Part. Prim.* ubi loca supra citata ex professo declarantur q. 1. a. 6; q. 2. a. 2.; q. 5. a. 8.

tate primum gradum quoad executionem providentiae. Motio ad universale bonum, quod est determinate ipse Deus, est principium efficiens in humana voluntate primum gradum quoad executionem praedestinationis. Quamobrem I-II. q. 9. a. 6. ad 3. dicit :

« Deus movet voluntatem hominis sicut universalis motor ad universale objectum voluntatis, quod est bonum, et sine hac universali motione homo non potest aliquid velle; sed homo per rationem determinat se ad volendum hoc vel illud, quod est vere bonum vel apparens bonum. Sed tamen interdum specialiter Deus movet aliquos ad aliquid determinate volendum, quod est bonum, sicut in his, quos movet per gratiam, ut infra (I-II. q. 109. a. 6.; q. 111. a. 2.; q. 112. a. 2. et 3.; q. 113. a. 8.) dicitur. » Et Joh. 20. lect. 3. declarans illa verba, *Dicit ei Jesus : Mulier, quid ploras? quid quaeris?... Dicit ei Jesus : Maria ! Conversa illa dicit ei : Rabboni!* ait : « Primo ponitur vocatio, cum dicit : *Maria*, quam supra alloquens mulierem quasi nomine communi vocaverat. Sed hic proprio nomine vocatur *Maria*, ut designet specialem notitiam, quam habet ad sanctos. Ps. 146, 4 : *Qui numerat multitudinem stellarum et omnibus eis nomina vocat.* Exod. 33, 12 : *Novi te ex nomine*, et ut ostendat quod, licet quadam generali motione omnes res moveantur a Deo, specialiter tamen ad hominis justificationem necessaria est gratia specialis. Effectus vocationis ponitur cum dicit : *Conversa illa dicit ei : Rabboni, quod dicitur Magister.* »

*Primus* itaque *passus* in via motuum, actuum et operationum creatae voluntatis est a solo Deo; est motus ad universale objectum voluntatis, quod est bonum. Deinde, praesupposito jam fine communi, propter quem omnia agunt, homo per rationem determinat seipsum ad volendum hoc vel illud bonum particulare, aliquando verum, aliquando apparens; et ista determinatio per iudicium practicum rationis est quam sequitur acceptando voluntas in omnibus suis motibus deliberatis.

*Primus* quoque *passus* in via motuum, actuum et opera-



tionum creatae voluntatis in ordine supernaturali est etiam a solo Deo ut a movente : est motus fidei, spei, caritatis, cujus terminus est justificatio ; est motus ad universale bonum, quod est objectum voluntatis jam sanctificatae et Deum super omnia diligentis. Et est motus liber, quamvis non deliberatus. Non enim in isto primo passu determinat seipsum homo, sed a sola motione Dei determinatur ; non enim movet seipsum homo in isto primo motu, sed a solo Deo movetur ; quoniam est primus passus in alio superiori ordine, in via, quae conducit ad visionem divinae essentiae ; et nec oculus vidit, nec auris audivit, nec in cor hominis ascendit, quae praeparavit Deus diligentibus se.

Sed positus homo a Deo in hac coelesti via et collocatus in novo ordine et *essendi* et *operandi*, homo sub auxilio Dei speciali etiam determinat seipsum ad volendum hoc vel illud, quod est semper vere bonum ; nam in ista via nova omne bonum est bonum verum. Attamen *interdum, specialiter* Deus movet *aliquos* ad aliquid determinate volendum, quod est *bonum* magnum quoad substantiam rei vel quoad modum operandi, sicut in his, quos movet per habitus seu virtutes, quae vocantur dona Spiritus Sancti ; et tunc iterum habet locum effectus ille, in quo voluntas est mota et non movens, solus autem Deus movens. Etenim, ut observat Cajetanus (in I-II. q. 111. a. 2.) : « Gratia operans non solum invenitur in infusione gratiae et justificatione impii, sed post acceptam gratiam pluries, quamvis manifestius in justificatione impii. »



## CAPUT QUARTUM

**Natura seu characteres essentialis physicae  
praemotionis juxta doctrinam D. Thomae.**

---

### I

#### PRAENOTANDA

**PRIMO : Nihil velle possumus, nisi sit intellectum.** — Voluntas enim nostra movet intellectum ad intelligendum volendo intelligere; sed voluntas intellectum ad intelligendum nullo modo movere valeret, nisi prius ab ipso intellectu fuerit mota, ut vellet intelligere tamquam aliquod bonum. Attamen, ut docet D. Thomas I. q. 82. a. 4. ad 3. : « Non oportet procedere in infinitum, sed statim in intellectu sicut in primo. Omnem enim voluntatis motum necesse est quod praecedat apprehensio, sed non omnem apprehensionem praecedit motus voluntatis; sed principium considerandi et intelligendi est aliquod intellectivum principium altius intellectu nostro, quod est Deus. »

**SECUNDO : Causa et subjectum libertatis.** — Sub Deo, qui est primus motor immobilis, a quo procedit omnis motus tam voluntatis quam naturae, primum principium intrinsicum omnis voluntarii actus in nobis est vis cognoscitiva et appetitiva; nam ratio voluntarii tunc maxime invenitur in humanis actibus, cum homo maxime cognoscit finem sui operis, et cognoscendo movet seipsum ad opus suum exsequendum. Liberum itaque arbitrium, per quod homo habet dominium suorum actuum, est *facultas voluntatis et rationis*. Radix enim libertatis est voluntas sicut *subjectum*;

sed sicut *causa* est ratio; ex hoc enim voluntas libere potest ad diversa ferri, quia ratio potest habere diversas conceptiones boni. Et ideo philosophi definiunt liberum arbitrium, quod est *liberum de ratione iudicium*, quasi ratio sit causa libertatis. Liberum arbitrium dicitur facultas voluntatis et rationis, non quia utramque essentialiter comprehendat, sed virtualiter. Liberum arbitrium virtutem voluntatis et rationis colligit, propter quod facultas utriusque dicitur. (I-II. q. 1. a. 1 et 2.; q. 17. a. 1. ad 2.; II. Sent. dist. 24. q. 1. a. 2.)

**TERTIO : Relationes inter intellectum et voluntatem.** — Absolute et simpliciter loquendo, intellectus est nobilior quam voluntas, et potentia altior, quoniam objectum intellectus est altius et nobilius quam objectum voluntatis. Verumtamen in statu praesentis vitae melior est amor Dei quam cognitio; quia Deus in hoc statu immediate amatur, sed non immediate cognoscitur. Similiter, absolute et simpliciter loquendo, intellectus est primus motor omnium actuum humanorum; quoniam etsi moveatur a voluntate, voluntas tamen non ipsum movet nisi prius ab illo mota. Ad omne velle praecedit intelligere; non vero ad omne intelligere praecedit velle. Tametsi intellectus sit primus motor simpliciter omnium actuum humanorum, cum sit etiam primus motor ipsius voluntatis, a qua aliae potentiae animae moventur ad suos actus, utimur enim aliis potentiis cum volumus: attamen non est primus motor in omni genere motus, quo voluntas nata est moveri. Unde voluntas movet etiam ipsum intellectum quantum ad *exercitium* vel *usum* actus; quia, ut docet D. Thomas I-II. q. 9. a. 1., et ipsum verum, quod est perfectio intellectus, continetur sub universali bono ut quoddam bonum particulare. Sed quantum ad *determinationem* actus, quae est ex parte objecti, intellectus movet voluntatem; quia et ipsum bonum apprehenditur secundum quandam specialem rationem, comprehensam sub universali ratione veri. Et sic patet, quod non est idem movens et motum secundum idem.

**QUARTO : Duplex modus, quo voluntas movetur ad agendum.** — Cum autem voluntas sit primus motor omnium actuum humanorum quoad ipsum *exercitium* vel *usum* actus, atque hoc genere motus possit quoque movere semetipsam, quamquam non secundum idem voluntas movet et movetur (I-II. q. 9. a. 3.) : hinc duplex modus, quo voluntas movetur ad operandum : 1<sup>o</sup> quantum ad *determinationem* actus ; 2<sup>o</sup> quantum ad *exercitium* vel *usum* actus. Quod quidem duplex motionis genus constanter distinguit D. Thomas, quotiescumque de virtute immutandi humanam voluntatem pertractat, ac saepe in suis operibus, in quo altera ab altera differat motio, perspicue amat ostendere. Imprimis hujusce motionis diversitas ac necessitas sic probatur I-II. q. 9. a. 1. : « Respondeo dicendum, quod in tantum aliquid indiget moveri ab aliquo, in quantum est in potentia ad plura ; oportet enim, ut id quod est in potentia, reducat in actum per aliquid quod est in actu ; et hoc est movere. Dupliciter autem aliqua vis animae invenitur esse in potentia ad diversa : uno modo quantum ad *agere* vel *non agere* ; alio modo quantum ad *agere hoc* vel *illud* ; sicut visus quandoque videt actu, quandoque non videt, et quandoque videt album, quandoque videt nigrum. Indiget igitur movente quantum ad duo, sc. quantum ad *exercitium* vel *usum* actus, et quantum ad *determinationem* actus. Quorum primum est ex parte subjecti, quod quandoque invenitur agens, quandoque non agens ; aliud autem est ex parte objecti, secundum quod specificatur actus. » Et deinde considerans rationem boni et finis quae est objectum voluntatis, et ens et verum quod est objectum intellectus, concludit intellectum movere voluntatem sicut praesentans ei objectum suum, a quo actio voluntatis specificatur ; et voluntatem movere intellectum et alias potentias et etiam seipsam quoad exercitium actus. Unde quod voluntas agat vel non agat, a nulla alia potentia vel virtute creata accipit nisi a semetipsa ; quod autem agat hoc vel illud, voluntas accipit ab intellectu. Unde D. Thomas in fine hujus q. 9. a. 6. ad 3. expresse declarat, quod voluntas quoad exercitium actus non



movetur a Deo solo, nisi : *a*) quando « Deus movet voluntatem hominis sicut universalis motor ad universale objectum voluntatis, quod est bonum, et sine hac universali motione homo non potest aliquid velle »; *b*) quando « interdum specialiter Deus movet aliquos ad aliquid determinate volendum, quod est bonum, sicut in his, quos movet per gratiam ». In reliquis, quotiescumque voluntas operatur, « homo per rationem determinat se ad volendum hoc vel illud, quod est vere bonum vel apparens bonum ». Et tunc quod voluntas *velit* vel *non velit*, a seipsa habet; a semetipsa ad hujusmodi volitionem, quod est eligere vel consentire, movetur. Sed quod velit *hoc* vel *illud*, quod est vere bonum vel apparens bonum, a determinatione intellectus pendet, cujus objectum movet voluntatem determinando actum ipsius ad modum principii formalis.

**QUINTO : Natura utriusque motionis.** — Naturam vero utriusque praedictae motionis magis adhuc explanat Angelicus Doctor, I. q. 82. a. 4. : « Respondeo dicendum, quod aliquid dicitur movere dupliciter : Uno modo per modum finis, sicut dicitur, quod finis movet efficientem; et hoc modo intellectus movet voluntatem, quia bonum intellectum est objectum voluntatis et movet ipsam ut finis. Alio modo dicitur aliquid movere per modum agentis, sicut alterans movet alteratum, et impellens movet impulsum; et hoc modo voluntas movet intellectum et omnes animae vires. » Et hoc modo voluntas per modum agentis movet omnes animae potentias ad suos actus, praeter vires naturales vegetativae partis, quae nostro arbitrio non subduntur; et similiter voluntas per hoc, quod vult finem, movet seipsam ad volendum ea quae sunt ad finem.

Motio ergo, qua voluntas movetur ab *intellectu*, vocatur a D. Thoma : *a*) quantum ad determinationem seu specificationem actus; *b*) per modum finis; *c*) per modum suadentis; *d*) ab objecto; *e*) ab exteriori.

Motio autem, qua voluntas movetur a *seipsa*, denominatur a D. Thoma : *a*) quantum ad exercitium vel usum actus;

*b*) per modum agentis; *c*) per modum alterantis, impellentis, immutantis; *d*) ex parte ipsius potentiae; *e*) ab interiori <sup>1</sup>.

**SEXTO : Quomodo voluntas agatur per utramque motionem.**

— Omnia, quae movent aut movere possunt primo modo, in tantum agunt in potentiam voluntatis, in quantum agunt vel possunt agere in ipsum intellectum, per quem omnis motio ex parte objecti exterius praesentati valet pertingere usque ad voluntatem, quae est potentia omnino immaterialis et incorporea, et quam non est possibile movere quantum ad determinationem seu specificationem actus nisi mediante ipso intellectu. Etenim bonum intellectum, bonum ut apprehensum, est objectum voluntatis; et voluntas est appetitus rationalis, quae non sequitur nisi formam apprehensam a potentia intellectiva. Unde voluntas non tendit in aliquod bonum, sive verum aut apparens, sive spirituale aut corporale, nisi in quantum apprehenditur per intellectum et ab ipso immediate voluntati praesentatur. Tamen ad hoc, quod voluntas in aliquid tendat, non requiritur, quod sit bonum in rei veritate, sed sufficit, quod apprehendatur in ratione boni.

Quae autem movent voluntatem altero modo, semper directe agunt atque intrinsece in ipsam liberae voluntatis potentiam; et hujusmodi moventia nequeunt esse nisi solus Deus, qui dedit virtutem volendi, et ipsa voluntas, cui Deus, primum volens, contulit dominium proprii actus. Unde D. Thomas, *II. Sent.* dist. 25. q. 1. a. 2. ad 3. : « Ad actum liberi arbitrii nulla virtus est eo superior, nisi Deus, quamvis forte aliqua alia virtus creata simpliciter potentior sit; unde nulla virtus creata liberum arbitrium cogere nec immutare potest. Deus autem potest quidem immutare, sed non cogere, eo modo, quo dicitur non posse facere, ut duo contradictoria sint simul. » Et ad 5. : « Fides catholica ponit animas immediate a Deo creari; unde ipse solus in voluntate operari potest et in ipsam imprimere; et ideo diversitates humanae

<sup>1</sup> Vide : I. q. 82. a. 4.; q. 105. a. 5.; q. 106. a. 2.; q. 111. a. 2.; I-II. q. 9. a. 1.; *III. C. Gent.* cap. 70.; *De Pot.* q. 3. a. 7.

voluntatis in uniformitatem voluntatis divinae reducuntur sicut in primum regulans. »

**SEPTIMO : In quo consistat uterque modus agendi in potentiam voluntatis.** — Primus itaque modus movendi voluntatem consistit in determinata ratione proponendi objectum, sub ratione boni ab intellectu apprehensum, ipsi potentiae volitivae, cui praesentatur. Alter vero modus movendi consistit in applicatione ipsius virtutis volendi ad operationem; sicut etiam artifex applicat securim ad scindendum, qui tamen interdum formam securi non tribuit; in applicatione quidem intrinseca, per quam ipsa virtus operativa causae secundae completur et elevatur de posse operari ad actualiter operandum. Primum ergo est movere secundum rationem causae finalis, alliciendo, suadendo, inspirando desiderium sui, et appellatur **motio moralis**. Alterum vero est movere secundum rationem causae efficientis, intrinsece immutando, interius inclinando, reducendo de potentia in actum, transferendo de actu primo in actum secundum, et nominatur **motio physica**. Omnis motio physica praesupponit motionem moralem; sed motio moralis non necessario connectitur cum motione physica; potest enim esse, et de facto invenitur pluries absque illa. Non datur potentiae motio ex parte *subjecti* sine praevia motione ex parte *objecti*; motio autem ex parte *objecti* non sufficit ad peragendam immutationem potentiae ex parte *subjecti*.

**OCTAVO : Characteres essentiales physicae praemotionis.** — Nunc ergo, etsi non omnis praemotio physica sit gratia efficax, omnis tamen gratia efficax formaliter constituitur per praemotionem physicam. Notae vero seu essentiales praemotionis physicae characteres, quibus intrinsecam divinae gratiae efficaciam probare intendimus, ad sequentia reduci possunt :

1<sup>o</sup> Physica praemotio est Dei motio immediata immediate suppositi in ipsam potentiam liberi arbitrii.

2<sup>o</sup> Est Dei motio immediata immediate virtutis in ipsum actum liberi arbitrii.

3º Est Dei motio determinans ad unum potentiam liberi arbitrii.

4º Est Dei motio faciens nos velle hoc vel illud.

5º Est Dei motio, ad quam necessario necessitate infallibilitatis sequitur effectus in potentia liberi arbitrii, qui est eligere vel consentire.

## II

### **Physica praemotio est Dei motio immediata immediatione suppositi in ipsam potentiam liberi arbitrii.**

Ut autem haec prima atque essentialis physicae praemotionis nota perfecte capiatur, oportet mente recolere illos quatuor modos, quibus Deus operatur in omni creatura operante, quosque D. Thomas clare ac distincte explicat ubique in suis omnibus scriptis, praesertim in utraque *Summa* atque in *Quaest. Disp. De Pot.* q. 3. a. 7. docet et docendo concludit : « Sic ergo Deus est causa actionis cujuslibet, in quantum dat virtutem agendi, et in quantum conservat eam, et in quantum applicat actioni, et in quantum ejus virtute omnis alia virtus agit. Et cum conjunxerimus his, quod Deus sit sua virtus, et quod sit intra rem quamlibet non sicut pars essentiae, sed sicut tenens rem in esse : sequetur, quod ipse in quolibet operante immediate operetur, non exclusa operatione voluntatis et naturae. »

*Primus* itaque modus, quo Deus operatur in creatura rationali, est quo tribuit ei virtutem operandi ; unde Deus est causa nostrarum electionum omniumque humanorum actuum, in quantum dat nobis potentiam liberi arbitrii, per quam libere operamur. *Secundus* modus, quo Deus operatur in homine et angelo, est quo potentiam liberi arbitrii, postquam causavit, ipse conservat et tenet in esse. *Tertius* modus, quo Deus operatur in nobis, est quo potentiam,



quam nobis tribuit et in nobis conservat, ipse movet et applicat ad agendum. *Quartus* denique modus, quo Deus operatur in nobis, est quo per potentiam, quam ipse nobis tribuit et in nobis conservavit et ad agendum applicavit, nos ipsi operamur in virtute nostra propria simul ac in virtute ipsius Dei. Atque in omnibus ac singulis praedictis quatuor modis, quibus Deus operatur in quolibet operante creato, semper semperque Deus operatur immediate, vel immediatione suppositi, vel saltem immediatione virtutis, vel utraque immediatione. Quotiescumque Deus operatur immediate immediatione suppositi, etiam operatur immediate immediatione virtutis, at non e converso.

Dicitur enim agens agere immediate immediatione virtutis, quando virtus agentis jungitur effectui ex se, virtute propria, ab intrinseco sui, non mendicando talem conjunctionem ab aliqua alia virtute. Dicitur autem agens agere immediate immediatione suppositi, quando inter agens et ipsius effectum nulla alia mediat causa efficiens, nullum suppositum subordinatum coagens. Cum autem Deus operatur, necesse est, ut semper operetur immediate immediatione virtutis; aliter non esset Deus, qui operatur. Cum vero dicitur Deus non operari immediate immediatione suppositi, tantummodo significatur, quod Deus causat effectus et vult illos facere mediante natura, ut servetur ordo in rebus. Deus enim operatur in omni operante, et operatur in nobis omnia opera nostra; operatur, inquam, mediantibus rebus creatis, quibus dedit veram virtutem operativam; non tamen operatur propter defectum sui virtutis, sed propter abundantiam suae bonitatis, ut dignitatem causalitatis etiam creaturis communicet. (*De Pot.* q. 3. a. 7. ad 16.; *III. C. Gent.* cap. 70.; *I. q. 22. a. 3.*) Attamen, quamvis Deus hoc sensu non operetur semper immediate immediatione suppositi, non tamen propter hoc Deus desinit esse in omnibus rebus intime per essentiam, praesentiam et potentiam. In omnibus, inquam, rebus, sicut dans eis *esse* et *virtutem* et *operationem*. (*I. q. 8. a. 1. et 2.*)

Jam vero: in *primo* modo, quo Deus est causa actus liberi, Deus operatur immediate immediatione virtutis et

immediatione suppositi; quoniam potentia seu virtus libere operandi confertur a Deo per creationem angeli et creationem animae rationalis. Et impossibile est, quod alicui creaturae conveniat creare, neque virtute propria neque instrumentaliter sive per ministerium. Creatio est propria actio ipsius Dei. (I. q. 45. a. 5.)

In *secundo* autem modo, quo Deus est causa actus liberi, Deus operatur immediate immediatione virtutis simul atque suppositi; quoniam, licet sit verum, quod Deus conservat res quasdam in esse mediantibus aliquibus causis, praesupposita tamen principali conservatione, quae est ab ipso: ea tamen, quae nequeunt produci nisi per creationem, sicut substantiae spirituales et formae subsistentes, conservantur in esse a solo Deo. Per se enim solum conservat Deus omnia, quae per se produxit. Esse per se consequitur formas subsistentes creatas, supposito tamen influxu Dei; sicut lumen sequitur diaphanum aëris, supposito tamen influxu solis. Sic pariter formae subsistentes conservantur in esse, supposita continuatione hujus divini influxus; *conservatio enim est continuata creatio*. (I. q. 104. a. 1. et 2.)

In *tertio* autem modo, quo Deus est causa actus liberi, operatur quoque Deus immediate immediatione virtutis atque immediatione suppositi; quoniam hoc modo Deus est causa actionis cujuslibet rei creatae et operatur in ipsa natura vel voluntate ut movens et applicans virtutem ad agendum; et dum virtus agendi movetur et applicatur, aliquid in ipsa virtute operativa operatur; sed agitur a solo Deo, nulla causa intermedia operante; et agitur a solo Deo ita, ut in hoc modo causandi actum Deus operetur in voluntate et natura, absque eo, quod natura et voluntas adhuc operentur. Unde D. Thomas, *De Pot.* q. 3. a. 7. ad 3. « Dicendum, quod in operatione, qua Deus operatur movendo naturam, non operatur natura; sed ipsa naturae operatio est etiam operatio virtutis divinae, sicut operatio instrumenti est per virtutem agentis principalis. »

In *quarto* tandem modo, quo Deus est causa actionis cujuslibet rei creatae, Deus operatur quidem semper immediate

immediatione virtutis, at non immediate immediatione suppositi. Quia sic intelligendum est Deum operari in rebus, quod tamen ipsae res propriam habeant operationem; et in hoc quarto modo Deus ita est causa actionis cujuslibet creaturae, in quantum virtute ipsius Dei omnis alia virtus agit. Unde in hoc quarto modo, ut D. Thomas docet, tam Deus quam natura immediate operantur, licet ordinentur sicut prius et posterius. Deus est prius agens, immediate agens in operatione cujuslibet operantis *prioritate causalitatis et immediatione virtutis*; creatura vero est semper posterius agens, quia semper agit in virtute divina; attamen est prius et immediate agens proximitate et immediatione suppositi; etenim Deus minime subtrahit ordinem causae et causati a rebus creatis, sed complet ac perficit. Operationes atque effectus causarum secundarum producit Deus mediantibus ipsismet causis secundis: « Non enim hoc est ex insufficientia divinae virtutis, sed ex immensitate bonitatis ipsius, per quam suam similitudinem rebus communicare voluit, non solum quantum ad hoc, quod essent, sed etiam quantum ad hoc, quod aliorum causae essent..... Per hoc etiam decor ordinis in rebus creatis apparet. » (III. C. Gent. cap. 70.)

Atque inter hos quatuor modos, quibus Deus est causa cujuslibet actionis, et quibus operatur in quolibet operante, non exclusa operatione voluntatis et naturae, adest quidam mirificus ordo, sic, ut alter alterius sit continuatio, perfectio et complementum, non quidem ex parte Dei operantis, sed ex parte naturae et voluntatis, quae per diversos gradus perfectionis educuntur de potentia in actum: 1<sup>o</sup> in ordine *essendi*; 2<sup>o</sup> in ordine *operandi*. In *primo* enim modo intelligitur *collatio* virtutis activae; dum enim mens hominis creatur, facultas voluntatis et rationis ei confertur. In *secundo* autem modo intelligitur *conservatio* virtutis activae seu potentiae libere operandi, quae per creationem fuit creaturae rationali collata. In *tertio* vero modo intelligitur *applicatio* ad actionem ipsius virtutis activae, quam Deus contulit nobis et in esse conservat. In *quarto* denique modo intelligitur *ipsa operatio* liberae voluntatis, quae libere agit, virtute

quidem propria, sed in virtute quoque Dei, qui creavit, conservavit et applicavit ad agendum ipsam liberam voluntatem operantem sub Deo primo volente, ut instrumentum sub agente principali. Secundus itaque modus est complementum primi, tertius vero complementum primi et secundi, quartus autem ultima perfectio ceterorum. Conservatio rei non est nisi continuatio esse ipsius, operatio virtutis operativae non est nisi continuatio applicationis ipsius virtutis, ad actionem. Conservatio est continuata creatio; et influxus divinus, in cujus virtute omnis alia virtus agit, est physica motio continuata.

Fundamentum autem scientificum ac vere philosophicum horum omnium postea ex professo declarandum indicatur sic ab Angelico Doctore : « Impossibile est, quod actio angeli vel cujuscumque alterius creaturae sit ejus substantia. Actio enim est proprie actualitas virtutis, sicut esse est actualitas substantiae vel essentiae. Impossibile est autem, quod aliquid, quod non est purus actus, sed aliquid habet de potentia admixtum, sit sua actualitas; quia actualitas potentialitati repugnat. Solus autem Deus est actus purus. Unde in solo Deo sua substantia est suum esse et suum agere... Nec in angelo nec in aliqua creatura virtus vel potentia operativa est idem quod sua essentia. Quod sic patet : cum enim potentia dicatur ad actum, oportet, quod secundum diversitatem actuum sit diversitas potentiarum. Propter quod dicitur, quod proprius actus respondet propriae potentiae. In omni autem creato essentia differt ab ejus esse, et comparatur ad ipsum sicut potentia ad actum, ut ex supradictis patet. Actus autem, ad quem comparatur potentia operativa, est operatio. In angelo autem non est idem intelligere et esse; nec aliqua alia operatio, aut in ipso aut in quocumque alio creato, est idem cum ejus esse. Unde essentia angeli non est ejus potentia intellectiva, nec alicujus creati essentia est ejus operativa potentia. » (I. q. 54. a. 1. et 3.)

Qui istam fundamentalem doctrinam D. Thomae intelligant, prompte, facile ac delectabiliter intelligent doctrinam de physica praemotione atque de divina gratia ab intrinseco,



ex se et per se efficaci. Qui vero praedictam solidissimam doctrinam non capiant, in tenebris opus est ut perpetuo ambulent, ac de altissima philosophia Angelici Doctoris non gustabunt quidquam, nec in plenitudinem christianae metaphysicae introibunt. Qui autem hanc fundamentalem veritatem philosophiae christianae perspicere non valeant, sciant certissime, quod pro ipsis non fuit scripta *Summa Contra Gentes* nec *Summa Theologica*. At eo, unde digressi sumus, redeamus.

Primus itaque atque essentialis character physicae praemotionis stat in hoc, quod est Dei motio immediata immediate suppositi et immediate virtutis, movens et applicans ipsam potentiam liberi arbitrii ad agendum. Non est enim hujusmodi motio et applicatio *collatio* potentiae operativae, sed *collatio* virtutis *transeuntis*, qua potentia operativa, quae est per se virtus operandi *permanens*, completur et perficitur secundum rationem suae activitatis, in ratione esse principii sui actus. Non confertur ipsa virtus volendi, ipsa facultas voluntatis, sed movetur et applicatur; et per hanc divinam applicationem reducitur de potentia in actum; per hunc divinum motum (motio enim moventis in re mobili est motus) potentia liberae voluntatis participat aliquid de virtute principalis causae; et hoc aliquid est complementum propriae formae et propriae virtutis; et hoc aliquid est ipsa virtus divina participata per modum transeuntis, et conjungens virtutem operativam, creaturae collatam per modum permanentis, proprio actui et effectui proprio. Unde D. Thomas: « Nam complementum virtutis agentis secundi est ex virtute agentis primi. » (*III. C. Gent. cap. 66. et De Pot. q. 3. a. 7.*)

Atque iste primus essentialis character physicae praemotionis, ex quo velut ex sua radice oriuntur alii quatuor nobis explanandi, constituit quoque primam et radicalem differentiam inter duplex genus motionis, quo voluntas creata potest moveri, videlicet: 1<sup>o</sup> motione, quae dicitur et est *moralis*; 2<sup>o</sup> motione, quae dicitur et est *physica*. Angelicus enim Doctor constanter tradit et explicat rationem essen-

tialem utriusque motionis ; ac dum sollicite utramque distinguit, perpetuus est in docendo, quod *physice movere* potentiam voluntatis est proprium Dei, sicut proprium Dei est voluntatem *creare* et *conservare*.

*Physica* enim motio voluntatis est : *a*) voluntatem moveri ab eo, qui causat virtutem volendi ; *b*) voluntatem immutari ex parte ipsius potentiae ; *c*) voluntatem immutari ab interiori ; *d*) voluntatem immutari per modum causae efficientis ; *e*) voluntatem moveri ab exteriori principio eo modo, quo movetur a seipsa, nempe quantum ad exercitium actus.

*Moralis* autem motio voluntatis est : *a*) voluntatem moveri ab objecto, quod est bonum ; *b*) voluntatem moveri ab eo, qui demonstrat aliquid esse bonum ; *c*) voluntatem immutari ab exteriori ; *d*) voluntatem immutari per modum causae finalis ; *e*) voluntatem immutari per viam intellectus, motione intellectus, sicut praesentans ei objectum suum.

Nunc vero : ex hac radicali differentia, diversimode denominata, inter utrumque motionis genus, D. Thomas infert tria, quorum 1. : Movere potentiam liberi arbitrii *physice*, id est, interius eam inclinando, competit soli Deo ; quoniam solus Deus potentiam liberi arbitrii fecit ac causavit, et quoniam solius Dei, qui est bonum per essentiam, proprium est inclinare voluntatem in bonum universale. 2. : Movere potentiam liberi arbitrii sufficienter et efficaciter *moralis* motione, id est, ab objecto, etiam non competit nisi soli Deo, cujus virtus activa in movendo per modum finis non tantum adaequat, sed excedit etiam capacitatem voluntatis creatae. 3. : Quotiescumque Deus movet immediate immediatione suppositi, semper sufficienter et efficaciter movet eo modo, quo vult, et quando vult, et quocumque vult.

Cum igitur de conceptu essentiali physicae motionis sit, quod Deus immediate immediatione suppositi agat in ipsam potentiam liberi arbitrii, implicat in terminis, quod si Deus physice voluntatem moveat, voluntas non moveatur ; si Deus voluntatem transmutet de malo in bonum, voluntas non transmutetur ; si Deus transferat peccatorem de statu injustitiae ad statum iustitiae, peccator non justificetur. Qua-

propter D. Thomas, loquens de hac physica motione, *De Verit.* q. 22. a. 9. scribit : « Ex parte quidem voluntatis mutare actum voluntatis non potest, nisi quod operatur intra voluntatem ; et hoc est ipsa voluntas, et id, quod est causa esse voluntatis, quod secundum fidem solus Deus est. Unde solus Deus potest inclinationem voluntatis, quam et dedit, transferre de uno in aliud, secundum quod vult. » Porro ipse D. Thomas aperte docet efficaciam intrinsecam divinae gratiae constitui formaliter per hanc physicam liberae voluntatis immutationem factam a Deo non modo prout est auctor tantum naturae, verum prout est quoque auctor ordinis supernaturalis. Unde I. q. 106. a. 2. in *contra* : « Ejus est immutare voluntatem, cujus est justificare, cum justitia sit rectitudo voluntatis. Sed solus Deus est, qui justificat. » Et q. 111. a. 2. in *contra* : « Immutare voluntatem est proprium Dei, secundum illud Prov. 21, 1 : *Cor regis in manu Domini ; quocumque voluerit, vertet illud.* » Et in c. a. : « Et sic cum motus voluntatis non sit aliud quam inclinatio voluntatis in rem volitam, solius Dei est sic immutare voluntatem, qui dat naturae intellectuali virtutem talis inclinationis. Sicut enim inclinatio naturalis non est nisi ab eo, qui dat naturam, ita inclinatio voluntaria non est nisi a Deo, qui causat voluntatem. »

Haec est igitur gratia ex se efficax, Dei motio, qua voluntas nostra physice movetur atque sic interius immutatur, ut incipiat bonum velle, si prius malum volebat, et convertatur ad Deum sicut ad specialem finem, quem homines justii intendunt. (I-II. q. 109. a. 6. et q. 111. a. 2.) Per hanc quippe motionem omnis duritia cordis dissolvitur, omnis voluntatis fictio aufertur ; et quidquid Deus facit, ut velimus, hoc naturaliter, voluntarie, libere volumus. Unde D. Thomas, III. q. 69. a. 9. ad 2. : « Quando Deus voluntatem hominis de malo in bonum mutat, tunc homo non accedit fictus ; sed non semper hoc Deus facit. » Et ibid. q. 44. a. 2. ad 1. : « Sicut inferioribus corporibus naturale est moveri a coelestibus corporibus, quae sunt superiora secundum naturae ordinem, ita etiam naturale est cuilibet creaturae, ut trans-

mutetur a Deo secundum ejus voluntatem. » Et ibid. a. 3. ad 1. : « Ex quibus omnibus patet, quod Christus, quando voluit, virtute divina animas hominum immutavit, non solum justificando et sapientiam infundendo (quod pertinet ad miraculorum finem), sed etiam exterius alliciendo vel terrendo vel stupefaciendo, quod pertinet ad ipsa miracula. »

### III

**Physica praemotio est Dei motio immediata  
immediatione virtutis in ipsum actum liberi arbitrii.**

D. Thomas, I. q. 2. a. 3. : « Secunda via est ex ratione causae efficientis. Invenimus enim in istis sensibilibus esse ordinem causarum efficientium... In omnibus causis efficientibus ordinatis primum est causa medii, et medium est causa ultimi... Ergo est necesse ponere aliquam causam efficientem primam, quam omnes Deum nominant. » Et I. q. 105. a. 5. : « Si sint multa agentia ordinata, semper secundum agens agit in virtute primi agentis. Nam primum agens movet secundum ad agendum ; et secundum hoc omnia agunt in virtute ipsius Dei ; et ita ipse est causa omnium actionum agentium. » Ac I-II. q. 109. a. 1. : « Quantumcumque natura aliqua, corporalis vel spiritualis, ponatur perfecta, non potest in suum actum procedere nisi moveatur a Deo. » Atque *I. Sent.* dist. 37. q. 1. a. 1. ad 4. : « Respectu ejusdem operationis non potest esse duplex causa proxima eodem modo, sed diversimode potest ; quod sic patet. Operatio reducitur sicut in principium in duo : in ipsum agentem et in virtutem agentis, qua mediante exit operatio ab agente. Quanto autem agens est magis proximum et immediatum, tanto virtus ejus est mediata, et primi agentis virtus est immediatissima... Et ita patet, quod cum Deus sit prima causa omnium, sua virtus est immediatissima omnibus. Sed quia ipsemet est sua virtus, ideo non tantum est immediatum principium



operationis in omnibus, sed immediate in omnibus operans; quod in aliis causis non contingit, quamvis singulae res proprias operationes habeant, quibus producunt suos effectus. » Et *II. Sent.* dist. 1. q. 1. a. 4. : « Unde operatio creatoris magis pertingit ad intima rei quam operatio causarum secundarum; et ideo hoc, quod creatum est causa alii creaturae, non excludit, quin Deus immediate in rebus omnibus operetur, in quantum virtus sua est sicut medium conjungens virtutem cujuslibet causae secundae cum suo effectu; non enim virtus alicujus creaturae posset in suum effectum, nisi per virtutem creatoris, a quo est omnis virtus et virtutis conservatio et ordo ad effectum; quia, ut dicitur in *De causis* prop. 1., causalitas causae secundae finaliter est per causalitatem causae primae. » Praeterea *De causis* lect. 1. : « Operatio, qua secunda causa causat effectum, causatur a causa prima. Nam causa prima adjuvat causam secundam, faciens eam operari... Causa secunda non agit in causatum suum nisi virtute causae primae. » Et lect. 9. : « Dictum est autem in prima propositione, quod causa inferior operatur per virtutem causae superioris; unde virtus causae superioris est virtus virtutis causae inferioris. » Et *De Verit.* q. 22. a. 2. : « Secunda causa non potest influere in suum effectum, nisi in quantum recipit virtutem primae causae. » Et *III. C. Gent.* cap. 70. : « Virtus infimi agentis non habet, quod producat hunc effectum ex se, sed ex virtute superioris proximi, et virtus illius ex virtute superioris; et sic virtus supremi agentis invenitur ex se productiva effectus, quasi causa immediata... *Idem effectus* ab inferiori agente et a Deo; ab utroque immediate, licet alio et alio modo... *Totus* ab utroque secundum alium modum, sicut idem effectus totus attribuitur instrumento, et principali agenti etiam totus. » Et *De Pot.* q. 3. a. 7. : « Sic ergo Deus est causa omnis actionis, prout quodlibet agens est instrumentum divinae virtutis operantis. Sic ergo si consideremus supposita agentia, quodlibet agens particulare est immediatum ad suum effectum. Si autem consideremus virtutem, qua fit actio, sic virtus superioris causae erit immediatior effectui quam virtus

inferioris ; nam virtus inferior non conjungitur effectui nisi per virtutem superioris. Unde dicitur *De causis* prop. 1. quod virtus causae primae prius agit in causatum et vehementius ingreditur in ipsum. »

Ex quibus omnibus habetur : 1<sup>o</sup> Actus liberae voluntatis, qui sunt velle, intendere, consentire, eligere, cum habeant veram rationem effectus causati a potentia liberi arbitrii, esse productos secundum totum et a Deo et a libero arbitrio creato ; ab utroque immediate ; et ab utroque *totus* et *idem* effectus, eadem et tota operatio. 2<sup>o</sup> Totum et eundem effectum, eandem et totam operationem produci a Deo et a libera voluntate, alio et alio modo : a libera quidem voluntate immediate immediatione *suppositi*, a Deo autem immediate immediatione *virtutis*. 3<sup>o</sup> Totum et eundem effectum, totam eandemque liberam operationem ab utroque, a Deo sc. et potentia liberi arbitrii, at secundum alium modum. A Deo namque illo modo, quo totus effectus attribuitur principali agenti ; a potentia vero liberi arbitrii, seu ab homine per liberi arbitrii potentiam, illo modo, quo idem effectus totus attribuitur instrumento, « sicut artifex applicat securim ad scindendum, qui tamen interdum formam securi non tribuit ». (I. q. 105. a. 5.) Deus enim, qui est artifex applicans liberum hominis arbitrium ad propriam operationem, etiam tribuit *formam* libere operandi homini, qui est « tamquam instrumentum anima rationali animatum, quod ita agitur, quod etiam agit ». (III. q. 7. a. 1. ad. 3.)

Ex praedictis habetur etiam, quod virtus communicata ipsi libero arbitrio creato per illam motionem, qua Deus agit in omni agente ut primum efficiens, et qua ut primum movens movet et applicat potentiam liberi arbitrii ad agendum :

a) Est *immediatior* actui libero quam propria ipsius liberae voluntatis virtus.

b) *Prius* agit in ipsum effectum liberi arbitrii quam potentia activa voluntatis.

c) *Vehementius* ingreditur in ipsam liberi arbitrii operationem, quod est velle, intendere, consentire et eligere.

d) *Est sicut medium conjungens* virtutem liberae voluntatis cum omnibus suis actibus; et veluti *pons*, per quem omnes animae rationalis potentiae operativae transeunt ad actus suos, et perveniunt deinde agendo usque ad terminos, suis propriis operationibus ab ipso Deo primo movente praefixos.

e) Est denique illa vis, qua cunctae res creatae omnesque agendi virtutes, etiam intellectus et voluntas, agunt ad *esse*, ut instrumentum primae causae : vis, de qua scribit D. Thomas, quod est vis divinae artis cuncta facientis, et quod non potest ulli creaturae conferri tamquam virtus propria aut quasi forma permanens, « nisi daretur ei, quod esset universale essendi principium ». (*De Pot.* q. 3. a. 7. ad 7.)

Gratia vero ex se ab intrinseco efficax est illa motio supernaturalis <sup>1</sup>, qua non modo completur virtus libere operandi in creatura rationali, verum etiam infunditur a Deo *novum esse* in essentia animae, et superadditur nova virtus altius operandi supra vires naturales liberi arbitrii, virtus altius cognoscendi in intellectu, et virtus altius diligendi in voluntate; et hoc per modum formae permanentis, ut sunt omnes virtutes infusae. Est illa motio, qua Deus agit in effectus liberae voluntatis per caritatem jam informatae, vehementius quam ipsa voluntas hominis justificati. Est sicut medium conjungens non tantum potentias animae rationalis, sed ipsosmet habitus supernaturales, quibus potentiae perficiuntur et elevantur in ordine agendi, cum omnibus actibus salutaribus vitaeque aeternae meritoriis. Est illa vis, qua creatura rationalis agit ut instrumentum primi agentis ad esse gratiae et gloriae, et per quam Deus adimplet in nobis ordinem divinae praedestinationis, vocando quos praedestinavit, justificando quos vocavit, glorificando quos justificavit.

<sup>1</sup> Vide *Part. Prim.* q. 5. a. 8., et *Epilog.* IV. corol. 7.

## IV

**Physica praemotio est Dei motio  
determinans ad unum potentiam liberi arbitrii.**

D. Thomas, *I. C. Gent.* cap. 82. ait. : « Ad utrumlibet enim esse alicui virtuti potest convenire dupliciter : uno modo, ex parte sui ; alio modo, ex parte ejus ad quod dicitur. Ex parte quidem sui, quando nondum consecuta est suam perfectionem, per quam ad unum determinetur ; unde hoc in imperfectionem virtutis redundat, et ostenditur esse potentialitas in ipsa, sicut patet in intellectu dubitantis, qui nondum assecutus est principia, ex quibus ad alterum determinetur. Ex parte autem ejus ad quod dicitur, invenitur aliqua virtus ad utrumlibet esse, quando perfecta operatio virtutis a neutro dependet, sed tamen utrumque esse potest ; sicut aliquis, qui diversis instrumentis uti potest aequaliter ad idem opus perficiendum. Hoc autem ad imperfectionem virtutis non pertinet, sed magis ad ejus eminentiam, in quantum utrumlibet expositorum excedit ; et ob hoc determinatur ad neutrum, se ad utrumlibet habens. Sic autem est in divina voluntate respectu aliorum a se ; nam finis ejus a nullo aliorum dependet, cum tamen ipsa fini suo perfectissime sit unita. Non igitur oportet potentialitatem aliquam in divina voluntate poni. Similiter autem nec mutabilitatem... »

Quam quidem doctrinam complet ac dilucidat Angelicus Doctor, *De Verit.* q. 22. a. 4. : « Quanto enim, ait, aliqua natura est Deo propinquior, tanto expressior in ea divinae dignitatis similitudo invenitur. Hoc autem ad divinam dignitatem pertinet, ut omnia moveat et inclinet et dirigat, ipse a nullo alio motus vel inclinatus vel directus. Unde quanto aliqua natura est Deo vicinior, tanto minus ab eo inclinatur et magis nata est seipsam inclinare. Natura igitur insensibilis, quae ratione suae materialitatis est maxime a Deo



remota, inclinatur quidem in aliquem finem, non tamen est in ea aliquid inclinans, sed solummodo inclinationis principium, ut ex praedictis a. 1. hujus q. patet. Natura autem sensitiva, ut Deo propinquior, in se ipsa habet aliquod inclinans, sc. appetibile apprehensum; sed tamen inclinatio ipsa non est in potestate ipsius animalis, quod inclinatur, sed est ei aliunde determinata. Animal enim ad aspectum delectabilis non potest non concupiscere illud, quia illa animalia non habent dominium suae inclinationis; unde non agunt, sed magis aguntur; et hoc ideo, quia vis appetitiva sensibilis habet organum corporale, et ideo vicinatus dispositionibus materiae et rerum corporalium, ut moveatur magis quam moveat. Sed natura rationalis, quae est Deo vicinissima, non solum habet inclinationem in aliquid, sicut habent inanimata, nec solum movet se secundum hanc inclinationem quasi aliunde sibi determinatam, sicut natura sensibilis: sed ultra hoc habet in potestate ipsam inclinationem, ut non sit ei necessarium inclinari ad appetibile apprehensum, sed possit inclinari vel non inclinari; et sic ipsa inclinatio non determinatur ei ab alio, sed a seipsa. Et hoc quidem competit ei, in quantum non utitur organo corporali; et sic recedens a natura mobilis, accedit ad naturam moventis et agentis. Quod autem aliquid determinet sibi inclinationem in finem, non potest contingere nisi cognoscat finem et habitudinem finis in ea quae sunt ad finem: quod est tantum rationis. Et ideo talis appetitus, non determinatus ex aliquo alio de necessitate, sequitur apprehensionem rationis; unde appetitus rationalis, qui voluntas dicitur, est alia potentia ab appetitu sensibili. » (Conferatur etiam I. q. 18. a. 3. et I-II. q. 1. a. 2.)

Se enim habere ad utrumlibet vel ad alterum oppositorum, rem valde diversam significat, secundum quod consideratur diversa ratio, quare potest convenire alicui virtuti operativae sive alicui subjecto virtute agendi praedito. Primo namque habere se ad alterum oppositorum potest convenire subjecto ratione sui, ex parte ipsius virtutis activae; *ex parte sui*: tunc huiusmodi indifferentia ad utrumque involvit: a) *caren-*

*tiam* illius perfectionis, per quam ad unum virtus operativa determinatur; *b) carentiam* proinde ipsius actus; etenim per actum et potentia operandi completur et ad alterum oppositorum, id est ad unum, determinatur; *c) realem distinctionem* inter potentiam agendi et ipsiusmet actum; alioquin agendi potentia numquam suo proprio actu careret, nam cum ipso re identificaretur; *d) potentiam passivam* admixtam cum activo principio operandi; consequenter potentiam, quae dividitur contra actum, et quod est principium patiendi ab alio; *e) indeterminationem*, quae analogiam quandam retinet cum indeterminatione materiae et quantitatis; nam potentia operandi absque actuali operatione similis quodammodo est materiae absque forma, et quantitati absque figura seu formali termino. Hoc modo omnis potentia agendi creata se habet ad utrumlibet, quia in omni creatura actus est aliud a potentia, et actus est nobilior ipsa potentia, et omnis potentia est principium actionis. Unde D. Thomas I. q. 25. a. 1. ad 2. et ad 3. : « Actio Dei non est aliud ab ejus potentia, sed utrumque est essentia divina; quia nec esse ejus est aliud ab ejus essentia... Potentia in rebus creatis non solum est principium actionis, sed etiam effectus. Sic igitur in Deo salvatur ratio potentiae quantum ad hoc, quod est principium effectus, non autem quantum ad hoc, quod est principium actionis, quae est divina essentia. » Quapropter D. Thomas excludit a divina voluntate hunc modum se habendi ad utrumlibet, utpote importans potentialitatem et mutabilitatem.

Deinde se habere ad utrumlibet potest convenire subjecto *ex parte ejus ad quod dicitur*; et tunc indifferentia potentiae operativae ad utrumque nihil mutabilitatis aut imperfectionis importat, nihil passivum activo mixtum praesupponit, nullamque ex se potentialitatem; sed e contra, sic se habere ad alterum oppositorum ad virtutis operativae eminentiam pertinet, et dominium super objectum, a quo specificatur potentiae actus, includit. Hoc modo ad utrumlibet esse idem significat atque independentiam potentiae operativae, quae potest aequaliter uti illo vel alio medio

ad suum opus perficiendum, et cujus operis perfectio a neutro dependet, sed tamen utrumque esse potest. Hujusmodi non est indifferentia passiva, sed activa, non indifferentia privativa actus, sed indeterminatio, quae augetur per ipsum actum; etenim est indeterminatio de conceptu essentiali virtutis activae, quae completur per illudmet, quod est potentiae complementum. Exinde esse indifferens vel ad utrumlibet hoc modo exprimit essentiam liberi arbitrii, quoniam dicit determinationem actus relinqui in potestate ipsius operantis.

Unde in Deo, qui est primum movens immobile et prima causa efficiens non habens causam, abest absolute *esse ad utrumlibet* ex parte sui, simul atque adest etiam absolute *esse ad utrumlibet* ex parte ejus ad quod dicitur. Quoniam, ut ait D. Thomas, hoc ad divinam dignitatem pertinet, ut omnia moveat et inclinet et dirigat, ipse a nullo alio motus vel inclinatus vel directus. In omnibus, praeter Deum, adest absolute *esse ad utrumlibet* ex parte sui; quoniam omne ens creatum constat actu et potentia tam in ordine essendi quam in ordine operandi. Omnia enim indigent moveri et inclinari et dirigi a Deo, qui est actus purus, primum volens et primus intellectus. In omnibus praeter Deum reperitur etiam, diversimode tamen, quasi quaedam umbra seu participatio illius *esse ad utrumlibet* ex parte ejus ad quod dicitur; quoniam in omni creatura adinvenire est virtutem operativam, quae est participatio quaedam divinae virtutis, et quanto hujusmodi participatio est perfectior, tanto magis appropinquat ad divinae virtutis eminentiam, in quantum utrumlibet oppositorum excedit. Unde, ait D. Thomas, quanto aliqua natura est Deo vicinior, tanto minus ab eo inclinatur et magis nata est seipsam inclinare.

Ad tres itaque gradus reducuntur diversi modi, quibus creaturae participant divinam virtutem in ordine operandi; sunt enim creaturae, quae tantummodo *inclinantur* et nullo modo se *inclinant*; et haec sunt insensibilia, quae omni prorsus carent cognitione. Sunt praeterea creaturae, quae et *inclinantur* et etiam incipiunt seipsas *inclinare*;

et haec sunt, quae percipiunt aliququaliter ea ipsa, quae appetunt, videlicet animalia. Sunt denique creaturae, quae et *inclinantur* et perfecto quoque modo seipsas *inclinant*; et haec sunt creaturae rationales, quae dum operantur, cognoscunt perfecte rationem finis in suis operationibus. Sic intra res insensibiles est principium inclinationis, sed non aliquid inclinans; in animalibus est et principium inclinationis et aliquid inclinans, at inclinans necessario ad aliquid a solo Deo determinatum; et in creatura rationali est et principium inclinationis, et aliquid inclinans, et potestas hujus inclinationis, seu determinatio per intellectus judicium illius boni, ad quod inclinatur appetitus sequens apprehensionem rationis. Unde humana voluntas appetit et vult aliquid, sicut appetunt inanimata; et aliquid, sicut appetit natura sensibilis; et ultra hoc appetit et vult aliquid, determinando sibi ipsi inclinationem in finem, quod est tantum rationis. Atque in hoc modo seipsam movendi, inclinandi et dirigendi, creatura rationalis appropinquat Deo, primo motori et primae causae; et tanto expressior in ea divinae dignitatis similitudo invenitur, quanto cognitio est altior et majori in judicando praedita est robore. Quapropter D. Thomas I. q. 59. a. 3. : « Ubi cumque est intellectus, est liberum arbitrium. Et sic patet liberum arbitrium esse in angelis, etiam excellentius quam in hominibus, sicut et intellectum. »

Voluntas itaque hominis movetur, inclinatur et dirigitur semper a Deo : uno modo *ex necessitate*, sicut inanimata et sensibilia; alio modo, *non de necessitate, sed modo sibi proprio*, ut appetitus rationalis est, nempe ut recedens a natura mobilis et accedens ad naturam moventis et agentis, ut natura rationalis, transcendens omnem naturam insensibilem et sensibilem, et appropinquans Deo utpote Deo vicinissima; et hoc modo movetur, inclinatur et dirigitur semper a Deo ita, quod moveat etiam et inclinet et dirigat seipsam. Hic enim duplex modus motionis et motus sic inter se ordinantur, ut primus includatur in secundo, et in secundo inveniatur non solum id, quod sibi competit secundum rationem propriam, sed quod competit secundum



rationem primi. Etenim in voluntate oportet invenire non solum id quod voluntatis est, sed etiam quod naturae est. Hoc autem est cujuslibet naturae creatae, ut a Deo sit ordinata in bonum, naturaliter appetens illud. Homo non vult hoc vel illud bonum, nisi quia vult bonum; et voluntas in tantum movet seipsam ad volendum ea quae sunt ad finem, in quantum vult finem. (I-II. q. 9. a. 3. et 6. et *De Verit.* q. 22. a. 5.)

Voluntas igitur humana movetur a Deo *ex necessitate* ad *universale objectum voluntatis*, quod est bonum; et sine hac universali motione homo non potest aliquid velle. Naturaliter homo vult non solum objectum voluntatis, sed etiam alia, quae conveniunt aliis potentiis, ut cognitionem veri, quae convenit intellectui, et esse et vivere et hujusmodi alia, quae respiciunt consistentiam naturalem; quae omnia comprehenduntur sub objecto voluntatis, sicut quaedam particularia bona. Ad ista omnia appetenda voluntas movetur ex necessitate quantum ad *specificationem* actus, quae est ex objecto. Nam finis ultimus ex necessitate movet voluntatem, quia est bonum perfectum; et similiter illa, quae ordinantur ad hunc finem, sine quibus finis haberi non potest, sicut esse et vivere et hujusmodi. In his omnibus appetendis motus voluntatis est voluntatis ut *natura*; et inclinatur a Deo, sicut inclinantur inanimata et natura sensibilis; et inclinatio haec determinatur ei a solo Deo; et voluntas de necessitate vult quasi naturali inclinatione in ipsum determinata, in finem nempe ultimum, ut beatitudo et ea, quae in ipso includuntur, ut est cognitio veritatis et alia hujusmodi. Attamen adhuc in hisce praedictis appetendis voluntas humana longe excedit omnem appetitum naturalem rerum inferiorum; nam quantum ad *exercitium* actus voluntas a nullo objecto ex necessitate movetur; potest enim aliquis de quocumque objecto non cogitare, et per consequens nec actu velle illud. (I-II. q. 9. a. 6. ad 3.; q. 10. a. 1. et 2. et *De Verit.* q. 22. a. 5.)

Ad alia vero appetenda, etiam quantum ad specificationem actus, voluntas *propria dispositione absque necessitate* determinatur. Homo per rationem determinat seipsum ad

volendum hoc vel illud, quod est vere bonum vel apparens bonum. In his omnibus volendis voluntas nata est seipsam inclinare, et ipsa determinat sibi inclinationem in finem, et habet in potestate ipsam inclinationem utroque modo et quoad specificationem actus et quantum ad ipsius actus exercitium. Motus hic voluntatis est voluntatis ut *voluntas*, ut facultas operandi accedens ad naturam moventis et agentis, ut appetitus naturae rationalis, quae est Deo vicinissima. Verumtamen voluntas creata etiam in his appetendis movetur, inclinatur et dirigitur a Deo, quoniam hoc ad divinam dignitatem pertinet, ut omnia moveat, inclinet et dirigat, ipse a nullo alio motus vel inclinatus vel directus. Unde D. Thomas concludit : « Et ideo talis appetitus, non determinatus ex aliquo alio de necessitate, sequitur apprehensionem rationis. » Sed tamen determinatur ab aliquo alio, quod est Deus, in ordine causae primae, sed determinatur *libere, non de necessitate*. Ipsa inclinatio liberae voluntatis determinatur ei a Deo et a seipsa : a Deo, qui movet simul et voluntatem et rationem, cujus iudicium sequitur appetitus rationalis, qui voluntas dicitur.

Jam vero voluntas ut voluntas seu potentia liberi arbitrii se habet ad utrumlibet dupliciter : 1<sup>o</sup> *ex parte sui*; 2<sup>o</sup> *ex parte ejus, ad quod dicitur*. Ex *parte* quidem *sui*; quoniam est liberum arbitrium creatum, de cujus ratione est constare actu et potentia, et quod actus realiter distinguatur ab ipsa potentia operativa. Ex *parte ejus ad quod dicitur*; quoniam est liberum arbitrium, de cujus ratione est habere dominium sui actus et dominium ipsius objecti, a quo actus specificatur. Propter primum se habere ad utrumlibet oportet in libero arbitrio ponere aliquam potentialitatem et mutabilitatem. Propter alterum se habere ad utrumlibet nulla adinvenitur in libero arbitrio creato imperfectio, sed e contra eminentia virtutis operativae excedens utrumlibet oppositorum, quorum alterutro potest uti aequaliter ad idem opus perficiendum.

Sic igitur potentia liberi arbitrii indiget divina motione, ut determinetur ad unum, tam ex parte sui quam ex parte ejus ad quod dicitur. Etenim *ex parte sui* potentia liberae

voluntatis determinatur ad unum per *actum*; *ex parte ejus ad quod dicitur*, determinatur ad unum per *rationem*, per *consilium atque judicium practicum intellectus*; atque ex utroque capite divina motio est absolute necessaria. Necessaria enim ex primo capite; quoniam, quod est in potentia ad utrumque, ut primo sit volens in potentia et postmodum volens actu, revera mutatur atque transeundo de potentia in actum consequitur suam perfectionem, per quam ad unum determinetur. Ac de potentia non potest aliquid reduci in actum nisi per aliquod ens in actu; consequenter nullum liberum arbitrium transit de potentia in actum nisi per primum liberum, quod semper est volens in actu, quidquid vult. Voluntas enim Dei, quae est actus purus, semper est in actu volendi. (I-II. q. 10. a. 1. ad 2. et III. C. Gent. cap. 82.) Hocce argumentum, quod ex intimis philosophiae christianae visceribus emanat, incipit evolvere Angelicus Doctor I. q. 2. a. 3., dum ostendit Deum esse per illam viam, quae sumitur ex parte motus, et perficit I-II. q. 9. a. 4. et 6., dum ostendit voluntatem etiam quantum ad exercitium actus moveri ab aliquo exteriori principio, quod est Deus.

Necessaria vero ex altero capite : 1<sup>o</sup> Quoniam ita se habere ad utrumlibet pertinet ad eminentiam virtutis operativae; et omnis perfectio, omnis actio, omne ens, derivatur a primo ente, causatur a primo actu, descendit ab eo, qui est bonus et perfectus per essentiam; 2<sup>o</sup> quoniam homo, dum agit potentia liberi arbitrii, determinat se ad unum per rationem et per voluntatem (nam liberum arbitrium est facultas voluntatis et rationis); per rationem consiliando, per voluntatem eligendo juxta rationis consilium; per rationem inquirendo, comparando, judicando, per voluntatem judicium rationis practicae acceptando. Et omnium motuum interiorum mentium principium est a Deo movente : a Deo electio, voluntatis principium; a Deo etiam consilium, principium electionis. (*Quodl.* 1. a. 7. et III. C. Gent. cap. 89.)

Rursus : Potentia voluntatis « completur per actum, per quem determinatur ad alterum oppositorum, de se in potentia

existens ad utrumque; sicut materia in potentia existens ad plures formas per dispositiones aptatur ad unam formam magis quam ad aliam ». (*De Verit.* q. 28. a. 3. ad 9.) Sed divina motio, qua Deus physice et intrinsece movet voluntatem tam ad actus naturales quam ad actus liberos, est virtus conjungens ipsam potentiam voluntatis cum suis propriis actibus, et faciens ipsam actu volentem. Ergo divina motio est determinans ad unum, sive de necessitate sive libere, ipsam voluntatis creatae potentiam. Praeterea, D. Thomas *De Verit.* q. 8. a. 12. : « Sed quia ex causa ad utrumlibet, cum sit quasi in potentia, non progreditur aliquis effectus, nisi per aliquam aliam causam determinetur magis ad unum quam ad aliud : ideo hujusmodi effectus in causis quidem ad utrumlibet nullo modo cognosci possunt per se acceptis; sed si adjungantur causae illae, quae causas ad utrumlibet inclinant magis ad unum quam ad aliud, potest aliqua certitudo conjecturalis de effectibus praedictis haberi, sicut de his, quae ex libero arbitrio dependent, aliqua futura conjicimus ex consuetudinibus et complexionibus hominum, quibus inclinantur ad unum. Omnes autem hujusmodi effectus, qualescumque sint eorum causae proximae, tamen in causa prima omnes sunt determinati, quae sua praesentia omnia intuetur et sua providentia omnibus modum imponit. » Jam vero liberum arbitrium, licet possit inclinari magis ad unum quam ad alterum ex consuetudinibus, ex parte ipsius appetitus sensitivi, ex suasionibus hominum, motione, quae dicitur ex objecto, ab exteriori, moralis : minime potest physice et interius inclinari nisi a solo Deo; atque in solo Deo effectus omnes liberi arbitrii creati sunt determinati. Ergo sola Dei motio, per quam in ordine executionis suae providentiae omnibus imponit modum, determinat ad unum potentiam liberi arbitrii. Iterum D. Thomas *Opusc.* VIII. q. 38. (*Opusc.* 8. edit. Vivès; 9. edit. Rom.) : « Manifestum est enim, quod Deus in anima agit, non solum causando in ea aliquem habitum, puta gratiae vel virtutis, sed etiam inclinando liberum arbitrium ad hoc vel ad illud : quod non proprie dicitur influere, sed magis movere ad actum. » At



inclinare liberum arbitrium ad hoc vel ad illud, movendo ad actum, est determinare ad unum potentiam liberi arbitrii.

Unde ipse D. Thomas concludit *III. C. Gent.* cap. 88. quod solus Deus potest esse causa directe electionum et voluntatum nostrarum : 1<sup>o</sup> quoniam solus Deus potest movere voluntatem per modum agentis ; 2<sup>o</sup> quoniam ipse solus voluntatem nostram in aliquid inclinare potest ; 3<sup>o</sup> quoniam a solo Deo potest motus voluntarius causari ; 4<sup>o</sup> quoniam solus Deus, creando animam, causat principium intrinsecum hujus motus, hujus electionis vel consensus, quod est potentia ipsa voluntatis. Hinc est quod dicitur : « Cor regis in manu Domini ; quocumque voluerit, inclinabit illud. » (Prov. 21, 1) « Deus est, qui operatur in vobis et velle et perficere pro bona voluntate. » (Philipp. 2, 13)

## V

### **Physica praemotio est Dei motio faciens nos velle hoc vel illud.**

Haec ratio, in qua includuntur reliquae, dilucidatur ex professo ab Angelico Doctore et firmiter propugnatur contra omnes, qui non valent intelligere physicam praemotionem absque laesione libertatis. Sic scribit *III. C. Gent.* cap. 89. « Quidam vero non intelligentes, qualiter motum voluntatis Deus in nobis causare possit absque praejudicio libertatis voluntatis, conati sunt has auctoritates male exponere, ut sc. dicerent, quod Deus causat in nobis velle et perficere, in quantum dat nobis virtutem volendi, non autem sic, *quod faciat nos velle hoc vel illud*, sicut Origenes exponit (lib. 3. Περὶ Ἀρχῶν cap. 1.) liberum arbitrium defendens contra auctoritates praedictas. Et ex hoc processisse videtur opinio quorundam, qui dicebant, quod providentia non est de his, quae subsunt libero arbitrio, sc. de electionibus, sed providentia refertur ad exteriores eventus ; non enim qui eligit aliquid consequi vel perficere, puta aedificare vel ditari,

semper poterit ad hoc pervenire; et sic eventus actionum nostrarum non subjacent libero arbitrio, sed providentia disponuntur.

Quibus quidem auctoritatibus Sacrae Scripturae resistitur evidenter :

1<sup>o</sup> Dicitur enim : *Omnia opera nostra operatus es nobis, Domine.* (Is. 26, 12) Unde non solum virtutem volendi a Deo habemus, sed etiam operationem.

2<sup>o</sup> Praeterea : Hoc ipsum, quod Salomon dicit : *Quocumque voluerit, inclinabit illud* (Prov. 21.), ostendit non solum divinam causalitatem ad potentiam voluntatis extendi, sed etiam ad actum ipsius.

3<sup>o</sup> Item : Deus non solum dat rebus virtutem, sed etiam nulla res potest propria virtute agere nisi agat in virtute ipsius, ut supra cap. 67. et 70. ostensum est. Ergo homo non potest virtute voluntatis sibi data uti, nisi in quantum agit in virtute Dei. Illud autem, in cujus virtute agens agit, est causa non solum virtutis, sed etiam actus; quod in artifice apparet, in cujus virtute agit instrumentum, etiam quod ab hoc artifice propriam formam non accipit, sed solum ab ipso applicatur ad actum. Deus igitur est causa nobis non solum voluntatis, sed etiam volendi.

4<sup>o</sup> Amplius : Perfectius invenitur ordo in spiritualibus quam in corporalibus. In corporalibus autem omnis motus causatur a primo motu. Oportet igitur, quod in spiritualibus omnis motus voluntatis causetur a prima voluntate, quae est voluntas Dei.

5<sup>o</sup> Adhuc : Superius cap. 67. et 70. ostensum est, quod Deus est causa omnis actionis et operatur in omni agente. Est igitur causa motuum voluntatis.

6<sup>o</sup> Item : Arguit Aristoteles in *VII. Ethic. Eudem.* cap. 14. per hunc modum : Hujus, quod aliquis intelligat, consiliatur et eligat et velit, oportet aliquid esse causam, quia omne novum oportet quod habeat aliquam causam. Si autem est causa ejus aliud consilium et alia voluntas praecedens, cum non sit procedere in his in infinitum, oportet devenire ad aliquod primum. Hujusmodi autem primum oportet esse

aliquid, quod est melius ratione. Nihil autem est melius intellectu et ratione nisi Deus. Est igitur Deus primum principium nostrorum consiliorum et voluntatum. »

Licet thesis et argumenta, quibus D. Thomas ipsam confirmat, sint adeo clara, ut declaratione non indigeant, sed assidua dumtaxat atque attenta meditatione, attamen quaedam adhuc placet adnotare :

PRIMO : D. Thomam hic loqui de illa motione voluntatis, quae est propria solius Dei, sicut est proprium solius Dei animam rationalem creare. Loquitur ergo de physica praemotione : 1<sup>o</sup> Quia hoc in loco a cap. 85. usque ad 89. Angelicus Doctor ostendit nullam creaturam posse causare physice, intrinsece, directe actus et electiones voluntatis humanae ; et contraponit hunc causandi modum ad causam electionis nostrae per modum suadentis vel per modum indirectum, alligando appetitum sensitivum ; 2<sup>o</sup> quia causare per motionem moralem, proprie loquendo non est causare electiones nostras, sed tantum suadere, hortari, ostendere convenientiam ex parte objecti, quod minime valet interius potentiam liberi arbitrii immutare ; 3<sup>o</sup> quia D. Thomas ait expresse inveniri « quosdam non intelligentes, qualiter motum voluntatis Deus in nobis causare possit absque praeiudicio libertatis voluntatis ». Et notum est omnibus, qui sint isti quidam non intelligentes physicam motionem ad hoc vel illud volendum absque interitu libertatis humanae.

SECUNDO : D. Thomas tradit hic conceptis verbis, quod Deus, physice movendo potentiam liberi arbitrii, « facit nos velle hoc vel illud ». Ac velle hoc vel illud est determinatio liberae voluntatis ad unum, sive accipiatur determinatio ad unum ex parte ipsius potentiae operativae, sive ex parte objecti, quod eligendo vel consentiendo vult. Unde Deus facit nos velle hoc vel illud : 1<sup>o</sup> faciendo nos inquirere, consiliari, iudicare et per iudicium rationis determinare hoc vel illud volendum, eligendum ; 2<sup>o</sup> reducendo potentiam voluntatis, reduplicative ut voluntatis, de posse eligere ad actum eligendi.

TERTIO : Conferre oportet hanc doctrinam, quam D. Thomas ex professo et sic late ac profunde hic *III. C. Gent.* evolvit atque dilucidat, cum doctrina tradita I-II. q. 9., in qua etiam edocet voluntatem moveri eo ipso modo, quo movetur quantum ad exercitium actus a semetipsa, ab aliquo principio exteriori; quod tamen principium non potest esse nisi solus Deus, « quoniam voluntatis causa nihil aliud esse potest quam Deus ». (a. 6.) Et cum in arg. 3. in *contra* ait : « Deus non est causa nisi bonorum; si ergo a solo Deo voluntas hominis moveretur, numquam moveretur ad malum; ergo voluntas potest moveri etiam ab alio, diabolo sc. tamquam ab exteriori principio », Angelicus Doctor ad 3. respondet : « Dicendum, quod Deus movet voluntatem hominis sicut universalis motor ad universale objectum voluntatis, quod est bonum; et sine hac universali motione homo non potest aliquid velle; sed homo per rationem determinat se ad volendum hoc vel illud, quod est vere bonum vel apparens bonum. Sed tamen interdum specialiter Deus movet aliquos ad aliquid determinate volendum, quod est bonum, sicut in his, quos movet per gratiam, ut infra dicitur (q. 109. et 111. et 112.). » In qua famosa responsione D. Thomas : 1<sup>o</sup> satisfacit argumento posito contra conclusionem articuli, concedendo maiorem, concedendo minorem et negando consequentiam. Verum enim est, quod « Deus non est causa nisi bonorum ». Verum quoque est, quod « si a solo Deo voluntas hominis moveretur, numquam moveretur ad malum ». At falsum est : Ergo voluntas movetur, sicut ab exteriori principio, ab alio praeter Deum. Etenim homo movetur a seipso tamquam a principio intrinseco; et dum movendo seipsum *deficit* in suo proprio motu ab ordine primi moventis, tunc « movetur ad malum peccando ». Non est ergo necessarium admittere aliquod aliud principium extrinsecum, a quo secundum rationem causae efficientis moveatur humana voluntas; sufficit, quod « homo per rationem determinet se ad volendum hoc vel illud, quod est vere bonum vel apparens bonum ». Quando bonum est tantum *apparens* et *non vere bonum*, tunc motus proprius voluntatis, qui speciem



accipit in ordine morali ab objecto, est *deficiens* a rectitudine rationis. 2º At D. Thomas non solummodo solvit perfecte argumentum in *contra*, sed quasi in compendium redigens diversos gradus divinae motionis indicat tres praecipuos modos, quibus Deus determinat voluntatem ad unum, postea a nobis exponendos. Ad praesens sufficiat dicere peregrinos in doctrina D. Thomae se exhibere illos scriptores, qui ex responsione ad 3. in I-II. q. 9. a. 6. confidenter asserere audent Angelicum Doctorem numquam docuisse determinationem ad unum, eo quod ait : « Homo per rationem determinat se ad volendum hoc vel illud, quod est vere bonum vel apparens bonum ». Quis ex discipulis D. Thomae hoc negavit umquam? D. Thomas affirmat, quod omnes debemus admittere; et hoc est sufficiens ad argumentum solvendum; at asseritne, quod Deus non determinet hominem ad volendum hoc vel illud? Hoc est, quod quaeritur ab adversariis, quibus etiam ipse D. Thomas respondet : « Quidam vero non intelligentes... quod Deus... faciat nos velle hoc vel illud... » Unde si non intelligunt, saltem laborent, ut intelligere possint.

QUARTO : D. Thomas ait similiter, quod isti quidam non intelligentes ab Originis temporibus usque ad hodiernum diem, « liberum arbitrium defendunt contra auctoritates S. Scripturae, illas male exponentes ». Et ut liberum arbitrium defendatur, non est necesse, quod « auctoritatibus S. Scripturae resistatur evidenter ».

QUINTO : D. Thomas etiam manifestat, in quo stat essentialis ratio physicae praemotionis, dum scribit : « Homo non potest virtute sibi data uti, nisi in quantum agit in virtute Dei. » Unde virtus divina collata potentiae voluntatis confert illi usum actualem tam intellectus quam ipsiusmet voluntatis. I-II. q. 16. a. 1. : « Usus rei alicujus importat applicationem rei illius ad aliquam operationem... Ad operationem autem applicamus et principia interiora agendi, sc. ipsas potentias animae vel membra corporis, ut intellectum ad

intelligendum. » Et a. 4. : « Sed quia voluntas etiam quodammodo rationem movet et utitur ea, potest intelligi usus ejus quod est ad finem, secundum quod est in consideratione rationis referentis ipsum in finem. Et hoc modo usus praecedit electionem. » Ergo homo recipit a Deo per physicam motionem hoc, quod determinet seipsum per rationem et voluntatem ad volendum hoc vel illud. Voluntas virtute divinae motionis utitur intellectu ad consiliandum, ad judicandum, ad determinandum; etiam utitur seipsa, exercendo actum electionis vel consensus, dum acceptat judicium rationis practicae; et juxta prudentiam, quae est recta ratio agibilium, vult, consentit, eligit et transit ad exteriora opera.

SEXTO : Ex eo, quod in spiritualibus ordo est perfectior quam in corporalibus, etiam rationalis creatura magis inclinatur a Deo quam natura inanimata et sensibilis, licet minus inclinetur illo modo, quo natura inferior inclinatur, nempe de necessitate ad unum; etenim hoc modo homo et angelus non inclinantur nisi ad bonum universale. Sed in his omnibus aliis, in quibus creatura rationalis, utpote Deo vicinissima, nata est inclinare seipsam, efficacius et excellentius inclinatur quam sensibilia et inanimata. Unde D. Thomas *III. C. Gent.* cap. 95. : « Substantiae autem intellectuales propinquiores sunt Deo quam substantiae naturales inanimatae. Efficacior est igitur impressio divinae motionis in substantiis intellectualibus quam in substantiis aliis naturalibus. »

SEPTIMO : Tandem D. Thomas viam ex parte motus et viam ex ratione causae efficientis, quas I. q. 2. a. 3. inchoat a motu locali et ab ordine causarum in rebus sensibilibus, hic progreditur, et proseguendo ascendit per motum liberi arbitrii, quae est facultas voluntatis et rationis; et transeundo de actibus intellectus ad actus voluntatis, de consilio ad electionem, et de actibus voluntatis ad actus intellectus, de volitione ad apprehensionem rationis, pervenit ad aliquod primum, quod est melius ratione et voluntate creata : ad

Deum, primum principium efficiens nostrorum consiliorum et voluntatum. « Nihil autem est melius intellectu et ratione nisi Deus. » (*III. C. Gent. cap. 89.*)

## VI

**Physica praemotio est Dei motio, ad quam necessario necessitate infallibilitatis sequitur effectus in potentia liberi arbitrii, qui est eligere vel consentire.**

Hanc quoque notam essentialem physicae praemotionis tradit ad litteram D. Thomas ubique passim in suis scriptis. Ut alia praetermittamus, *III. C. Gent. cap. 92.* : « Quamvis autem Deus solus *directe* ad electionem hominis operetur, tamen actio angeli operatur aliquid ad electionem hominis per modum *persuadentis*; actio vero corporis coelestis per modum *disponentis*, in quantum corporales coelestium corporum impressiones in corpora nostra disponunt ad aliquas electiones... » Sed est attendenda differentia. « Nam operatio angeli et corporis coelestis est solum sicut disponens ad electiones, operatio autem Dei est sicut perficiens. Cum autem dispositio, quae est ex corporis qualitate vel intellectus persuasionem, necessitatem ad eligendum non inducat, non semper homo eligit id, quod angelus custodiens intendit, neque illud, ad quod corpus coeleste inclinat; *semper tamen hoc homo eligit, quod Deus operatur in ejus voluntate.* Unde custodia angelorum interdum cassatur, secundum illud Jer. 51, 9 : *Curavimus Babylonem, et non est sanata*; et multo magis inclinatio coelestium corporum; divina vero providentia semper est firma. » Et iterum *De Malo* q. 3. a. 3. : « Respondeo dicendum, quod causa aliquid movens multipliciter dicitur. Quandoque enim dicitur causa id quod est disponens, vel quod est consilians, vel quod est praecipiens. Quandoque vero dicitur causa id, quod est perficiens; et haec proprie et vere causa dicitur, quia causa est, ad quam sequitur effectus. Ad actionem autem perfi-

cientis statim effectus sequitur ; non autem ad actionem disponentis vel consulentis vel imperantis... Est autem considerandum, quod voluntas ad aliquid inclinari dicitur dupliciter : uno modo ab exteriori, alio modo ab interiori. Ab exteriori quidem, sicut ab objecto apprehenso ; nam bonum apprehensum movere dicitur voluntatem, et per hunc modum dicitur movere consilians vel suadens, in quantum sc. facit apparere aliquod esse bonum. Ab interiori autem movetur voluntas sicut ab eo, quod producit ipsum voluntatis actum... Relinquitur ergo, quod causa perficiens et propria voluntarii actus sit solum id, quod operatur interius. Hoc autem nihil aliud esse potest quam ipsa voluntas sicut causa secunda, et Deus sicut causa prima. Cujus ratio est, quia actus voluntatis nihil est aliud quam inclinatio quaedam voluntatis in volitum, sicut et appetitus naturalis nihil est aliud quam inclinatio naturae ad aliquid. Inclinatio autem naturae est et a forma naturali et ab eo, quod dedit formam ; unde dicitur, quod motus ignis sursum est ab ejus levitate et a generante, quod talem formam creavit. Sic ergo motus voluntatis directe procedit a voluntate et a Deo, qui est voluntatis causa, qui solus in voluntate operatur et voluntatem inclinare potest in quodcumque voluerit. »

Sic clare, sic distincte et ordinate tradit nobis D. Thomas quaecumque sunt necessaria ad perfectam intelligentiam physicae praemotionis et divinae gratiae ex se et per se efficacis.

PRIMO : *Distinctio inter motionem moralem et physicam.* Nam etsi utraque sit causa aliquid movens, motio moralis est tantummodo disponens vel consilians vel praecipiens vel qualitercumque alliciens ; motio autem physica est causa movens perficiens. Rursus : motio moralis est causa indirecta actus voluntarii, et ab exteriori sicut ab objecto apprehenso ; motio vero physica est causa directa, et ab interiori, et sicut ab eo, quod producit ipsum voluntatis actum. Rursus : motio moralis potest esse creaturae ; motio autem physica est dumtaxat propria Dei, qui solus potentiam liberi arbitrii creavit.



SECUNDO : *Efficacia intrinseca physicae praemotionis* :  
 a) Quoniam haec proprie et vere est causa; et causa est, ad quam sequitur effectus; b) quoniam physice movendo Deus operatur interius intra ipsam potentiam liberae voluntatis; c) quoniam motus voluntatis, etsi procedat a voluntate sicut a causa secunda, procedit quoque a Deo sicut a causa prima; et « virtus primi agentis invenitur immediata ad producendum effectum; nam virtus infimi agentis non habet, quod producat effectum ex se, sed ex virtute superioris, quae ex se est productiva effectus quasi causa immediata immediatione virtutis ». Unde liberum arbitrium creatum « invenitur immediatum activum immediatione suppositi »; et voluntas Dei per physicam motionem invenitur immediatum activum immediatione virtutis; d) quoniam motus voluntatis « directe procedit a Deo, qui est voluntatis causa, qui solus in voluntate operatur et voluntatem inclinare potest in quodcumque voluerit »; e) quoniam « semper homo hoc eligit, quod Deus operatur in ejus voluntate »; et « ex divina operatione inclinante inclinatur ejus voluntas ad aliquid eligendum sibi utile »; et « Deus solus directe ad electionem hominis operatur »; et « operatio Dei est sicut perficiens »; et « actionem perficientis statim effectus sequitur »; et « Deus est actor bonorum nostrorum operum, et sicut exterius persuadens et sicut interius movens »; et « ipse est causa electionis et voluntatis nostrae »; et « quanto ergo Deus aliqua magis amat, tanto magis sub ejus providentia cadunt ». (III. C. Gent. cap. 70. 90., 91. et 92.; *De Malo*, q. 3. a. 3.)

TERTIO : *Efficacia intrinseca adhuc major ac perfectior divinae gratiae*, quae est physica motio in ordine supernaturali, et qua moventur a Deo illi, qui cadunt sub praedestinatione, quae est specialissima providentia electorum. Deus semper movet ad bonum, quamvis non omnes physice moveat ad omne bonum. Deus semper movet ad bene operandum, tametsi non omnes physice moveat ad operandum eodem gradu perfectionis et bonitatis. Per phy-

sicam motionem in ordine naturae Deus movet ad bene et libere operandum vel saltem ad operandum libere. Per physicam motionem in ordine supernaturali Deus movet semper ad libere et bene et salutariter operandum; quoniam hujusmodi operatio non solum est libera et bona, verum etiam potest esse meritoria vitae aeternae. Unde D. Thomas, loquendo de actione humana, cui conjungitur deformitas peccati, ait: « Hoc autem Deo non convenit; et ideo non oportet, ut ad malum cooperari dicatur, quamvis actionis illius causa sit, in qua malum consistit secundum quod influit agenti *esse, posse et agere*, et quidquid perfectionis in agente est... Quidquid est in actu deficiente, sc. peccato, de ratione actus et entis et boni, totum hoc a *primo* agente, sc. Deo, mediante voluntate. » Loquendo autem de bona operatione, addit: « Deus dicitur causa bonarum operationum non solum quantum ad essentiam actus, sed etiam quantum ad perfectionem, secundum quam bonae dicuntur; utrumque enim agenti influit, et ut agat et ut bene agat. »  
(II. Sent. dist. 37. q. 2. a. 2. et ad 2. et ad 3.)

---

## CAPUT QUINTUM

**Gratia efficax, quae formaliter constituitur per physicam praemotionem, est aliquid physicum ac reale in potentia liberi arbitrii receptum.**

---

### I

#### PRAENOTANDA

**PRIMO : Recapitulatio doctrinae traditae.** — Doctrinam traditam circa influxum Dei in creaturas rationales, tam in ordine naturae quam in ordine gratiae, sic in compendium redegit D. Thomas *II Cor.* 3. lect. 1. ubi explanans illa verba Apostoli : « Fiduciam autem talem habemus per Christum ad Deum, non quod sufficientes simus cogitare aliquid a nobis quasi ex nobis, sed sufficientia nostra ex Deo est », scribit :

« In quolibet processu operis primo est assensus, qui fit cogitando ; deinde collatio per verbum ; et postmodum impletio per opus. Unde fit, ut si nec cogitare quis a se habeat sed a Deo, non est dubium, quod non solum perfectio operis boni est a Deo, sed etiam inchoatio. Philipp. 1, 6 : *Qui coepit in vobis opus bonum, perficiet usque in diem Christi Jesu.* Et hoc est contra Pelagianos dicentes, quod inchoatio boni operis est ex nobis, sed perfectio est a Deo. Is. 26, 12 : *Omnia opera nostra operatus es nobis, Domine.* Sed ex hoc ne videatur tollere libertatem arbitrii, dicit : *A nobis quasi ex nobis.* Quasi dicat : Possum quidem aliquid facere, quod est liberi arbitrii ; sed hoc, quod facio, non est ex me, sed a Deo, qui hoc ipsum *posse* confert ; ut sic et libertatem hominis defendat, cum dicit : *a nobis,*

id est, a nostra parte, et divinam gratiam commendat dum dicit : *quasi ex nobis* sc. procedat, *sed a Deo*. Hoc etiam Philosophus vult, quod numquam homo per liberum arbitrium potest quoddam bonum facere sine adjutorio Dei. Et ratio sua est : quia in his, quae facimus, quaerendum est illud, propter quod facimus. Non est autem procedere in infinitum, sed est devenire ad aliquid primum, puta ad consilium. Sic ergo bonum facio, quia consilium mihi inest ad hoc ; et hoc est a Deo. Unde dicit, quod consilium boni est ab aliquo, quod est supra hominem, movens eum ad bene operandum ; et hoc est Deus, qui et homines movet et omnia, quae agunt, ad actiones suas, sed aliter et aliter. Cum enim hujusmodi motus sit quoddam receptum in moto, oportet, quod hoc fiat secundum modum suae naturae, id est, rei motae. Et ideo omnia movet secundum suas naturas. Ea ergo, quorum natura est ut sint liberae voluntatis, dominium suarum actionum habentia, movet libere ad operationes suas, sicut creaturas rationales et intellectuales ; alia autem non libere, sed secundum modum suae naturae. Licet autem non simus sufficientes cogitare aliquid a nobis tamquam ex nobis, tamen habemus aliquam sufficientiam, qua sc. bonum possumus velle et credere incipiamus ; et hoc a Deo est. I Cor. 4, 7 : *Quid habes, quod non accepisti ?* »

Tria ergo manifestantur hic ab Angelico Doctore, videlicet : a) Quaecumque dicta manent circa intrinsecam divinae gratiae efficaciam ; b) realitas physica divinae motionis in potentia liberi arbitrii recepta ab ipso Deo immissa ; c) concordia liberi arbitrii cum ipsa divinae motionis efficacia.

Quoad primum satis jam videtur ostensum ex S. Scriptura, ex doctrina Augustini, ex Romanorum Pontificum approbatione, atque ex doctrina tam philosophica quam theologica D. Thomae. Si enim Angelicus Doctor *II. Sent. dist. 37. q. 2. a. 2.* laborat pro aris et focis ad concludendum : « Quidquid est in actu deficiente, sc. peccato, de ratione actus et entis et boni, totum hoc a primo agente, sc. Deo procedit mediante voluntate » : quanto magis in opere bono, in actu, cui nulla adjungitur deformitas, dicendum erit juxta docu-



menta philosophiae christianae, quod totum procedit mediante liberae voluntatis potentia a primo agente, quod est Deus? Per totum operis processum ab initio usque in finem, ab intellectus apprehensione usque ad electionem et consensum, et ab electione usque ad ipsius operis externi executionem : quidquid est actus, quidquid entis, quidquid recti, quidquid boni, quidquid perfecti et ordinati, hoc totum a Deo, sed a Deo per nostras potentias operativas; a Deo, mediante intellectu et mediante voluntate. A Deo, non quidem expectante determinationem liberi arbitrii, sed sufficienter ipsam liberam determinationem causante; a Deo, non quidem ab extrinseco et tamquam modo parallelo agente, sed intrinsece ipsam voluntatis potentiam immutante, et, mediante ipsa voluntate creata, in actum liberum et bonum a nobis causatum vehementius sua divina virtute ingrediente. Haec est doctrina Apostoli et simul doctrina Philosophi.

Et si Philosophus vult, quod omnia et singula in processu boni operis, incipiendo a consilio boni, sit ab aliquo, quod sit supra hominem, sc. a Deo movente hominem ad bene operandum : quanto magis hoc est asserendum, si loquamur de opere bono in ordine supernaturali, quod pertinet ad salutem ac meretur vitam aeternam? Si ergo in ordine naturae non sumus sufficientes cogitare aliquid veri, nec desiderare aliquid boni a nobis quasi ex nobis, sed sufficientia nostra ex Deo est : quomodo poterimus in ordine gratiae incipere vel perficere, nisi physice moveamur a Deo, qui omnia, quae agunt, praemovet ad actiones suas : a Deo, a quo est consilium principium electionis, et electio principium voluntatis in executione omnium bonorum operum?

**SEGUNDO : In toto processu boni operis, quod pertinet ad salutem, non solum omnia sunt a Deo sicut in ordine naturae, qui est ordo generalis suae providentiae, verum etiam omnia sunt a Deo ea ratione singularissima, qua fiunt in tempore, quaecumque ab aeterno decrevit pro executione illius specialis providentiae, quae vocatur praedestinatio. — Unde Angelicus**

Doctor declarans illa verba Apostoli, Gal. 1. lect. 4. : « Cum autem placuit ei, qui me segregavit ex utero matris et vocavit per gratiam suam, ut revelaret Filium suum in me, ut evangelizarem illum in gentibus, continuo non acquievi carni et sanguini » ait : « Primo ostendit causam efficientem suae conversionis ; secundo finem..., tertio modum... Circa primum notat causam suae conversionis, quae duplex est, sc. beneplacitum Dei quod est divina electio, et convertentis vocatio. Quantum ad primum dicit : *Cum autem placuit*, sc. Deo ; non quando volui ego, sed quando placitum fuit sibi ; quia *non est volentis neque currentis, sed miserentis Dei*, ut dicitur Rom. 9, 16... Quantum autem ad aliam causam dicit : *Et vocavit per gratiam suam*. Est autem duplex vocatio. Una est exterior, et sic dicit : vocavit me coelesti voce. Act. Ap. 9, 4-7 : *Saule, Saule, quid me persequeris?... ingredi civitatem, et ibi dicetur tibi, quid te oporteat facere*. Sic etiam alios apostolos vocavit. Alia est interior ; et sic vocavit per quendam instinctum interiorem, quo Deus per gratiam tangit cor, ut convertatur ad ipsum ; et sic vocavit a mala via in bonam ; et hoc per gratiam suam, non nostris meritis. Rom. 8, 30 : *Quos praedestinavit, hos et vocavit ; et quos vocavit, hos et justificavit*. Finis autem conversionis ponitur, cum dicitur : *Ut revelaret Filium suum in me* ; qui quidem finis est Christus. Ordinatur autem conversio sua ad Christum dupliciter, sc. facto, et sic dicit : *Ut revelaret Filium suum*, id est in eo, quod circa me fecit, convertendo me et dimittendo peccata mihi, revelaret, quanta sit mihi facta misericordia... Sic ergo revelavit in ejus conversione Filium suum ; et hoc in quantum Filius dicitur gratia Dei... Item revelavit eum in ejus operatione... Et hoc in quantum Filius virtus est Dei. Modus autem suae conversionis est perfectus et quantum ad affectum ; unde dicit : *Continuo non acquievi carni et sanguini* ; id est, statim ita perfecte fui conversus, quod omnis carnalis affectus recessit a me... Item quantum ad intellectum ; quia ita fuit instructus a Christo, quod non fuit ei necesse instrui ab apostolis. »

**TERTIO : Conversio S. Pauli exemplar est mirificum intrinsecae efficaciae, qua Deus per suam gratiam tangit cor hominum, et physice transmutando a malo in bonum vertit illud, quocumque vult, et quomodo vult, et quando vult.** — Omnis conversio, qua homo justificatur, est transmutatio de statu injustitiae ad statum justitiae. Transmutatur siquidem essentia animae per infusionem gratiae sanctificantis; transmutatur intellectus per infusionem fidei; transmutatur et voluntas per infusionem spei et caritatis. Totus homo transmutatur, exspolians se veterem hominem cum actibus suis, et induens novum hominem, qui renovatur in agnitionem secundum imaginem ejus, qui creavit illum; et recreatus in justitia et sanctitate veritatis, in novitate ambulat. (Rom. 6, 4; Eph. 4, 24; Coloss. 3, 10) Omnis itaque vocatio, qua Deus justificat quos praedestinavit, est semper per instinctum interiorem, per intrinsecum tactum cordis, per physicam voluntatis transmutationem; et omnis conversio habet sicut conversio S. Pauli eandem causam efficientem, sc. beneplacitum Dei, quod est divina electio et convertentis vocatio. Et non quando homo vult, quoniam ipsum velle et ipsum cogitare ut velit jam est effectus gratiae tangentis cor; sed quando est placitum Deo, qui operatur in nobis et velle et perficere pro bona voluntate (Philipp. 2, 13), et vocat per gratiam suam.

**QUARTO : Omnis etiam uniuscujusque praedestinati conversio, sicut conversio S. Pauli, habet finem et habet modum.** — *Finem* quidem; quia Deus convertendo nos et dimittendo peccata nobis, revelat, quanta sit nobis facta misericordia; et per nostram conversionem ordinamur ad gloriam Christi, cui conformes per justificationem efficimur. *Modum* autem; etenim omnis conversio, qua homo ex averso fit ad Deum conversus, ex malo bonus, ex peccatore justus, habet modum perfectum quoad perfectionem substantialem, in qua non est accipere magis aut minus, et in qua pariter ostenditur in omnibus praedestinatiis efficacia divinae gratiae ex se et per se. Quod autem supra hunc modum substantialiter perfectum

reperiantur diversi modi et gradus plus vel minus perfecti, etiam provenit velut a prima causa ab ipsa Dei voluntate, qua movet plus vel minus liberum hominis arbitrium. Utique, qui plus conatur, plus habet de gratia, plus de caritate, plus de sanctitate et justitia, et plus appropinquat Deo; sed quod plus conetur, indiget altiori causa et vehementiori motione. Unde D. Thomas Ephes. 3. lect. 5. : « Hoc, quod Deum diligimus, non est ex nobis, sed a Spiritu Sancto. Hoc ergo, quod unus habeat caritatem longam, latam, sublimem et profundam, et alius non habeat, venit ex profundo divinae praedestinationis. »

QUINTO : **A Deo quippe sunt omnia, quae mediante nostra voluntate operantur in toto processu bonae atque salutaris operationis.** — D. Thomas II Thess. 2. lect. 3. : « Finis electionis est salus aeterna, et ideo dicit : *in salutem*... Hoc autem fit primo ex parte Dei per gratiam sanctificantem; unde dicit : *In sanctificatione Spiritus*. Secundo, ex parte nostra est consensus liberi arbitrii per fidem, et ideo subdit : *et in fide veritatis*... Petit autem pro eis exhortationem, quae est monitio ducens animum ad volendum. Et hanc potest facere homo exterius; sed non esset efficax, nisi esset interius Spiritus Dei; unde dicit : *Exhortetur corda vestra*, id est, instiget... Exhortetur per gratiam, ut velimus; et confirmet, ut efficaciter velimus. » A Deo, inquam, omnia ac singula, quae ad operationem salutarem expectant; sed a Deo in nobis acta vel in nobis simul et per nos. Etenim omnia conferuntur nobis a Deo per Christum; et gratia et gloria, et credere et mereri et perseverare. Unde D. Thomas Ephes. 2. lect. 2. : « Sicut gratia nobis confertur per Christum, ita et gloria quae est gratia consummata... Per ipsum enim beatificamur, per quem justificamur. » Et lect. 3. : « Quia dixerat, quod per fidem sumus salvati, possit quis credere, quod ipsa fides esset a nobis, et quod credere in nostro arbitrio constitutum est; et ideo hoc excludens dicit : *Et hoc non ex vobis*. Non enim sufficit ad credendum liberum arbitrium, eo quod ea, quae sunt fidei, sunt supra rationem... Et ideo quod homo



credat, hoc non potest ex se habere, nisi Deus det. » Et I Cor. 10. lect. 3. : « Vere fidelis Deus, qui dat potentiam, ne vincamur; gratiam, ut mereamur; constantiam, ut vincamus. »

Haec autem intrinseca divinae motionis efficacia plus adhuc patebit ex dicendis :

- a) De natura seu quidditate divinae motionis.
- b) De diversis gradibus perfectionis divinae motionis.
- c) De concordia liberi arbitrii cum divina motione.

**SEXTO : Quid nomine divinae motionis sit intelligendum.** — Quotiescumque de natura divinae motionis determinanda agitur, sive sub nomine motionis sive sub nomine motus designetur, non loquimur de *actione* Dei; quoniam Deus non agit per actiones formaliter transeuntes, sed per intellectum et voluntatem; et actio Dei est ipsa substantia Dei, ac proinde natura divinae motionis sic sumpta est *ipsa natura Dei*, de qua D. Thomas per totum tractatum *de Deo Uno et Trino*. Loquimur itaque de divina motione prout est aliquid reale, quod ab illa divina actione derivatur ad creaturas, et quo potentiae operativae creaturarum formaliter praemoventur, et sic praemotae applicantur ad actualiter operandum. Atque in hac acceptione quidquid dicatur de physica motione creaturae rationalis, etiam venit intelligendum de gratia actuali ex se et per se efficaci; quae nihil aliud est nisi physica praemotio, qua homo primo transfertur a Deo de statu injustitiae ad statum justitiae; et qua deinde ab ipso Deo etiam movetur, ut « gratia jam percepta utatur homo, juste vivendo, ad vitandum peccata et consequendum vitam aeternam ». (D. Thomas II\*Cor. 6. lect. 1.)

---

## II

## CONCLUSIO 1.

**Physica motio, et consequenter gratia efficax,  
est aliquid reale receptum in potentia liberi arbitrii.**

Arg. 1<sup>um</sup>. — Ex supradictis physica motio est Dei virtus, qua Deus : 1<sup>o</sup> agit immediate immediatione suppositi in ipsam potentiam liberi arbitrii ; 2<sup>o</sup> agit immediate immediatione virtutis in ipsum actum liberi arbitrii ; 3<sup>o</sup> determinat potentiam liberi arbitrii ad unum ; 4<sup>o</sup> facit creaturam rationalem velle hoc vel illud ; 5<sup>o</sup> infallibiliter operatur, mediante voluntate creata, aliquem bonum effectum, seu quidquid in actu liberae voluntatis creatae est *actus, entis et boni*. Manifestum est igitur physicam motionem esse aliquid reale extra Deum, et aliquid derivatum a Dei actione ad creaturam, et in potentiis operativis ejusdem receptum.

Arg. 2<sup>um</sup>. — D. Thomas I-II. q. 110. a. 2. ita describit naturam divinae motionis in ordine supernaturali : « In quantum anima hominis movetur a Deo ad aliquid cognoscendum vel volendum vel agendum, hoc modo ipse gratuitus effectus in homine non est qualitas, sed motus quidam animae ; actus enim moventis in moto est motus. » Et *III. Sent.* dist. 8. q. 1. a. 5. ad 4. : « Dicendum, quod omnis motus est aliquid secundum rem, non autem omnis relatio. »

Arg. 3<sup>um</sup>. — D. Thomas, loco jam citato II Cor. 3. lect. 1., postquam asseveravit, quod Deus « homines movet et omnia, quae agunt, ad actiones suas », addit, quod *hujusmodi motus est quoddam receptum in moto.* \*

## CONCLUSIO 2.

**Physica motio, et proinde gratia efficax,  
est aliquid reale causatum  
a solo Deo in potentia liberi arbitrii.**

Arg. 1<sup>um</sup>. — D. Thomas *De Pot.* q. 3. a. 7. ad 3. : « Dicendum, quod in operatione, qua Deus operatur movendo

naturam, non operatur natura, sed ipsa naturae operatio est etiam operatio virtutis divinae, sicut operatio instrumenti est per virtutem agentis principalis. » Cum igitur physica motio sit operatio, qua Deus operatur movendo naturam, movendo et voluntatem, in hac operatione non operatur voluntas nec natura. Ergo effectus hujusmodi operationis est aliquid reale causatum a solo Deo in potentiis operativis creaturarum.

Arg. 2<sup>um</sup>. — Hoc, quod efficitur per physicam motionem, constituit complementum ipsius virtutis operativae, qua creatura agit et operatur. Complementum autem virtutis ad agendum, qua creaturae sunt praeditae, confertur ab ipso, qui creaturas primo condidit eisque vim operandi simul cum natura donavit.

Arg. 3<sup>um</sup>. — Physica motio est virtus, qua Deus agit immediatione suppositi in potentiam liberi arbitrii. Sed in potentiam liberi arbitrii creati nemo potest intrinsece agere « nisi solum ille, qui solus illabitur animabus, sc. Deus ». (Ephes. 3. lect. 3.) Huc spectat illud Conc. Araus. II. can. 20. : « Multa Deus facit in homine bona, quae non facit homo. Nulla vero facit homo bona, quae non Deus praestat, ut faciat homo. »

### CONCLUSIO 3.

**Physica motio, et consequenter gratia efficax, est aliquid reale causatum in potentia liberi arbitrii prius prioritatem naturae et causalitatis quam ipsa operatio liberae voluntatis.**

Arg. 1<sup>um</sup>. — D. Thomas III. C. Gent. cap. 149. : « Motio autem moventis praecedit motum mobilis ratione et causa. » Et rursus : « Impossibile est ergo esse aliquem rectum motum in ipsa [anima], quem non praeveniat actio divina; unde et Dominus dicit Joh. 15, 5 : *Sine me nihil potestis facere.* »

Arg. 2<sup>um</sup>. — Physica motio est, qua Deus movet res ad operandum, quasi applicando formas et virtutes rerum ad

operationem, sicut etiam artifex applicat securim ad scindendum. Deus enim non solum dat formas rebus, sed etiam conservat eas in esse, et applicat eas ad agendum, et est finis omnium actionum. (I. q. 105. a. 5.) Manifestum vero est omnem applicationem praecedere natura et causalitate operationem propriam potentiae applicatae ad operandum.

Arg. 3<sup>um</sup>. — Causam secundam moveri a causa prima, qui est Deus, *motione praevia* propriae actioni ipsius causae secundae, potest habere duplicem sensum : 1<sup>o</sup> ita, ut in ipsa causa secunda praesupponatur nulla virtus propria ad agendum, et consequenter causa secunda non moveat ex virtute propria, sed solum ob hoc praecise, quia movetur a causa prima ; sicut baculus movet lapidem motus a manu, et solum quia movetur a manu ; 2<sup>o</sup> ita, ut in ipsa causa secunda praesupponatur vera ac propria potentia operativa ; et consequenter quod causa secunda moveat ex duobus, sc. virtute propria, et quia movetur a causa prima, a qua causa secunda recepit complementum suae propriae virtutis. Etenim motio causae primae est cooperativa intrinsece propriae actioni causae secundae, reducendo virtutem agendi propriam ipsius de potentia in actum.

Primo enim sensu physica motio minime dicenda est praevia propriae actioni creaturae rationalis, quoniam hoc esset negare liberum arbitrium, quod est facultas voluntatis et rationis. Atque hoc modo recte negat Cajetanus in I. q. 19. a. 8. motionem Dei esse praevia actioni voluntariae ; non enim liberum arbitrium *movel* ob hoc praecise tantum, quia movetur a Deo, « sicut baculus movet lapidem motus a manu ». Unde addit : « Non enim oportet, cum aliquis vult aliquid, seu cum sol illuminat, primam causam praevia motione cooperari ; sed sufficit et exigitur eam intrinsece cooperari tali electioni vel illuminationi. Et hoc, quia cooperatio in unoquoque est secundum naturam uniuscujusque ; sic enim omnia disponit suaviter. » Hoc est, quod D. Thomas edocet II Cor. 3. lect. 1. : « Cum enim hujusmodi motus sit quoddam receptum in moto, oportet, quod hoc fiat secundum



modum suae naturae, id est, rei motae... Ea ergo, quorum natura est ut sint liberae voluntatis, dominium suarum actionum habentia, movet libere ad operationes suas, sicut creaturas rationales et intellectuales; alia autem non libere, sed secundum modum suae naturae. »

In altera vero acceptione, physica motio absolute dicenda est praevia propriae actioni creaturae, sive sit libera in agendo sive non sit. Quoniam, ut profunde simul ac dilucide ait Cajetanus l. c. « Sic movere causae secundae provenit non ex moveri tantum, sed ex moveri et modo proprio ipsius causae secundae. »

Idecirco *movere* liberi arbitrii creati provenit ex duobus : 1<sup>o</sup> ex moveri a Deo; 2<sup>o</sup> ex modo proprio et virtute propria ipsius liberi arbitrii. Ac cum virtus propria liberi arbitrii compleatur ob hoc praecise, quia a Deo movetur, et operatio libera proveniat a Deo mediante libera voluntate, quae mota movet, acta agit : ideo physica motio est revera praevia actioni propriae rei motae.

Arg. 4<sup>um</sup>. — Cajetanus ibid. sic egregie ostendit mentem Angelici Doctoris circa divinum sc. influxum in creaturas etiam liberas : « Illa propositio adjuncta, sc. : *Causa secunda nihil agit nisi in virtute primae*, non juvat. Quoniam non est sensus, quod causa secunda nullam virtutem habeat nisi primae; sed quod ipsa secunda nullum effectum producit nisi virtute primae concurrente et conjungente virtutem secundae suo effectui; quoniam prima omnia attingit immediate immediatione virtutis, ut q. 8. a. 1. declaratum est. » Ergo si virtus primae causae, qui est Deus, conjungit virtutem operativam causae secundae suo effectui, absque dubio physica motio est aliquid reale causatum in potentia liberi arbitrii, prius quam ipsemet effectus sive operatio liberae voluntatis.

Arg. 5<sup>um</sup>. — Cajetanus ibid. addit : « Prima causa non attingit effectum secundae causae in seipso, sed modificata operatione sua juxta modum ipsius causae secundae. Et propterea effectus secundae causae in nullo priori haberet

necessariam habitudinem ad primam, sed solam ex se contingenter fieri habitudinem haberet. Illa enim propositio assumpta : *Prima causa prius naturaliter respicit effectum quam quaecumque alia causa*, non est sic intelligenda, quasi sit aliqua duratio naturae, in cuius primo instanti causa prima respiciat effectum, et in secundo causa secunda; puerilis enim hic est sensus... Sed est intelligenda quoad independentiam et intimitatem; attingit enim prima causa effectum secundae et independentius et intimius quam secunda, ut patet in principio libri *De Causis* prop. 1.; et propterea dicitur respicere prius. »

Unde habentur duo maxime notanda : 1<sup>o</sup> causam primam attingere effectum causae secundae mediante ipsa causa secunda; attingere proinde actum liberum mediante ipsa potentia liberi arbitrii; et influxum divinae motionis recipi in re mota secundum modum suae naturae; 2<sup>o</sup> causam primam attingere effectum secundae independentius et intimius quam secunda; ac proinde attingere consensum et electionem liberae voluntatis independentius et intimius quam ipsa libera hominis voluntas. Exinde physica motio : 1<sup>o</sup> intrinsece cooperatur virtuti operativae propriae creaturae rationalis; 2<sup>o</sup> virtutem propriam creaturae rationalis coniungit cum actione libera; 3<sup>o</sup> intimius et independentius attingit ipsam actionem liberam quam rationalis creatura; 4<sup>o</sup> est prior non duratione naturae aut prioritate temporis, sed ratione et causalitate, quam ipsum agere causae secundae.

Arg. 6<sup>um</sup>. — Cajetanus in I. q. 8. a. 1. scribit : « Agens enim potest dupliciter dici immediatum, ut docetur *III. C. Gent.* cap. 70., sc. immediatione virtutis et immediatione suppositi. Est autem immediatio virtutis, quando virtus agentis iungitur effectui, non mendicando talem conjunctionem ab aliqua alia virtute. Et propterea, quanto agens est superius, tanto immediatius agit immediatione virtutis; quoniam inferius agit virtute superioris, et non e converso. Immediatio autem suppositi est, quando inter suppositum agens et effectum nullum mediat suppositum subordinatum coagens.

Et propterea, quanto agens est inferius, tanto est immediatius immediatione suppositi. » Juxta hanc D. Thomae doctrinam jam supra declaratam habetur : 1<sup>o</sup> inter effectum, qui est libere agere, consentire aut eligere, et inter potentiam liberae voluntatis, nullum mediare suppositum subordinatum coagens; ac idcirco liberum arbitrium creatum est agens immediatum immediatione suppositi; 2<sup>o</sup> inter effectum, qui est libere agere, et inter causam primam, qui est Deus, mediare suppositum subordinatum coagens, quod est liberum arbitrium hominis; ac consequenter Deus est agens immediatum immediatione virtutis.

Exinde inferuntur alia duo : 1<sup>o</sup> Virtus Dei agentis jungitur effectui, quae est libera operatio creaturae rationalis, non mendicando talem conjunctionem ab aliqua alia virtute; 2<sup>o</sup> virtus creaturae rationalis sive voluntas creata jungitur suo effectui, quae est libera operatio, mendicando talem conjunctionem ab aliqua alia virtute, sc. a physica Dei praemotione. Cum enim causa secunda, tam natura quam voluntas, nequeat efficere nisi per actionem, et actionem elicere non valeat nisi mendicando physicam praemotionem ab ipso Deo : planum est, quod physica motio praesupponatur ad omnem actionem creaturae etiam rationalis. Ad hoc pertinet illud Conc. Araus. II. can. 9. : « Divini est muneris, cum et recte cogitamus et pedes nostros a falsitate et in justitia continemus. Quoties enim bona agimus, Deus in nobis atque nobiscum, ut operemur, operatur. » Et can. 11. : « Nemo quidquam Domino recte voveret, nisi ab ipso acciperet quod voveret, sicut legitur : *Quae de manu tua accepimus, damus tibi.* »

#### CONCLUSIO 4.

**Physica motio, et ideo gratia efficax, est aliquid reale causatum in potentia liberi arbitrii per modum impressionis transeuntis.**

Arg. 1<sup>um</sup>. — D. Thomas *De Pot.* q. 3. a. 7. ad 7. : « Dicendum, quod virtus naturalis, quae est rebus naturalibus

in sua institutione collata, inest eis ut quaedam forma habens esse ratum et firmum in natura. Sed id, quod a Deo fit in re naturali quod actualiter agat, est ut intentio sola, habens esse quoddam incompletum, per modum quo colores sunt in aëre et virtus artis in instrumento artificis. Sicut ergo securi per artem dari potuit acumen, ut esset forma in ea permanens, non autem dari ei potuit, quod vis artis esset in ea quasi quaedam forma permanens, nisi haberet intellectum : ita rei naturali potuit conferri virtus propria, ut forma in ipsa permanens, non autem vis, qua agit ad esse, ut instrumentum primae causae, nisi daretur ei, quod esset universale essendi principium ; nec iterum virtuti naturali conferri potuit, ut moveret seipsam, nec ut conservaret se in esse. Unde sicut patet, quod instrumento artificis conferri non potuit, ut operaretur absque motu artis : ita rei naturali conferri non potuit, quod operaretur absque operatione divina. » Ita D. Thomas. Hic tangitur fundamentum scientificum, postea declarandum, quare sit necessaria physica praemotio. Si creatura non indigeret praemoveri a Deo ad operandum, illius actio non reduceretur, sicut in causam, in primum agens. Et similiter, si virtus agendi collata creaturis per divinam motionem non esset per modum transeuntis, sed inesset eis ut ipsa virtus operativa propria, cujus est complementum, per modum formae permanentis : creaturae non essent instrumentum primae causae in operando, nec Deus esset principium universale totius operationis. Hanc profundam veritatem dilucidat D. Thomas etiam *II. Sent.* dist. 37. q. 2. a. 2. et alibi pluries. At de his infra.

Arg. 2<sup>um</sup>. — D. Thomas I-II. q. 110. a. 2. edocet, quod « ipse gratuitus effectus in homine non est qualitas, sed motus quidam animae ». Et de ratione motus est habere *esse* per modum transeuntis.

Arg. 3<sup>um</sup>. — Physica motio est, qua omnia a Deo aguntur, vel naturaliter vel voluntarie. Sed effectus relictus a divina virtute in rebus motis, sive res sit naturalis sive voluntaria,



nihil est aliud quam « quaedam impressio a primo movente; sicut inclinatio sagittae ad signum determinatum nihil aliud est quam quaedam impressio a sagittante ». (I. q. 103. a. 8.)

### CONCLUSIO 5.

**Physica motio, et a fortiori gratia efficax, est aliquid reale causatum in potentia liberi arbitrii per modum actuantis, complentis ac perficientis.**

Arg. 1<sup>um</sup>. — D. Thomas *III. C. Gent.* cap. 66. : « Ultimum in bonitate et perfectione inter ea, in quae potest agens secundum, est illud, in quod potest ex virtute agentis primi; nam complementum virtutis agentis secundi est ex virtute agentis primi. » Virtus igitur, quae per Dei motionem liberae voluntati creatae confertur, virtutem propriam ipsius voluntatis complet, coronat ac perficit.

Arg. 2<sup>um</sup>. — D. Thomas *III. C. Gent.* cap. 70. : « In quolibet enim agente est duo considerare, sc. rem ipsam quae agit, et virtutem qua agit; sicut ignis calefacit per calorem. Virtus autem inferioris agentis dependet a virtute superioris agentis, in quantum superius agens dat virtutem ipsam inferiori agenti, per quam agit, vel conservat eam, aut etiam applicat eam ad agendum; sicut artifex applicat instrumentum ad proprium effectum, cui tamen interdum formam non dat, per quam agit instrumentum, nec conservat, sed dat ei solum motum. Oportet igitur, quod actio inferioris agentis non solum sit ab eo per virtutem propriam, sed per virtutem omnium superiorum agentium; agit enim in virtute omnium; et sicut agens infimum invenitur *immediatum activum*, ita virtus primi agentis invenitur *immediata* ad producendum effectum. Nam virtus infimi agentis non habet quod producat hunc effectum *ex se*, sed ex virtute superioris... et sic virtus supremi agentis invenitur *ex se* productiva effectus, quasi causa *immediata*; sicut patet in principiis demonstrationum, quorum primum est immediatum. Sicut igitur non est inconveniens, quod una actio

producatur ex aliquo agente et ejus virtute, ita non est inconveniens, quod producatur idem effectus ab inferiori agente et a Deo : ab utroque *immediate*, licet alio et alio modo. » Idem ergo effectus, quod est velle, libere agere, consentire et eligere, producit ab inferiori agente, quae est creatura rationalis, et a Deo ; ab utroque *immediate*, licet alio et alio modo. Etenim creatura rationalis est immediatum activum immediatione suppositi, et Deus est immediatum activum immediatione virtutis.

Unde actio, quae est consensus vel electio seu libera volitio, producit : 1<sup>o</sup> ex aliquo agente, nempe creatura rationali, 2<sup>o</sup> et ex ejus virtute, sc. potentia liberae voluntatis ; quoniam in creaturis sicut esse realiter distinguitur ab essentia vel natura, sic etiam actus distinguitur ab ipsa agendi potentia. Haec potentia agendi, quae est virtus liberi arbitrii, non habet quod producat hunc effectum consentiendi, volendi, eligendi, *ex se*, sed habet *ex virtute supremi agentis*, qui est Deus. Etenim virtus primi agentis invenitur *ex se productiva* effectus, quasi causa immediata immediatione virtutis. Unde operatio liberae voluntatis producit ex creatura rationali, ex virtute liberi arbitrii ejusdem, et ex virtute supremi agentis, qui est Deus. Virtus ergo superioris agentis complet et perficit virtutem, per quam agit rationalis creatura. Insuper D. Thomas statuit semper velut principium altissimae veritatis : « Quanto suppositum est prius in agendo, tanto virtus ejus est immediatior effectui ; quia virtus causae primae conjungit causam secundam suo effectui. » (I. q. 36. a. 3. ad 4.)

Arg. 3<sup>um</sup>. — Ipse Angelicus Doctor hanc differentiam inducit inter motionem moralem et motionem physicam, quibus movetur aut moveri potest liberum arbitrium creatum, videlicet, quod altera est per modum persuasionis vel per modum disponentis, altera vero per modum perficientis. Quod alia ita se habet in movendo, ut illam non semper sequatur effectus voluntatis, quod est velle aut consentire ; alia autem ita se habet in movendo, ut effectus statim

sequatur in voluntate ad actionem moventis. Quod alia potest convenire creaturae, alia vero non competit nisi soli Deo. Quod alia non inducit necessitatem infallibilitatis ad eligendum; alia autem necessitatem, non quidem coactionis, sed infallibilitatis, ad eligendum semper inducit. « Id, quod est perficiens... proprie et vere causa dicitur; quia causa est, ad quam sequitur effectus. Ad actionem autem perficientis statim effectus sequitur. » Deus « solus in voluntate operatur et voluntatem inclinare potest in quodcumque voluerit ». (*De Malo* q. 3. a. 3.) Physica ergo motio, et a fortiori gratia efficax, est aliquid reale actum a Deo in potentia liberi arbitrii, per modum actuantis atque perficientis ipsam potentiam in ordine ad suam propriam operationem.

### III

#### Quid sit motus.

Philosophus incipit *III. Physic.* ostendens necessitatem investigandi naturam motus : « Quoniam autem, inquit, natura est principium motus et mutationis, scientia autem de natura est : oportet non ignorare, quid sit motus; necessarium enim est ignorato ipso et ignorari naturam. » Pari modo, cum physica motio et gratia ex se efficax sint in potentia liberi arbitrii creati quidam motus, non est ignorandum, quid sit motus; hoc enim ignorato quidditatem divinae motionis, tam in ordine naturae quam in ordine supernaturali, necesse erit etiam ignorari. Unde D. Thomas I-II. q. 110. a. 2. volens determinare quid sit gratia actualis, qua anima hominis movetur a Deo ad aliquid cognoscendum vel volendum vel agendum, docet, quod « hoc modo ipse gratuitus effectus in homine non est qualitas, sed motus quidam animae; actus enim moventis in moto est motus, ut dicitur *III. Physic.* ». Quapropter, etsi jam quaedam circa

hanc materiam maneant insinuata supra, cum de quidditate gratiae actualis actum est <sup>1</sup>, quaedam alia adhuc oportet attingere, ut natura physicae praemotionis non ignoretur, et paretur via ad plures difficultates enodandas. Erit semper D. Thomas dux verbi ac magister, qui conditiones motus loquendo expendet.

III. *Physic.* lect. 2. : « Convenientissime Philosophus definit motum dicens, quod motus est actus existentis in potentia secundum quod huiusmodi. Unde neque est potentia existentis in potentia, neque est actus existentis in actu, sed est actus in potentia, ut per id, quod dicitur *actus*, designetur ordo ejus ad anteriorem potentiam, et per id, quod dicitur *in potentia existentis*, designetur ordo ejus ad ulteriorem actum. » Ibid. lect. 3. : « Et quidem verum est, quod motus est actus ; sed est actus imperfectus, medius inter potentiam et actum. » Ibid. lect. 4. : « Quia enim motus est actus existentis in potentia in quantum huiusmodi ; existens autem in potentia in quantum huiusmodi est mobile, non autem movens, quia movens in quantum huiusmodi est ens in actu : sequitur, quod motus sit actus mobilis in quantum huiusmodi. » Manifestum est, quod « actus motus est in mobili, cum sit actus mobilis, causatus tamen in eo a movente... Idem est, quod movens agendo causat, et quod motum patiando recipit. Et hoc est, quod dicit (Philosophus), quod movens est activum mobilis, id est, actum mobilis causat ; quare oportet unum actu esse utriusque, sc. moventis et moti. Idem enim est, quod est a movente ut a causa agente, et quod est in moto ut in patiente et recipiente. » Ibid. lect. 4. : « Motus enim in rerum natura nihil aliud est quam actus imperfectus, qui est inchoatio quaedam actus perfecti in eo, quod movetur ; sicut in eo, quod dealbatur, jam incipit esse aliquid albedinis... Et quia positum fuit in dubitatione, utrum motus sit actus moventis vel mobilis, et ostensum est, quod est actus activi ut ab hoc, et passivi ut in hoc : ac tollendum omnem dubi-

<sup>1</sup> Vide hujus operis *Prim. Part.* q. 2. a. 2. pag. 146.



tationem aliquantulum notius dicamus, quod motus est actus potentiae activi et passivi. Et sic etiam poterimus in particulari dicere, quod aedificatio est actus aedificatoris et aedificabilis in quantum hujusmodi; et simile est de modificatione in aliis motibus. »

Praeterea, D. Thomas *XI. Metaph. lect. 3.* : « Motus non habet aliquam aliam naturam separatim a rebus aliis, sed unaquaeque forma, secundum quod est in fieri, est actus imperfectus, qui dicitur motus. » Et *III. Metaph. lect. 3.* : « Motus est actus existentis in potentia, et est quodammodo medium inter potentiam et actum. » *De Anima q. unica a. 7. ad 3.* : « Motus reducitur ad genus et speciem ejus, ad quod terminatur motus; in quantum eadem forma est, quae ante motum est tantum in potentia; in ipso motu, medio modo inter actum et potentiam; et in termino motus, in actu completo. » *IV. Sent. dist. 1. q. 1. a. 4.* : « Motus autem non est ens completum, sed est in via in ens, quasi medium quid inter potentiam puram et actum purum, ut dicitur *III. Physic.* Motus, quantum ad substantiam suam, reducitur ad illud genus, in quo sunt termini motus, sicut imperfectum ad perfectum, quamvis ponatur in praedicamento passionis, secundum quod importat ordinationem moventis ad motum... Reducitur autem (virtus transiens in sacramentis) ad bona maxima, in quibus est gratia, quae quodammodo est complementum ipsius virtutis, quasi finis ejus. »

*I. q. 85. a. 3.* : « Omne autem, quod procedit de potentia in actum, prius pervenit ad actum incompletum, qui est medius inter potentiam et actum, quam ad actum perfectum. » *III. q. 11. a. 5.* : « Medium autem inter puram potentiam et actum completum est habitus. Ejusdem autem generis sunt medium et extrema. » *De Verit. q. 24. a. 1. ad 3.* : « Secunda causa non potest in actum procedere nisi per virtutem causae primae. » *II. Sent. dist. 15. q. 1. a. 2.* : « Cum omnis motus sit actus motoris et moti, oportet, quod in motu relinquatur virtus motoris et virtus mobilis. » *Ibid. dist. 1. q. 1. a. 4.* : « Operatio creatoris magis pertingit ad intima rei quam operatio causarum secundarum. » *De*

*Pot.* q. 3. a. 4. : « Omnes secundae causae agentes a primo agente habent hoc ipsum, quod agent. » *De Verit.* q. 8. a. 13. : « Motus autem voluntatis non habet dependentiam nec connexionem ad aliquam causam naturalem, sed solum ad causam divinam, quae in voluntate sola imprimere potest. » *III. C. Gent.* cap. 17. : « A Deo omnes aliae causae habent, quod sint causae in actu. » *I. q. 103. a. 1. ad 3. et a. 3. ad 1.* : « Motus est actus mobilis a movente, impressio quaedam Dei dirigentis ad finem. Id, quod creaturae a Deo recipiunt, est earum natura. » *Et I. q. 62. a. 9.* : « In unoquoque motu motoris intentio fertur in aliquid determinatum, ad quod intendit perducere mobile. »

---

## IV

### COROLLARIA

1<sup>um</sup>. — Physica motio, et consequenter gratia efficax, quae ultimum gradum perfectionis in physica motione exhibet, est *actus* liberi arbitrii creati existentis in potentia ; sed tamen est *actus in potentia*. *Actus* siquidem : quoniam est quaedam vis, quaedam energia superveniens ipsi libero arbitrio. Attamen *actus in potentia*, quoniam adhuc non est actus liberi arbitrii existentis in actu. Per hoc, quod physica motio dicitur actus, designatur ordo ejus ad anteriorem potentiam, id est, ad potentiam liberi arbitrii, ejus propriam operandi virtutem complet et magis actuat. Per hoc autem, quod physica motio dicitur actus in potentia, designatur ordo ejus ad ulteriorem actum, id est, ad operationem productam ex virtute liberi arbitrii et ex virtute primi agentis sive causatam a Deo per suam motionem, mediante voluntate, in qua motio recipitur.

2<sup>um</sup>. — Physica motio est : 1<sup>o</sup> quid medium inter potentiam liberi arbitrii et ipsius operationem, quae est electio et consensus ; 2<sup>o</sup> actus liberi arbitrii, in quantum est mobile ;

3<sup>o</sup> quid activum, quod se habet respectu potentiae liberi arbitrii in ratione causae formalis; respectu autem operationis liberi arbitrii in ratione virtutis agentis seu causae efficientis; 4<sup>o</sup> inchoatio quaedam ipsius liberae operationis in potentia liberi arbitrii, quae a Deo movetur, sicut in eo, quod dealbatur, jam incipit esse aliquid albedinis.

3<sup>um</sup>. — Physica motio est actus Dei ut *activi*, et actus liberi arbitrii creati ut *passivi*; quoniam Deus movens est activum liberi arbitrii mobilis; atque idem est, quod est a Deo movente ut a causa agente, et a libero arbitrio moto ut in patiente et recipiente. Deus movens *aedificat* aliquid in potentia mota, eam perficiendo; et potentia operativa mota *aedificatur*, dum incipit elongari a statu potenciali et appropinquare ad terminum motus, quod est existere in actu.

4<sup>um</sup>. — Unde potentia liberi arbitrii per physicam motionem quasi in medio inter potentiam puram et actum purum constituitur; ponitur in via ad hoc, quod existat in actu; et potentia pura, id est indifferentia privativa actus, tollitur per physicam motionem, qua actus purus, id est perfectus ac completus, inchoatur. Etenim omne, quod procedit de potentia in actum, prius pervenit ad actum incompletum, qui est medius inter potentiam et actum, quam ad actum perfectum.

5<sup>um</sup>. — Realitas sive entitas physicae praemotionis: 1<sup>o</sup> neque est ipsa potentia operativa, neque est ipsa operatio; 2<sup>o</sup> est quodammodo medium inter potentiam et actum; 3<sup>o</sup> participat aliquid de natura utriusque, quia ejusdem generis sunt medium et extrema, et physica praemotio est formaliter complementum virtutis operativae et inchoatio ipsius operationis; 4<sup>o</sup> potest igitur reduci ad naturam operationis, quia est actus in fieri; et potest reduci ad naturam potentiae operativae, quia est actualitas ultima terminans ac complens operativam potentiam; 5<sup>o</sup> quoad substantiam suam seu naturam specificam reducitur ad speciem ejus, ad quod terminatur motus; et sic una motio differt ab alia secundum differentiam ipsam actuum, ad quos motus termi-

natur. Unde si terminus ipsius motus est eligere aut consentire aut simpliciter velle, motio potest dici diversa juxta diversitatem electionis, consensus et simplicis volitionis. Et pariter, si terminus ipsius motus sistit in operatione ordinis naturalis, motio dicitur esse a Deo ut auctor naturae est; si vero transcendens ordinem naturae ingreditur in ordinem supra naturam, motio dicitur esse a Deo ut auctor est gratiae. Et tunc physica motio, quae in anima est motus, denominatur effectus gratuitus vel gratia actualis.

6<sup>um</sup>. — Per physicam motionem potentia liberi arbitrii accipit a Deo : *a*) ut agat ; *b*) ut libere agat ; *c*) ut bene agat ; *d*) ut supernaturaliter agat ; *e*) ut supernaturaliter agendo agat meritorie.

7<sup>um</sup>. — In omni operatione liberi arbitrii quidquid in actu est entis et actus et boni et perfecti, a Deo movente est, et a Deo procedit mediante potentia voluntatis. Et cum voluntas moveat quoque seipsam sub Dei motione, in hoc motu relinquitur tum virtus Dei primi auctoris, tum virtus voluntatis et motae et seipsam moventis.


8<sup>um</sup>. — Motus liberi arbitrii creati non habet dependentiam neque connexionem nisi ad causam divinam, quae sola potest in voluntate imprimere atque potentiam liberi arbitrii creati, quocumque voluerit, transmutando vertere. Atque creatura rationalis non potest in actum liberum procedere nisi per virtutem causae primae; quae quidem virtus conjungit virtutem propriam ipsius creaturae rationalis cum actu sive operatione libera voluntatis.

9<sup>um</sup>. — Quotiescumque potentia liberi arbitrii creati movetur a Deo per physicam motionem, ad *aliquid unum* movetur, ad *aliquid unum* determinatur, ad *aliquid unum* fertur, et ad *aliquid unum* pervenit. Atque creatura rationalis sic physice praemota a Deo movetur et determinatur et pervenit ad terminum motus *libere*. Ratio primi asserti est : quia in unoquoque motu Dei motoris intentio fertur in aliquid determinatum, ad quod intendit perducere mobile. Ratio alterius asserti est : quia id, quod creaturae a Deo recipiunt, est eorum natura. Cum creatura rationalis recipit



a Deo potentiam liberi arbitrii, recipit facultatem libere agendi; et cum postea recipit a Deo physicam motionem hujus potentiae, recipit actum, qui est complementum facultatis libere agendi antea collatae et simul inchoatio ipsius liberae actionis, quam creatura rationalis actualiter agit.

10<sup>um</sup>. — Unde physica Dei motio habet rationem actus respectu ipsius liberae voluntatis, in quantum voluntas est potentia; et consequenter habet rationem perfectionis atque complementi potentiae voluntatis, in quantum est principium ipsius actus liberi. Physica enim Dei motio in potentia liberae voluntatis est *motus*; et ut D. Thomas docet *VIII. Physic. lect. 10.*: « Ipse motus est quidam actus mobilis, in quantum movetur; sed est actus imperfectus, quia est actus ejus, in quantum est adhuc in potentia. »



## CAPUT SEXTUM

### De diversis perfectionis gradibus in physica praemotione.

---

#### I

#### PRAENOTANDA

PRIMO : **Sensus quaestionis.** — Sensus quaestionis declaratur a D. Thoma *De Pot.* q. 1. a. 2. his verbis : « Intensio autem in operatione divina non est attendenda secundum quod operatio est in operante, quia sic semper est infinita, cum operatio sit divina essentia ; sed attendenda est secundum quod attingit effectum ; sic enim a Deo moventur quaedam efficacius, quaedam minus efficaciter. » Et III. q. 57. a. 3. ad 3. : « Etsi virtus divina sit infinita et infinite operetur quantum est ex parte operantis, tamen effectus virtutis ejus recipitur in rebus secundum earum capacitatem et secundum Dei dispositionem. »

SECUNDO : **Quot et quales sint actus voluntatis.** — Ut ergo diversi hujus efficaciae gradus perspiciantur, opus erit aliquid praelibare de ipsis actibus, qui sunt immediate ipsius voluntatis, velut a voluntate elicit. Cum autem voluntas moveatur in finem et in ea quae sunt ad finem, distinguere oportet actus, quibus voluntas movetur in finem, et actus, quibus voluntas movetur in ea quae sunt ad finem. Actus vero voluntatis in finem videntur esse tres, sc. *velle, intendere* et *frui*. Actus denique voluntatis in ea quae sunt ad finem, ad tres quoque reducuntur : *eligere, consentire* et *uti*. (I-II. q. 8. et q. 13.)

*Velle* nominat simplicem actum voluntatis, sicut intelligere nominat simplicem actum intellectus. Simplex autem actus potentiae est in id, quod est secundum se objectum potentiae. Cum ergo potentia voluntatis non sit nisi boni, velle proprie loquendo est in id, quod est propter se bonum et volitum. Cum denique id, quod est propter se bonum et volitum, habeat rationem finis, velle proprie est ipsius finis.

*Intendere* nominat etiam actum voluntatis, praesupposita tamen ordinatione rationis ordinantis aliquid in finem. Importat quidem motum voluntatis in finem, non simpliciter ut velle, sed secundum quod finis acquiritur per ea quae sunt ad finem.

*Frui* nominat quoque motum voluntatis in finem, sicut intendere; attamen differt ab intentione, quoniam fruitio importat quietem, quae est in fine, ac consequenter exprimit motum voluntatis in finem, in quantum jam habetur finis ipse. Si habetur dumtaxat in intentione, fruitio est imperfecta; si vero habetur jam in re, est perfecta. Si finis, qui habetur vel realiter vel in intentione tantum, sit ultimus, fruitio est propria; si autem non est ultimus, fruitio est impropria.

*Eligere* importat in sua quidditate aliquid pertinens ad rationem et aliquid pertinens ad voluntatem; quamobrem Philosophus dixit, quod electio est vel appetitivus intellectus vel appetitus intellectivus. Electio tamen substantialiter non est actus rationis, sed voluntatis; perficitur enim in motu quodam animae ad bonum, quod eligitur. Electio est semper eorum quae sunt ad finem. Unde finis, in quantum hujusmodi, non cadit sub electione.

*Consentire* similiter non est nisi de his quae sunt ad finem. Actus appetitivae virtutis importat quandam conjunctionem ad id, cui consentitur. Praecedit electionem, quae addit supra consensum quandam relationem respectu ejus, cui aliquid praeeligitur; et ideo post consensum adhuc remanet electio. Sed si inveniatur unum solum ducens ad finem, quod placeat, non differunt re consensus et electio, sed ratione tantum; ut consensus dicatur secundum quod placet

ad agendum, electio autem secundum quod praefertur his, quae non placent.

*Uti* proprie est actus voluntatis; et semper est ejus quod est ad finem; et si referantur ad idem, usus sequitur electionem, et electio praecedit usum.

**TERTIO : Actus voluntatis per comparisonem ad intellectum.** — Pro pleniori horum omnium motuum voluntatis notitia non abs re erit illos examinare per comparisonem : 1<sup>o</sup> ad intellectum; 2<sup>o</sup> ad ipsam potentiam voluntatis; 3<sup>o</sup> ad objectum, quod est bonum. Quoad primum regula generalis est, quae nullam patitur exceptionem, quod ad omnem motum voluntatis praecedat semper, saltem prioritatem naturae et causalitatis, motus ipsius intellectus; etenim nihil volitum, quin praecognitum, ac ignoti nulla cupido. Voluntas namque est appetitus rationalis; et ut D. Thomas, loquens de animalibus brutis, expresse ait, quod « in his non est aliquis rationis motus, per consequens nec voluntatis ». (I-II. q. 10. a. 3.) Unde si intellectus non movet voluntatem, sicut praesentans ei objectum suum, nullus aderit voluntatis motus. Jam vero intellectus praesentat voluntati objectum suum, quod est bonum, dupliciter : uno modo, apprehendendo aliquid in ratione boni ut simpliciter bonum, ut propter se bonum, ac consequenter simpliciter ac propter se volendum. Et istiusmodi actus, qui est apprehendere aliquod objectum ut simpliciter bonum, praecedit tres actus voluntatis, qui sunt *velle*, *intendere* et *frui*. Alio modo, apprehendendo aliquid in ratione boni, non ut propter se bonum, sed ut bonum in ordine ad aliud, ideoque ut volendum ratione alterius. Et hujusmodi actus est inquisitio rationis ante iudicium de eligendis; ac haec inquisitio consilium vocatur, quod praecedit *electionem*, *consensum* et *usum*.

**QUARTO : Actus voluntatis per comparisonem ad ipsam voluntatis potentiam.** — Per comparisonem autem ad ipsam potentiam voluntatis, tres actus, *velle*, *intendere* et *frui* constituunt unam speciem actuum diversam ab illa, quam constituunt tres alii, qui sunt *eligere*, *consentire* et *uti*.



Manifestum est enim, quod unus et idem motus voluntatis est, quo fertur in finem secundum quod est ratio volendi ea quae sunt ad finem, et in ipsa quae sunt ad finem. Sed alius actus est, quo fertur in ipsum finem absolute, et quandoque praecedat tempore. Velle itaque, intendere et frui, atque eligere, consentire et uti sunt duae species actuum voluntatis : quae tamen non diversificant potentiam volendi propter communem rationem objecti, quod est bonum. (I-II. q. 8. a. 3. ; III. q. 18. a. 3. et *De Verit.* q. 22. a. 13. ad 12.)

Velle, intendere et frui sunt motus voluntatis, secundum quod voluntas est *natura*; eligere vero, consentire et uti sunt motus voluntatis, secundum quod voluntas est *ratio*. (I. q. 83. a. 4. ; III. q. 18. a. 4.) Eligere, consentire et uti sunt semper actus liberae voluntatis; velle, intendere et frui possunt esse et sunt etiam actus liberae voluntatis, quamvis exerceantur ad instar motuum naturalium; etenim id, quod est in una operatione ut *finis*, potest ordinari et ordinatur in altera operatione ad aliquid aliud ut *ad finem*; idcirco hoc modo omnia cadunt aut cadere possunt sub electione praeter unum, quod est absolute ultimus finis, respectu cuius velle, intendere et frui sunt absolute actus naturales ac necessarii voluntatis; necessarii, inquam, saltem quoad specificationem. (I-II. q. 13. a. 3. et q. 9. a. 4.)

Denique, cum voluntas duplicem habitudinem habeat ad volitum, unam quidem in ordine intentionis, alteram vero in ordine executionis; unam enim in volente per proportionem ad rem desideratam, et alteram in re, qua volens tendit per executionem ad consequendam rem volitam : ideo omnes actus, qui praecedunt electionem, pertinent ad primam habitudinem voluntatis; quoniam in electione completur proportio voluntatis, ut complete velit id quod est ad finem. Atque in actu, qui dicitur usus, fit transitus ab ordine intentionis ad ordinem executionis, et incipit secunda habitudo voluntatis, cuius proportio completur per hoc, quod ipsum finem habeat realiter; quod est perfecte habere ipsum atque in ipso per fruitionem propriam et perfectam quiescere. (I-II. q. 16. a. 4.)

**QUINTO : Actus voluntatis per comparisonem ad objectum.**

— Per comparisonem tandem ad objectum, quod est bonum, et a quo specificantur actus voluntatis, velle, intendere et frui respiciunt bonum *delectabile*; et eligere, consentire et uti tendunt immediate in bonum *utile*. De ratione boni est esse appetibile terminans motum appetitus; si enim terminat secundum quid, ut medium, per quod tenditur in aliud, vocatur bonum utile; si autem terminat motum appetitus totaliter ita, ut quiescat in re desiderata, vocatur bonum delectabile. Exinde oritur determinatio seu specificatio actuum voluntatis, quae se habet ex parte objecti; et quantum ad hoc voluntas se habet passive et dependet ab intellectu, a quo movetur isto modo motionis. Unde principium formale specificans in ordine physico omnes motus seu actus voluntatis, est objectum praesentatum ei ab intellectu sub ratione boni delectabilis et sub ratione boni utilis. Quod bonum volitum sit desiderabile propter se, tamquam terminus simpliciter, velut finis appetitivus motus; vel e contra sit desiderabile propter aliud, tamquam terminus secundum quid, velut medium in motu appetitus: hoc pendet ab objecto diversimode apprehenso; hoc derivatur ab intellectu prout praesentat voluntati objectum suum. Ex qua diversa objecti praesentatione consurgit diversa species actuum voluntatis, nempe velle, intendere et frui; et eligere, consentire et uti. (I. q. 5. a. 6.; q. 82. a. 4.; I-II. q. 9. a. 1.)

Ac supra hanc specificationem motuum voluntatis in ordine *physico*, supervenit alia specificatio in ordine *moralis*, etiam dependens ab objecto, etiam causata formaliter ab intellectu; at juxta hanc determinationem actus voluntatis distinguuntur in duas quoque species, videlicet: actus *boni* et actus *mali*, ita ut aliae duae species in ordine entitativo vel physico se habeant in isto novo ordine superveniente tamquam materia vel subjectum; et sic possunt esse similiter boni aut similiter mali: velle, intendere, frui, eligere, consentire et uti; quoniam omnes isti motus constituunt unum solum actum humanum. Hujusmodi autem specifi-

catio pendet ex objecto praesentato voluntati per rationem, non ut objectum habet rationem boni delectabilis vel utilis, sed in quantum objectum cadit sub ordine rationis, quae est principium humanorum actuum et regula voluntatis humanae; ex qua regula regulata per legem aeternam, quae est ipsa Ratio Divina, mensuratur bonitas, quae pertinet ad genus moris et causat bonitatem moralem in actibus voluntatis, sive actus denominetur simplex volitio aut intentio aut fruitio, aut electio aut consensus aut usus aut opus externum in ordine executionis. Haec conformitas sive adaequatio voluntatis in agendo ad rectam rationem, et mediante rectitudine rationis humanae ad rationem aeternam, quae est Deus, constituit essentialiter rationem *boni honesti*, quae se extendit et ad bonum delectabile et ad bonum utile, ad volitum propter se et ad volitum propter aliud; et ex qua sequitur ratio laudabilis et ratio meriti, et ex cujus privatione procedit ratio culpabilis et demeriti. Rectitudo voluntatis est per debitum ordinem ad finem ultimum, qui est Deus. (I-II. q. 4. a. 4. ; q. 19. a. 4.) Omnia bona honesta habent quoque rationem boni delectabilis et rationem boni utilis praeter Summum Bonum, quod cum sit per essentiam honestum, est totaliter delectabile et in semetipso continet totam prorsus rationem, unde desideretur, et in quo omne desiderium complete quiescit. Unde S. Augustinus *I. Confess.* cap. 1. : « Magnus es, Domine, et laudabilis valde... Tu excitas, ut laudare te delectet; quia fecisti nos ad te, et inquietum est cor nostrum, donec requiescat in te. »

**SEXTO : Quid significet movere seipsum.** — Postremo notandum, quod *movere seipsum* potest significare : 1<sup>o</sup> activitatem intrinsecam rerum ad exercendas actiones immanentes, quibus viventia, dum agunt, per seipsa perficiuntur; atque in hoc sensu docet D. Thomas I. q. 18. a. 3. : « Inveniuntur igitur quaedam, quae movent seipsa... Et hujusmodi sunt plantae. »

2<sup>o</sup> Activitatem intrinsecam, qua viventia ita moventur a principio intrinseco, quod habent in seipsis, ut non solum

agent, sed etiam agent cum aliqua notitia finis, sive perfecta sive imperfecta; et in hac acceptione D. Thomas asserit, quod animalia, quibus competit voluntarium secundum rationem imperfectam, « dicuntur movere seipsa ». (I-II. q. 6. a. 1. et 2.)

3<sup>o</sup> Activitatem intrinsecam, qua sola rationalis creatura, cui voluntarium secundum rationem perfectam competit, potest, deliberans de fine, cujus cognitionem perfectam habet, et de his quae sunt ad finem, movere seipsam in finem vel non movere. Ac in hac profundiori significatione D. Thomas I-II. q. 1. a. 2. concludit: « Et ideo proprium est naturae rationalis, ut tendat in finem, quasi se agens vel ducens ad finem; naturae vero irrationalis, quasi ab alio acta vel ducta, sive in finem apprehensum sicut bruta animalia, sive in finem non apprehensum sicut ea, quae omnino cognitione carent. »

4<sup>o</sup> Activitatem intrinsecam, qua sola creatura intellectualis, angelus vel homo, determinat se ad volendum hoc vel illud, vel etiam ad volendum vel non volendum hoc; nam ex hoc, quod ratio deliberans se habet ad opposita, voluntas in utrumque potest. Homo autem est dominus sui actus ex hoc, quod habet deliberationem de suis actibus. Atque in hoc sensu magis proprio ac stricto nulla creatura rationalis, quantumvis perfectissima, potest se movere absolute quantum ad omnia. In hoc sensu D. Thomas I. q. 18. a. 3. ait: « Sed quamvis intellectus noster ad aliqua se agat, tamen aliqua sunt ei praestituta a natura; sicut sunt prima principia, circa quae non potest aliter se habere, et ultimus finis, quem non potest non velle. »

In hac posteriori ac plus circumscripta significatione accipere oportet *movere se*, quotiescumque affirmabitur vel negabitur de humana voluntate. Etenim humana voluntas, sive moveat seipsam sive tantum a Deo moveatur ad operandum, semper aliquid agit, semper activitatem suam propriam exercet, eo ipso, quod elicit operationem, qua virtus intrinseca agendi evolvitur et augetur. Unde *movere se* in hoc postremo sensu, non modo exprimit virtutem



agendi, qua voluntas est naturaliter praedita, et actionem immanentem, qua voluntas, dum agit, perficitur; sed praeterea praesupponit cognitionem perfectam finis, propter quem voluntas agit et in quem agendo tendit; non modo significat facultatem voluntatis et rationis, qua homo est dominus suorum actuum et qua creatura rationalis est causa sui in operando, sed etiam importat hoc, quod homo reducat se de potentia in actum, quatenus per rationem determinat se ad volendum hoc vel illud. Hoc sensu D. Thomas docet I. q. 2. a. 3. : « Movere enim nihil aliud est quam educere aliquid de potentia in actum. » Et I-II. q. 9. a. 1. : « Oportet enim ut id, quod est in potentia, reducatur in actum per aliquid, quod est in actu; et hoc est movere. » Et a. 3. : « Manifestum est autem, quod intellectus per hoc, quod cognoscit principium, reducit seipsum de potentia in actum, quantum ad cognitionem conclusionum; et hoc modo movet seipsum; et similiter voluntas per hoc, quod vult finem, movet seipsam ad volendum ea quae sunt ad finem. » Et a. 6. ad 3. : « Homo per rationem determinat se ad volendum hoc vel illud, quod est vere bonum vel apparens bonum. » Itaque *voluntatem movere se* significat, quod voluntas non modo vult, verum etiam quod seipsam applicat ad volendum<sup>1</sup>.

<sup>1</sup> Quod quidem eximie declarat CAJETANUS in I-II. q. 9. a. 4. dum scribit : « Scito... quod aliud est loqui de volitione, et aliud est loqui de volitione ut a voluntate applicante seipsam ad volendum. Volitio enim nihil aliud dicit nisi operationem voluntatis, qua vult; et certum est, quod ad volendum sufficit voluntas cum objecto. Sed ad volendum a se, ita quod ly *a se* dicat causalitatem applicantem seipsam ad volendum, non sufficit voluntas cum objecto, sed exigitur voluntas praevolens finem; et ratio hujus est, quia velle a se non solum importat velle, sed agere seu movere : quod, quia oportet fieri propter finem, praeexigit natura vel tempore appetitum finis, ut dictum est; et non advertere hoc casus est loquentium. »

## II

## CONCLUSIO 1.

**Eo modo, quo movetur quantum ad exercitium actus, id est, tamquam a causa efficiente actum, voluntas non movetur nisi a solo Deo sicut ab exteriori principio.**

Arg. 1<sup>um</sup>. — Quoniam haec est differentia inter motionem voluntatis per modum causae finalis et motionem per modum causae efficientis, quod licet utroque modo sit proprium Dei movere voluntatem, sed maxime secundo modo, interius eam inclinando. Nam movere voluntatem, interius eam inclinando, est movere physice potentiam voluntatis et immutare ipsius actum in aliud. Quod est proprium Dei solius. (I. q. 105. a. 4.; *De Verit.* q. 22. a. 8.)

Arg. 2<sup>um</sup>. — Movere voluntatem efficienter quantum ad exercitium actus nihil aliud est nisi motum voluntarium efficere intra potentiam ipsius voluntatis et ipsa voluntate mediante; nam motus vel actus voluntatis est ab intrinseco et procedens ab ipsa potentia volendi. Sed hujusmodi motus ab intrinseco voluntatis procedens, impossibile est quod efficiatur ab aliquo principio intrinseco, nisi sit ipsa causa voluntatis. Ergo solus Deus, qui causavit naturam voluntatis, potest efficienter causare motum ipsi voluntati connaturalem.

Arg. 3<sup>um</sup>. — Cum voluntas ut *potentia* habeat ordinem ad universale bonum, voluntas ut *actus* exprimit hunc ordinem ita, quod in omni motu voluntario claudatur haec universalis motio ad universum objectum voluntatis, quod est bonum. Sed nemo potest dare sive virtualiter sive actualiter hanc inclinationem universalem nisi ipse Deus, qui est universale bonum.

Arg. 4<sup>um</sup>. — Omnis motus voluntatis ab interiori procedit; voluntarium enim est quod procedit ab intrinseco cum

cognitione finis. Sed solus Deus conjungitur animae intellectuali quantum ad sua interiora, qui solus est causa ipsius et sustinens eam in esse. A solo igitur Deo potest motus voluntarius causari.

Arg. 5<sup>um</sup>. — Nulla creatura potest directe immutare voluntatem quasi agendo intra ipsam voluntatem; potest autem intrinsecus aliquid proponendo voluntati eam aliquammodo inducere. Sed hoc est movere ex parte objecti; non interius, sed ab extra per repraesentationem seu apprehensionem boni mediante facultate cognoscitiva. Solus itaque Deus potest intrinsecus immutare voluntatem et inclinationem voluntatis, quam et dedit, transferre de uno in aliud, secundum quod vult.

Arg. 6<sup>um</sup>. — Quoniam per omnem motum, tam voluntatis quam intellectus, oportet devenire ad aliquod primum movens, quod a nullo movetur in ordine volitionum et intellectionum; et hoc omnes intelligunt Deum. Sub Deo igitur, qui est primus intellectus et volens, ordinantur omnes intellectus et voluntates sicut instrumenta sub principali agente. (I. q. 2. a. 3. et q. 105. a. 4. — I-II. q. 6. a. 1. et q. 9. a. 6. — III. C. Gent. cap. 88. et 147. — De Verit. q. 22. a. 8. et 9.)

## CONCLUSIO 2.

**Ad universale objectum voluntatis, quod est bonum in universali, voluntas non movet seipsam, sed a solo Deo movetur.**

OBSERVATIO. — Cum dicitur, quod « objectum voluntatis est finis et bonum in universali » (I-II. q. 1. a. 2. ad 3. et q. 9. a. 6. ad 3.), hoc vocabulum *bonum in universali* potest significare : 1<sup>o</sup> *bonum per essentiam*, in quo continetur eminenter tota latitudo boni, et a quo derivatur omne bonum in quantum huiusmodi; et hoc bonum infinitum est solus Deus; 2<sup>o</sup> *bonum in communi*, facta abstractione ab hac vel illa re, in qua ratio boni participata a bono per essentiam

adinvenitur; 3<sup>o</sup> *bonum* conveniens homini volenti secundum suam naturam, et sine quo non potest homo esse beatus. In conclusione supra posita non agitur de bono universali per essentiam, quoniam in via non videmus Deum sicuti est, et antequam per certitudinem divinae visionis non demonstretur necessaria connexio hujusmodi boni infiniti ad nostram beatitudinem, voluntas non ex necessitate Deo inhaeret. Sed agitur: 1<sup>o</sup> de bono in communi; quia voluntas, quae est potentia ad bonum appetendum, nihil appetit nisi sub ratione boni, nihilque operatur nisi intendens aliquod bonum; et 2<sup>o</sup> de omnibus illis bonis in particulari, quae naturaliter unusquisque vult et ad quae de necessitate naturali movetur: ut esse, vivere et hujusmodi alia, quae respiciunt consistentiam naturalem, et sine quibus homo non potest *esse beatus*, quia prius est *esse* quam *beatus esse*. (I. q. 82. a. 2.; I-II. q. 1. a. 6. et q. 10. a. 1.)

Arg. 1<sup>um</sup>. — Bonum in universali, quod est objectum voluntatis, est ultimus finis sumptus *formaliter*, non materialiter; in communi, non in particulari quantum ad ipsam rem, quae revera est finis et in qua sola stat de facto nostra beatitudo. Sed ultimus finis si accipiatur formaliter et in generali, id est, pro ratione finis ultimi, et non pro illa re, in qua finis ultimi ratio vera invenitur: est illud, propter quod homo vult omnia, quae vult; illud, propter quod amantur cetera, et illud autem propter seipsum; illud, in quo appetendo omnes homines conveniunt, et ratione cujus omnes appetunt implicite Deum, etiam cum a Deo recedunt per peccatum. Ergo cum talis motus voluntatis includatur in omni voluntario motu ac sit fundamentum ad appetendum bona particularia, creata et per participationem, naturaliter prodiit ex ipsa potentia voluntatis. Ergo voluntas ad objectum suum universale movetur a solo Deo et non movet seipsam.

Arg. 2<sup>um</sup>. — Natura et voluntas hoc modo ordinata sunt, ut ipsa voluntas quaedam natura sit; quia omne, quod in rebus invenitur, natura quaedam dicitur. Et ideo in voluntate oportet invenire non solum quod voluntatis, sed etiam quod



naturae est. Ergo voluntas *quoad aliquid* appetendum movetur a Deo absque eo quod seipsam moveat, et a solo Deo inclinatur absque eo quod seipsam inclinet. (*De Verit.* q. 22. a. 4. et 5.)

Arg. 3<sup>um</sup>. — Sic se habet principium motuum voluntariorum, quod est bonum in communi seu finis in appetibilibus, respectu potentiae voluntatis, sicut prima principia cognitionis respectu potentiae intellectus. Sed principia intellectualis cognitionis sunt naturaliter nota. Ergo finis ultimus et illa, sine quibus finis haberi non potest, sicut esse, vivere et hujusmodi, sunt naturaliter volita. (I. q. 83. a. 4. ; I-II. q. 10. a. 1. et 2.)

Arg. 4<sup>um</sup>. — In tantum voluntas movet seipsam ad volendum ea quae sunt in finem, in quantum vult ipsum finem. Unde in appetibilibus finis est fundamentum et principium eorum quae sunt ad finem. Non enim eligit voluntas, nisi quia aliquid simpliciter vult; quia, quae sunt propter finem, non appetuntur nisi ratione finis. Ergo finis ultimus, ut beatitudo et ea, quae in ipsa includuntur, ut est cognitio veritatis et alia hujusmodi, non cadit sub electione, sed omnia haec voluntas de necessitate vult quasi naturali inclinatione. (*De Verit.* q. 22. a. 5. ; I-II. q. 9. a. 3.)

Arg. 5<sup>um</sup>. — Sicut se habet intellectus ad rationem, ita se habet voluntas *ut natura* ad voluntatem *ut rationalem*. Si non darentur primae veritates per se notae, minime darentur conclusiones; absque intellectu primorum principiorum impossibilis redderetur discursus; si potentia cognoscitiva aliquid sine discursu non intelligeret, non valeret ratiocinari. Pariter, si voluntas non moveretur a Deo ut ipsa est *natura*, non moveretur a seipsa ut est *rationalis*; absque motu naturali in ultimum finem non perduceretur motus liberi arbitrii; si voluntas aliquid naturaliter non appeteret, non relinqueretur locus electioni. (I. q. 83. a. 4.)

## CONCLUSIO 3.

**Quotiescumque homo per rationem determinat se ad volendum hoc vel illud bonum, voluntas movetur etiam a Deo per modum causae efficientis.**

Arg. 1<sup>um</sup>. — Quia omnis motus tam voluntatis quam naturae a Deo procedit sicut a primo movente; et omnia, quae ex proposito atque deliberatione fiunt, oportet reducere in aliquam altiorem causam, quae non sit ratio et voluntas humana : 1<sup>o</sup> quoniam ratio et voluntas humana mutabilia sunt et defectibilia ; 2<sup>o</sup> quoniam aliter Deus non esset primum movens per viam causarum efficientium. (I. q. 2. a. 3. ad 2. ; I-II. q. 6. a. 1. ad 3.)

Arg. 2<sup>um</sup>. — Quotiescumque voluntas movet seipsam ad volendum ea quae sunt ad finem, voluntas elicit illos actus, qui sunt in comparatione ad ea quae sunt ad finem, sc. eligere, consentire et uti. Voluntas enim utitur ratione, movendo illam ad inquirendum et consiliandum ; et hoc modo usus praecedit electionem. Unde hoc modo voluntas movet intellectum. Utitur etiam voluntas semetipsa ad consentiendum vel eligendum media adinventata per inquisitionem et consilium rationis. Unde hoc modo voluntas movetur a seipsa quantum ad exercitium actus secundum rationem finis. (I-II. q. 16. a. 4. ; q. 9. a. 3. ad 3.) Sed voluntas : 1<sup>o</sup> etsi quantum ad aliquid sufficienter se movet et in suo ordine, sc. sicut agens proximum, non tamen potest seipsam movere quantum ad omnia ; unde indiget moveri ab alio sicut a primo movente ; 2<sup>o</sup> hoc ipsum, quod voluntas movet seipsam sufficienter et in suo ordine sicut agens proximum, habet voluntas et ex vi propria et ex eo, quod movetur a Deo in ordine causae primae, per cujus motionem completur virtus propria ipsius voluntatis. (I-II. q. 9. a. 4. ad 3. ; I. q. 105. a. 4. et *De Malo* q. 3. a. 2. ad 4.)

Arg. 3<sup>um</sup>. — Homo determinat se ad volendum hoc vel illud

per consilium rationis; nam quantum ad determinationem actus, quae est ex parte objecti, intellectus movet voluntatem, intellectus quidem non speculativus tantummodo, sed practicus. (I-II. q. 9. a. 1.) Sed Deus est universale principium omnis interioris motus humani, Deus causat bona interius movendo voluntatem, Deus illuminat omnem hominem venientem in hunc mundum et est seminator omnis boni consilii. « Prudentiam docet et justitiam. » (Sap. 8, 7) Deus denique est actor bonorum nostrorum operum, tam ex parte intellectus quam ex parte voluntatis, et sicut exterius persuadens et sicut interius movens, id est, movendo physice utramque potentiam intellectus et voluntatis.

Arg. 4<sup>um</sup>. — Quotiescumque homo determinat se per rationem ad volendum hoc vel illud, voluntas ipsius, quae ante determinationem ad unum per consilium rationis erat ad utrumlibet, transmutatur et reducitur de potentia in actum; etenim prius erat eligens in potentia et postea fit eligens in actu. Sed haec liberae voluntatis transmutatio est ab aliquo movente, « in quantum ipsa voluntas movet seipsam ad agendum, et in quantum etiam movetur ab aliquo exteriori agente, sc. Deo ». (*De Malo* q. 6. a. unico ad 17.) Ergo Deus non solum agit in liberam voluntatem per viam intellectus, agendo physice in ipsam potentiam intellectivam, et per inspirationem sanctae illuminationis agendo moraliter in voluntatem; sed etiam agit in ipsam potentiam liberi arbitrii, quando de novo incipit eligere, transmutando illam de potentia eligendi ad actum electionis.

Arg. 5<sup>um</sup>. — D. Thomas I-II. q. 109. a. 1. statuit hoc philosophicum ac simul theologicum principium: « Quantumcumque natura aliqua corporalis vel spiritualis ponatur perfecta, non potest in suum actum procedere nisi moveatur a Deo. » Ergo in omni actu liberi arbitrii creatura rationalis, quantumvis ponatur perfecta, indiget moveri a Deo ut a prima causa efficiendi, ut possit in actum liberum transire.

Arg. 6<sup>um</sup>. — Electio est actus proprius ac specificus voluntatis ut *voluntatis*, ut *appetitus rationalis*, ut *libera*. Sed

« solus Deus nostrarum voluntatum et electionum causa est », et « Deus solus directe ad electionem hominis operatur », et « ex divina operatione inclinante inclinatur ejus voluntas ad aliquid eligendum sibi utile », et « semper hoc homo eligit, quod Deus operatur in ejus voluntate », ut D. Thomas docet et solide ostendit *III. C. Gent.* cap. 91. et 92.

Arg. 7<sup>um</sup>. — Cum homo per rationem determinat se ad volendum hoc vel illud, libere agit, libere operatur et est dominus sui actus; et antequam agat et dum agit, actus revera est in potestate sui liberi arbitrii. Sed D. Thomas *III. C. Gent.* cap. 89. tradit, quod Deus causat efficienter in nobis omnem actum voluntatis : 1<sup>o</sup> « in quantum dat nobis virtutem volendi »; 2<sup>o</sup> « in quantum facit nos velle hoc vel illud ». Atque hoc probat sex argumentis; et expresse praeterea declarat, quod asserere contrarium est « resistere evidenter auctoritatibus Sacrae Scripturae », in qua dicitur : « Domine,... omnia enim opera nostra operatus es in nobis. » (Is. 26, 12) « Cor regis in manu Domini; quocumque voluerit, inclinabit illud. » (Prov. 21, 1) « Deus est enim, qui operatur in vobis et velle et perficere. » (Philipp. 2, 13.)

Arg. 8<sup>um</sup>. — Ex supradictis characteres essentialis physicae praemotionis stant in hoc, quod hujusmodi motio est : 1<sup>o</sup> Dei motio immediata immediatione suppositi in potentiam liberi arbitrii; 2<sup>o</sup> Dei motio immediata immediatione virtutis in ipsum actum liberi arbitrii; 3<sup>o</sup> Dei motio determinans potentiam liberi arbitrii ad unum; 4<sup>o</sup> Dei motio faciens nos velle hoc vel illud; 5<sup>o</sup> Dei motio, ad quam infallibiliter semper consequitur effectus. Dicendum est ergo, quod libera hominis voluntas praemovetur physice a Deo ad actus ipsos liberos, et quod in omni actu libero homo indiget physice moveri a Deo ut a prima causa efficiente, ut ipse homo per rationem et voluntatem suam determinet se ad volendum hoc vel illud.

Arg. 9<sup>um</sup>. — Si, dum voluntas creata movet seipsam ad electionem, consensum et usum, qui sunt actus liberi arbitrii, non moveretur prius prioritatem naturae et causalitatis in ordine [causae primae ab ipsa Dei voluntate, sequeretur :



1<sup>o</sup> quod voluntas creata esset primum principium agendū quoad actus suos liberos; 2<sup>o</sup> quod hujusmodi actus nec essent actus nec liberi.

Ratio primae consequentiae : Quia praedicti motus voluntatis non reducuntur ad Deum sicut ad primum movens in via causae efficientis, nec Deus influeret immediate immediate virtutis in hos liberi arbitrii actus. Unde D. Thomas *II. Sent. dist. 37. q. 2. a. 2.* : « Non posset vitari, quin voluntas esset primum agens. »

Ratio secundae consequentiae : Quia non causantur efficienter a voluntate Dei, « quae est actus purus et semper est in actu volendi »; nec causantur efficienter a voluntate Dei, quae est primum liberum. Quod enim non efficitur ab actu per essentiam, nequit esse actus per participationem; et quod non procedit immediate immediate virtutis a voluntate per essentiam, nequit esse voluntarium aut liberum per participationem. (*I-II. q. 10. a. 1. ad 2.; I. q. 44. a. 1.*)

Arg. 10<sup>um</sup>. — Si Deus non determinaret hominem, dum homo determinat se ad volendum hoc vel illud; si Deus physice non moveret et intellectum hominis et ipsius voluntatem, et si non ageret ut causa prima efficiens in utramque potentiam : 1<sup>o</sup> nec intellectus intelligeret aut judicaret aut aliquid determinaret inquirendo, nec voluntas vellet aut aliquid eligeret; 2<sup>o</sup> nec Deus cogitationes mentium et voluntates cordium cognosceret. Deus enim cognoscit motus voluntatis creatae, quoniam scit et vult causare ipsum voluntatis motum, tam necessarium quam liberum, tam naturalem quam voluntarium. Quod ex professo declarat D. Thomas *I. C. Gent. cap. 68.* : « Cognoscendo, inquit, suum intelligere et velle cognoscit omnem cogitationem et voluntatem. » Et *I. q. 57. a. 2.* : « Secundum quod causat, sic et cognoscit; quia scientia ejus est causa rei, ut ostensum est *q. 14. a. 8.* »

Arg. 11<sup>um</sup>. — Qui actus liberos voluntatis creatae subtrahunt a physica Dei praemotione, subtrahunt eos et a divina causalitate et a divina praescientia, et consequenter a divina providentia. Et velint nolint, annumerandi erunt

inter illos, qui unum eligunt e duobus, aut esse aliquid in nostra voluntate, aut esse praescientiam futurorum, quoniam utrumque arbitrantur esse non posse; sed si elegerimus praescientiam futurorum, tolli libertatis arbitrium; si elegerimus voluntatis arbitrium, tolli praescientiam futurorum. Unde de Cicerone ita philosophante scribit Augustinus *V. De Civit. Dei* cap. 9.: « Ipse itaque, ut vir magnus et doctus et vitae humanae plurimum ac peritissime consulens, ex his duobus elegit liberum voluntatis arbitrium; quod ut confirmaretur, negavit praescientiam futurorum; atque ita dum vult facere liberos, facit sacrilegos. Religiosus autem animus utrumque eligit, utrumque confitetur, et fide pietatis utrumque confirmat. »

Sunt tamen aliqui, qui habentes animum religiosum in has easdem angustias coarctatum, utrumque elegerunt, sc. liberum voluntatis arbitrium et praescientiam divinam futurorum, attamen negant divinam causalitatem quoad actus liberi arbitrii; exinde praescientia futurorum, quam ponunt in Deo, est quaedam praescientia sui generis, praescientia media, de qua infra loquemur, si Deus voluerit. Ad praesens sufficiat insinuare, quod D. Thomas pro eadem re accepit negationem praescientiae divinae futurorum et negationem divinae causalitatis. Quamobrem per nullam aliam viam Angelicus Doctor existimat esse possibile perfecte et in ultima resolutione demonstrare praescientiam futurorum in Deo nisi per viam divinae causalitatis, ut infra quoque patebit. Et cum hanc quaestionem tangit I. q. 116. a. 1. ait de Tullio, de quo Augustinus dixerat, quod negaverat praescientiam futurorum, quod noluit reducere haec futura in divinam causalitatem. « Fuerunt igitur aliqui, qui hujusmodi casualia et fortuita, quae in his inferioribus accidunt, in nullam superiorem causam reducere voluerunt; et hi fatum et providentiam negaverunt, ut de Tullio Augustinus recitat *De Civit. Dei* lib. 5. cap. 9.; quod est contra ea, quae superius de providentia dicta sunt q. 22. a. 2. »

Unde negare praemotionem physicam ad liberos actus efficiendos, est negare divinam causalitatem; negare autem

divinam causalitatem in efficientia physica actuum liberorum, est negare divinam praescientiam futurorum; et negare divinam actuum liberorum praescientiam, est negare divinam providentiam et divinam praedestinationem, quae quoad objecta est pars specialis providentiae.

Maneat igitur firmum, quod voluntas creata sive quoad actus necessarios sive quoad actus liberos non jungitur effectui suo nisi mendicando talem conjunctionem a virtute Dei, quae vehementius ingreditur in actus liberos quam virtus propria ipsius liberae voluntatis. Liberum enim arbitrium in agendo pendet a Deo, a quo habet complementum suae virtutis operativae; nam ut Cajetanus recte capiens doctrinam D. Thomae et illam declarans ait I. q. 14. a. 13. : « Secundum independentiam et immediationem virtutis » causa prima « independentius et immediatius immediatione virtutis attingit effectum quam secunda. In eodem tamen instanti naturae effectus ab utraque attingitur. » Quoniam totus motus proficiscitur a Deo tamquam a tota causa motus; et quidquid est entis, actus, boni in actu libero, efficitur a Deo mediante potentia ipsius voluntatis, quae mota movet, effecta efficit, causata causat; et per divinam motionem completur virtus propria libere operandi.

### III

#### CONCLUSIO 4.

**Cum Deus convertit hominem ad seipsum sicut ad specialem finem, propter quem, homo velit omnia quaecumque vult, voluntas hominis movetur a solo Deo in huiusmodi prima conversione.**

Arg. 1<sup>um</sup>. — Sic se habet Deus ut auctor gratiae, dum primo hominem aversum a Deo per peccatum convertit ad seipsum sicut ad finem specialem, quem homo conversus

intendat et cui cupiat adhaerere sicut bono proprio : sicut se habet Deus ut auctor naturae, quando movet voluntatem hominis ad universale objectum voluntatis, quod est bonum in communi. Sed in hac universali motione, sine qua homo non potest aliquid velle, voluntas est mota et non movens, solus autem Deus movens. Ergo simili modo, servata proportionem, in illa prima conversione ad Deum, sine qua homo non potest aliquid velle in ordine ad vitam aeternam, solus Deus est movens, et voluntas dumtaxat mota.

Arg. 2<sup>um</sup>. — Sic se habet voluntas *ut voluntas* in suo primo motu ad Deum sicut ad illud, in quo ratio ultimi finis invenitur et vera beatitudo, sicut se habet voluntas *ut natura* ad rationem ultimi finis formaliter sumpti sive ad beatitudinem in communi. Sed in motu voluntatis ad bonum in communi, ad finem formaliter sumptum, utpote naturali, voluntas non movet seipsam, sed tantummodo movetur a solo Deo, qui est motor universalis. Ergo pariter in primo motu voluntatis ad bonum per essentiam, tamquam ad bonum particulare ac sibi proprium, voluntas non movet seipsam, sed solum movetur a Deo, qui est motor specialissimus omnium hominum ad ipsum se convertentium.

Arg. 3<sup>um</sup>. — D. Thomas I-II. q. 9. a. 6. ad 3. : « Dicendum, quod Deus movet voluntatem hominis sicut universalis motor ad universale objectum voluntatis, quod est bonum, et sine hac universali motione homo non potest aliquid velle; sed homo per rationem determinat se ad volendum hoc vel illud, quod est vere bonum vel apparens bonum. Sed tamen interdum specialiter Deus movet aliquos ad aliquid determinate volendum, quod est bonum, sicut in his, quos movet per gratiam, ut infra (I-II. q. 109. a. 6.; q. 111. a. 2.; q. 112. a. 3.; q. 113. a. 8.) dicetur. »

Ergo juxta hanc profundissimam doctrinam Angelici Doctoris, motio Dei ad universale objectum voluntatis, et motio Dei specialis per gratiam ad aliquid determinatum bonum, conveniunt :

1<sup>o</sup> In hoc, quod homo non determinat se per rationem ad



volendum nec bonum universale in primo motu nec bonum particulare in secundo.

2<sup>o</sup> In hoc, quod terminus utriusque motus non solum ex parte Dei moventis, sed etiam ex parte voluntatis motae, est semper bonum; in primo motu bonum in communi, in secundo bonum in speciali.

3<sup>o</sup> In hoc, quod a solo Deo voluntas hominis movetur; quapropter voluntas sic mota numquam movetur ad malum.

4<sup>o</sup> In hoc, quod prima motio est veluti introitus ad omnes motus tam necessarios quam liberos voluntatis humanae in ordine naturali et in exsecutione generalis providentiae; et altera motio est quasi introitus ad omnes motus liberos, bonos et vitae aeternae meritorios, et quasi porta ad ordinem supernaturalem, et veluti primus passus in exsecutione divinae praedestinationis : « cujus ordinis exsecutio est passive quidem in praedestinatiis, active autem est in Deo. » (I. q. 23. a. 2.).

5<sup>o</sup> In hoc, quod motus voluntatis sub prima motione est motus naturalis et necessarius quoad specificationem seu determinationem actus; unde homo non determinat se per rationem ad huiusmodi velle. Et motus voluntatis sub altera motione, quamvis liberrimus, est etiam ad instar motus naturalis per modum simplicis volitionis; et homo non valet per rationem se primo determinare ad huiusmodi velle, quod excedit omnem naturalem facultatem, tam rationis quam voluntatis.

6<sup>o</sup> Unde in primo motu voluntatis non habet locum electio, quia talis motus est fundamentum omnium electionum liberi arbitrii in ordine naturae, et prius est velle quam eligere, sicut prior est amor finis quam amor mediorum. In secundo autem motu voluntatis nec habet locum electio per solum liberum arbitrium, quia superat omnes naturales liberi arbitrii vires; et huiusmodi motus liberae quidem voluntatis constituit fundamentum omnium sanctarum electionum in ordine gratiae. Quamobrem D. Thomas, II-II. q. 24. a. 1. ad 3. evolvit hanc sublimem doctrinam lucis suae radiis, edocens : « Dicendum, quod liberum arbitrium non est alia potentia a

voluntate, ut dictum est. (I. q. 83. a. 4.) Et tamen caritas non est in voluntate secundum rationem liberi arbitrii, cujus actus est eligere. Electio enim est eorum, quae sunt ad finem. Voluntas autem est ipsius finis, ut dicitur *Ethic. lib. 3.* Unde caritas, cujus objectum est finis ultimus, magis debet dici esse in voluntate quam in libero arbitrio. »

Arg. 4<sup>um</sup>. — Sub hac, de qua loquimur, divina motione transmutatur homo de statu injustitiae ad statum justitiae. Et quamvis in eo, qui habet usum liberi arbitrii, non fit motio a Deo ad justitiam absque motu liberi arbitrii, tamen liberum arbitrium in hujusmodi interiori transmutatione non movet se, sed movetur a solo Deo; non transmutat se, sed a solo Deo transmutatur et reducitur de uno extremo in alterum. Unde Deus ita infundit donum gratiae justificantis, quod etiam simul cum hoc movet liberum arbitrium ad donum gratiae acceptandum in his, qui sunt hujus motionis capaces. (I-II. q. 113. a. 1. et a. 3.)

Arg. 5<sup>um</sup>. — Quia hujus divinae motionis, de qua est sermo, effectus in anima est ille effectus, in quo mens nostra est mota et non movens, solus autem Deus movens: ut ex professo declaratur per subsequentem conclusionem.

### CONCLUSIO 5.

**Quotiescumque Deus movet potentiam liberi arbitrii per gratiam operantem, voluntas movetur equidem libere, sed movetur a solo Deo, absque eo quod moveat seipsam.**

Arg. 1<sup>um</sup>. — D. Thomas I-II. q. 111. a. 2. : « Respondeo dicendum, quod, sicut supra dictum est q. 110. a. 2., gratia dupliciter potest intelligi: uno modo, divinum auxilium, quo nos movet ad bene volendum et agendum; alio modo, habituale donum nobis divinitus inditum. Utroque autem modo gratia dicta convenienter dividitur per operantem et cooperantem.

Operatio enim alicujus effectus non attribuitur mobili, sed moventi. In illo ergo effectū, in quo mens nostra est mota et non movens, solus autem Deus movens, operatio Deo attribuitur; et secundum hoc dicitur gratia *operans*. In illo autem effectū, in quo mens nostra et movet et movetur, operatio non solum attribuitur Deo, sed etiam animae; et secundum hoc dicitur gratia *cooperans*. Est autem in nobis duplex actus : primus quidem interior voluntatis; et quantum ad istum actum voluntas se habet ut mota, Deus autem ut movens, et praesertim, cum voluntas incipit bonum velle, quae prius malum volebat; et ideo secundum quod Deus movet humanam mentem ad hunc actum, dicitur gratia *operans*. Alius autem actus est exterior, qui cum a voluntate imperetur, ut supra habitum est q. 17. a. 9., consequens est, quod quantum ad hunc actum operatio attribuatur voluntati. Et quia etiam ad hunc actum Deus nos adjuvat et interius confirmando voluntatem, ut ad actum perveniat, et exterius facultatem operandi praebendo : respectu hujusmodi actus dicitur gratia *cooperans*. Unde post praemissa verba subdit Augustinus : *Ut autem velimus, operatur; cum autem volumus, ut perficiamus, nobis cooperatur*. Sic igitur, si gratia accipiatur pro gratuita Dei motione, qua movet nos ad bonum meritorium, convenienter dividitur gratia per operantem et cooperantem. »

Praedictus D. Thomae articulus ex una parte constituit commentarium breve ac fidelissimum totius doctrinae S. Augustini circa gratiam Dei et circa praedestinationem sanctorum; et ex alia lapidem angularem pro integra theoria physicae praemotionis tam in ordine naturae quam in ordine supernaturali. Jam supra <sup>1</sup> fusius explanatus est iste famosus articulus, in quo continetur radix prima omnium differentiarum, quibus ad invicem opponuntur ac separantur documenta S. Augustini et D. Thomae, et documenta Molinae ac Suarezii circa divinum influxum in causas secundas et praesertim in causas liberas. Ex isto articulo infertur :

<sup>1</sup> Vide *Part. Prim.* q. 3. a. 2. et q. 1. a. 6.

1<sup>o</sup> Effectum divinae motionis esse : a) *actum interiorem* voluntatis; b) *actum exteriorem* a voluntate imperatum. Et quoniam actus interior voluntatis distinguitur in tres motus voluntatis in finem et tres motus voluntatis in ea quae sunt ad finem, inde habetur esse effectum divinae motionis totum processum interioris voluntariae operationis, nempe *velle, intendere, frui; eligere, consentire, uti*.

2<sup>o</sup> Potentiam liberi arbitrii, quae est facultas voluntatis et rationis, posse esse motam a Deo et simul seipsam moventem in toto processu actus interioris, sc. dum vult, dum intendit, dum fruitor, dum eligit, dum consentit, et dum per usum transit ex ordine intentionis ad ordinem executionis; et hoc contingit in omnibus actibus voluntariis in ordine naturae, in quo homo per rationem determinat se ad volendum hoc vel illud, quod est bonum vel apparens bonum.

3<sup>o</sup> Potentiam liberi arbitrii, quae est facultas voluntatis et rationis, posse esse solummodo motam a Deo, absque eo quod seipsam moveat, in toto processu interioris actus, volendo, intendendo, fruendo, eligendo seu consentiendo; et hoc contingit, quotiescumque Deus movet potentiam liberi arbitrii per gratuitam motionem, quae vocatur gratia operans.

4<sup>o</sup> Potentiam liberi arbitrii, quae est facultas voluntatis et rationis, se habere ut motam et non moventem quantum ad actum interiorem, « praesertim cum voluntas incipit bonum velle, quae prius malum volebat ». Nam tum est, cum libera voluntas ex aversa a Deo fit ad Deum conversa tamquam ad incommutabile bonum, tamquam ad verum finem ultimum tam formaliter quam materialiter acceptum. Tunc ergo est, cum voluntas creata transmutatur a solo Deo; et sic sub Deo infundente gratiam ac caritatem tendit in Deum per motum fidei et dilectionis velut in bonum propter se et in finem specialissimum, propter quem omnia vult, intendit, eligit et omnibus utitur. Et hoc est, quod asseritur in conclusione quarta.

Arg. 2<sup>um</sup>. — Cajetanus, qui I. q. 19. a. 8. uno verbo expressit quidditatem physicae praemotionis dicens : « Movere causae



secundae provenire ex moveri a causa prima et modo proprio ipsius causae secundae, » sic etiam breviter et terminanter declaravit I-II. q. 111. a. 2. quidditatem gratiae operantis ex suo effectu in libera voluntate : « Voluntas, inquit, mota a Deo ad hujusmodi novum velle, non movet seipsam ad hoc, sed est tantum mota a Deo ; est tamen tale velle ipsius elicitive, sicut descendere est motus (τοῦ) gravis. Et est liberum, quia potest dissentire a tali velle ; Deus enim movet suaviter liberum arbitrium secundum conditionem ejus... Gratia operans non solum invenitur in infusione gratiae et justificatione impii, sed post acceptam gratiam pluries, quamvis manifestius in justificatione impii. »

### CONCLUSIO 6.

**Quotiescumque post justificationem homo movetur a Deo, ut auctor est gratiae, ad operandum, utendo habitibus infusis gratiae sanctificantis et caritatis ceterarumque virtutum, de lege ordinaria voluntas sub Dei gratuita motione movet etiam seipsam.**

Arg. 1<sup>um</sup>. — Quia de lege ordinaria etiam intra ordinem supernaturalem homo per rationem suam lumine fidei, quae per caritatem operatur, illuminatam determinat se ad volendum hoc vel illud verum bonum et ad agendum hoc vel illud bonum opus propter Deum summum bonum super omnia dilectum.

Arg. 2<sup>um</sup>. — Quia, praesupposito jam fine per gratiam operantem, consequens est, ut gratia nobis cooperetur. Effectus autem gratiae cooperantis in nobis est ille effectus, « in quo mens nostra et movet et movetur, et operatio non solum attribuitur Deo, sed etiam animae ». (I-II. q. 111. a. 2.)

Arg. 3<sup>um</sup>. — Cum homo motus a Deo, ut auctor gratiae est, virtute hujus gratuita motionis utitur gratia justificanti et habitibus simul cum gratia infusis, operatur opera meritoria vitae aeternae. Meritum autem est effectus gratiae *coope-*

*rantis*, sicut justificatio est effectus gratiae *operantis*, etsi ad gratiam operantem etiam spectet motus liberi arbitrii meritorios gloriae causare. Ergo de lege ordinaria in omni opere meritorio, de cujus ratione est esse opus liberum, voluntas et a Deo movetur et seipsam movet.

## IV

## CONCLUSIO 7.

**Quotiescumque homo, habens gratiam sanctificantem ac caritatem, movetur a Deo secundum habitus infusos, qui vocantur dona Spiritus Sancti, libera hominis voluntas non movet seipsam, sed est tantum mota.**

Arg. 1<sup>um</sup>. — Rom. 8, 14 : « Quicumque enim Spiritu Dei aguntur, ii sunt filii Dei. » Supra quae verba D. Thomas lect. 3. : « Illa enim agi dicuntur, quae quodam superiori instinctu moventur; unde de brutis dicimus, quod non agunt, sed aguntur, quia a natura moventur et non ex proprio motu ad suas actiones agendas. Similiter autem homo spiritualis non quasi ex motu propriae voluntatis principaliter, sed ex instinctu Spiritus Sancti inclinatur ad aliquid agendum, secundum illud Is. 59, 19 : « *Cum venerit quasi fluvius violentus, quem Spiritus Domini cogit*, et Luc. 4, 1 : *Jesus... agebatur a Spiritu in desertum*. Non tamen per hoc excluditur, quin viri spirituales per voluntatem et liberum arbitrium operentur; quia ipsum motum voluntatis et liberi arbitrii Spiritus Sanctus in eis causat, secundum illud Philipp. 2, 13 : *Deus est enim, qui operatur in vobis et velle et perficere*. »

Unde homo, at non quicumque homo, sed homo spiritualis : 1<sup>o</sup> inclinatur ad aliquid agendum ex instinctu superiori Spiritus Sancti ; 2<sup>o</sup> inclinatur motu propriae suae voluntatis, sed non quasi ex motu propriae voluntatis principaliter ; quo-

niam voluntas est mota sed non movens, solus autem Deus movens ; 3<sup>o</sup> inclinatur motu quidem libero, quem Spiritus Sanctus causat in voluntatis potentia ; 4<sup>o</sup> et sic inclinatus atque motus per liberam voluntatem operatur.

Commentarium D. Thomae supra haec verba Apostoli est etiam genuina atque authentica declaratio doctrinae ipsius Angelici Doctoris circa naturam gratiae operantis. Qui desideret penetrare articulum secundum I-II. q. 111., attente perspiciat lectionem tertiam super cap. 8. Epistolae ad Romanos.

Arg. 2<sup>um</sup>. — D. Thomas, Matth. cap. 4. declarans illa verba : « Tunc Jesus ductus est in desertum a Spiritu », ait : « Homines enim tunc ducuntur a Spiritu Sancto, quando caritate moventur sic, quod non motu proprio moventur, sed alieno ; quia sequuntur impetum caritatis. II Cor. 5, 14 : *Caritas Dei urget nos*. Et sic filii Dei aguntur a Spiritu Sancto, ut tempus hujus vitae, quae plena est tentationibus,... transeant cum victoria per Christi virtutem. Ipse enim tentari voluit, ut sicut morte sua vicit nostram, sic tentatione sua superet omnes tentationes nostras. »

Arg. 3<sup>um</sup>. — D. Thomas I-II. q. 68. a. 1. ostendens dona Spiritus Sancti differre secundum rem a virtutibus etiam infusis, docet : « Est enim considerandum, quod in homine est duplex principium movens : unum quidem interius, quod est ratio ; aliud autem exterius, quod est Deus, ut supra dictum est q. 9. a. 4. et 6. ; et etiam Philosophus dicit hoc in cap. *De bona fortuna*. Manifestum est autem, quod omne, quod movetur, necesse est proportionatum esse motori ; et haec est perfectio mobilis in quantum est mobile, dispositio qua disponitur ad hoc, quod bene moveatur a suo motore. Quanto igitur movens est altior, tanto necesse est quod mobile perfectiori dispositione ei proportionetur ; sicut videmus, quod perfectius oportet esse discipulum dispositum ad hoc, quod altiorem doctrinam capiat a doctore. Manifestum est autem, quod virtutes humanae perficiunt hominem, secundum quod homo natus est moveri per rationem in his, quae

interius vel exterius agit. Oportet igitur inesse homini altiores perfectiones, secundum quas sit dispositus ad hoc, quod divinitus moveatur; et istae perfectiones vocantur dona, non solum quia infunduntur a Deo, sed quia secundum ea homo disponitur, ut efficiatur prompte mobilis ab inspiratione divina, sicut dicitur Is. 50, 5: *Dominus aperuit mihi aurem; ego autem non contradico, retrorsum non abii*. Et Philosophus etiam dicit..., quod his, qui moventur per instinctum divinum, non expedit consiliari secundum rationem humanam, sed quod sequantur interiorem instinctum, quia moventur a meliori principio quam sit ratio humana. Et hoc est, quod quidam dicunt, quod dona perficiunt hominem ad altiores actus quam sint actus virtutum. » Hucusque Angelicus Doctor.

Quamvis alta, licet profunda, omnia tamen fiunt plana quaerentibus veritatem in scriptis D. Thomae. 1<sup>o</sup> Ex dictis supra I-II. q. 9. a. 1., in homine primum principium movens *quoad specificationem* actuum humanorum est *ratio*; unde quantum ad determinationem actus, quae est ex parte objecti, intellectus movet voluntatem. Primum vero principium movens quantum *ad exercitium actus* in omnibus actibus humanis est *voluntas*.

2<sup>o</sup> Deus est primum principium movens hominem ad agendum per utramque viam, per viam nempe intellectus et per viam voluntatis; ac consequenter est primum principium movens actuum humanorum et quoad *specificationem* actus et quoad ipsius actus *exercitium*; aliter tamen et aliter. Unde D. Thomas XII. *Metaph.* lect. 5.: « Primum movens idem est quod primum intelligibile et primum appetibile, quod est optimum. »

3<sup>o</sup> Haec praeterea notanda iterum differentia, quod per viam intellectus plus vel minus directe vel indirecte multa possunt movere voluntatem ex parte objecti, ut late exponit D. Thomas in hac q. 9. et alibi pluries in I. Parte. Per viam tamen voluntatis, ex parte potentiae, ab intrinseco, quantum ad exercitium actus, nihil potest movere voluntatem nisi solus Deus et ipsa voluntas.



4<sup>o</sup> Motio, qua Deus movet physice potentiam liberae voluntatis, servat semper proportionem cum motione, qua Deus movet ipsam voluntatem per viam intellectus. Unde Deus physice movet voluntatem : 1<sup>o</sup> antequam homo determinet se per rationem ad volendum hoc vel illud ; et haec est motio physica ad bonum in communi ; 2<sup>o</sup> cum homo determinat se per rationem ad volendum hoc vel illud ; et haec est motio physica ad bonum particulare ; 3<sup>o</sup> cum homo determinatur per rationem divinam supra modum suae propriae rationis ; et ista est motio physica superioris generis respondens determinationi humanae rationis factae ex instinctu Spiritus Sancti.

5<sup>o</sup> Ad hoc autem, quod physica motio, qua Deus movet ut auctor naturae est, habeat tamquam mobile bene dispositum ipsam potentiam voluntatis, requiruntur virtutes morales acquisitae, quarum prima est prudentia, quae sedet in ratione practica. Ad hoc, quod physica motio, qua Deus movet ut auctor gratiae est, habeat tamquam mobile bene dispositum ipsam potentiam voluntatis, requiruntur virtutes morales infusae, quibus homo moveatur ad operandum conformiter ad esse gratiae sanctificantis ; at in isto ordine virtus suprema non est prudentia infusa, sed caritas, qua mens tendit per amorem in Deum sicut in finem cognitum lumine fidei. Ad hoc tandem, quod physica motio, qua Deus movet ut auctor gratiae quidem est, at *aliquos, interdum, specialiter*, habeat tamquam mobile bene dispositum ipsam potentiam voluntatis, requiruntur altiores perfectiones, virtutes superioris generis quam ipsae virtutes morales infusae ; et hujusmodi virtutes seu habitus infusi, quibus homo perficitur ad prompte obediendum Spiritui Sancto, vocantur *dona*.

6<sup>o</sup> Cum ergo Deus movet physice hominem determinantem se per rationem, sed absque virtutibus moralibus infusis, voluntas est mota et movens. Cum autem movet Deus physice hominem determinantem se per rationem lumine fidei adjutam et cum virtutibus moralibus infusis, voluntas etiam est mota et simul movens. Cum denique Deus movet physice hominem spirituales, non quidem determinantem se per

rationem, sed per rationem ipsius hominis determinatam immediate ex consilio divinae sapientiae, voluntas est quidem libera, at non est seipsam movens, sed tantum mota. Quoniam homo, utpote filius Dei, agitur a Deo; et homo movetur a meliori principio quam sit ratio humana.

7<sup>o</sup> Unde quanto altior est motio actuum humanorum quantum ad *specificationem*, tanto perfectior est motio physica voluntatis quantum ad *exercitium* ipsorum actuum.

Arg. 4<sup>um</sup>. — Ex his, quae D. Thomas I. q. 82. a. 4. et I-II. q. 9. a. 1. docet, voluntas movet intellectum per modum agentis quantum ad exercitium actus, et intellectus movet voluntatem per modum finis quantum ad specificationem actus. Voluntas enim per hoc, quod vult finem, movet intellectum, ut inquirat ea quae sunt ad finem, ut comparet illa ad invicem per ordinem ad finem consequendum, et ut determinet unum inter plura praeeligendum; ac intellectus, postquam inquisivit, adinvenit atque inter media adinventum iudicavit, movet voluntatem per ultimum iudicium practicum ad eligendum hoc vel illud. Sed dum homo agitur a Deo et movetur per dona Spiritus Sancti, voluntas non movet intellectum, ut inquirat, ut comparet, ut sententiam proferat de bonitate rerum eligendarum; quoniam in huiusmodi actibus liberi arbitrii intellectus, reduplicative ut iudicans, praevolat voluntatem et praevenit ipsam motionem, qua voluntas instigat intellectum ad consiliandum. Unde intellectus humanus iudicat et proponit id, quod agendum est, sub ratione boni ex dono sapientiae et consilii. Unde in tali motu liberae voluntatis actus praerequisitus ex parte rationis est per modum *simplicis intelligentiae*; et actus voluntatis, in quo formaliter completur actio libera, est per modum *simplicis volitionis*.

Arg. 5<sup>um</sup>. — Ex ipsa perfectione quantum ad modum operandi. Actus humani, quos homo exercet dum movetur a Deo per dona Spiritus Sancti, sunt actus seu operationes, quae denominantur *beatitudines*. Huiusmodi autem actus sunt ejusdem generis quam actus virtutum, sed differunt in

gradu perfectionis praecise ob hoc, quod exercentur excellentiori modo *supra* mensuram humanae rationis, non quidem *contra* eam. Unde D. Thomas I-II. q. 68. a. 2. ad 1. : « Dona excedunt communem perfectionem virtutum, non quantum ad genus operum, eo modo, quo consilia praecedunt praecepta ; sed quantum ad modum operandi, secundum quod movetur homo ab altiori principio. » Et *De Carit.* a. 2. ad 17. : « Dona perficiunt virtutes elevando eas supra modum humanum, sicut donum intellectus virtutem fidei, et donum timoris virtutem temperantiae in recedendo a delectabilibus ultra humanum modum. » Sed dum homo operatur opera virtutum ultra humanum modum, operatur ultra determinationem propriam suae rationis, et movetur quantum ad specificationem suorum actuum ab altiori principio quam sit humana ratio, et ab abundantiori lumine quam sit lumen naturale, et per quod perficitur ipsum etiam lumen supernaturale fidei. Unde D. Thomas I-II. q. 68. a. 2. : « In ordine ad finem ultimum supernaturalem, ad quem ratio movet, secundum quod est aliquammodo et imperfecte informata per virtutes theologicas, non sufficit ipsa motio rationis, nisi desuper adsit instinctus et motio Spiritus Sancti, secundum illud Rom. 8, 14 : *Qui Spiritu Dei aguntur, hi filii Dei sunt... et haeredes* ; et Ps. 142, 10 dicitur : *Spiritus tuus bonus deducet me in terram rectam*, quia sc. in haereditatem illius terrae beatorum nullus potest pervenire, nisi moveatur et deducatur a Spiritu Sancto. Et ideo ad illum finem consequendum necessarium est homini habere donum Spiritus Sancti. »



## CAPUT SEPTIMUM

### De distinctione divinarum motionum.

« Deus non est causa nisi bonorum, secundum illud Genes. 1, 31 : *Vidit Deus cuncta quae fecerat, et erant valde bona.* Si ergo a solo Deo voluntas hominis moveretur, numquam moveretur ad malum; cum tamen voluntas sit, qua peccatur et recte vivitur, ut Augustinus dicit *II. Retract. cap. 9* »

« Dicendum, quod Deus movet voluntatem hominis sicut universalis motor ad universale objectum voluntatis, quod est bonum; et sine hac universali motione homo non potest aliquid velle; sed homo per rationem determinat se ad volendum hoc vel illud, quod est vere bonum vel apparens bonum. Sed tamen *interdum, specialiter* Deus movet *aliquos* ad aliquid determinate volendum, quod est bonum, sicut in his, quos movet per gratiam, ut infra dicetur. »

(S. Thomas I-II. q. 9. a. 6. ad 3.)

## I

### PRAENOTANDA

**PRIMO : Primus ac supremus gradus physicae praemotionis.**

— D. Thomas in hac famosa responsione ad 3. indicat primum et supremum gradum physicae motionis, qua Deus movet hominem ad operandum, quasi applicando intellectum et voluntatem ejus ad operationem; sicut etiam artifex applicat securim ad scindendum, qui tamen interdum formam securi non tribuit. Deus enim non solum dat facultatem voluntatis et rationis hominibus, sed etiam conservat eam in esse, et applicat eam ad agendum, et est finis omnium actionum. Et cum *finis* et *agens* et *forma* se habeant ut actionis principium, Deus secundum haec tria in quolibet operante operatur. Unde I Cor. 12, 6 : « Operatur omnia in omnibus. »



Et Philipp. 2, 13 : « Operatur in vobis et velle et perficere. » Et Hebr. 13, 21 : « Aptet vos in omni bono, ut faciat ejus voluntatem, faciens in vobis quod placeat coram se. » Et quod est valde notandum, quanto Deus magis aliquos amat, magis et intensius in illis operatur; et quanto magis in suis dilectis operatur, tanto plus qui illum diligunt, illi subjiciuntur, et per hanc subjectionem magis sub ejus providentia cadunt. Unde praedestinatio nihil aliud est nisi specialissima providentia electorum, propter quos omnia facta sunt. Sic D. Thomas III. C. Gent. cap. 90. : « Quanto ergo Deus aliqua magis amat, tanto magis sub ejus providentia cadunt. Hoc autem et Sacra Scriptura docet dicens : *Custodit Dominus omnes diligentes se* (Ps. 144, 20); et etiam Philosophus X. *Ethic.* tradit dicens, quod Deus maxime curat de his, qui diligunt intellectum, tamquam de suis amicis. »

**SECUNDO : Deus etenim operatur in quolibet operante, sive operatione naturae sive operatione voluntatis, secundum tria praedicta : sc. finem et agentem et formam.** — *Finis* namque est terminus illius viae, quae sumitur ex gubernatione rerum, et constituit quintam viam ad demonstrandam existentiam Dei. *Forma* autem est illa via quarta ad demonstrandam existentiam Dei, via, inquam, quae sumitur ex gradibus, qui in rebus inveniuntur, et per quam devenitur ad aliquid, quod est verissimum et optimum et nobilissimum, et per consequens maxime ens, ens per essentiam. *Agens* vero constituit principium in illa via secunda, sub qua clauditur tertia, quae sumitur ex ordine causarum efficientium in istis sensibilibus, et per quam datur ascendere usque ad aliquam causam efficientem primam, quam omnes Deum nominant. Unde quinque viae ad demonstrandam existentiam Dei reducuntur ad primam viam, quae sumitur ex parte motus, et per quam necesse est devenire ad aliquod primum movens, quod a nullo movetur; et hoc omnes intelligunt Deum. Deus ergo est primum movens immobile, a quo omnia moventur : in ratione causae efficientis, in ratione causae exemplaris et in ratione causae finalis. Necesse est itaque

dicere, omne ens, quod quocumque modo est, a Deo esse : a Deo tamquam a causa prima efficiente, et a Deo tamquam a causa suprema exemplari, et a Deo tamquam a causa ultima finali. (I. q. 2. a. 3.; q. 44. a. 1-4.; q. 105. a. 5.)

**TERTIO : Exacta adaequatio inter omnia genera divinae motionis.** — Et quoniam Deus operatur in omni operante secundum haec tria, quae se habent ut actionis principium : *finem*, *agentem* et *formam*; et aliunde quaecumque Deus operatur, facit in numero, pondere et mensura, attingens a fine usque ad finem fortiter et disponens omnia suaviter; exinde admirari oportet semper in cunctis operibus Dei, et praesertim in operibus quas operatur in creatura rationali, quam maxime diligit, exactam adaequationem inter omnia genera divinarum motionum; ita ut ad invicem sibi correspondeant motio Dei ut est causa efficiens, et motio Dei ut est causa formalis separata sive exemplaris, et motio Dei ut est causa finalis. Motio Dei moventis in creatura est motus, id est, aliquid reale causatum a solo Deo in creatura et elevans ac perficiens ipsam creaturam sive quoad *esse* suum sive quoad suum *operari*. Motio Dei moventis secundum rationem *formae* est motio divina causans in rebus creatis formas quae sunt principium motus, et conservans eas in esse. Motio Dei moventis secundum rationem *agentis* est applicatio formarum ac virtutum rerum creatarum ad operandum. Et motio Dei moventis secundum rationem *finis* est inspirare desiderium sui. Unde in omni propria operatione creaturae requiruntur haec tria : 1<sup>o</sup> quod habeat propriam virtutem agendi, a qua sicut a principio intrinseco rei procedat omnis motus atque operatio ejus; 2<sup>o</sup> quod recipiat adhuc ab ipso Deo complementum propriae virtutis; quoniam secunda causa non influit in suum effectum nisi in quantum recipit virtutem causae primae; 3<sup>o</sup> quod operetur propter aliquod bonum verum vel apparens, quod quidem non est aut non apparet bonum nisi secundum quod participat aliquam similitudinem summi boni, quod est Deus.

**QUARTO : Divinae motiones per comparisonem ad creaturam rationalem.** — Hae praedictae fundamentales motiones si inspiciantur per comparisonem ad creaturam rationalem, habebitur, quod Deus dicitur movere hominem secundum rationem *formae*, in quantum confert ei intellectum et voluntatem, quae est forma seu facultas libere agendi; et secundum rationem *finis*, in quantum movet physice intellectum creatum, dando ei virtutem ad intelligendum vel naturalem vel supernaturalem, et imprimendo ei species intelligibiles; et secundum rationem *agentis*, in quantum applicat voluntatem ad volendum, interius eam inclinando. Et sic, sive consideremus motus voluntatis secundum quod movetur ab intellectu, sive secundum quod movetur a seipsa, necessario per utramque viam devenire oportet ad unum et idem, quod est primum in via causae efficientis, supremum in via causae formalis, et ultimum in via causae finalis. Ideoque sicut Deus propter hoc, quod est primum efficiens, agit in omni agente; ita propter hoc, quod est primum formale, omnium formarum exemplar, participatur in omni forma et operativa virtute; et similiter propter hoc, quod est ultimus finis, appetitur in omni fine, et implicite desideratur in omni bono, et amatur in omni pulchro.

**QUINTO : Si terminus motus est supernaturalis, supernaturalis est quoque ejusdem principium.** — Et quoniam inter ista tria divinarum motionum genera adest semper perfecta ac mirifica proportio, dicendum est : 1<sup>o</sup> quod secundum gradum perfectionis in motione Dei ut finis, erit gradus perfectionis in motione Dei ut agens, et gradus perfectionis in motione Dei ut forma. Si ergo finis, ad quem Deus vult et intendit perducere creaturam rationalem, est supernaturalis, supernaturalis erit quoque et applicatio potentiae liberi arbitrii ad operandum, et forma ipsius liberi arbitrii, quae applicatur ad operationem. Etenim Deus omnia disponit suaviter atque omnibus dat formas et virtutes inclinantes in id, ad quod ipse movet; et illo modo Deus movet et movendo inclinat juxta modum ipsum formarum, eo ipso quod et

forma principium actus, et virtus inclinans formam ad actum, et applicatio, qua Deus applicat formam jam inclinatam per virtutem ad agendum, procedunt a Deo, suntque participationes ipsius virtutis Dei, atque per unam altera completur. Virtus namque perficit formam et est complementum ipsius; et divina motio perficit simul formam et virtutem et est ipsarum complementum, dum perducit potentiam operativam creaturae rationalis ad ultimum actum.

**SEXTO : Formae supernaturales seu virtutes infusae.** — Exinde cum finis, ad quem intendit Deus, applicans potentiam voluntatis ad agendum, ipsam elevare, est supra vires naturales, quae continentur in virtute operativa liberi arbitrii : tunc conferuntur formae naturali aliae formae superadditae, et virtutibus acquisitis virtutes infusae ; atque inter istas virtutes infusas reperiuntur quoque gradus perfectionis in modo inclinandi ad ipsas operationes supernaturales, ex quo habetur scientifica ratio distinguendi inter virtutes infusas et dona Spiritus Sancti. Quamobrem D. Thomas II-II. q. 23. a. 2. : « Oportet, quod si voluntas moveatur a Spiritu Sancto ad diligendum, etiam ipsa sit efficiens suum actum. Nullus autem actus perfecte producitur ab aliqua potentia activa, nisi sit ei connaturalis per aliquam formam, quae sit principium actionis. Unde Deus, qui omnia movet ad debitos fines, singulis rebus indidit formas, per quas inclinantur ad fines sibi praestitutos a Deo ; et secundum hoc disponit omnia suaviter, ut dicitur Sap. 8, 1. Manifestum est autem, quod actus caritatis excedit naturam potentiae voluntatis. Nisi ergo aliqua forma superadderetur naturali potentiae, per quam inclinaretur ad dilectionis actum, esset actus iste imperfectior actibus naturalibus et actibus aliarum virtutum ; nec esset facilis et delectabilis. Quod patet esse falsum ; quia nulla virtus habet tantam inclinationem ad suum actum sicut caritas, nec aliqua ita delectabiliter operatur. Unde maxime necesse est, quod ad actum caritatis in nobis existat aliqua habitualis forma superaddita potentiae naturali, inclinans ipsam ad caritatis actum et faciens eam



prompte et delectabiliter operari. » (Vide etiam *I. Sent.* d. 17. q. 1. a. 1. et 4.; *De Carit.* a. 1.)

**SEPTIMO : Nobilissima omnium formarum supernaturalium est caritas.** — Inter omnes autem formas supernaturales, quas Deus infundit, ut homo possit operari conformiter ad esse gratiae gratum facientis, nobilissima omnium est caritas, ad cujus actum ordinantur ceterae virtutes theologicae et omnes virtutes morales infusae et ipsamet dona Spiritus Sancti. Caritas enim est excellentissima virtutum, quas omnes ordinat ad finem suum, omnibusque suam propriam formam imponit; atque actus caritatis nihil in ordine actuum agnoscit tamquam superius nisi visionem divinae essentiae, qua videbimus Deum facie ad faciem sicuti est, et similes ei erimus per consummationem gratiae, cum per visionem gloriae participabimus ipsam aeternitatem, quae est Deus. Quapropter D. Thomas II-II. q. 23. a. 8. : « Per caritatem ordinantur actus omnium aliarum virtutum ad ultimum finem. » *De Carit.* a. 2. ad 17. : « Circa amorem Dei non inest aliqua imperfectio, quam oporteat per aliquod donum perfici; unde caritas non ponitur donum virtutis, quae tamen excellentior est omnibus donis. »

**OCTAVO : Regula ad discernendum perfectionem physicae praemotionis.** — Unde finis omnium divinarum motionum est conversio creaturae rationalis in Deum; et illa motio est perfectior, quo magis appropinquamus Deo et Deus appropinquat nobis. Deus enim appropinquat nobis nos movendo ad ipsum, et nos Deo appropinquamus ab ipso Deo moti; in Deo enim vivimus, movemur et sumus. Sic D. Thomas III. C. *Gent.* cap. 116. « Adhaesio igitur amoris ad Deum est potissimus modus ei adhaerendi..... In omnibus autem, quae moventur ab aliquo primo movente, tanto aliquis perfectius movetur, quanto magis participat de motione primi moventis et de similitudine ipsius. Deus autem, qui est legis divinae dator, omnia facit propter suum amorem. Qui igitur hoc modo tendit in ipsum, sc. amando, perfec-

tissime movetur in ipsum. Omne autem agens intendit perfectionem in eo, quod agit. Hic igitur est finis totius legislationis, ut homo Deum amet. » En regula ad iudicandum de perfectione physicae motionis, qua Deus ut agens movet creaturam rationalem ad ipsum ut finem. Nam Deus omnia movendo convertit ad seipsum. Itaque dicemus primo *de distinctione divinarum motionum in genere*; secundo, *de distinctione physicae motionis*.

## II

### De distinctione divinarum motionum in genere.

#### CONCLUSIO 1.

**Omnes divinae motiones convenienter reducuntur ad tria genera, videlicet : secundum rationem causae efficientis, exemplaris ac finalis.**

Arg. 1<sup>um</sup>. — Deus est primum movens immobile, quod a nullo movetur, et a quo omnia moventur. Atqui Deus est primum movens immobile in via causarum efficientium et in via causarum formalium et in via causarum finalium. Omnes namque ac singulae causae efficientes ab illo causantur et ab illo habent, quod possint causare et quod actualiter causent. Similiter omnes ac singulae causae formales ab illo participant divinam quandam perfectionem, et ab illo habent, quod formaliter constituent *esse specificum* rerum, quae per formam illis intrinsecam sunt *entia, una, vera et bona*. Ac pariter omnes ac singulae causae finales ab illo recipiunt, quod possint inspirare desiderium sui, et quod diffundant bonitatem, quam a Deo summo bono acceperunt, unaquaeque juxta mensuram suam. Haec sunt illae quinque viae (I. q. 2. a. 3.), quibus *Deum esse* probari potest : quae reducuntur ad tres, juxta triplex genus

causarum ; et quae resolvuntur in primam viam sumptam ex parte motus. Motio enim moventis in mobili est motus.

Arg. 2<sup>um</sup>. — Modus movendi convenienter distinguitur atque dividitur secundum distinctionem ac diversitatem in modo causandi. Sed, ut D. Thomas ex professo demonstrat I. q. 44., Deus eo ipso quod est ens per essentiam, est causa efficiens et causa exemplaris et causa finalis omnium entium per participationem. Entia enim per participationem diversificantur secundum diversam participationem *essendi* et *operandi* receptam ab uno primo ente, quod perfectissime *est* et est causa omnis entis, omnis veri et omnis boni. In hac q. 44. clauduntur quinque viae, quibus *Deum* esse probari potest, quasque Angelicus Doctor pulcherrime exaraverat in q. 2. a. 3. Et istae quinque viae, clausae jam per unitatem principii causalitatis, perveniunt ad ultimum ipsarum terminum, in quo demonstratio existentiae Dei totaliter perficitur, in q. subsequenti 45. a. 2., dum D. Thomas respondet dicendum, quod : « non solum non est impossibile a Deo aliquid creari ex nihilo, sed necesse est ponere a Deo omnia creata esse. »

Arg. 3<sup>um</sup>. — Quatuor sunt causarum genera : materialis, formalis, efficientis et finalis. *Materia* tamen, etsi dicatur causa, non est principium actionis, sed se habet ut subjectum recipiens actionis effectum. Unde dumtaxat *finis*, *forma* et *agens* se habent ut actionis principium ; sed ordine quodam. Nam primum quidem principium actionis est *finis*, qui movet agentem ; secundum vero *agens* ; tertium autem *forma*, quod ab agente applicatur ad agendum, quamvis et ipsum agens per formam suam agat. Atqui secundum haec tria Deus in quolibet operante operatur, ut D. Thomas ex professo declarat I. q. 105. a. 5. Ex quibus apparet, quod controversia de influxu Dei in creaturas non potest disjungi a magnis quaestionibus de existentia Dei et de processione omnium rerum a Deo per creationem.

## CONCLUSIO 2.

**Aliquando per unam solam numero motionem Deus simul agit secundum rationem agentis et formae.**

Arg. 1<sup>um</sup>. — Agere secundum rationem *formae* in creaturas est dare creaturis formas eis intrinsecas et modo permanenti, per quas tamquam per propriam virtutem operentur. Etenim sic semper intelligendum est Deum operari in rebus, quod tamen ipsae res propriam habeant operationem. Agere autem secundum rationem *agentis* in creaturas est applicare ad agendum ipsas formas creaturis intrinsecas per modum permanentis collatas; nam applicare formas creaturarum ad agendum nihil est aliud nisi conferre ipsis formis complementum suae activitatis, conjungendo illas ad actiones proprias. Unde applicare est etiam dare formam, sed ultimam formam ipsarum formarum; formam, inquam, per modum transeuntis, et quae cessat cessante operatione, cujus est principium immediatissimum immediate virtutis. Virtus enim causae primae vehementius ingreditur in effectum quam virtus causae secundae, quae operatur immediatius immediate suppositi.

Jam vero Deus, dum creavit angelos, dum creavit etiam primos parentes et dum creavit animam hominis Christi, simul contulit illis cum natura : 1<sup>o</sup> facultatem liberi arbitrii, quae est facultas voluntatis et rationis; 2<sup>o</sup> formas superadditas potentiae liberi arbitrii, id est, virtutes infusas, sc. fidem, spem ac caritatem homini et angelo, et caritatem Christo Domino, in quo, utpote comprehensore jam divinae essentiae, non relinquebatur locus fidei nec spei; 3<sup>o</sup> actus fidei, spei et caritatis in angelis et in Adamo, et actum caritatis in anima sanctissima Domini nostri Jesu Christi.

Ergo una sola motionem Deus contulit et formam naturalem agendi, sc. liberum arbitrium; et formam supernaturalem, nempe caritatis habitum; et actum liberi arbitrii informati caritate, nimirum dilectionem Dei. Deus enim fecit angelos



et primum hominem et hominem Christum actualiter et libere tendentes in ipsum per motum liberi arbitrii, qui est amare seu diligere.

Arg. 2<sup>um</sup>. — In justificatione impii, ut dictum manet supra (I-II. q. 113. a. 8.) sunt simul tempore, etsi ordine naturae unum eorum sit prius altero, haec quatuor : 1<sup>o</sup> gratiae infusio ; 2<sup>o</sup> motus liberi arbitrii in Deum per fidem et caritatem ; 3<sup>o</sup> motus liberi arbitrii in peccatum ; 4<sup>o</sup> remissio culpae. Sed una est numero motio Dei moventis, sc. gratiae infusio ; et plures effectus, qui constituunt terminum hujus motus in potentia liberi arbitrii, sc. formas seu habitus fidei et caritatis, et simul actus liberi arbitrii informati per fidei et caritatis virtutes. Quibus adhuc oportet addere alium motum seu actum liberi arbitrii per dolorem in peccatum, qui est actus virtutis infusae poenitentiae. Ergo patet, quomodo Deus simul operatur in creatura rationali operante, et dando formam per modum permanentis et applicando hanc formam ad actum, qui est per modum transeuntis et cessat cessante applicatione facta a Deo secundum rationem agentis.

Unde transmutatio, quae fit in homine a Deo per infusionem gratiae, est una, si consideretur motio Dei moventis, quae est infusio gratiae sanctificantis et virtutum supernaturalium. Est multiplex motus, ratione potentiarum, in quibus infunduntur habitus virtutum ; et multiplex terminus motus in unaquaque potentia, cum motio Dei moventis efficiat simul tamquam effectus et terminos distinctos : 1<sup>o</sup> ipsas formas permanentes quoad esse et operari supernaturaliter, gratiam sc. et caritatem cum ceteris virtutibus ; 2<sup>o</sup> ipsas formas transeuntis, videlicet operationes liberi arbitrii, dum homo credit, diligit et dolet <sup>1</sup>.

<sup>1</sup> Unde D. Thomas *De Verit.* q. 28. a. 3. ad 10. : « Non autem per hoc excluditur usus liberi arbitrii, qui est in ipso instanti, quo gratia infunditur ; in hoc enim ostenditur perfectior communicatio divinae bonitatis, quod simul facit in homine *habitum* et *actum* iustitiae quam si faceret *habitum* tantum. » Et ibid. ad 20. : « Iste autem motus liberi arbitrii non solum se habet ad gratiam *ut dispositio*, sed *ut complementum* ; operationes enim sunt quae-

## CONCLUSIO 3.

**Motio Dei secundum rationem formae potest dici duplex ex parte modi, quo respicit terminum; et similiter motio Dei secundum rationem agentis potest etiam dici duplex ex parte modi, quo terminatur ad effectum.**

DECLARATUR. Motio Dei moventis creaturam secundum rationem formae nihil aliud est nisi motio, qua Deus tribuit creaturis virtutem operandi, et motio, qua illam Deus conservat in esse. Sed alius est modus, quo Deus movet in quantum dat virtutem, et alius, quo Deus movet in quantum virtutem operandi jam collatam conservat. Etenim licet ex parte Dei non sint cogitandae duae distinctae actiones, una, qua tribuit virtutem operandi, et altera, qua conservat ipsam operandi virtutem, attamen collatio virtutis operativae non supponit ipsam virtutem existentem, et conservatio virtutem operantem, quam tenet in esse, jam ut existentem subaudit. Consequenter iste duplex modus potest dici unus et potest dici duplex : unus, ex parte principii, sc. Dei moventis; et etiam ex parte termini, sc. virtutis operativae. Duplex autem, propter diversum respectum ad eundem terminum motus; ea quippe ratione, qua creatio differt a conservatione rei creatae; et tamen verum quoque est, quod conservatio est continuata creatio.

Pariter motio Dei moventis creaturas secundum rationem agentis nihil aliud est nisi motio, qua Deus applicat virtutem activam creaturae ad actionem, et motio, qua Deus simul

dam completiones habituum; unde perfectionem agentis attestatur, quod *habitus* inducatur simul *cum sua operatione*, quia perfectio effectus demonstrat perfectionem causae. » Et *De Carit.* a. 1. ad 2. : « Unde cum Spiritus Sanctus sit virtuosissimum movens, sic movet ad diligendum, quod etiam *habitus* caritatis inducit. » Vide quae ex professo dicta manent circa hujusmodi motionem, *Part. Prim.* q. 5. a. 8. et *Epilog.* IV. coroll. 7.

cum virtute creaturae applicatae ad agendum et mediante ipsa creaturae potentia operatur eandem operationem et eundem effectum. Sed alius est modus, quo Deus movet in quantum applicat virtutem actioni, et alius modus, quo Deus movet in quantum virtuti jam conjunctae ad suam actionem cooperatur intrinsece. Etenim quamvis ex parte Dei sit eadem motio, attamen *applicatio* non supponit virtutem operativam creaturae junctam cum suo actu, et cooperatio virtutem cooperativam conjunctam cum actu subaudit. Et praeterea terminus motionis, quae est *applicatio*, est complementum virtutis activae creaturae, et a Deo solo effectum; et terminus motionis, quae est *cooperatio*, est ipsamet operatio creaturae, quae tota est a creatura et tota simul a Deo. A Deo per potentiam creaturae; a creatura autem per suam propriam potentiam completam in ratione virtutis activae per virtutem Dei. A Deo, inquam, immediatius quam a creatura, si immediatio virtutis attendatur; a creatura vero immediatius quam a Deo, si immediatio suppositi coagentis consideretur.

Corroboratur conclusio ex D. Thoma, qui *De Pot.* q. 3. a. 7. ubi hos praedictos quatuor modos, quibus Deus operatur in omni operante, distincte describit, et postquam ipsorum rationem perpendendo exposuit, concludit: « Sic ergo Deus est causa actionis cujuslibet, in quantum dat virtutem agendi, et in quantum conservat eam, et in quantum applicat actioni, et in quantum ejus virtute omnis alia virtus agit. Et cum conjunxerimus his, quod Deus sit sua virtus et quod sit intra rem quamlibet non sicut pars essentiae, sed sicut tenens rem in esse, sequetur, quod ipse in quolibet operante immediate operetur, non exclusa operatione voluntatis et naturae. »

## CONCLUSIO 4.

**Motio Dei, qua Deus dat creaturae virtutem operandi, et motio, qua conservat virtutem operativam in esse suo, potest dici una motio ; et pariter motio Dei, qua Deus applicat virtutem propriam creaturae ad agendum, et motio, in cuius virtute omnis alia virtus creaturae agit, potest etiam dici una motio.**

Arg. 1<sup>um</sup>. — Quia ex parte Dei una et eadem est actio, qua confert virtutem operandi creaturis et qua illam conservat. Et ex parte termini eadem est virtus operandi, quae confertur et quae in esse suo conservatur. Similiter ex parte Dei moventis una et eadem est motio, qua virtus operativa creaturae applicatur ad agendum et qua, semel applicata suae propriae actioni, agit. Ex parte virtutis collatae per applicationem primi agentis eadem est virtus, quae complet virtutem propriam creaturae, et virtus, qua jam completa virtus propria creaturae agit.

Arg. 2<sup>um</sup>. — Quoniam D. Thomas I. q. 105. a. 5. dare formas rebus et conservare eas in esse reducit ad unum modum, secundum quem Deus dicitur operari in quolibet operante in ratione *formae*. Ac pariter alios duos modos, juxta quos Deus et applicat virtutem propriam creaturae ad actionem et cooperatur intrinsece ipsi virtuti operativae creaturarum, etiam reducit ad unum, nempe secundum rationem *agentis*, et quem quidem modum vocat applicationem virtutis creatae ad operandum.

## CONCLUSIO 5.

**Concursus simultaneus in doctrina D. Thomae nihil commune habet, quoad rem significatam, cum concursu simultaneo, quem tradit ac propugnat Molina.**

1<sup>o</sup> Quoniam concursus *simultaneus* in doctrina D. Thomae praesupponit necessario concursum *praeivium*, id est appli-



cationem, qua Deus applicat virtutem operativam creaturae ad agendum. Quam quidem applicationem, ut postea ostendatur, rejicit Molina et ipse ingenue fatetur non intelligere.

2<sup>o</sup> Quoniam concursus *simultaneus* in doctrina D. Thomae minime se habet ad instar concursus *paralleli* et quasi ab extrinseco respectu concursus creaturae, ut docet Molina; sed intrinsece cooperatur cum virtute creaturae et per creaturae potentiam, pervadens totam creaturae potentiam, quam conservat, in ipso actu, quocum potentia per concursum praevisum fuit conjuncta.

3<sup>o</sup> Quoniam modus cooperandi per concursum simultaneum Molinae jam praedamnatus fuerat ab ipso Angelico Doctore in opusculo *I. Contra errores Graecorum* cap. 23. De quo postea.

4<sup>o</sup> Quoniam virtus divina, qua virtus propria creaturae agit et qua conjungitur cum suo proprio effectu, qua applicatur ad agendum et qua applicat se, qua movetur et qua movet, est una et eadem virtus, sc. illa vis, qua agit ad esse ut instrumentum primae causae. Quae quidem vis est forma complens formam propriam creaturae et id, quod a Deo fit in re naturali, quo actualiter agat. Atque hujusmodi forma seu vis divina datur per modum transeuntis et cessat cessante actu.

Unde D. Thomas, dum istos duos modos operandi, quos distinxerat *De Pot.* q. 3. a. 7., ad unum modum reducit in *Summa Theol.* I. q. 105. a. 5. et vocat illum per modum agentis et semper denominat ipsum *applicationem*, qua Deus applicat virtutem creaturae ad operandum. Etenim de hac celeberrima applicatione controvertitur, et in applicatione ista stat punctum difficile quaestionis et caput ceterorum, quae inter Molinam ac D. Thomam dividunt et separant. Quamobrem non absque ratione Angelicus Doctor est semper sollicitus de hac applicatione, quae deinceps intelligenda veniet, quotiescumque de physica praemotione loquemur. Concursus enim simultaneus in doctrina D. Thomae est illa virtus Dei, qua omnis alia virtus agit; et hujusmodi divina virtus est continuatio ipsius divinae virtutis, qua Deus applicat actioni

virtutem propriam ac permanentem creaturarum. Concursus itaque simultaneus est ipsemet influxus praevious continuatus, sicut conservatio dicitur continuata creatio.

### III

#### De distinctione physicae motionis.

##### CONCLUSIO 1.

**Physica praemotio, considerata per respectum ad determinationem rationis, convenienter distinguitur in tres diversos gradus perfectionis.**

Hujusmodi diversi gradus sunt tres illi, quos D. Thomas indicat I-II. q. 9. a. 6. ad 3. Quorum primus est motus creaturae rationalis ad universale objectum voluntatis; alter est motus voluntatis ad hoc vel illud particulare bonum volendum in ordine naturae; et tertius est motus voluntatis ad aliquid determinate volendum in ordine gratiae.

Primus motus est ante determinationem rationis deliberantis; secundus motus est per determinationem rationis; et tertius motus est supra ipsam rationis determinationem, quoniam consequitur ad ipsam rationem divinae sapientiae.

Primus est motus naturalis ac necessarius voluntatis; secundus est motus rationalis ac liber; tertius est motus quidem liberi arbitrii, sed ad instar motus naturalis productus per modum simplicis volitionis.

In primo motu voluntas est mota et non movens, solus autem Deus movens; in secundo motu voluntas est movens et a Deo mota; in tertio denique motu voluntas non se movet, sed a solo Deo movetur. (I-II. q. 111. a. 2.)

## CONCLUSIO 2.

**Physica praemotio, si consideretur per ordinem ad perfectionem mobilis, quod est facultas voluntatis et rationis, convenienter dividitur etiam in tres diversos perfectionis gradus.**

Perfectio mobilis, in quantum est mobile, in rationali creatura nihil aliud est nisi perfectio liberi arbitrii (quae est facultas voluntatis et rationis), qua disponitur ad hoc, quod bene moveatur a suo motore, qui est solus Deus. Sed potentia liberi arbitrii dupliciter est perfecta a Deo : primo quidem naturali perfectione, secundum sc. lumen naturale rationis ; alio autem modo quadam supernaturali perfectione per virtutes theologicas. Et quamvis haec secunda perfectio sit major quam prima, tamen prima perfectiori modo habetur ab homine quam secunda. Nam prima habetur ab homine quasi plena possessione ; secunda autem habetur quasi possessione imperfecta, imperfecte enim diligimus et cognoscimus Deum. Exinde perfectio supernaturalis liberi arbitrii, qua homo disponitur ad hoc, quod bene moveatur a suo motore, qui est Deus, juxta formas supernaturales virtutum theologicarum, participatur in anima secundum diversos gradus perfectionis : uno modo per virtutes morales infusas, et altiori adhuc modo per virtutes infusas superioris generis, quae vocantur dona Spiritus Sancti. Ergo triplex est perfectio, qua potentia liberi arbitrii potest esse disposita ad hoc, quod bene moveatur a suo motore, qui est solus Deus, videlicet : perfectio, qua ex virtutibus moralibus acquisitis vires appetitivae perficiuntur ad obediendum rationi, et per rationem totus homo Deo ; perfectio, qua ex virtutibus moralibus infusis vires appetitivae ad obediendum rationi jam lumine supernaturali fidei adjunctae, et per rationem ac fidem, quae per caritatem operatur, Deo subduntur ; et perfectio, qua omnes vires animae disponuntur ad hoc, quod subdantur adhuc promptius atque excellentius divinae motioni, secun-

adum quam movetur homo altiori modo per dona Spiritus Sancti.

*Magis declaratur conclusio.* — Cajetanus in I-II. q. 68. a. 1. sic breviter exponit praefatam D. Thomae doctrinam: « Ad pleniorum intellectum scito, quod imaginamur, quod in homine est triplex subordinatum movens... sc. : 1<sup>o</sup> mens humana praedita lumine naturali et prudentia; 2<sup>o</sup> mens humana praedita lumine gratiae et fidei; 3<sup>o</sup> mens humana pulsata instinctu Spiritus Sancti. Et ad hoc, ut vires animae obediant primo motori, ponuntur virtutes morales acquisitae, tendentes ad media et fines ab ipso motore praestitutos. Ad hoc autem, ut eadem vires obediant secundo motori superiori, ponuntur virtutes morales infusae, tendentes ad media et fines ab illo motore praestitutos. Ad hoc autem, quod non solum eadem, sed omnes vires animae obediant supremo motori, ponuntur dona tendentia in fines proprios a tali motore ostensos. Necessitas autem distinguendi hos duos ordines habituum infusorum ad obediendum in littera assignatur ex imperfecta participatione motoris supernaturalis per habitus virtutum theologicarum. »

Tres sunt itaque diversi gradus perfectionis in physica praemotione distinguendi, secundum quod potentia liberi arbitrii diversimode disponitur et disposita subicitur divinae motioni per prudentiam naturalem, per virtutes morales infusas et per dona Spiritus Sancti.

### CONCLUSIO 3.

**Physica praemotio, qua homo justus movetur a Deo ad meritorie operandum per usum habituum supernaturalium, tam virtutum quam donorum, convenienter dividitur in tres diversos gradus.**

Arg. 1<sup>um</sup>. — Convenienter distinguuntur tres diversi gradus in augmento ac perfectione caritatis, juxta quod caritas nata nutritur, nutrita autem roboratur, roborata vero perficitur; et secundum quod habens caritatem nutriendam, roboran-



dam ac perficiendam, primo dum incipit, magis sentit suam sollicitudinem de vitiatione peccatorum; deinde dum proficit, principalior est ei cura de profectu virtutum; ac postremo dum in caritate incipit esse perfectus, studium ipsius circa hoc maxime versatur, ut Deo inhaereat. (II-II. q. 24. a. 9.)

Arg. 2<sup>um</sup>. — Tres sunt quoque gradus, quibus convenienter distinguuntur virtutes morales infusae, non quidem distinctione secundum essentiam, sed secundum statum et actus perfectionem; et distinguuntur secundum diversitatem motus et termini, ita sc. quod quaedam sunt virtutes incipientium, quibus incumbit studium principale ad recedendum a peccato et ad resistendum concupiscentiis ejus, quae in contrarium caritatis movent. Quaedam vero sunt virtutes transcendentium et in divinam similitudinem tendentium. Quaedam autem sunt virtutes jam assequentium divinam similitudinem; quas quidem virtutes dicimus esse beatorum vel aliquorum in hac vita perfectissimorum. (I-II. q. 61. a. 5.; II-II. q. 183. a. 4.; II-II. q. 159. a. 2. ad 1.)

#### CONCLUSIO 4.

**Physica praemotio, si consideretur per comparisonem ad potentiam liberi arbitrii, convenienter dividitur in motum, qui est « actus imperfecti », et in motum, qui est « actus perfecti ».**

Arg. 1<sup>um</sup>. — Omne quod procedit de potentia in actum, prius pervenit ad actum incompletum, qui est medius inter potentiam et actum, quam ad actum perfectum. Sed potentia liberi arbitrii, dum procedit de potentia in actum, accipit a Deo per physicam praemotionem: 1<sup>o</sup> complementum suae propriae virtutis operativae; 2<sup>o</sup> conjunctionem suae propriae virtutis cum suo proprio effectu seu operatione, in quam causandam vehementius ingreditur Deus physice praemovens quam ipsa virtus operativa liberi arbitrii. Ergo liberum arbitrium creaturae per physicam praemotionem acquirit: 1<sup>o</sup> actum, qui est medius inter

ipsum ut est potentia et ipsum ut est actio; 2<sup>o</sup> actum, qui est terminus liberi arbitrii se moventis sub physica Dei motione. Consequenter physica motio, quae in potentia liberi arbitrii est motus, convenienter dividitur per respectum ad ipsam potentiam, quam perficit, in actum liberi arbitrii imperfecti et in actum liberi arbitrii perfecti. (I. q. 79. a. 8. et q. 85. a. 3.)

Arg. 2<sup>um</sup>. — D. Thomas *De div. nom.* cap. 4. lect. 7. : « Considerandum est autem, quod, sicut dicit Philosophus *III. De Anima*, duplex est motus. Unus, qui est actus imperfecti, id est, existentis in potentia, et talis est motus rerum corporalium, quae secundum hoc moveri dicuntur, sive secundum substantiam sive secundum quantitatem, sive secundum qualitatem sive secundum locum, in quantum exeunt de potentia in actum. Alius autem est motus perfecti, secundum quod ipsa operatio existentis in actu, manens in ipso operante, motus dicitur, ut sentire, intelligere, velle. » Et ibid. lect. 12. : « Et quia motus, qui est in rebus corporalibus, de quo determinatum est in lib. *Physicorum*, est de contrario in contrarium, manifestum est quod sentire, si dicatur motus, est alia species motus ab ea, de qua determinatum est in lib. *Phys.* Ille enim motus est actus existentis in potentia, quia videlicet recedens ab uno contrario quamdiu movetur non attingit alterum contrarium, quod est terminus motus, sed est in potentia. Et quia omne quod est in potentia, in quantum hujusmodi, est imperfectum, ideo ille motus est actus imperfecti. Sed iste motus est actus perfecti; est enim operatio sensus jam facti in actu per suam speciem. Non enim sentire convenit sensui nisi in actu existenti; et ideo iste motus simpliciter est alter a motu physico. Et hujusmodi motus dicitur proprie operatio, ut sentire, intelligere et velle. Et secundum hunc motum anima movet seipsam secundum Platonem, in quantum cognoscit et amat seipsam. »

Et *II. Sent.* dist. 11. q. 2. a. 1. : « Secundum Philosophum operatio et motus differunt : operatio enim est actus perfecti,

ut lucidi lucere, et intellectus in actu intelligere; sed motus est actus imperfecti tendentis in perfectionem; et ideo id, quod est in sua ultima perfectione, habet operationem sine motu, sicut Deus; quod autem distat ab ultima perfectione, habet operationem conjunctam motui, quia proficere in beatitudinem est quidam motus naturae tendentis in perfectionem; et ideo quandocumque angelus vel homo ponitur in ultima sua perfectione, operatio ejus non est meritoria nec proficiens. »

Et *I. De Anima* lect. 6. : « Appetere et velle et hujusmodi non sunt motus animae, sed operationes. Motus autem et operatio differunt, quia motus est actus imperfecti, operatio vero est actus perfecti... Operatio enim non facit distare, sed perficit operantem; sed in motu oportet quod sit exitus. »

*Quaest. Disp. De Anima* q. unica a. 7. ad 3. : « Motus reducitur ad genus et speciem ejus, ad quod terminatur motus : in quantum eadem forma est, quae ante motum est tantum in potentia; in ipso motu, medio modo inter actum et potentiam; et in termino motus, in actu completo.

*III. Suppl.* q. 78. a. 2. ad 4. : « Motus non accipit speciem a termino *a quo*, sed a termino *ad quem*. » *I. Sent.* dist 37. q. 4. a. 1. : « Successio in intellectu angeli largo modo dicitur motus. Differt tamen a motu proprie dicto in duobus ad minus. Primo, quia non est de potentia in actum, sed de in actu in actum. Secundo, quia non est continuus. Et similis ratio est de successione affectionum. »

*III. q. 21. a. 1. ad 3.* : « Ascensio nihil est aliud quam motus in id, quod est sursum. Motus autem, ut habetur *III. De Anima*, dupliciter dicitur : uno modo proprie, secundum quod importat exitum de potentia in actum, prout est actus imperfecti... Alio modo dicitur motus, qui est actus perfecti, id est existentis in actu, sicut intelligere et sentire dicuntur quidam motus. » *III. q. 62 a. 4.* : « Virtus principalis agentis habet permanens et completum esse in natura; virtus autem instrumentalis habet esse transiens ex uno in aliud et incompletum, sicut et motus est actus imperfectus

ab agente in patiens. » Et rursus ibid. ad 2 : « Sicut motus eo, quod est actus imperfectus, non proprie est in aliquo genere, sed reducitur ad genus actus perfecti, sicut alteratio ad qualitatem : ita virtus instrumentalis non est proprie loquendo in aliquo genere, sed reducitur ad genus et speciem virtutis perfectae. » Et iterum ibid. ad 3. : « Virtus instrumentalis acquiritur instrumento ex hoc ipso, quod movetur ab agente principali. » Et *De Verit.* q. 22. a. 5. ad 8. : « Forma recepta in aliquo non movet illud, in quo recipitur ; sed ipsum habere talem formam est ipsum motum esse ; sed movetur ab exteriori agente, sicut corpus, quod calefit per ignem, non movetur a calore recepto, sed ab igne. » *Quodl.* 4. a. 9. : « Duplex est actio : Quaedam, quae fit cum motu ; et talis actio semper est cum aliqua innovatione, quia semper in motu aliquid fit et aliquid desinit esse, in quantum acceditur ad terminum et receditur a termino... Alia autem actio est, quae est sine motu, per simplicem communicationem formae... » *I. Sent.* dist. 8. q. 3. a. 1. ad 4. : « In omnibus, in quibus operatio differt a substantia, oportet esse aliquem modum motus ex hoc, quod exit de novo in operationem ; quia acquiritur in ipso operatio, quae prius non erat. » Et ibid. q. 4. a. 3. ad 3. : « Actio, secundum quod est praedicamentum, dicit aliquid fluens ab agente cum motu ; sed in Deo non est aliquid medium secundum rem inter ipsum et opus suum ; et ideo non dicitur agens actione, quae est praedicamentum, sed actio sua est substantia. »

Haec omnia placuit in unum colligere, quoniam ex illis possunt inferri quaecumque sunt necessaria ad intelligendum, quid sit physica praemotio, prout recipitur in potentia liberi arbitrii, in qua motio Dei moventis est motus.

1<sup>o</sup> Nomen motus fuit translatus ex rebus corporalibus ad res spirituales ; ex transmutatione corporis de contrario in contrarium, ad transitum animae de potentia in actum.

2<sup>o</sup> Licet differant operatio et motus, tamen omnis operatio animae potest dici motus per respectum ad supremam operationem, in qua consistit beatitudo, quae est ultima perfectio.



3<sup>o</sup> Exinde de ratione motus est actus; sed actus mixtus potentiae, quia est actus entis in potentia prout in potentia. Consequenter motus exprimit aliquid perfectum, in quantum importat recessum a potentia, id est, a termino *a quo*, et veluti quandam inchoationem illius perfectionis acquirendae in termino *ad quem*. Importat tamen simul in subjecto mobili aliquid imperfectum, in quantum supponit subjectum adhuc in potentia, adhuc in via, et quasi tendens in perfectionem, in qua debet quiescere.

4<sup>o</sup> In omni operatione creaturae, etsi fiat in instanti, semper adest aliqua ratio motus : *a*) quia dicit aliquid fluens ab agente in patiens cum motu ; *b*) quia supponit aliquam inno-  
vationem in operante, quod movet motum et agit actum.

5<sup>o</sup> Idcirco in omnibus motibus seu operationibus liberi arbitrii, quae fiunt a Deo per gratiam operantem, etsi fiant in instanti et non successive, attamen est semper aliquis modus motus ex hoc, quod potentia liberi arbitrii exit de novo in operationem et elevatur supra seipsam.

6<sup>o</sup> In omnibus motibus liberi arbitrii, sive fiant in instanti sive successive, sive per gratiam operantem sive per gratiam cooperantem, sive voluntas sit movens et mota sive mota solummodo et Deus solus movens : semper semperque est aliquid medium secundum rem inter potentiam operandi et suam propriam operationem. Et hoc aliquid medium vocatur physica praemotio, quae in potentia liberi arbitrii est motus; et hujusmodi motus, tam in ordine naturae quam gratiae, est illa vis, qua omnis creatura operatur ad esse velut instrumentum primi agentis.

7<sup>o</sup> Hujusmodi vis activa est quid divinum complens potentiam operativam creaturae et inchoans ipsius operationem. Est quid medium inter potentiam liberi arbitrii et actum liberum; est virtus faciens transire virtutem activam voluntatis de potentia in actum.

8<sup>o</sup> Hujusmodi vis est semper quid ultimum in linea potentiae operativae voluntatis, et quid primum in linea voluntariae operationis; et tamen nec est ipsa operatio nec ipsa voluntas.

9<sup>o</sup> Unde hujusmodi vis est magis propinqua ad actum liberae voluntatis quam ipsa voluntas et quam omnes habitus, sive acquisiti sive infusi, per quos voluntas perficitur ad operandum.

Arg. 2<sup>um</sup>. — Unde sic *ratio secunda* conclusionis instruitur : Physica praemotio, per comparisonem ad potentiam liberi arbitrii considerata, dupliciter perficit illam : 1<sup>o</sup> in quantum, complendo virtutem activam ipsius, facit illam tendere ad suam propriam operationem ; 2<sup>o</sup> in quantum se habet in ratione principii activi intrinsece cooperantis ipsi liberae voluntati, dum elicit liberum velle. Sub primo respectu physica praemotio est actus liberae voluntatis tendentis in propriam operationem : *actus imperfecti*, actus entis in potentia prout in potentia. Sub altero respectu physica praemotio est virtus divina, qua virtus propria voluntatis agit et prorumpit in actum, ac proinde causa principalior liberae operationis quam ipsa voluntas propria virtute operans. Et sic praemotio physica est motus, qui est *actus perfecti*. Unde perfectum et imperfectum se habent ex parte voluntatis, in qua recipitur velut in subjecto physica praemotio. Physica autem praemotio immediate perficit ipsam potentiam ; et deinde perficit causando operationem mediante potentia, quam elevat de posse agere ad actualiter agere.

---

## IV

### RECAPITULATIO

PRIMO : **Quinque gradus enumerantur.** — Possunt itaque diversi gradus divinae motionis sic convenienter distingui : *Primus* namque gradus est physicae motionis illius, qua Deus movet voluntatem hominis sicut universalis motor ad universale objectum voluntatis, quod est bonum ; et sine hac universali motione homo non potest aliquid velle. *Secundus* gradus est illius physicae motionis, qua Deus,

etiam ut auctor naturae et universalis motor omnium voluntatum, movet liberum arbitrium hominis, cum homo per rationem determinat se ad volendum hoc vel illud, quod est vere bonum vel apparens bonum. *Tertius* gradus est illius motionis, qua Deus, ut auctor ordinis supernaturalis est, movet liberum arbitrium hominis, praeparando peccatorem ad lumen gratiae habitualis suscipiendum et iustificando illum per infusionem ipsius gratiae sanctificantis et caritatis; qua homo convertitur ad Deum sicut ad specialem finem, quem intendit et cui cupit adhaerere sicut proprio bono. *Quartus* gradus est etiam gratuita motionis, qua Deus movet physice hominem justum ad recte agendum et ad utendum habitibus infusis gratiae et virtutum. *Quintus* gradus est illius supremae atque excellentissimae motionis, qua Deus ita superabundanter movet liberum arbitrium hominis spiritualis, ut liberum arbitrium sit motum et non movens, Deus autem solus movens et solus movens liberum arbitrium, in quantum est mobile optime dispositum per dona Spiritus Sancti.

**SECUNDO : Quomodo se habeat voluntas mota sub unaquaque motione.** — *Primus* gradus physicae motionis est, qua homo movetur ad bonum in communi, ad agendum et volendum omnia propter ultimum finem formaliter sumptum, et ad appetendum omnia, ad quae voluntas de necessitate movetur. Huiusmodi actus voluntatis est necessario bonus, illa videlicet bonitate, quae substernitur reliquis bonitatibus in actu humano. Voluntas naturaliter movetur in tali motu; elicit actum, sed non movet seipsam, agendo. Hic non relinquitur locus peccato.

*Secundus* gradus physicae motionis est, qua homo fit potens ad determinandum seipsum, agendo per consilium rationis et per consensum vel electionem voluntatis. In isto motu homo potest deficere <sup>1</sup> peccando; sed quidquid est ibi

<sup>1</sup> Quomodo autem sub physica Dei motione potest contingere in motu creaturae rationalis defectus, qui dicitur peccatum, declaratur

de defectu, non est a virtute motiva Dei moventis, sed a libero arbitrio male disposito et claudicante sub physica Dei motione.

*Tertius* gradus physicae motionis est, qua homo convertitur ad Deum, et de peccatore fit justus, et incipit omnia velle et operari propter ultimum finem non modo formaliter sumptum, sed etiam materialiter; quia intendit tamquam finem specialem ultimum ipsum Deum summe dilectum. Atque in hujusmodi transmutatione de statu injustitiae ad statum justitiae nequit habere locum peccatum, in quod liberum hominis arbitrium tendit per dolorem ac detestationem; et peccatum ipsum remittitur. In hoc motu liberi arbitrii per fidem et amorem in Deum, per odium et fugam in peccatum, voluntas est mota et non movens, solus autem Deus movens.

*Quartus* gradus physicae motionis est, qua homo movetur per gratiam actualem ad meritorie operandum utendo habitibus gratiae sanctificantis et caritatis et fidei, quae per caritatem operatur. In hoc motu liberi arbitrii voluntas est mota et movens, nisi gratia actualis sit gratia operans, in cujus effectu voluntas non movet, sed est tantum mota. Dum liberum arbitrium movet se sub ista et antecedenti Dei physica motione, *potest* resistere, si velit; sed sub hujusmodi motione numquam resistere vult; et implicat contradictionem, quod dum homo per gratiam actualem motus utitur ipsa gratia sanctificante et caritate, deficiat peccando. Peccatum enim non habet locum in ipso usu gratiae, qui est ab ipso Deo per gratiam.

*Quintus* gradus physicae motionis est, qua homo justus ac spiritualis agitur a Spiritu Sancto, et mens humana operatur opera salutis supra modum humanum. In hoc motu liberi

a D. THOMA : a) I. q. 63. a. 1. ad 4.; b) I-II. q. 79. a. 2.; c) *De Malo* q. 3. a. 1., 2. et 3.; d) *III. C. Gent.* cap. 10.; e) *II. Sent.* dist. 37. q. 1. et q. 2. — Vide etiam CAJETANUM in I-II. q. 79. a. 2.; CAPREOLUM in *II. Sent.* dist. 37. q. 1.; FERRARIENSEM in *III. C. Gent.* cap. 10.; GOUDIN, *Philosoph.* part. 4. q. 3 a. 7.



arbitrii voluntas est mota et non movens, solus autem Deus movens; et homo habet rectum iudicium de rebus divinis secundum quandam connaturalitatem ad ipsas; et operatur excellentissima opera virtutum, quae vocantur beatitudines et fructus Spiritus Sancti; et incipit esse perfectus in divinis, non solum discens, sed et patiens divina.

**TERTIO : Quomodo omnes gradus motionis reducuntur ad tres.** — Omnes praedicti gradus perfectionis sic intelligendi sunt, ut in secundo includatur perfectio primi, et in tertio perfectio secundi, et in quinto perfectio omnium antecedentium, sed non e contra. Ac quinque hi gradus, quos singulatim distinguit D. Thomas (I-II. q. 68. a. 2. et 3.; q. 109. a. 1., 2., 6. et 9.; q. 111. a. 2.) reducuntur ad tres determinatos ab ipso Angelico Doctore I-II. q. 9. a. 6. ad 3. Etenim omnis physica praemotio vel est voluntatis ante determinationem rationis per consilium, vel post consilium rationis determinantis, vel supra omnem determinationem humanae rationis.

In summo gradu physicae praemotionis, qua creatura rationalis potest moveri et applicari ad operandum, veniunt collocandae motiones, quibus moventur in via viri sanctissimi et in patria omnes beati. Haec est altissima motio, qua movebatur Christus Dominus, dum in terris visus et cum hominibus conversatus est; qua etiam movebatur Beatissima Virgo, praesertim postquam ex suis visceribus genuit Deum et hominem (III. q. 27. a. 4. et 5. et a. 3. ad 3.); et qua moventur aliqui in hac vita iusti perfectissimi, de quibus D. Thomas I-II. q. 61. a. 5. et S. Joannes a Cruce in opere, cui titulus « *Subida del Monte Carmelo* » lib. 3. cap. 1. <sup>1</sup>.

<sup>1</sup> D. Thomas I-II. q. 61. a. 5. : « Quaedam vero sunt virtutes jam assequentium divinam similitudinem, quae vocantur virtutes jam purgati animi; ita sc. quod prudentia sola divina intueatur, temperantia terrenas cupiditates nesciat, fortitudo passiones ignoret, iustitia cum divina mente perpetuo foedere societur, eam sc. imitando : quas quidem virtutes dicimus esse beatorum vel aliquorum in hac vita perfectissimorum. » De quibus S. JOANNES A CRUCE loco

supra citato : « Y asi de ordinario los primeros movimientos de las potencias de estas almas son como divinos ; y no hay que maravillarse que lo sean, pues estan trasformados en sér Divino... Dios con particularidad mueve las potencias de estas almas ;... y asi las obras y ruegos de estas almas siempre tienen efecto. Tales eran las de la gloriosa Madre de Dios, la cual estando desde el principio levantada a este alto estado, nunca tuvo en su alma impresa forma alguna de criatura que la divirtiese de Dios, ni por ella se movió ; porque siempre su mocion fuè del Espiritu Sancto. » De hujusmodi divinis motionibus loquitur etiam D. Thomas in suis *Comment. in Cantic.* Sic in cap. I. declarans illa verba : *Trahe me post te*, Angelicus Doctor scribit : « Non ad insipientiam dico : *Trahe me post te* ; quia tuus tractus est suavis et validus. Quia si tu me traxeris, non solum movebor qualitercumque, sed etiam curram *in odorem unguentorum tuorum*, id est, velociter movebor, dummodo possim suaviter odorare virtutem et dona tua. Notandum autem, quod cum sponsa dicit se cursuram ad tractum Christi, confitetur ejus tractum non esse violentum, sed *suavem* ; nam currere est voluntate moveri. Rursum confitetur talem tractum esse *fortem* ; quia in cursu notatur velocitas motus, quae sine magna virtute esse non potest. Nec mirum, si Christus trahit suaviter et fortiter ; quia Christus est *Dei virtus et Dei sapientia*, secundum Apostolum (I Cor. 1, 24) ; et sapientia, ut legitur (Sap. 8, 1) : *Attingit a fine usque ad finem fortiter et disponit omnia suaviter.* »

Atque ibidem in cap. 5. exponit sic intrinsecam efficaciam harum divinarum motionum : « Deinde cum dicit : *Dilectus meus misit manum suam per foramen*, ponitur Christi attractio ; nam licet sponsa se excusaret, tamen tanta fuit potentia Christi, quod virtute sua eam attraxit, voluntatem suam inclinando, ut vellet habere curam filiorum. Continuatur sic : Ego sponsa me excusabam, ne rediret ad activam vitam ; sed *Dilectus meus* Christus, qui est potentiae infinitae, *misit manum suam per foramen*, id est, intellectum vel affectum ; quia intellectus vel etiam affectus sunt quasi quaedam foramina et rimulae, per quas ad nos Christus ingreditur. *Et ad tactum ejus*, id est, ad istam immissionem virtutis, secundum quam me Christus tetigit, *venter meus*, id est, mollior pars in me *intremuit*, id est, prae timore obstupuit, non audens renuere quod sponsus vult ; quasi dicat : Tanta fuit virtus Christi, quod non solum fortiores partes animae fuerunt paratae ad obediendum Christo, sed etiam debiliores. Deinde dicit : *Surrexi, ut aperirem dilecto* ; quia, ut dictum est, tanta fuit virtus Christi, quod totam sponsam convertit ad suam voluntatem. » Haec D. Thomas, qui jam in *Prooemio expositionis* adnotaverat : « In hoc autem libro specialiter manuducimur ad divinam dilectionem, considerando divi-

nam benignitatem et meditando, quanta affectione Christus sponsam suam diligit, et quanto desiderio moveri debet anima sancta ad gustandum dulcedinem divinam. Quae si bene advertimus, non inconvenienter finis hujus libri assignatur *dilectio Dei*, licet etiam hoc sit finis totius doctrinae sacrae; speciali enim modo liber iste provocat ad dilectionem Dei et proximi. »



## CAPUT OCTAVUM

### De concordia physicae praemotionis cum libero arbitrio.

#### I

#### PRAENOTANDA

PRIMO : Documenta S. Augustini et D. Thomae in hac quaestione constanter servanda. — Controversiam jam illam aggredimur, de qua S. Augustinus *I. De gratia Christi* cap. 47. : « Ista quaestio, inquit, ubi de arbitrio voluntatis et Dei gratia disputatur, ita est ad discernendum difficilis, ut quando defenditur liberum arbitrium, negari Dei gratia videtur; quando autem asseritur Dei gratia, liberum arbitrium putetur auferri. » Et postea scripsit librum unum *De grat. et lib. arbit.* cap. 1. « propter eos, qui hominis arbitrium sic praedicant et defendunt, ut Dei gratiam, qua vocamur ad eum et a nostris malis meritis liberamur, et per quam bona merita comparamus, quibus ad vitam perveniamus aeternam, negare audeant et conentur auferre ». « Sunt quidam, addit, qui sic gratiam Dei defendunt, ut negent hominis liberum arbitrium; aut quando gratia defenditur, negari existiment liberum arbitrium. »

In hujus adeo difficilis quaestionis dilucidatione tria magni momenti documenta atque admonitiones a S. Augustino et a D. Thoma nobis servanda traduntur. *Primo* namque, ut minime ea denegemus, quae in controversia sunt aperta seu in perspicuo posita, quia utriusque extremi oppositio non



clare videatur conciliari. Reddenda sunt ergo, quae sunt Dei, Deo; et quae sunt liberi arbitrii, libero arbitrio etiam donanda, quamvis concordia liberi arbitrii cum Dei gratia in obscuritate et mysterio videatur remanere. Unde S. Augustinus, *De dono persever.* cap. 14. : « Numquid ideo negandum est quod apertum est, quia comprehendere non potest quod occultum est? Numquid, inquam, propterea dicturi sumus, quod ita esse perspicimus, non ita esse, quoniam cur ita sit non possumus invenire? » Et D. Thomas Rom. 11. lect. 5. : « Etsi ipsae creaturae sint homini notae, tamen modi, quibus Deus in creaturis operatur, ab homine comprehendere non possunt. »

*Alterum* vero documentum in hac liberi arbitrii cum Dei gratia concordia observandum traditur a S. Augustino, *De grat. et lib. arbit.* cap. 1. his verbis : « Itaque, dilectissimi, ne vos perturbet hujus quaestionis obscuritas, moneo vos primum, ut de iis, quae intelligitis, agatis Deo gratias; quidquid est autem, quo pervenire nondum potest vestrae mentis intentio, pacem inter vos et caritatem servantes a Domino, ut intelligatis, orate; et donec vos ipse perducatur ad ea, quae nondum intelligitis, ibi ambulate, quo pervenire potuistis. » Et D. Thomas *De Verit.* q. 6. a. 3. : « In praedestinatione autem invenitur certitudo respectu singularis finis; et tamen causa proxima, sc. liberum arbitrium, non producit effectum illum nisi contingenter. Unde difficile videtur concordare infallibilitatem praedestinationis cum libertate arbitrii. »

*Tertium* denique documentum traditur a D. Thomas *I. Perihier.* lect. 14., ubi postquam praeposuit objectiones contra liberum hominis arbitrium : 1<sup>o</sup> ex parte divinae scientiae quae non potest falli, « et ita ea, quae ipse (Deus) scit, videtur quod necesse sit evenire »; 2<sup>o</sup> ex parte divinae voluntatis : « Voluntas enim Dei inefficax esse non potest; videtur ergo, quod omnia, quae (Deus) vult, ex necessitate eveniant »; statim, antequam respondeat directe ostendendo, quod solutio difficultatis inde quaerenda est, unde difficultas oritur, nempe in ipsa infallibilitate divinae scientiae ac praesertim in ipsissima efficacia divinae voluntatis,

admonet nos de Deo et creaturis nihil praedicari univoce nec quoad *esse*, nec quoad *posse*, nec quoad *operari*. Unde observat sagaciter ac profunde : « Procedunt autem hae objectiones ex eo, quod cognitio divini intellectus et operatio divinae voluntatis pensantur ad modum eorum, quae in nobis sunt, cum tamen multo dissimiliter se habeant. »

**SEGUNDO : Quomodo se habeant ad invicem esse necessarium et esse liberum.** — Praeterea : quomodo ergo in concordia liberi arbitrii cum gratia ex se efficaci vel cum physica Dei praemotione poterit aliquis recte procedere, vel ad harmoniam eorum, quae videntur ad invicem opposita et irreductibilia, pervenire, si revera ipsum ignorare contingat rationem liberi arbitrii simul ac rationem physicae praemotionis? De physica Dei motione in potentiam et actum liberae voluntatis satis dixisse arbitramur; et quamvis haud pauca de libero quoque arbitrio supra dicta remaneant, attamen non abs re fortasse erit adhuc pressius, quid sit liberum arbitrium, definire, et in quo differant necessarium et liberum. Unde :

a) *Liberum et necessarium inter se ad invicem opponuntur.* Necessarium autem per comparisonem ad actus nostrae voluntatis tripliciter potest dici, nempe necessarium necessitate naturali et absoluta, necessarium necessitate finis, et necessarium necessitate coactionis. Ex his tribus sola necessitas coactionis omnino repugnat voluntati; coactum enim est, quod est voluntati contrarium. Necessitas autem finis et necessitas naturalis non repugnant voluntati; quoniam necessitas naturalis ex interiori inclinatione ipsius voluntatis procedit; et necessitas finis, quamvis non proveniat ex interiori inclinatione voluntatis, provenit tamen ex ordine ad finem, quem voluntas naturali inclinatione vult. Violentia seu coactio involuntarium causat; necessitas autem naturalis et necessitas finis minime involuntarium causant, cum interiori inclinationem voluntatis praesupponant atque augeant et ad illam reducantur. Unde omnis actus voluntatis semper semperque est voluntarius, et quantum ad ipsum actum pro-

prium voluntatis non potest ei violentia inferri. (I. q. 82. a. 1.; I-II. q. 6. a. 4.; III. C. Gent. cap. 138.)

b) *Liberum ergo et necessarium dividunt in duas species actus humanae voluntatis.* Actus enim necessarius et actus liber conveniunt in genere, in hoc sc., quod uterque procedit: 1<sup>o</sup> ab intellectu per potentiam voluntatis, quoniam omnis motus voluntatis praesupponit necessario apprehensionem intellectus; voluntas enim tendit sive necessario sive libere in bonum, prout est ab intellectu apprehensum et voluntati praesentatum; 2<sup>o</sup> ab intrinseco principio, quod est potentia voluntatis, a qua immediate elicitur; ac proinde uterque actus, tam necessarius quam liber, est spontaneus ac voluntarius. Unde D. Thomas *De Verit.* q. 24. a. 1. ad 20. ait, quod etiam respectu finis ultimi « habemus liberam voluntatem, cum necessitas naturalis inclinationis libertati non repugnet, secundum Augustinum *I. De Civit. Dei* cap. 20.; non autem liberum iudicium, proprie loquendo, cum non cadat sub electione ».

c) *Liberum et necessarium, etsi opponantur ad invicem ita ut se excludant in eodem actu, attamen non se excludunt in diversis specie actibus ejusdem potentiae: immo necessarium est fundamentum liberi.* Etenim voluntas, ut *natura* quaedam est, includitur in ipsa voluntate ut est *voluntas*; et sicut est ordo naturae ad voluntatem, ita se habet ordo eorum, quae naturaliter vult voluntas, ad ea, respectu quorum a seipsa determinatur, non ex natura. Et ideo, sicut *natura* est voluntatis fundamentum, ita appetibile, quod naturaliter appetitur, est aliorum appetibilium principium et fundamentum. (*De Verit.* q. 22. a. 5.) Si ergo voluntas non eliceret aliquem actum *necessarium*, nullum posset *liberum* elicere. Quaelibet itaque voluntas naturaliter vult illud, quod est proprium volentis bonum, sc. ipsum esse perfectum; et non potest contrarium hujus velle. Unusquisque vult esse perfectus; et hoc est illud bonum in communi, ad quod voluntas de necessitate determinatur; hic est ille ultimus finis, propter quem appetit homo omnia, quaecumque vult. Et quoniam finis se habet

in appetibilibus sicut principium in speculativis, inde est, quod voluntas se habet circa finem et circa reliqua omnia praeter finem sicut intellectus circa prima principia et circa conclusiones. Intellectus non inhaeret naturaliter et ex necessitate nisi primis principiis et conclusionibus, quae habent necessariam connexionem ad prima principia; similiter voluntas non de necessitate inhaeret nisi ultimo fini, id est, beatitudini et illis bonis, quae necessariam dicunt connexionem ad beatitudinem; atque simul connexionis necessitas appareat evidenter manifesta ipsi voluntati. Quapropter in via, cum non cognoscamus Deum nisi in speculo et in aenigmate, voluntas non ex necessitate Deo inhaeret, nec his, quae Dei sunt. Sed voluntas videntis Deum per essentiam, de necessitate inhaeret Deo, sicut nunc ex necessitate volumus esse beati. Unde in homine sicut se habet potentia cognoscitiva, ut *intellectus*, ad seipsam, ut *ratio*: ita se habet potentia volitiva, ut *voluntas*, ad seipsam, ut *liberum arbitrium*. Ejusdem potentiae est intelligere et ratiocinari, sicut ejusdem virtutis est quiescere et moveri, et ejusdem potentiae est velle et eligere. Velle et eligere sunt quidem actus diversi specie; non tamen pertinent ad diversam potentiam, sed ad eandem. Voluntas est appetitus intellectivus et rationalis; secundum ergo quod bonum naturaliter vult, respondet intellectui naturalium principiorum; secundum vero quod bonum libere vult, respondet rationi, quae ad opposita se habet. (I. q. 82. a. 1. et q. 83. a. 2. et 4.)

**TERTIO : Quid sit liberum arbitrium.** — Si nunc igitur potentiam liberi arbitrii sub forma definitionis voluerimus considerare, hae quidem, quae subsequuntur, tamquam optimae, profundae ac valde philosophicae adducuntur atque ponderantur ab ipso Angelico Doctore. Quarum sit :

*Prima : Liberum est, quod sui causa est.* — Haec enim definitio affertur a Philosopho *I. Metaph.* ubi ad ostendendam dignitatem metaphysicae supra omnes humanas scientias, ait : « Sed quemadmodum dicimus : homo liber, qui suimet et non alterius causa est, sic et haec libera est



scientiarum, siquidem sola haec suimet causa est sive sui-ipsius gratia est. » Quam probationem explanans D. Thomas lect. 2. addit : « Hic probat (Philosophus),... quod ipsa (sapientia seu philosophia prima) sit libera, et utitur tali ratione. Ille homo proprie dicitur liber, qui non est alterius causa, sed est causa suiipsius. Servi enim dominorum sunt, et propter dominos operantur et eis acquirunt quidquid acquirunt. Liberi autem homines sunt suiipsorum, utpote sibi acquirentes et operantes. Sola autem haec scientia est propter seipsam; ergo ipsa sola est libera inter scientias. »

Unde de ratione liberi est : 1° non ordinari ad aliud tamquam ad causam finalem ; 2° non subesse sub potestate alterius ; 3° esse supra omnes ; 4° esse dominum sui ipsius quoad *esse*, quoad *posse* et quoad *operari*. Inquirite inter omnia, quae existunt in universo mundo, quibus convenient vel non convenient hujusmodi quatuor characteres ; et illa, quibus conveniunt, sunt libera ; illa autem, quibus non conveniunt, libera non sunt ; illa, quibus magis conveniunt, majoris erunt libertatis ; et sic ascendendo usque ad aliquod unum, cui soli simpliciter et absolute et per se illa quatuor competunt, et in quo refulget plenitudo libertatis ; et hoc unum, quod est liberum per essentiam, omnes intelligunt Deum. Haec autem prima liberi arbitrii definitio est omnium altior ac profundior, utpote continens omnium aliarum supremam rationem. Multis in locis a D. Thoma declaratur (I. q. 83. a. 1. et *De Verit.* q. 24. a. 1. et alibi pluries). Verumtamen qui longitudinem, latitudinem et profunditatem praedictae definitionis perspicere desideret, adeat I. q. 2. a. 3. et q. 18. a. 3. et I-II. q. 1. a. 2. ; quoniam isti tres articuli constituunt verissimum commentarium hujusce veritatis : *Liberum est quod sui causa est.*

Solus Deus est causa sui ; omnia alia praeter Deum sunt causa Dei. Solus Deus existit et operatur gratia sui ; cetera omnia praeter Deum existunt et operantur gratia Dei. Solus Deus non ordinatur ad aliud, cum ipse sit causa finalis, ad quam ordinantur omnes res. Solus non subest sub alterius potestate, cum ipse sit, a quo est omnis potestas in coelo

et in terra. Solus est supra omnia, cum omnia sint ab ipso et per ipsum et sub ipso et in ipsum. Solus Deus est verus dominus sui ipsius quoad *esse*, quoad *posse* et quoad *operari*; quia solus ipse est primum movens, quod a nullo movetur et a quo cuncta moventur; et prima causa efficiens, quae nullam habet causam, et a qua omnes aliae causae causantur et efficiuntur; ultima causa finalis, quae nullum habet finem, et ad quam omnes fines velut quaedam media ordinantur.

Solus Deus est actus purus, qui a nullo alio agitur, et a quo universa aguntur. Quoniam omnia, etiam ipsa, quae se agunt et se in agendo movent, ab ipso accipiunt: 1<sup>o</sup> potestatem se movendi et agendi; 2<sup>o</sup> principium et finem, intra quos velut terminos se movent, dum agunt; et 3<sup>o</sup> ipsum esse et ipsum vivere et ipsum moveri, quae immediate immediatione virtutis causantur a Deo. Unde D. Thomas I. q. 60. a. 1. ad 2. : « Dicendum, quod omnia, quae sunt in toto mundo, aguntur ab aliquo, praeter primum agens, quod ita agit, quod nullo modo ab alio agitur: in quo est idem natura et voluntas. »

Cetera vero omnia agunt se plus minusve, secundum quod elongantur a materia, quae est pura potentia in linea entis, et appropinquant ad Deum, qui est actus purus in omni genere perfectionum, quoniam est actus purus in ordine essendi. Et sicut in plantis dicitur esse ultima resonantia vitae, pari modo dici potest, quod in brutis coruscare incipit prima umbra libertatis; quamvis, proprie loquendo, primus gradus libertatis, incipiendo ab imperfectiori, ibi revera adest, ubi refulget vita rationalis, quae est quaedam participata similitudo Luminis Increati, quod illuminat omnem hominem venientem in hunc mundum. Quapropter D. Thomas I-II. q. 1. a. 2. : « Ideo proprium est naturae rationalis, ut tendat in finem quasi se agens vel ducens ad finem; naturae vero irrationalis, quasi ab alio acta vel ducta, sive in finem apprehensum sicut bruta animalia, sive in finem non apprehensum sicut ea quae omnino cognitione carent. » Unde definitio liberi arbitrii :

*Secunda* est : **Facultas voluntatis et rationis.** — Quam quidem liberi arbitrii definitionem adeo graphicam et syntheticam ubique passim repetere et explicare amat Angelicus Doctor sive in Summa Theol. sive in Quaest. Disput. sive in Commentariis supra libros Sententiarum. Ex illa infertur liberum arbitrium esse tamquam in sua radice in intellectu et in voluntate tamquam in proprio subjecto. Radix enim proxima atque immediata actus liberi est amplitudo et capacitas voluntatis ad omne bonum, ad bonum universale. Propterea ait D. Thomas I. q. 105. a. 4. : « Potest autem voluntas moveri sicut ab objecto a quocumque bono; non autem sufficienter et efficaciter nisi a Deo; non enim sufficienter aliquid potest movere aliquod mobile, nisi virtus activa moventis excedat vel saltem adaequet virtutem passivam mobilis. Virtus autem passiva voluntatis se extendit ad bonum in universali; est enim ejus objectum bonum universale, sicut et intellectus objectum est ens universale. Quodlibet autem bonum creatum est quoddam particulare bonum; solus autem Deus est bonum universale. »

Radix autem prima remota intrinseca hujus infinitae capacitatis nostrae voluntatis est ipsa immaterialitas ac elevatio animae rationalis; et radix proxima est amplitudo intellectus et universalitas ejus in cognoscendo et judicando de omnibus. Quamobrem D. Thomas I-II. q. 2. a. 8. : « Objectum autem voluntatis, quae est appetitus humanus, est universale bonum, sicut objectum intellectus est universale verum. Ex quo patet, quod nihil potest quietare voluntatem hominis nisi bonum universale; quod non invenitur in aliquo creato, sed solum in Deo, quia omnis creatura habet bonitatem participatam. Unde solus Deus voluntatem hominis implere potest. »

Exinde est, quod D. Thomas totam rationem libertatis ex modo cognitionis affirmat dependere et totius libertatis radicem in ratione esse constitutam; et secundum quod aliquid se habet ad rationem, sic ipsum se habere asserit ad liberum arbitrium. Unde in brutis est quaedam similitudo liberi arbitrii, sicut est quaedam similitudo rationis. In

homine liberum arbitrium plenarie invenitur et proprie loquendo, quia ratio plene et perfecte invenitur solum in homine. In angelis liberum arbitrium est excellentius quam in hominibus, sicut et intellectus. In Deo autem liberum arbitrium excellit supra omnem modum ; quia ubicumque est intellectus, est liberum arbitrium ; et Dei natura est ipsum ejus intelligere. (I. q. 18. a. 3. ; q. 19. a. 10. ; q. 59. a. 3.) Atque ex hoc procedit alia liberi arbitrii magis pressa definitio, quae est :

*Tertia : Liberum de ratione judicium.* — Hanc liberi arbitrii definitionem tradit D. Thomas *II. C. Gent.* cap. 48. et illam evolvit, dum ostendit in hoc loco substantias intellectuales esse liberi arbitrii in agendo. Sunt enim res, quae nullum habent judicium de agendis, sicut lapides et plantae, quae absolute cognitione carent. Sunt autem res, quae habent de agendis aliquod judicium, sicut bruta, quae naturali aestimatione judicant ; sed judicium in eis non est liberum, sed a natura determinatum ad unum. Sunt autem res, quae habent perfectum judicium de agendis, non ex naturali tantum instinctu in particulari, sed ex collatione rationis, quae potest in diversa ferri ; non a natura determinatum, sed determinatum ex eo, quod seipsas in judicando movent, ut creatura rationalis. Unde in plantis et inanimatis nullum est de agendis judicium ; in brutis animalibus jam adest aliquod judicium de agendis, at non liberum, sed determinatum ad unum per naturam ; in creatura vero rationali reperitur judicium de agendis ex eo, quod in judicando seipsam movet et per judicium seipsam determinat ad volendum hoc vel illud. Unde essentialis ratio liberi arbitrii oritur ex hoc, quod libere agens se ad judicandum movet, se ad judicandum agit, suumque judicium cognoscit et supra suum tam intellectus quam voluntatis actum potest se reflectere. Idecirco, ubicumque est indifferentia judicii de agendis, ibi est dominium proprii actus, ibi liberum arbitrium, quod definitur : *Liberum de ratione judicium.* (I. q. 83. a. 1. et *De Verit.* q. 24. a. 2.)

*Quarta* autem definitio liberi arbitrii est : **Potentia ad oppo-**



**sitos actus se habens.** — Hanc liberi arbitrii definitionem, quae infertur ex antecedentibus, quaeque affertur etiam a Philosopho IX. *Metaph.* declarat Angelicus Doctor in eodem loco lect. 2. dicens : « In potentiis irrationalibus quando passivum appropinquat activo in illa dispositione, qua passivum potest pati et activum potest agere, necesse est quod unum patiatur et alterum agat, ut patet quando combustibile applicatur igni. In potentiis vero rationalibus non est necessarium ; non enim necesse est aedificatorem aedificare, quantumcumque sibi materia appropinquaret. » Itaque in hoc, quod dicitur : *ad oppositos actus se habere*, significatur : 1<sup>o</sup> quod libere agens potest agere vel non agere ; 2<sup>o</sup> quod, posito quod agat, potest agere hoc vel illud. Primum vocatur oppositio seu indifferentia contradictionis ; alterum, oppositio seu indifferentia contrarietatis. Ubi cumque reperitur iudicium de agendis, ibi licet reperire praedictam utramque indifferentiam, quae mensuratur per ipsam perfectionem libere agentis in iudicando. Unde bruta possunt agere vel non agere unum et idem secundum suum iudicium ; possunt enim agere, si iudicant ex naturali aestimatione esse agendum ; vel non agere, si non iudicant. Sed : 1<sup>o</sup> non dependet a brutorum appetitu iudicare vel non iudicare ; 2<sup>o</sup> si de facto iudicant ex naturali instinctu, iudicium eorum est semper determinatum ad unum ; et per consequens et appetitus et actio ad unum determinatur. Creatura autem rationalis : 1<sup>o</sup> habet in potestate sua iudicare ; nam appetitus, qui est voluntas, movet quoad exercitium intellectum, ut inquirat ac iudicet ; 2<sup>o</sup> cum intellectus per suum iudicium movet quoad specificationem seu determinationem actus ipsam voluntatem, ita movet *ad unum*, ut adhuc relinquatur in potestate ipsius voluntatis acceptare vel non acceptare dictamen practicum rationis ; quoniam potest movere intellectum ad rursus inquirendum ac de novo alio modo iudicandum. Consequenter nec iudicium ex collatione rationis est determinatum *ad unum*, nec appetitus et actio creaturae rationalis ad unum determinatur de necessitate. Itaque in homine est indifferentia ad agere vel non agere, dupliciter :

uno modo, considerata ipsa actione secundum seipsam; alio modo, considerato ordine ipsius actionis ad iudicium, a quo provenit. (*De Verit.* q. 24. a. 2.)

Rursus : **Ad oppositos actus se habere** idem significat ac **ad utrumlibet esse**; et jam supra<sup>1</sup> explanatum manet ex D. Thoma *I. C. Gent.* cap. 82. quod ad utrumlibet esse potest convenire alicui virtuti operativae ex parte ipsius, vel ex parte ejus ad quod dicitur. Indifferentia vel indeterminatio ad agendum si consideretur ex parte potentiae, involvit imperfectionem, mutabilitatem et potentialitatem passivam; si vero attendatur ex parte ejus ad quod dicitur, importat eminentiam virtutis operativae, dominium sui actus et dominium supra objectum, a quo actus specificatur. Quapropter ait D. Thomas *De Verit.* q. 24. a. 3. ad 3. : « Voluntas divina se habet ad opposita, non quidem ut aliquid velit et postea nolit, quod ejus immutabilitati repugnaret; nec ut possit velle bonum et malum, quia defectibilitatem in Deo poneret; sed quia potest hoc velle et non velle. » Idcirco liberum arbitrium in creatura, etsi exprimat excellentiam potentiae operativae, semper tamen habet aliquid adjunctum potentialitatis et mutabilitatis et defectibilitatis; non quia liberum est arbitrium, sed quia est arbitrium liberum creatum ex nihilo. Sicque indeterminatio atque indifferentia potentiae liberi arbitrii est duplex : *activa* et *passiva*. Activa augetur per actum, passiva vero aufertur. Unde D. Thomas *IX. Metaph.* lect. 2. docet cum Philosopho, quod indeterminatio potentiae rationalis, quae se habet ad opposita, determinatur per electionem. « Necesse est praeter potentiam rationalem, quae est communis ad duo contraria, poni aliquid, quod appropriet eam ad alterum faciendum ad hoc, quod exeat in actum. Hoc autem est electio, quae pertinet ad rationem. Quod enim aliquis considerat, hoc facit, ita tamen, si existit in dispositione qua est potens agere, et passivum adsit. Unde si cut potens potentia irrationali necessario agit, passivo appropinquante, ita omne potens secundum rationem necesse

<sup>1</sup> Vide supra cap. 4. pag. 159.

est quod faciat, quando desiderat illud, cujus habet potentiam, et eo modo quo habet. » Inde :

*Quinta* definitio liberi arbitrii est : **Facultas electiva mediorum, servato ordine finis.** — Hanc definitionem tradit D. Thomas I. q. 62. a. 8. ad 2. et ad 3. et declarat ex professo q. 83. praesertim a. 3., in quo ostendit, quod *naturam liberi arbitrii ex electione considerare oportet*. Quam quidem declarationem complet I-II. q. 6. a. 1., dum demonstrat liberum esse illud agens, quod habet in seipso principium sui actus, non solum ut agat, sed etiam ut agat propter finem cum cognitione finis ; atque perficit deinde q. 13., ubi naturam electionis perpendit. His prae notatis :

Tria in praesenti capite oportet exponere atque peragere :

1<sup>o</sup> Argumenta contra concordiam physicae praemotionis cum libero arbitrio physice praemoto ;

2<sup>o</sup> Argumenta pro concordia physicae praemotionis cum libero arbitrio physice praemoto ;

3<sup>o</sup> Solutio argumentorum in contra.

## II

### Argumenta contra concordiam physicae praemotionis cum libero arbitrio.

Argumenta omnia, quae contra intrinsecam divinae gratiae efficaciam afferri solent, possunt reduci ad tria capita, sc. 1<sup>o</sup> ad efficaciam ipsius divinae voluntatis ; 2<sup>o</sup> ad infallibilitatem divinae sapientiae, quae voluntate adjuncta est causa efficiens omnium rerum ; et 3<sup>o</sup> ad naturam ipsius divinae motionis, qua liberum hominis arbitrium physice movetur a Deo, dum exsequitur ut primus motor ac prima causa ordinem generalem suae providentiae et ordinem specialem praedestinationis, quae quantum ad objecta pars est providentiae. Nullae sunt alicujus momenti difficultates, quae in

hac materia non fuerint ab ipso Angelico Doctore excogitatae et convenienter solutae <sup>1</sup>. Ex illis quaedam, quae principiores videntur, diversis ex locis suorum operum depromuntur.

## § 1

### **Difficultates sumptae ex efficacia divinae voluntatis.**

1. Videtur, quod voluntas ex necessitate moveatur a Deo. Omne enim agens, cui resisti non potest, ex necessitate movet. Sed Deo, cum sit infinitae virtutis, resisti non potest; unde dicitur Rom. 9, 19 : « Voluntati enim ejus quis resistit ? » Ergo Deus ex necessitate movet voluntatem.

2. Omnis causa, quae non potest impediri, ex necessitate suum effectum producit, quia et natura semper idem operatur, nisi aliquid impediat, ut dicitur *II. Physic.* Sed voluntas Dei non potest impediri. Dicit enim Apostolus Rom. 9, 19 : « Voluntati enim ejus quis resistit ? » Ergo voluntas Dei imponit rebus volitis necessitatem.

3. Praeterea : possibile est, quo posito non sequitur impossibile. Sequitur autem impossibile, si ponatur, quod voluntas non velit hoc, ad quod Deus eam movet, quia secundum hoc operatio Dei esset inefficax. Non ergo est possibile voluntatem non velle hoc, ad quod Deus eam movet. Ergo necesse est eam hoc velle.

4. Si homo ad eligendum movetur quodam interiori in-

<sup>1</sup> Cardinalis GONZALEZ in suo opere *Estudios sobre la filosofia de Santo Tomas* lib. 6. cap. 7. : « No se dirá que Santo Tomàs desconocia, ni menos que desvirtuaba, la fuerza de las objeciones contra la libertad. I sin embargo lejos de abandonar ni modificar su doctrina en este punto, la confirma y desenvuelve al contestar á estas objeciones... Santo Tomàs manifiesta haberse formado una idea algo más filosófica de la accion de Dios, y más en armonia con las condiciones de la Omnipotencia divina, que los que creen descubrir en esa accion de Dios la muerte de la libertad humana... La solucion de Santo Tomàs es altamente filosófica, y la única que por la elevacion del punto de vista en que se coloca, se halla en armonia con la gravedad è importancia de la objeccion. »



stinctu, sc. ab ipso Deo, immobiliter movetur. Sed immobiliter moveri repugnat libero arbitrio, de cujus ratione est se habere indifferenter ad diversa. Ergo si voluntas hominis immobiliter movetur a Deo, sequitur, quod homo non habeat liberam electionem suorum actuum.

5. Praeterea : dicere, quod Deus movet potentiam liberae voluntatis ad agendum per gratuitam motionem ex se et per se efficacem, idem est ac dicere, quod non est volentis neque currentis, sed miserentis est Dei. Sed si non est volentis velle, neque currentis, sed Dei moventis ad hoc hominem, videtur, quod homo non sit dominus sui actus : quod pertinet ad libertatem arbitrii.

6. Praeterea : non potest esse, quod liberum arbitrium creatum deficiat, voluntate divina physice illud per gratiam ex se efficacem praemovente ; sic enim simul esset divina voluntas et non esset ejus, quod est volitum a Deo : quod patet esse falsum. Est igitur incompatibilis gratia ex se efficax cum libero arbitrio creaturae.

## § 2

### **Difficultates sumptae ex infallibilitate divinae praescientiae.**

1. A causa enim necessaria procedit effectus necessarius. Sed scientia, qua Deus scit futura contingentia et libera, quae creatura rationalis ex deliberata voluntate faciet et vellet, est causa efficiens futurorum contingentium ac liberorum. Ergo, cum scientia Dei sit necessaria, vel admittenda erit *scientia media*, vel scientia Dei non erit contingentium, vel scientia futurorum liberorum, quae dicitur *scientia visionis*, destruit liberum hominis arbitrium.

2. Si Deus scit futura contingentia libera, hujusmodi actiones liberi arbitrii creati necessario erunt ; quia scientia Dei non est nisi verorum, et Deus falli non potest. Sed necessario futurum esse et libere futurum esse, mutuo sese excludunt in uno eodemque actu liberae voluntatis. Ergo vel admittenda *scientia media*, quae consequitur ad innatam propriam determinationem liberi arbitrii creati ante omn

decretum Dei ; vel si Deus scit futura libera *scientia visionis*, quae decretum divinae voluntatis praesupponit, liberum arbitrium creatum periit atque de medio tollitur.

3. Praeterea : omne scitum a Deo necesse est esse, quia etiam omne scitum a nobis necesse est esse, cum tamen scientia Dei certior sit quam scientia nostra. Sed nullum contingens futurum necesse est esse. Ergo vel admittenda *scientia media* ; vel si futurum contingens est scitum a Deo *scientia visionis* dumtaxat, actum est de libero hominis arbitrio.

4. Praeterea : si aliqua causa habet certitudinem ad aliquem effectum, effectus ille ex necessitate proveniet, nisi aliquid possit resistere virtuti agentis ; sicut dispositiones in corporibus inferioribus inventae resistunt interdum actioni corporum coelestium, ut non producant proprios effectus, quos necessario producerent, nisi esset aliquid resistens. Sed praedestinationi divinae nihil potest resistere : « Voluntati enim ejus quis resistit ? » ut dicitur Rom. 9, 19. Ergo vel admittenda scientia futurorum liberorum in Deo ante omne decretum voluntatis, et consequenter determinatio liberi arbitrii creati ex sua sola innata libertate, Deo excitante per suam gratiam, et consequenter praedestinatio post praevisa merita ; vel aliter liberum arbitrium cadet oppressum sub aeterno divinae voluntatis decreto et sub gratia ab intrinseco efficaci, per quam fit in tempore, quod Deus ab aeterno decrevit.

5. Praeterea : aliquis praedestinatus quandoque est in peccato mortali, sicut patet de Paulo, quando Ecclesiam persequabatur. Potuit autem in peccato mortali perseverare usque ad mortem, vel statim tunc interfici ; quorum utrolibet posito, praedestinatio effectum suum non consequeretur. Ergo possibile est praedestinationem non consequi effectum suum. Vel neganda igitur est gratia ex se et per se efficax, vel tollenda contingentia rerum ac indifferentia ad opposita liberi arbitrii.

6. Praeterea : quod potest esse et non esse, non habet aliquam certitudinem. Sed praedestinatio Dei de salute alicujus

potest esse et non esse; sicut enim potuit ab aeterno praedestinare et non praedestinare, ita et nunc potest praedestinare et non praedestinare, cum in aeternitate non differant praesens, praeteritum et futurum. Ergo praedestinatio non habet certitudinem, nisi forte illam certitudinem provenientem ex innata liberi arbitrii creati determinatione, quae ante omne decretum divinae voluntatis respicitur a Deo in speculo *scientiae mediae*.

7. Praeterea : in omnibus potentiis, quae non sunt praedeterminatae ad unum, quod potest esse, potest non esse. Sed potentia praedeterminantis ad praedestinatum, et potentia praedeterminati ad consequendum praedestinationis effectum, sunt huiusmodi, quia et praedeterminans voluntate praedeterminat et praedeterminatus voluntate effectum praedestinationis consequitur. Ergo praedeterminatus potest non esse praedeterminatus. Quod idem dicendum de physica Dei motione tam in ordine naturae quam in ordine gratiae. Nam Deus movens voluntate movet, et homo motus a Deo voluntatem divinae motionis consequitur. Neganda est ergo efficacia intrinseca cunctae divinae motionis, aut neganda indifferentia liberae voluntatis humanae ad opposita.

### § 3

#### **Difficultates sumptae ex ipsa natura physicae praemotionis atque ex ipsa natura liberi arbitrii.**

1. Liberum est, quod sui causa est, ut dicitur *I. Metaph.* Quod ergo movetur ab alio, non est liberum. Sed Deus movet voluntatem; dicitur enim Prov. 21, 1 : « Cor regis in manu Domini, et quocumque voluerit vertet illud »; et Philipp. 2, 13 : « Deus est qui operatur in vobis velle et perficere. » Ergo aut homo non movetur physice a Deo, aut homo non est liberi arbitrii.

2. Omne enim quod movetur ab extrinseco, cogitur. Sed voluntas non potest cogi. Ergo non movetur ab aliquo extrinseco. Ergo non potest moveri a Deo tamquam a principio exteriori per modum causae efficientis, id est physica motione.

3. Praeterea : Deus non potest facere, quod contradictoria sint simul vera. Hoc autem sequeretur, si voluntatem physice praemoveret; nam voluntarie moveri est ex se moveri et non ab alio. Ergo Deus non potest physice voluntatem movere.

4. Praeterea : motus magis attribuitur moventi quam mobili; unde homicidium non attribuitur lapidi, sed projicienti. Si igitur Deus moveat voluntatem, sequitur, quod opera voluntaria non imputentur homini ad meritum vel demeritum. Hoc autem est falsum. Non ergo Deus movet voluntatem.

5. Praeterea : qui voluntarie agit, per se agere potest. Sed hoc homini non convenit; dicitur enim Joh. 15, 5 : « Sine me nihil potestis facere. » Ergo cum hoc conferatur homini per physicam Dei motionem, sc. *ultimum posse agere*, seu quod idem est, *primum inchoare actum*, sequitur, quod voluntarium in humanis actibus non invenitur.

6. Praeterea : omne quod movetur, est sicut instrumentum. Instrumentum autem non est liberum ad agendum. Si ergo homo in agendo physice a Deo praemovetur, absque dubio est instrumentum divinae virtutis principaliter ipsum moventis. Aut ergo homo non est liberi arbitrii, aut Deus per physicam suam motionem non utitur homine vel creatura rationali tamquam instrumento.

7. Praeterea : voluntas est domina sui actus. Hoc autem non esset, si agere non posset, nisi Deo in ipsa operante, cum voluntas nostra non sit domina divinae operationis. Ergo Deus non operatur in voluntate nostra operante.

8. Praeterea : liberum est, quod causa sui est. Quod ergo non potest agere, nisi causa in ipso agente, non est liberum in agendo. Sed voluntas nostra est libera in agendo. Ergo potest agere, nulla alia causa in ipsa operante. Ergo absque physica Dei praemotione.

9. Praeterea : voluntas incipit eligere, cum prius non eligeret. Aut ergo quia mutatur a dispositione, in qua prius erat, aut non. Si non, sequitur, quod sicut prius non eligebat, ita nec modo; et sic non eligens eligeret, quod est impos-



sibile. Si autem mutatur ejus dispositio, necesse est quod ab aliquo sit mutata ; quia omne quod movetur, ab alio movetur. Movens autem imponit necessitatem mobili, alias non sufficienter moveret ipsum. Ergo voluntas ex necessitate movetur.

10. Praeterea : ad libertatem liberi arbitrii pertinet, ut aliquis sit dominus sui actus. Sed cujuscumque agentis actus ab aliquo priori agente causatur, ipse agens non est dominus sui actus. Cum igitur cujuslibet creaturae actus in causam priorem reducatur, quae est ipse Deus, qui omnia opera nostra in nobis operatur, videtur, quod liberum arbitrium in creatura nulla invenitur.

### III

#### CONCLUSIO

**Gratia ex se efficax, qua Deus physice movet potentiam liberi arbitrii ad opera salutaria, non modo non laedit nec minuit liberum arbitrium creatum, verum etiam ipsum auget atque perficit.**

#### § 1

##### **Argumenta ex auctoritate.**

Arg. 1<sup>um</sup>. — *Ex auctoritate S. Augustini.* — Primo ex dictis supra cap. 3., juxta S. Augustinum unus ex sex characteribus essentialibus gratiae ex se et per se efficacis est : « augere ipsam libertatem voluntatis humanae. » Deinde : *De grat et lib. arbit.* cap. 20. ait de gratia Dei : « Satis me disputasse arbitror adversus eos, qui gratiam Dei vehementer oppugnant, qua voluntas humana non tollitur, sed ex mala mutatur in bonam ; et cum bona fuerit, adjuvatur. » Praeterea : *De corrept. et grat.* cap. 12. : « Subventum est igitur infirmitati voluntatis humanae, ut

divina gratia indeclinabiliter et insuperabiliter ageretur : et ideo, quamvis infirma, non tamen deficeret, nec adversitate aliqua vinceretur. » Amplius : *IV. Contra duas epist. Pelag.* cap. 6. exponens illa verba Ezechielis 36. : « Spiritum meum dabo in vobis, et faciam, ut in justificationibus meis ambuletis... » ait de Pelagianis : « Adversus Manichaeos laudant liberum arbitrium adhibentes propheticum testimonium : quid eis hoc prodest? quandoquidem non contra Manichaeos defendunt, quam contra Catholicos extollunt liberum arbitrium... Quid adhuc vos inflatis? Nos quidem ambulamus, verum est; nos observamus, nos facimus; sed ille (Deus) facit, ut ambulemus, ut observemus, ut faciamus. Haec est gratia Dei bonos faciens nos; haec est misericordia ejus praeveniens nos..... Quid mihi obtendis liberum arbitrium, quod ad faciendum justitiam liberum non erit, nisi ovis fueris? Qui facit igitur oves homines, ipse ad obedientiam pietatis humanas liberat voluntates. »

Adhuc *IV. Contra Julianum* cap. 8. : « Asseris me in alio libro meo dixisse : « Negari liberum arbitrium, si gratia commendetur; et iterum negari gratiam, si liberum commendetur arbitrium. » Calumniaris; non hoc a me dictum est, sed propter ipsius quaestionis difficultatem videri hoc posse dictum est et putari... Redde verba mea, et vanescet calumnia tua. Repone suis locis, ubi dixi : « videatur », ubi dixi « putetur », ut appareat de re tanta, quibus abs te fraudibus disputetur. Non dixi negari gratiam, sed : ut negari gratia videatur. Non dixi : negari liberum arbitrium vel auferri, sed dixi : ut putetur auferri. Ego enim dixi istam quaestionem esse ad discernendum difficilem; non autem dixi : non posse discerni. »

Ac denique *De corrept. et grat.* cap. 8. : « Ecce quemadmodum secundum gratiam Dei, non contra eam, libertas defenditur voluntatis! Voluntas quippe humana non libertate consequitur gratiam, sed gratia potius libertatem, et ut perseveret, delectabilem perpetuitatem et insuperabilem fortitudinem. » Et cap. 11. : « Fit quippe in nobis per hanc Dei gratiam in bono recipiendo et perseveranter tenendo,

non solum posse quod volumus, verum etiam velle quod possumus. Quod non fuit in homine primo; unum enim horum in illo fuit, alterum non fuit. Neque ut reciperet bonum, gratia non egebat, qui nondum perdiderat; ut autem in eo permaneret, egebat adjutorio gratiae, sine quo id omnino non posset, et accipere posset, si vellet; sed non habuit velle quod posset; nam si habuisset, perseverasset. Posset enim perseverare, si vellet; quod ut nollet, de libero descendit arbitrio, quod tum ita liberum erat, ut et bene velle posset et male. Quid erit autem liberius libero arbitrio, quando non poterit servire peccato, quae futura erat et homini, sicut facta est angelis sanctis, merces meriti? Nunc autem per peccatum perduto bono merito in his, qui liberantur, factum est donum gratiae, quae merces meriti futura erat. » Et cap. 12. concludit : « Prima ergo libertas voluntatis erat posse non peccare; novissima erit multo major, non posse peccare. Prima immortalitas erat, posse non mori; novissima erit multo major, non posse mori. Prima erat perseverantiae potestas, bonum posse non deserere: novissima erit felicitas perseverantiae, bonum non posse deserere. Numquid quia erunt bona novissima potiora atque meliora, ideo fuerint illa prima vel nulla vel parva? » Et iterum cap. 11. : « Haec prima est gratia, quae data est primo Adam, sed hac potentior est in secundo Adam. Prima est enim, qua fit, ut habeat homo justitiam, si velit; secunda ergo plus potest, qua etiam fit, ut velit, et tantum velit tantoque ardore diligit, ut carnis voluntatem contraria concupiscentem voluntate spiritus vincat. Nec illa quidem parva erat, qua demonstrata est etiam potentia liberi arbitrii, quoniam sic adjuvabatur, ut sine hoc adjutorio in bono non maneret; sed hoc adjutorium, si vellet, desereret. Haec autem tanto major est, ut parum sit homini per illam reparare perditam libertatem; parum sit denique non posse sine illa vel apprehendere bonum vel permanere in bono, si velit, nisi etiam efficiatur, ut velit. »

Quam quidem pulcherrimam de gratia ex se et per se efficaci notionem, unde liberum hominis arbitrium extollitur

atque usque ad summum suae perfectionis elevatur, rursus tradit S. Augustinus XXII. *De Civitate Dei* cap. 30. : « Primum liberum arbitrium, quod homini datum est, quando primum creatus est rectus, potuit non peccare, sed potuit et peccare; hoc autem novissimum eo potentius erit, quo peccare non poterit. Verum hoc quoque Dei munere, non suae possibilitate naturae. Aliud est enim esse Deum, aliud participem Dei. Deus natura peccare non potest; particeps vero Dei ab illo accipit, ut peccare non possit. Servandi autem erant gradus divini muneris, ut primum daretur liberum arbitrium, quo non peccare posset homo; novissimum, quo peccare non posset; atque illud ad comparandum meritum, hoc ad recipiendum praemium pertineret. Sed quia peccavit ista natura, cum peccare potuit, largiori gratia liberatur, ut ad eam perducatur libertatem, in qua peccare non possit. Sicut enim prima immortalitatis fuit, quam peccando Adam perdidit, posse non mori, novissima erit non possi mori : ita primum liberum arbitrium, posse non peccare, novissimum non posse peccare. Sic erit inamissibilis voluntas pietatis et aequitatis, quomodo est felicitatis... Erit ergo illius Civitatis et una in omnibus et inseparabilis in singulis voluntas libera, ab omni malo liberata et impleta omni bono, fruens indeficienter aeternorum jucunditate gaudiorum, oblita culparum, oblita poenarum; nec tamen ideo suae liberationis oblita, ut Liberatori suo non sit grata. »

Et in *Epist. ad Vitalem*<sup>1</sup> cap. 3. : « Si vere volumus defendere liberum arbitrium, non oppugnemus unde fit liberum. Nam qui oppugnat gratiam, qua nostrum ad declinandum a malo et faciendum bonum liberatur arbitrium, ipse arbitrium suum adhuc vult esse captivum... Ita fit, ut neque fideles fiant nisi libero arbitrio, et tamen illius (Dei) gratia fideles fiant, qui eorum a potestate tenebrarum liberavit arbitrium. Sic et Dei gratia non negatur, sed sine ullis humanis praecedentibus meritis vera monstratur; et liberum ita defenditur, ut humilitate solidetur, non elatione praecipitetur

<sup>1</sup> Epist. 217. edit. Migne.



arbitrium ; et qui gloriatur, non in homine, vel in quolibet alio, vel seipso, sed in Domino gloriatur (I Cor. 1, 31). ... Quomodo dicuntur negare liberum voluntatis arbitrium, qui confitentur omnem hominem, quisquis suo corde credit in Deum, non nisi sua libera credere voluntate, cum potius illi oppugnent arbitrium liberum, qui oppugnant Dei gratiam, qua vere ad bona eligenda et agenda fit liberum? »

Arg. 2<sup>um</sup>. — *Ex auctoritate S. Bernardi. — De grat. et lib. arb.* cap. 14. : « Ipsa (gratia) liberum excitat arbitrium, cum seminat cogitatum ; sanat, cum immutat affectum ; roborat, ut perducatur ad actum ; servat, ne sentiat defectum... Totum quidem hoc (liberum arbitrium) et totum illa (gratia) ; sed ut totum in illo, sic totum ex illa. »

Arg. 3<sup>um</sup>. — *Ex auctoritate D. Thomae. — Comp. Theol.* cap. 130. : « Cum actus voluntatis sit inclinatio quaedam ab interiori ad exterius procedens... actus voluntatis a solo Deo est, qui solus causa est naturae rationalis voluntatem habentis. Unde patet, quod non est contra arbitrii libertatem, si Deus voluntatem hominis moveat. » Praeterea : II Cor. 3. lect. 1. : « Deus... homines movet et omnia, quae agunt, ad actiones suas, sed aliter et aliter. Cum enim hujusmodi motus sit quoddam receptum in moto, oportet quod hoc fiat secundum modum suae naturae, id est, rei motae... Ea ergo, quorum natura est, ut sint liberae voluntatis, dominium suarum actionum habentia, movet libere ad operationes suas, sicut creaturas rationales et intellectuales. »

Amplius : ibid. lect. 3. : « Ubi Spiritus Domini, ibi libertas..., quia liber est, qui est causa sui... Quicumque ergo agit ex seipso, libere agit... Qui vitat mala, quia mala, est liber. Hoc autem facit Spiritus Sanctus, qui mentem interius perficit per bonum habitum, ut sic ex amore caveat ac si praeciperet lex divina ; et ideo dicitur liber, non quin subdatur legi divinae, sed quia ex bono habitu inclinatur ad hoc faciendum, quod lex divina ordinat. » Adhuc Rom. 6. lect. 4. : « Servite Domino in laetitia ; o Domine, quia ego servus tuus. Haec autem vera est libertas et optima servitus : quia per

justitiam homo inclinatur ad id, quod convenit ipsi, quod est proprium hominis, et avertitur ab eo, quod convenit concupiscentiae, quod est maxime bestiale... Hoc ipsum, quod bona operamur et quod opus nostrum est dignum vita aeterna, est a gratia Dei. » Quod quidem etiam explanat II-II. q. 183. a. 4.

Amplius in opusc.<sup>1</sup> *De rationibus fidei* cap. 10. : « Sicut autem divina scientia contingentibus necessitatem non imponit, sic nec ejus ordinatio, qua provide ordinat universa. Sic enim ordinat res, sicut agit res; non enim ejus ordinatio cassatur; sed quod per sapientiam ordinat, exsequitur per virtutem. In actione autem divinae virtutis hoc considerare oportet, quod operatur in omnibus et movet singula ad suos actus secundum modum uniuscujusque; ita, quod quaedam ex motione divina ex necessitate suas actiones perficiunt, ut patet in motibus coelestium corporum; quaedam vero contingenter, quae interdum a propria actione deficiunt, ut patet in actionibus corruptibilium; arbor enim quandoque a fructificando impeditur, et animal a generando. Sic ergo divina sapientia de rebus ordinat, ut ordinata proveniant secundum modum propriarum causarum. Est autem hic modus naturalis homini, ut libere agat, non coactus, quia rationales potestates ad opposita se habent. Sic igitur Deus ordinat de actibus humanis, ut actus humani necessitati non subdantur, sed proveniant ex arbitrii libertate. » Unde ipsa virtus, qua Deus agit res ac movet illas, est radix prima ipsius libertatis, qua homo libere agit.

Praeterea in Math. cap. 10. scribit : « Notandum, quod omnis actio, quae ex duobus causatur, quorum unum est principale agens, secundum vero instrumentale, debet denominari a principaliori. Isti [Apostoli et Sancti] fuerunt agentes instrumentaliter, Spiritus Sanctus principaliter; ideo tota actio debet denominari a Spiritu Sancto. Sed videndum, quod aliquando movet Spiritus perturbando rationem, aliquando movet confortando. Unde haec differentia est inter motum diaboli et Spiritus Sancti. Homo enim non est dominus nisi

<sup>1</sup> Opusc. 2. edit. Vivès; 3. edit. Rom.

per rationem, per quam est liber; unde quando homo secundum rationem non movetur, tunc est motus arreptitius. Quando cum ratione, tunc dicitur motus a Spiritu Sancto. Motio enim diaboli perturbat rationem. Isti autem licet a Spiritu Sancto loquerentur, tamen remanebat in eis ratio; et ideo etiam a se loquebantur, non sicut arreptitii. » Motio itaque divina movet confortando iudicium rationis; et ideo movet augendo et perficiendo liberum hominis arbitrium.

Arg. 4<sup>um</sup>. — *Ex Conc. Trid.* sess. 6. can. 4. : « Si quis dixerit, liberum hominis arbitrium a Deo motum et excitatum nihil cooperari assentiendo Deo excitanti atque vocanti, quo ad obtinendam justificationis gratiam se disponat ac prae-  
paret; neque posse dissentire, si velit; sed veluti inanime quoddam nihil omnino agere, mereque passive se habere : anathema sit. »

1<sup>o</sup> Hic agitur de illa motione, qua Deus tangit cor hominis per Spiritus Sancti illuminationem, et qua homo motus et excitatus incipit se movere ad iustitiam coram Deo libera sua voluntate.

2<sup>o</sup> Haec igitur motio nihil aliud est nisi gratia *praeveniens*, quae est duplex, nempe *excitans* atque *adjuvans*. *Excitans* quidem hominis voluntatem per viam intellectus, ex parte objecti, ab intrinseco potentiae cognoscitivae, sed ab extrinseco potentiae volitivae; motione physica in intellectum et motione morali in voluntatem. *Adjuvans* autem hominis voluntatem ex parte ipsius potentiae, ab intrinseco ipsius voluntatis, motione physica in ipsam voluntatem.

3<sup>o</sup> Idcirco huiusmodi motio gratuita est gratia *excitans*, in quantum Deus ut auctor ordinis supernaturalis movet potentiam liberi arbitrii per modum finis, per modum allicientis atque terrentis; et tunc est, cum homines « libere moventur in Deum credentes vera esse, quae divinitus revelata et promissa sunt... et dum peccatores se esse intelligentes a divinae iustitiae timore, quo utiliter concutiuntur, ad considerandam Dei misericordiam se convertendo, in

spem eriguntur, fidentes Deum sibi propter Christum propitium fore. » Est gratia *adjuvans*, in quantum ipse Deus ut auctor ordinis supernaturalis movet quoque potentiam liberi arbitrii per modum agentis, per modum alterantis et impellentis, ut primus motor in ratione causae efficientis; et voluntas intrinsece ac physice transmutata incipit Deum « tamquam omnis iustitiae fontem diligere; ac propterea movetur adversus peccata per odium aliquod et detestationem ». (Conc. Trid. sess. 6. cap. 6.)

4º Hujusmodi supernaturales actus, per quos homo disponitur seu praeparatur ad justificationem consequendam, procedunt semper a gratia actuali, a gratuita motione, a Spiritu Sancto; sed possunt procedere a Spiritu Sancto dupliciter: 1º a Spiritus Sancti impulsu, non adhuc quidem inhabitantis, sed tantum moventis; 2º a Spiritus Sancti impulsu, non tantum moventis, sed etiam jam inhabitantis. (Conc. Trid. sess. 14. cap. 4.)

5º Primo modo actus fidei, spei, dilectionis et doloris sunt imperfecti; et praeparatio ad gratiam sanctificantem praecedat tempore. Alio modo actus fidei, spei et dilectionis et doloris sunt perfecti; et praeparatio ad gratiam sanctificantem est simul cum ipsa gratiae et caritatis infusione; et motus liberi arbitrii in Deum per fidem, spem et caritatem et in peccatum per odium et detestationem procedunt ab ipsa gratia justificante et sunt informati caritate; et liberum arbitrium intrinsece transmutatum est de malo in bonum, de averso a Deo in Deum per amorem conversum, de statu injustitiae ad statum iustitiae.

6º In praedicta transmutatione liberum arbitrium motum et excitatum libere consentit, libere cooperatur Deo vocanti et excitanti et moventi, et libere consentiendo movetur ab ipso Deo ad acceptandum justificantis gratiae donum: ita quod « motus liberi arbitrii naturae ordine praecedat consecutionem gratiae, sequitur autem gratiae infusionem ». (I-II. q. 113. a. 8. ad 2.) « Ille tamen motus non est causa gratiae, sed effectus; unde tota operatio pertinet ad gratiam. » (I-II. q. 111. a. 2. ad 2.)



7<sup>o</sup> Conc. Trid. loquitur de gratia praeveniente, quae est et excitans et adjuvans, et cui libere assentiendo et cooperando homo disponitur ad gratiam sanctificantem suscipiendam; sive haec dispositio praecedat tempore ipsam susceptionem gratiae gratum facientis, sive haec dispositio praecedat tantum ordine naturae, considerando gratiae iustificantis consecutionem ex parte mobilis, quod est liberum arbitrium motum et excitatum a Deo per ipsius gratiae et caritatis infusionem: ut jam declaratum fuit supra quaest. *de justificatione* a. 8. <sup>1</sup>.

De hac igitur motione et excitatione liberi arbitrii, sub qua homo renovatur interius per voluntariam susceptionem gratiae et donorum, loquitur Conc. Trid. dum affirmat: 1<sup>o</sup> Quod liberum arbitrium sic motum et excitatum a Deo revera agit atque exercet suam activitatem, assentiendo Deo excitanti atque vocanti; 2<sup>o</sup> quod liberum arbitrium sic motum et excitatum potest dissentire, si velit. Quoniam, ut docet D. Thomas I Cor. 12. lect. 1.: « Non enim per Spiritum Sanctum inhabitantem tollitur facultas peccandi a libero arbitrio totaliter in vita praesenti. » Unde ex parte Spiritus Sancti moventis liberum arbitrium « necesse est dicere, quod motio Spiritus Sancti semper est efficax secundum suam intencionem. Operatur enim in anima Spiritus Sanctus dividens singulis prout vult, ut dicitur I Cor. 12.; et ideo quibus Spiritus Sanctus pro suo arbitrio vult dare perseverantem divinae dilectionis motum, in his peccatum caritatem excludens esse non potest. Dico non posse ex parte virtutis motivae, quamvis possit ex parte vertibilitatis liberi arbitrii. » Ita D. Thomas *De Carit.* a. 12. <sup>2</sup>.

Et hoc est, quod definivit Conc. Trid. Nam « Patres Tridentini, in ipso medio conclavi ordini habendo, una cum Divinae Scripturae codicibus et Pontificum Maximorum decretis, *Summam Thomae Aquinatis* super altari patere voluerunt,

<sup>1</sup> Vide supra cap. 3. p. 89 et *Part. Prim.* q. 5. a. 8. p. 477.

<sup>2</sup> Cf. II-II. q. 24. a. 11.

unde consilium, rationes, oracula peterentur. » (Leo XIII. *Aeterni Patris* <sup>1</sup>.)

Arg. 5<sup>um</sup>. — *Ex Catechismo Conc. Trid.* Pii V. Pontificis Maximi jussu promulgato I. a. 1. n<sup>o</sup> 24. : « Non solum autem Deus universa, quae sunt, providentia sua tuetur atque ministrat, verum etiam quae moventur et agunt aliquid, intima virtute ad motum atque actionem ita impellit, ut quamvis secundarum causarum efficientiam non impediat, praeveniat tamen; cum ejus occultissima vis ad singula pertineat, et quemadmodum Sapiens testatur, attingit a fine usque ad finem fortiter et disponit omnia suaviter. Quare ab Apostolo dictum est, cum apud Athenienses annuntiaret Deum, quem ignorantes colebant : *Non longe est ab unoquoque nostrum; in Ipso enim vivimus et movemur et sumus.* »

<sup>1</sup> Apte ad propositum BERTI, *De Theolog. Disciplin.* lib. 14. cap. 11. n<sup>o</sup> 4. : « Concilium ergo Tridentinum non definit gratiam praevenientem non esse per se efficacem, imo id confirmat; et damnando memoratam haeresim (Protestantium) declarat sub hac efficaci gratia consistere *potentiam* ad oppositum et libertatis indifferentiam. Primo enim, cum haeretici, ex praemotione Dei et doctrina de gratia per se efficaci, mala consecutione inferrent liberum arbitrium non cooperari Deo moventi, definit Synodus Tridentina praemoveri utique et excitari, sed liberum arbitrium non rapi necessitate, sed etiam motum et excitatum posse dissentire, si velit. Doctrinam ergo de gratia per se efficaci veram supponit et confirmat; consequentiam Calvinii merito negat et damnat. Nec enim definitum est a Tridentini Patribus, ideo liberum posse dissentire, quoniam excitatur et praemovetur gratia dumtaxat indifferenti : id in nullo Tridentini canone legimus. Imo si hoc erat mens Patrum, cur id expressis terminis non declarare et Calvinianam haeresim subvertere a fundamento? » Hactenus Berti. — MOLINA etiam in sua *Concord.* q. 23. a. 4. disp. 1. memb. ult. scribit, quod « Lutherani impudenter arbitrii nostri libertatem sunt ausi negare... ex Augustini opinione ». Non ergo damnavit Concilium Tridentinum doctrinam Augustini et D. Thomae, sed *consequentiam malam Calvinii et impudentiam Lutheranorum*. Non ergo decet viros catholicos hanc Lutheranorum impudentiam imitari nec cum Calvinio mala consecutione pessimum consequens inferre.

Haec igitur est physica praemotio ; haec gratia ex se efficax, quae praemotio physica est in ordine supernaturali, nempe intima virtus Dei, secundarum causarum efficientiam 1<sup>o</sup> non impediens ; 2<sup>o</sup> praeveniens ; 3<sup>o</sup> ad motum atque actionem impellens ; 4<sup>o</sup> attingens a fine usque ad finem fortiter ; 5<sup>o</sup> et disponens omnia suaviter.

Unde D. Thomas I. q. 18. a. 4. ad 1. : « Et hoc modo intelligendum est verbum Apostoli dicentis : *In ipso vivimus, movemur et sumus* ; quia etiam nostrum vivere et nostrum esse et nostrum moveri causantur a Deo. »

## § 2

### Argumenta rationis.

Arg. 1<sup>um</sup>. — *Ex modo, quo Deus movet.* — I-II. q. 10. a. 4. : « Respondeo dicendum quod, sicut Dionysius dicit *De div. nom.* 4., ad providentiam divinam non pertinet naturam rerum corrumpere, sed servare. Unde omnia movet secundum eorum conditionem, ita quod ex causis necessariis per motionem divinam sequuntur effectus ex necessitate, ex causis autem contingentibus sequuntur effectus contingentes. Quia igitur voluntas est activum principium non determinatum ad unum, sed indifferenter se habens ad multa, sic Deus ipsam movet, quod non ex necessitate ad unum determinat, sed remanet motus ejus contingens et non necessarius nisi in his, ad quae naturaliter movetur. » Hoc est argumentum capitale in quaestione de concordia liberi arbitrii cum divina motione, sive in ordine generali providentiae sive in ordine speciali praedestinationis. Hocce etenim argumentum, quod D. Thomas evolvit perducendo illud usque ad ipsam efficaciam divinae voluntatis, ut patebit infra, complet alternata vice doctrinam traditam ab ipso Angelico Doctore *De Pot.* q. 3. a. 7. circa multiplices modos, quibus Deus operatur in omni operante, et operatur immediate, non exclusa operatione voluntatis et naturae.

Primus modus operandi est, in quantum Deus dat virtutem

nobis libere operandi, hoc est, potentiam liberi arbitrii; secundus modus operandi est, in quantum Deus conservat in suo esse potentiam liberi arbitrii; tertius modus operandi est, in quantum Deus movet et applicat ad agendum potentiam liberi arbitrii; quartus modus operandi est, in quantum virtute Dei virtus propria liberi arbitrii agit. Dum ergo Deus operatur primo modo, non destruit, sed ex nihilo educit ipsam virtutem operativam liberi arbitrii; dum operatur secundo modo, non destruit, sed quod fecerat, conservat in esse facto; dum operatur tertio modo, non destruit, non laedit, non minuit, sed quod fecit et in esse facto tenet, complet, auget, perficit; et dum operatur quarto modo, conservat in esse virtutem, quam contulit libero arbitrio per tertium modum operandi, et per quam virtus propria liberi arbitrii complectur, augetur et perficitur.

Unde hoc argumentum sic breviter exponitur a D. Thoma *De Pot.* q. 3. a. 4. : « Omnes secundae causae agentes a primo agente habent hoc ipsum quod agant. » Sicut enim a Deo, ut est creator, habemus potentiam liberi arbitrii, et a Deo, ut est conservator, habemus potentiam liberi arbitrii in suo esse perdurantem : ita a Deo, ut est primum agens, habemus potentiam liberi arbitrii : 1<sup>o</sup> reductam de potentia in actum; 2<sup>o</sup> agentem.

Arg. 2<sup>um</sup>. — *Ex ipsa natura divinae motionis.* — *De Pot.* q. 3. a. 7. ad 7. : « Id, quod a Deo fit in re naturali, quo actualiter agat..., est vis, qua agit ad esse ut instrumentum primae causae. » Sed manifeste apparet, quod vis, qua creatura rationalis agit ad esse suae propriae operationis, ut instrumentum Dei, qui est primum volens, non minuit sed auget, non laedit sed perficit potentiam omnis voluntatis creatae.

Praeterea : ex dictis supra cap. 5. physica motio, ideoque et gratia ex se efficax, est : 1<sup>o</sup> aliquid reale, receptum in potentia liberi arbitrii ; 2<sup>o</sup> aliquid reale, causatum a solo Deo ; 3<sup>o</sup> aliquid reale, causatum in potentia liberi arbitrii per modum actuantis, complentis et perficientis. Non ergo



destruit potentiam liberi arbitrii, sed aedificat; non minuit, sed amplificat.

Rursus : ex dictis supra cap. 3. notae sive attributa gratiae ex se efficacis sunt : 1<sup>o</sup> auferre duritiam cordis, per quam homo resistit Spiritui Sancto; 2<sup>o</sup> transmutare liberam hominis voluntatem de mala in bonam; 3<sup>o</sup> inclinare illam ad bene agendum indeclinabiliter; 4<sup>o</sup> augere ipsam hominis libertatem; 5<sup>o</sup> conferre libero hominis arbitrio, ut perseveret in bono; 6<sup>o</sup> discernere bonos a malis. Non igitur potentiam liberi arbitrii mortificat, sed vivificat; non humiliat, sed exaltat; non deprimit, sed elevat.

Arg. 3<sup>um</sup>. — *Ex ipsa natura liberi arbitrii creati.* — Ex dictis supra cap. 3. liberum arbitrium creatum indiget physice moveri a Deo, ut possit agere, libere agere, bene agere et meritorie agere, ex eo quod : 1<sup>o</sup> non est actus purus; 2<sup>o</sup> habet rationem causae instrumentalis; 3<sup>o</sup> est liberum per participationem; 4<sup>o</sup> est causa agens subordinata; 5<sup>o</sup> ex viribus naturalibus nullam habet potentiam ad opera salutis nisi passivam ac obedientialem. Idcirco nec physica praemotio nec gratia ex se efficax, quae est praemotio physica in ordine ad vitam aeternam, possunt laedere *naturam* liberi arbitrii, quae per huiusmodi divinam motionem semper melioratur semperque perficitur; ac libero arbitrio divino, qui est actus purus et per essentiam liberum, redditur, in quantum a Deo praemota, magis propinqua, magis similis, magis de libertate participans.

Praeterea : Liberum arbitrium creatum est potentia se habens ad utrumlibet, potentia habens indifferentiam atque indeterminationem in agendo. Sed duplex est indifferentia, et duplex quoque indeterminatio : videlicet indifferentia passiva, quae involvit potentialitatem, et indeterminatio per carentiam actus, quae est indeterminatio involvens imperfectionem; sicut indeterminatio et indifferentia materiae ex privatione formae, ex carentia actus primi. Alia indifferentia est activa seu potestatis : haec est indifferentia non ex carentia actus, sed ex dominio ipsius; haec est indeterminatio, quae im-

portat eminentiam ad agendum plura, ad tendendum in hoc vel illud bonum, ad volendum illud vel non volendum; et est quid simile indeterminationi formae, quae non indiget recipi in materia ad subsistendum.

Jam vero prima indifferentia, quae non conducit ad agendum, sed magis obest, primaque indeterminatio, quae procedit ex elongatione ab actu, tolluntur per physicam praemotionem. Altera vero indifferentia, quae est dominativa actus et objecti, a quo specificatur actus; et altera indeterminatio, quae oritur ex libero rationis judicio, et in qua consistit essentia libertatis: causantur primo et principaliter ab ipso Deo per physicam praemotionem. Quoniam per physicam praemotionem removetur status potentialis liberi arbitrii, quae est facultas voluntatis et rationis; et utraque potentia, quae antea erat elongata ab agendo, actuatur, ut de facto operetur; conjungitur suae uniuscujusque propriae operationi, ut agat. Et adhuc physica praemotio, quae est effectus causatus a solo Deo in potentia liberi arbitrii, se habet respectu ipsius actus liberi in ratione principii efficientis, sicut ipsa virtus liberi arbitrii, cujus est complementum. Unde actus liber procedit a Deo mediante virtute propria liberi arbitrii et mediante virtute, quae confertur per applicationem ipsius liberi arbitrii ad agendum. Igitur per physicam praemotionem removetur indifferentia et indeterminatio, quae sunt de imperfectione liberi arbitrii; et causatur immediate immediatione virtutis ipse actus liberi arbitrii; et proinde perficitur indifferentia activa et indeterminatio eminentiae, quae sunt de essentiali liberi arbitrii entitate.

Rursus: processus actus liberi ita se habet: 1<sup>o</sup> voluntas per hoc quod vult finem, movet seipsam ad volendum ea quae sunt ad finem; unde postquam mota est ab intellectu secundum rationem objecti, movetur a seipsa quantum ad exercitium actus secundum rationem finis; 2<sup>o</sup> voluntas incipit movere seipsam ad volendum ea quae sunt ad finem, movendo intellectum, ut inquirat illa ante judicium de illis eligendis; et haec inquisitio consilium vocatur; 3<sup>o</sup> intellectus pronuntiat judicium, quod est quasi conclusio et determinatio

consilii; 4<sup>o</sup> haec autem determinatio, in qua consistit essentia liberi arbitrii reduplicative ut actualiter agentis, amplectitur duos actus, sc. *actum rationis* determinantis consilium de agendis hic et nunc per suam sententiam, et *actum voluntatis* acceptantis ultimum iudicium practicum rationis. Et tunc perficitur atque consummatur *actus humanus*. Est autem homo dominus suorum actuum per rationem et voluntatem; unde liberum arbitrium esse dicitur facultas voluntatis et rationis. Illae ergo actiones proprie humanae dicuntur, quae ex voluntate deliberata procedunt. (I-II. q. 1. a. 1.; q. 9. a. 3.; q. 14. a. 1. et I. q. 83. a. 3. ad 2.)

Jam vero : « Homo agit voluntate; voluntatis autem principium est electio; et electionis, consilium... Oportet aliquod exterius principium esse quod moveat mentem humanam ad consiliandum de agendis. Hoc autem oportet esse aliquod melius humana mente... Ita omnium motuum interiorum principium est a Deo movente... Deus movet omnia secundum modum eorum; et ideo divina motio a quibusdam participatur cum necessitate, a natura autem rationali cum libertate propter hoc, quod virtus rationalis se habet ad opposita; et ideo sic Deus movet mentem humanam ad bonum, quod tamen potest huic motioni resistere; et sic ex Deo est, ut homo se ad gratiam praeparet. Sed quod gratia careat, non habet causam a Deo, sed ab homine, secundum illud Os. 13, 9 : *Perditio tua ex te Israel; tantummodo ex me auxilium tuum.* » (Quodl. 1. a. 7.)

Arg. 4<sup>um</sup>. — *Ex characteribus essentialibus physicae praemotionis.* — Ex dictis supra (cap. 4.) per physicam motionem Deus agit immediate : 1<sup>o</sup> immediate suppositi in *potentiam* liberi arbitrii, quae est facultas voluntatis et rationis; 2<sup>o</sup> immediate virtutis in *actum* liberi arbitrii, id est, in determinationem consilii per sententiam rationis et per acceptationem appetitus. Ergo a Deo procedit, mediante potentia liberi arbitrii, quidquid est veri in apprehensione intellectus, quidquid recti in sententia rationis, quidquid boni et honesti in acceptatione appetitus, quidquid denique ordinati et lauda-

bilis in actu humano. Ut enim ait D. Thomas *De Verit.* q. 28. a. 3. ad 9. : « Potentia completur per actum, per quem determinatur ad alterum oppositorum de se in potentia existens ad utrumque ; sicut materia in potentia existens ad plures formas per dispositiones aptatur ad unam formam magis quam ad aliam. » Determinatio autem ad unum fit : *a)* per rationem deliberando ; *b)* per voluntatem acceptando iudicium rationis. Sed ratio non deliberat nisi Deo movente ; ratio non recte iudicat nisi Deo illuminante ; nec voluntas movet rationem ad deliberandum nisi Deo praemovente ; nec postea deliberantis rationis iudicium acceptat nisi Deo reducete ipsam de potentia in actum. Divina itaque motio est principium efficiens deliberationem et principium efficiens electionem, ergo principium efficiens determinationem ad unum et conferens libero arbitrio, ut seipsum ad unum determinet.

Unde D. Thomas *IV. Sent.* dist. 49. q. 1. a. 2. solut. 1. : « In omni ordine mobilium et motorum oportet secundos motores ordinari in finem primi motoris per dispositionem impressam in eis a primo motore... Et quia omnia procedunt a Deo in quantum bonus est, ideo omnia creata secundum impressionem a Creatore receptam inclinantur ad bonum appetendum secundum suum modum, ut sic in rebus quaedam circulatio inveniatur, dum a bono egredientia in bonum tendunt. Haec autem circulatio in quibusdam perficitur creaturis, in quibusdam autem remanet imperfecta. Illae autem creaturae, quae non ordinantur, ut pertingant ad illud primum bonum, a quo processerunt, sed solummodo ad consequendam similitudinem ejus qualemcumque, non perfecte habent hanc circulationem, sed solum illae creaturae, quae ad ipsum primum principium aliquo modo pertingere possunt : quod solum est rationabilium creaturarum, quae Deum ipsum assequi possunt per cognitionem et amorem ; in qua assecutione beatitudo eorum consistit. Ad appetendam beatitudinem perfecto appetitu, qui sufficiat ad merendum, homo ex propriis viribus non est sufficiens ; sed habet hoc ex munere divinae gratiae, ut patet II Cor. 5, 5 : *Qui efficit*



*nos in hoc ipsum Deus*, id est, qui facit nos veram gloriam appetere. »

Sicque per gratiam ex se et per se efficacem, quae est physica motio in ordine supernaturali, circulatio a bono in bonum perficitur in creatura rationali, quae est capax vitae aeternae, et quae perducitur in ipsam quasi a Deo transmissa, sicut sagitta a sagittante mittitur in signum. (I. q. 23. a. 1.)

Arg. 5<sup>um</sup>. — *Ex solutione argumentorum in contra.* — Quam quidem ad litteram ab ipso D. Thoma accipiemus, ac perinde aperte liquebit, quae sit concordia liberi arbitrii cum physica praemotione, cum gratia ex se efficaci, cum voluntate Dei atque praescientia.

## IV

### Solutio argumentorum in contra.

#### § 1

**Solvuntur difficultates sumptae ex efficacia divinae voluntatis.**

1. *Ad primum* ergo dicendum, quod « voluntas divina non solum se extendit, *ut aliquid fiat* per rem, quam movet; sed etiam *ut eo modo fiat*, quo congruit naturae ipsius. Et ideo magis repugnaret divinae motioni, si voluntas ex necessitate moveretur, quod suae naturae non competit, quam si moveretur libere, prout competit suae naturae ». (I-II. q. 10. a. 4. ad 1.)

2. *Ad secundum* dicendum, quod « ex hoc ipso, quod nihil voluntati divinae resistit, sequitur, quod non solum fiant ea, quae Deus vult fieri, sed quod fiant contingenter vel necessario, quae sic fieri vult ». (I. q. 19. a. 8. ad 2.)

3. *Ad tertium* dicendum, quod « si Deus movet voluntatem ad aliquid, impossibile est huic positioni, quod voluntas ad illud non moveatur; non tamen est impossibile simpliciter.

Unde non sequitur, quod voluntas a Deo ex necessitate moveatur ». (I-II. q. 10. a. 4. ad 3.)

4. *Ad quartum* dicendum, quod « Deus movet quidem voluntatem immutabiliter propter efficaciam virtutis moventis, quae deficere non potest; sed propter naturam voluntatis motae, quae indifferenter se habet ad diversa, non inducitur necessitas, sed manet libertas; sicut etiam in omnibus providentia divina infallibiliter operatur, et tamen a causis contingentibus proveniunt effectus contingenter, in quantum Deus omnia movet proportionabiliter, unumquodque secundum suum modum ». (*De Malo* q. 6. a. unico ad 3.)

5. *Ad quintum* dicendum, quod « Deus omnia movet, sed diversimode, in quantum sc. unumquodque movetur ab eo secundum modum naturae suae; et sic homo movetur a Deo ad volendum et currendum per modum liberae voluntatis. Sic ergo velle et currere est hominis ut *libere agentis*, non autem est hominis ut *principaliter moventis*, sed Dei ». Rom. 9. lect. 3. (cf. *De Malo* q. 6. a. unico ad 1.)

6. *Ad sextum* dicendum, quod « quamvis *non esse* effectus divinae voluntatis non possit simul stare cum divina voluntate, tamen *potentia deficiendi* effectus simul stat cum divina voluntate. Non enim sunt ista impossibilia: *Deus vult istum salvari*, et *ille potest damnari*. Sed ista sunt impossibilia: *Deus vult istum salvari*, et *iste damnatur* ». (*De Verit.* q. 23. a. 5. ad 3. et ad 4.)

## § 2

### **Solvuntur difficultates sumptae ex infallibilitate divinae praescientiae.**

1. « *Ad primum* ergo dicendum, quod licet causa suprema sit necessaria, tamen effectus potest esse contingens propter causam proximam contingentem; sicut germinatio plantae est contingens propter causam proximam contingentem, licet motus solis, qui est causa prima, sit necessarius. Et similiter scita a Deo sunt contingentia propter causas

proximas, licet scientia Dei, quae est causa prima, sit necessaria. » (I. q. 14. a. 13. ad 1.)

2. « *Ad secundum* dicendum, quod... si dicam : *Si Deus scit aliquid, illud erit*, consequens intelligendum est prout subest divinae scientiae, sc. prout est in sua praesentialitate. » (Ibid. ad 2.) Unde illud erit necessario necessitate consequentiae; sed libere necessitate consequentis. Erit enim actus et erit liber, quia utrumque scit Deus.

3. « *Ad tertium* dicendum, quod... ea, quae sunt scita a Deo, oportet esse necessaria secundum modum, quo subsunt divinae scientiae, non autem absolute, secundum quod in propriis causis considerantur. » (Ibid. ad 3.)

4. *Ad quartum* dicendum, quod « corpus coeleste agit in haec inferiora necessario, quasi necessitatem inducens quantum est de se; et ideo effectus ejus necessario evenit, nisi sit aliquid resistens. Sed Deus in voluntatem agit, non per modum necessitatis, quia voluntatem non cogit; sed movet eam, non auferendo ei modum suum, qui in libertate ad utrumlibet consistit. Et ideo quamvis divinae voluntati nihil resistat, tamen voluntas et quaelibet alia res exsequitur divinam voluntatem secundum modum suum; quia et ipsum modum divina voluntas rebus dedit, ut sic ejus voluntas impleretur; et ideo quaedam explent divinam voluntatem necessario, quaedam contingenter, quamvis illud, quod Deus vult, semper fiat. » (*De Verit.* q. 6. a. 3. ad 3.)

5. *Ad quintum* dicendum, quod « aliquid potest dici *posse* dupliciter : uno modo, considerando potentiam, quae in ipso est; sicut dicimus, quod lapis potest moveri deorsum. Alio modo, considerando id, quod ex parte alterius est; sicut si dicerem, quod lapis potest moveri sursum non per potentiam, quae in ipso sit, sed per potentiam projicientis. Cum ergo dicitur : *Praedestinatus iste potest in peccato mori*, si consideretur potentia ipsius, verum est; si autem loquamur de praedestinatione secundum ordinem, quem habet ad aliud, sc. ad Deum praedestinantem, sic ordo ille non compatitur secum *istum eventum*, quamvis compatiatur secum *istam potentiam*. » (*De Verit.* q. 6. a. 3. ad 7.)

6. *Ad sextum* dicendum, quod « absolute loquendo Deus potest unumquemque praedestinare vel non praedestinare, aut praedestinasse vel non praedestinasse, quia actus praedestinationis, cum mensuretur aeternitate, numquam cedit in praeteritum, sicut numquam est futurum; unde semper consideratur ut egrediens a voluntate per modum libertatis. Tamen ex suppositione hoc efficitur impossibile: non enim potest non praedestinare supposito quod praedestinaverit, vel e converso, quia mutabilis esse non potest; et ita non sequitur, quod praedestinatio possit variari. » (Ibid. ad 10.)

### § 3

#### **Solvuntur difficultates sumptae ex ipsa natura physicae praemotionis atque simul ex natura liberi arbitrii.**

1. *Ad primum* ergo dicendum, quod « liberum arbitrium est causa sui motus, quia homo per liberum arbitrium seipsum movet ad agendum. Non tamen hoc est de necessitate libertatis, quod sit prima causa sui id, quod liberum est; sicut nec ad hoc, quod aliquid sit causa alterius, requiritur quod sit prima causa ejus. Deus igitur est prima causa movens et naturales causas et voluntarias. Et sicut naturalibus causis, movendo eas, non aufert quin actus earum sint naturales, ita movendo causas voluntarias non aufert quin actiones earum sint voluntariae, sed potius hoc in eis facit; operatur enim in unoquoque secundum ejus proprietatem. » I. q. 83. a. 1. ad 3. — Dicendum, quod « Deus operatur in unoquoque agente etiam secundum modum illius agentis; sicut causa prima operatur in operatione causae secundae, cum secunda causa non possit in actum procedere nisi per virtutem causae primae. Unde per hoc, quod Deus est causa operans in cordibus hominum, non excluditur, quin ipsae humanae mentes sint causae suorum motuum; unde non tollitur ratio libertatis. » (*De Verit.* q. 24. a. 1. ad 3.)

2. *Ad secundum* « dicendum, quod illud, quod movetur ab altero, dicitur cogi, si moveatur contra inclinationem propriam; sed si moveatur ab alio, quod ipsi dat propriam



inclinationem, non dicitur cogi; sicut grave, cum movetur deorsum a generante, non cogitur. Sic igitur Deus movendo voluntatem non cogit ipsam, quia dat ei ejus propriam inclinationem. » (I. q. 105. a. 4. ad 1.) — Et rursus : Dicendum, quod « voluntas aliquid confert, cum a Deo movetur; ipsa enim est, quae operatur, sed mota a Deo; et ideo motus ejus, quamvis sit ab intrinseco sicut a primo principio, non tamen est violentus ». (*De Malo* q. 6. a. unico ad 4.)

3. *Ad tertium* dicendum, quod « moveri voluntarie est moveri ex se, id est, a principio intrinseco; sed illud principium intrinsecum potest esse ab alio principio extrinseco; et sic moveri ex se non repugnat ei, quod movetur ab alio ». (I. q. 105. a. 4. ad 2.) — Rursus : Dicendum, quod « non omne principium est principium primum. Licet ergo de ratione voluntarii sit, quod principium ejus sit intra, non tamen est contra rationem voluntarii, quod principium intrinsecum causetur vel moveatur ab exteriori principio; quia non est de ratione voluntarii, quod principium intrinsecum sit principium primum. » (I-II. q. 6. a. 1. ad 1.)

4. *Ad quartum* dicendum, quod « si voluntas ita movetur ab alio, quod ex se nullatenus moveretur, opera voluntatis non imputarentur ad meritum vel demeritum; sed quia per hoc, quod movetur ab alio, non excluditur quin moveatur ex se, ut dictum est : ideo per consequens non tollitur ratio meriti vel demeriti ». (I. q. 105. a. 4. ad 3.) — Rursus : Dicendum, quod « homo sic movetur a Deo ut instrumentum, quod tamen non excluditur quin moveat seipsum per liberum arbitrium, ut ex supradictis patet (q. 10. a. 4.); et ideo per suum actum meretur vel demeretur apud Deum ». (I-II. q. 21. a. 4. ad 2.)

5. *Ad quintum* dicendum, quod « Deus movet hominem ad agendum, non solum sicut proponens sensui appetibile vel sicut immutans corpus, sed etiam sicut *movens ipsam voluntatem*; quia omnis motus tam voluntatis quam naturae ab eo procedit sicut a primo movente. Et sicut non est contra rationem naturae, quod motus naturae sit a Deo sicut a primo movente, in quantum natura est quoddam instrumen-

tum Dei moventis : ita non est contra rationem actus voluntarii, quod sit a Deo, in quantum voluntas a Deo movetur. Est tamen communiter de ratione naturalis et voluntarii motus, quod sint a principio intrinseco. » (I-II. q. 6. a. 1. ad 3.)

6. *Ad sextum* dicendum, quod « instrumentum dupliciter dicitur. Uno modo proprie, quando sc. aliquid ita ab altero movetur, quod non confertur ei a movente aliquod *principium* talis motus, sicut serra movetur a carpentario; et tale instrumentum est expers libertatis. Alio modo dicitur instrumentum magis communiter, quidquid est movens ab alio motum, sive sit in ipso principium sui motus sive non; et sic ab instrumento non oportet quod omnino excludatur ratio libertatis, quia aliquid potest esse ab alio motum, quod tamen seipsum movet; et ita est de mente humana. » *De Verit.* q. 24. a. 1. ad 5. (Vide etiam I-II. q. 68. a. 3. ad 2. et III. q. 7. a. 1. ad 3.)

7. *Ad septimum* dicendum, quod « voluntas dicitur habere dominium sui actus non per exclusionem causae primae, sed quia causa prima non ita agit in voluntate, ut eam de necessitate ad unum determinet, sicut determinat naturam; et ideo determinatio actus relinquatur in potestate rationis et voluntatis ». (*De Pot.* q. 3. a. 7. ad 13.)

8. *Ad octavum* dicendum, quod « operatio illius agentis, quod per se agit, oportet ut in primum agens sicut in causam reducatur; quamvis enim huiusmodi entia per se agant, quia per propriam naturam et proprium iudicium actus suos determinant, non tamen a se habent, quod agant, sed a primo agente, quod eis et *esse* et *posse* et *agere* confert ». (*II. Sent.* dist. 73. q. 1. a. 2. ad 5.)

9. *Ad nonum* dicendum, quod « voluntas, quando de novo incipit eligere, transmutatur a sua priori dispositione quantum ad hoc, quod prius erat eligens in potentia et postea fit eligens actu; et haec quidem transmutatio est ab aliquo movente, in quantum ipsa voluntas movet seipsam ad agendum, et in quantum etiam movetur ab aliquo exteriori agente, sc. Deo. Non tamen ex necessitate movetur, ut dictum est in c. a. » (*De Malo* q. 6. a. unico ad 17.)

*Ad decimum* dicendum, quod « Deus operatur in omnibus, ita tamen, quod in unoquoque secundum ejus conditionem : unde in rebus naturalibus operatur sicut ministrans virtutem agendi et sicut determinans naturam ad talem actionem ; in libero autem arbitrio hoc modo agit, ut virtutem agendi sibi ministret et, ipso operante, liberum arbitrium agat ; sed tamen determinatio actionis et finis in potestate liberi arbitrii constituitur ; unde remanet sibi dominium sui actus, licet non ita sicut primo agenti ». (II. Sent. dist. 25. q. 1. a. 1. ad 3.) — Iterum : Dicendum, quod « cum dicitur aliquid movere seipsum, ponitur idem esse movens et motum ; cum autem dicitur, quod aliquid movetur ab altero, ponitur aliud esse movens et aliud motum. Manifestum est autem, quod cum aliquid movet alterum, non ex hoc ipso quod est movens, ponitur quod est primum movens ; unde non excluditur, quin ab altero moveatur et ab altero habeat similiter hoc ipsum, quod movet. Similiter cum aliquid movet seipsum, non excluditur, quin ab alio moveatur, a quo habet hoc ipsum quod seipsum movet ; et sic non repugnat libertati, quod Deus est causa actus liberi arbitrii. » (*De Malo* q. 3. a. 2. ad 4.)

Rursus : « Dicendum, quod Deus operatur in voluntate et libero arbitrio secundum ejus exigentiam ; unde etiam si voluntatem hominis in aliud mutet, nihilominus tamen hoc sua omnipotentia facit, ut illud, in quod mutatur, *voluntarie* velit... Ad actum liberi arbitrii nulla virtus est eo superior nisi Deus, quamvis forte aliqua alia virtus creata simpliciter potentior sit ; unde nulla virtus creata liberum arbitrium cogere nec immutare potest. Deus autem potest quidem immutare, sed non cogere eo modo, quo dicitur non posse facere, ut duo contradictoria sint simul... Unde ipse solus in voluntate operari potest et in ipsam imprimere ; et ideo diversitates humanae voluntatis in uniformitatem voluntatis divinae reducuntur sicut in primum regulans. » (II. Sent. dist. 25. q. 1. a. 2. ad 1., ad 3. et ad 5.)



## CAPUT NONUM

**Suprema ratio concordiae inter liberum hominis arbitrium et Dei motionem repetenda ex ipsa divinae voluntatis efficacia.**

---

### I

#### PRAENOTANDA

**PRIMO : Ponere gratiam ex se efficacem nihil aliud significat nisi gratuitam Dei motionem esse efficacem ex omnipotentia Dei moventis.** — Gratia enim ex se efficax constituitur formaliter per physicam praemotionem, id est, per gratuitam illam motionem, qua Deus movet liberam hominis voluntatem non solum ex parte objecti, sed etiam ex parte ipsius potentiae ; et huiusmodi motio est quidam motus voluntatis, quoniam actus moventis in moto est motus. (I-II. q. 111. a. 2.) Sed, ut D. Thomas declarat : « Forma recepta in aliquo non movet illud in quo recipitur, sed ipsum habere talem formam est ipsum motum esse ; sed movetur ab exteriori agente, sicut corpus quod calefit per ignem, non movetur a calore recepto, sed ab igne. » (*De Verit.* q. 22. a. 5. ad 8.) Hoc igitur, quod potentia liberi arbitrii recipit gratuitam Dei motionem, est ipsam potentiam motam esse. Unde, proprie loquendo, facultas voluntatis et rationis movetur a Deo, cujus motio in potentiis animae est motus. Quapropter Angelicus Doctor tradit expresse infallibilitatem divinae motionis seu ejusdem intrinsecam efficaciam ad movendum liberam hominis voluntatem se habere secundum quod est a Deo sicut a movente, minime secundum quod est a libero arbitrio sicut a moto ; ex virtute Spiritus



Sancti, qui infallibiliter operatur quodcumque voluerit; ex parte virtutis motivae, non ex parte vertibilitatis liberi arbitrii. (I-II. q. 112. a. 3.; II-II. q. 24. a. 11.; *De Carit.* a. 12.)

**SECUNDO : Ponere gratiam efficacem ex omnipotentia Dei moventis nihil aliud significat nisi ponere illam efficacem esse ex scientia atque Dei moventis voluntate.** — Primo namque potentia non ponitur in Deo ut aliquid differens a scientia et voluntate secundum rem, sed solum secundum rationem, in quantum sc. potentia importat rationem principii exsequentis id, quod voluntas imperat et ad quod scientia dirigit. Deinde, quoniam scientia Dei est causa rerum secundum quod habet voluntatem conjunctam. Ideoque ipsa scientia et voluntas divina, secundum quod sunt principium effectivum, habent rationem potentiae. (I. q. 14. a. 8. et q. 25. a. 1. ad 4.) Idcirco D. Thomas, dum efficaciam divinae motionis affirmat, semper ad voluntatem Spiritus Sancti atque ipsam intentionem Dei moventis appellat.

**TERTIO : De divina ista motione, involvente divinam voluntatem et divinam intentionem, quae deficere non potest, dicimus non stare quod homo simul cum illa componat contrarium dissensum** <sup>1</sup>. — Ita S. Scriptura. a) Esth. 13, 9-11 :

<sup>1</sup> In Congreg. *De Auxiliis*. 40. seu 3. coram Paulo V. quae habita fuit in Monte Quirinali coram Sanctissimo, 26. Oct. 1605, et in qua iterum *de praedeterminatione physica* est disputatum, quaesitumque: *Num in Scriptura Sacra fundari possit*, P. VASTIDA S. J., afferebat in contra illud Apostoli II Cor. 6, 1: *Hortamur vos, ne in vacuum gratiam Dei recipiatis*, et P. LEMOS O. P. sensum illius testimonii explicavit, dicens: 1º « Illud testimonium non loqui de gratia efficaci, sed de sufficiente. Exhortatur enim Paulus, ne tot sufficientia auxilia et externa et interna, sicut sunt evangelii praedicationes, interiores inspirationes, etc., in vacuum homines sua culpa recipiant »; 2º « Secundus sensus illius testimonii est: Paulum ibi loqui de gratia justificante, non de gratia actuali; et exhortatur, ne homines sua culpa in vacuum recipiant habitualement gratiam qua justificati sunt, ab illa per sua peccata recedentes et susceptam gratiam in vacuum redigentes. In utroque isto sensu procedit locus Apostoli, in quo argumentum totaliter ruit. Nego enim minorem :

« Domine, Domine, Rex omnipotens, in ditione enim tua cuncta sunt posita, et non est qui possit tuae resistere voluntati, si decreveris salvare Israël. Tu fecisti coelum et terram, et quidquid coeli ambitu continetur. Dominus omnium es; nec est qui resistat majestati tuae. » b) Ps. 113, 3: « Deus autem noster in coelo; omnia, quaecumque voluit, fecit. » c) Prov. 21, 1: « Sicut divisiones aquarum, ita cor regis

*Quod Paulus loquatur de gratia efficaciter praeveniente.* » Et prosequitur Lemos: « Cum autem instaret P. Vastida, nihil alicujus considerationis superaddens, dixit Archiepiscopus Armachanus (unus ex cardinalibus assistentibus): *Dicant Patres: An sit sensus illius loci Apostoli, quod exhortetur homines ut non jungant contrarium dissensum cum efficacia gratiae?* Ad quod Fr. Thomas: Ad hoc nullo modo exhortatur Apostolus, quia conjungere contrarium dissensum cum efficacia gratiae non est facibile. Unde ad id non exhortatur Apostolus. Cum autem P. Vastida instaret in illa sua antiqua aequivocatione *de entitate auxilii*, quod ex praecisa ratione entitatis; quod homo cum illa entitate jungat contrarium dissensum: dixit Fr. Thomas de Lemos: « Jam dixi in praecedenti Congregatione, et modo iterum dico: ... Quaestio est de auxilio in ratione auxilii secundum illam virtutem, quam habet prout actualiter venit a divina voluntate, intendente efficaciter hominem movere. De hoc dico, quod semper diximus, talem actualem motionem, qua Deus vult hominem movere, esse efficacem ex Deo ipso, et prout venit a divina voluntate, seclusa priori *scientia media*. Et cum tali motione divina, prout actualiter provenit a divina voluntate, intendente hominem movere ad bonum, non stare simul conjungere contrarium dissensum. Et sub istis terminis fuit semper quaestio tractata. Et in hoc sensu negat Molina et sui defensores auxilium praevenientis gratiae esse efficax, prout videlicet venit a Deo, et ex vi motionis divinae. Et ratio est manifesta; quia cum istud auxilium sit virtus divinae voluntatis, et sic quaedam actualis divina motio, et sic instrumentum divinae voluntatis intendentis per illud hominem movere ad bonum, non secludit nec secludere potest, imo semper essentialiter includit divinam voluntatem, quae est agens principale, in cujus virtute operatur. Manifestum est enim secundum omnem scientiam, quod cum sermo fit de instrumento in ratione actualis instrumenti, quod semper includitur principale agens. Igitur de divina ista motione, involvente divinam voluntatem et divinam intensionem, dicimus non stare quod homo simul cum illa componat contrarium dissensum. » — Haec LEMOS.

in manu Domini; quocumque voluerit, inclinabit illud. »  
*d)* Is. 46, 10 : « Consilium meum stabit, et omnis voluntas mea fiet. » *e)* Rom. 9, 19 : « Voluntati enim ejus quis resistit? »

Ita S. Augustinus : *a)* « Scriptura Divina si diligenter inspiciatur, ostendit non solum bonas hominum voluntates, quas ipse facit ex malis et a se factas bonas in actus bonos et in aeternam dirigit vitam, verum etiam illas, quae conservant saeculi creaturam, ita esse in Dei potestate, ut eas quo voluerit, quando voluerit, faciat inclinari. » (*De grat. et lib. arb.* cap. 20.) *b)* « Agit enim Omnipotens in cordibus hominum etiam motum voluntatis eorum, ut per eos agat quod per eos agere ipse voluerit, qui omnino injuste aliquid velle non novit. » (Ibid. cap. 21.) *c)* « Subventum est igitur infirmitati voluntatis humanae, ut divina gratia indeclinabiliter et insuperabiliter ageretur; et ideo, quamvis infirma, non tamen deficeret nec adversitate aliqua vinceretur. » (*De corrept. et grat.* cap. 12.)

Ita D. Thomas : *a)* « Si ex intentione Dei moventis est, quod homo, cujus cor movet, gratiam consequatur, infallibiliter ipsam consequitur. » (I-II. q. 112. a. 3.) *b)* « Impossibile est haec duo simul esse vera, quod Spiritus Sanctus velit aliquem movere ad actum caritatis, et quod ipse caritatem amittat peccando. » (II-II. q. 24. a. 11.) *c)* « Necesse est dicere, quod motio Spiritus Sancti semper est efficax secundum suam intentionem. » (*De Carit.* a. 12.)

Ita Cajetanus : « Efficaciam simul et facilitatem divinae operationis ad inclinandum cor hominum quocumque Deo placuerit, describit Salomon instar dividētis aquas in multos rivos. Facillima est enim divisio aquae in multos rivos eo quod aqua non resistit divisioni. Quemadmodum enim operatio hominis facillimae est efficaciae ad dividendum aquam in multos rivos, nec opus est laborare ad hujusmodi divisionem, quamvis laborare oporteat ad faciendum alveos, per quos aqua deducatur : ita facillima efficacia Deus movet cor et inclināt illud, quocumque voluerit ipse summus Deus; scribitur enim hic nomen *Tetragrammaton*. Nullus inter-

cedit labor, nulla resistentia, quando Deus vult; in omni enim creatura et non solum in corde hominis est, quae a theologis vocatur potentia obedientiae relative ad Deum. Omnia enim quaecumque vult Deus, facit sine resistentia, prout vult. » (*In Prov.* cap. 21, 1.)

**QUARTO : Quatenus ergo sit ultima atque suprema ratio in concordia liberi arbitrii cum gratuita Dei motione ex se et ab intrinseco efficaci.** — Juxta doctrinam S. Augustini et D. Thomae, ultimum *quare* hujusmodi excellentissimae ac adeo intimae concordiae inter liberum arbitrium et physicam Dei motionem est : *quia Deus voluit atque praescivit*. Non enim primo Deus praescivit ante omnem actum suae liberae voluntatis, in quam partem ex sola sua innata libertate arbitrium creatum, in his vel illis circumstantiis positum, sese inflectebat, et deinde voluit ac decrevit; sed primo decernendo voluit, et deinde praescivit. Scientia namque, qua Deus cognoscit certissime et infallibiliter omnes cogitationes mentium et omnes voluntates cordium, sive praeteritas sive praesentes sive futuras, est scientia divina habens adjunctam voluntatem et consequens ad actum liberae suae voluntatis, qua Deus decrevit ab aeterno, quae ab ipso per suas creaturas et in creaturis suis fienda sunt in tempore. Deus enim cognoscendo suum velle, cognoscit omnem voluntatem; et Deus praescit quae ipse facturus est. Ad efficaciam igitur divinae voluntatis assurgentes, ut concordia inter liberum hominis arbitrium et Dei motionem in perspicuo ponatur, haec, quae subsequuntur, restant nobis adhuc declaranda :

1º Deus cognoscit motus seu actus liberi arbitrii creati, cognoscendo seipsum ut causam primam efficientem respectu motuum atque operationum voluntatis creatae.

2º Voluntas Dei est ita efficax et perfecta in causando motus voluntatis, ut non solum conferat libero arbitrio creato causare suos proprios actus, verum etiam modum illos causandi, nempe : *libere*.

3º Omnes actus liberi arbitrii creati sunt praedefiniti seu



praedeterminati in causa prima efficiente, quae est voluntas Dei.

4<sup>o</sup> Praescientia Dei non est ratio praedefinitionis, sed e converso, praedefinitio actuum liberorum est ratio divinae praescientiae ipsorum.

5<sup>o</sup> Ultima resolutio hujus magnae controversiae.

## II

### CONCLUSIO 1.

**Deus cognoscit motus seu actus liberi arbitrii creati, cognoscendo seipsum ut primam efficientem causam respectu omnium motuum liberae voluntatis creatae.**

Arg. 1<sup>um</sup>. — *Ex ratione entis*. — Omnis quidem actus liberi arbitrii est *ens* in anima rationali, nempe ens in voluntate et ens in intellectu; nam liberum arbitrium est facultas voluntatis et rationis. Sed Deus, cognoscendo seipsum ut causam primam efficientem rerum, cognoscit omnia entia et omnes entium differentias et quae sub eis continentur; sive entia sint in anima, sive sint in rebus extra animam. Etenim Deus est ens per essentiam; et omnia alia sunt entia per participationem, quae eo modo, quo sunt, ab ente per essentiam effecta esse oportet. Relinquitur ergo, quod Deus ea quae sunt in cogitatione et in voluntate creaturae, cognoscat, seipsum ut ea efficientem cognoscendo.

Arg. 2<sup>um</sup>. — *Ex relatione inter causalitatem et cognitionem Dei respectu creaturarum*. — Deus cognoscendo suam essentiam, cognoscit omnia ad quae sua causalitas extenditur; quia sic, cognoscendo suam essentiam, alia cognoscit, sicut per cognitionem causae cognoscuntur effectus. Sed causalitas Dei extenditur ad operationes intellectus et voluntatis, ad initium usque harum operationum, ad determinationem

videlicet ipsam, qua se ad agendum determinat omne liberum arbitrium creatum; quoniam Deus est fontale principium totius esse, a quo est omnis forma, per quam res quaelibet operatur, et omnis operatio, cujus principium est forma, et omnis virtus, per quam forma completur in ratione principii operandi ac simul suae propriae operationi conjungitur. Cognoscit igitur Deus cogitationes et affectiones mentis, seipsum cognoscendo ut causam primam, ad quam principalis reducuntur effectus causarum secundarum.

Arg. 3<sup>um</sup>. — *Ex eo, quod velle Dei est primum velle.* — Sicut esse Dei est primum esse, et per hoc omnis esse causa: sic intelligere et velle Dei est primum intelligere et primum velle, et per hoc omnis operationis liberi arbitrii, quae est facultas voluntatis et rationis, causa; causa, inquam, efficiens, exemplaris ac finalis. Sicut igitur Deus cognoscendo suum esse, cognoscit esse cujuslibet rei, ita cognoscendo suum intelligere et velle, cognoscit omnem cogitationem et voluntatem. Cognoscendo ergo Deus suum esse et intelligere et velle ut *causam exemplarem* tantum, cognoscit omne ens, omnem cogitationem et omnem motum voluntatis, tamquam ejus virtute *possibilia*; cognoscendo autem suum esse, intelligere et velle ut *causam* praeterea *efficientem*, cognoscit omnia entia futura et omnem futuram cogitationem et omnem futurum liberae voluntatis motum.

Arg. 4<sup>um</sup>. — *Ex hoc, quod velle creatum est opus divinae artis.* — Nostrum enim intelligere ac nostrum velle nostrumque libere operari est opus divinae artis et quid revera artificiale respectu primi intellectus et primi volentis et primi liberi. Omnis namque cogitatio mentis atque voluntatis creatae actio comparantur ad intellectum et voluntatem Dei sicut artificiata ad scientiam artificis. Sed artificialia sunt in artificibus per intellectum et voluntatem artificum, sicut res naturales sunt in causis suis per virtutem causarum. Cum ergo scientia Dei sit causa rerum secundum quod habet voluntatem conjunctam, Deus cognoscendo se ut causam exemplarem simul atque efficientem omnium motuum

liberae voluntatis, cognoscit artificialia sua, quae sunt actus nostri liberi arbitrii; cognoscit, inquam, opera suae divinae artis, quae sunt cogitationes nostrarum mentium et affectus desideriaque nostrorum cordium.

Arg. 5<sup>um</sup>. — *Ex eo, quod omnis virtus agendi est a causa prima.* — Cogitatio quidem animae est per informationem quandam ipsius, in quantum Deus, qui dedit ei virtutem ad intelligendum tam naturalem quam superadditam, imprimit etiam similitudinem rei intellectae; ac pariter, affectus animae est quaedam inclinatio ipsius ad aliquid, in quantum Deus inclinat voluntatem in bonum, administrando virtutem agendi, et applicando hanc virtutem ad agendum, et directe movendo ad bonum. Deus enim influit creaturae rationali omnia : *esse, posse et agere*; et bonarum operationum ita est causa, ut efficiat tam substantiam actus quam perfectionem, secundum quam actus dicitur bonus. Unde utrumque influit Deus nostro libero arbitrio : 1<sup>o</sup> ut *agat*; 2<sup>o</sup> ut *libere agat*; 3<sup>o</sup> ut *bene agat*; omni quocumque gradu bonitatis ac perfectionis, sive in ordine naturae tantum, sive in ordine quoque supernaturali. Sicque Deus, seipsum cognoscendo ut causam efficientem, cognoscit cogitationes mentium et voluntates cordium in *virtute causae*, cum ipse sit universale essendi atque agendi principium.

Haec igitur sunt quinque argumenta, quibus D. Thomas *I. C. Gent.* cap. 68. ostendit, quod « Deus cogitationes mentium et voluntates cordium cognoscat in *virtute causae*, cum ipse sit universale essendi principium ». In *virtute causae* : hic non agitur de libero arbitrio creato se determinante ad volendum hoc vel illud ante omne decretum liberae Dei voluntatis; sed agitur de *virtute causae*, quae est Deus. Etenim Deus solus, et non liberum arbitrium creatum, est universale essendi principium, respectu cujus omnis virtus operandi est *causata*, et omnis causa est *effectus*, et omne principium tam essendi quam operandi est *particulare*, et omne liberum arbitrium est *subditum*, et omne dominium est *subjectum*. D. Thomas assurgens

supra potentiam liberi arbitrii creati, ut inveniat fundamentum scientificum absolutae certitudinis divinae scientiae circa futura libera et contingentia, assignat duas causas, quare illa sint Deo praesentia ab aeterno, nimirum : 1<sup>o</sup> *rationes rerum ipsarum* in mente divina ; 2<sup>o</sup> *aeternitatem* Dei, cujus scientia cum ipsius aeternitate realiter identificatur. Sed *rationes* rerum ante decretum Dei non repraesentant res ipsas ut futuras, sed ut possibles dumtaxat ; non ut fiendae in tempore, sed solummodo ut factibiles. Ex se causae sunt quidem rerum exemplares, at non efficientes. Ut enim scientia Dei efficiat res, voluntatem Dei suae scientiae oportet adjungere ac rerum rationibus divinae voluntatis decretum. Deus cognoscit certissime et infallibiliter omnes cogitationes mentium et omnes voluntates cordium in decreto suae liberae voluntatis ; ideoque ratio suprema, quare quaedam contingentia ac libera sunt in praesentia suae aeternitatis et quaedam non sunt, est libera ipsius Dei voluntas. Tam S. Augustinus quam D. Thomas semper appellant ad divinam causalitatem tamquam ad rationem supremam pro certitudine divinae scientiae circa futura libera et contingentia firmiter stabilienda, et pro reddenda ultima ratione, quare omnia futura contingentia et libera subduntur divino conspectui secundum suam praesentialitatem.

**S. Augustinus.** — a) XV. *De Trinit.* cap. 13. : « Nos oramus Deum, nec tamen necessitates nostras docemus eum. *Novit enim* (ait Verbum ejus) *Pater vester, quid vobis necessarium sit, priusquam petatis ab eo.* (Math. 6, 8) Nec ista ex aliquo tempore cognovit, ut nosset ; sed futura omnia temporalia, atque in eis etiam quid et quando ab illo petituri fueramus, et quos et de quibus rebus vel exauditurus vel non exauditurus esset, sine initio ante praescivit. Universas autem creaturas suas et spirituales et corporales, non quia sunt, ideo novit, sed ideo sunt, quia novit. Non enim nescivit, quae fuerat creaturus. Quia ergo scivit, creavit ; non quia creavit, scivit. Nec aliter ea scivit creata,



quam creanda; non enim ejus sapientia aliquid accessit ex eis; sed illis existentibus, sicut oportebat et quando oportebat, illa mansit ut erat... Longe est ergo huic scientiae nostra scientia dissimilis. Quae autem scientia Dei est, ipsa est sapientia; et quae sapientia, ipsa essentia sive substantia. Quia in illius essentia simpliciter mirabili non est aliud *sapere*, aliud *esse*; sed quod est sapere, hoc est esse. »

b) XIII. *Confess.* cap. 38. : « Nos itaque ista, quae fecisti, videmus, quia sunt; tu autem quia vides ea, sunt. Et nos foris videmus quia sunt, et intus quia bona sunt; tu autem ibi vidisti facta, ubi vidisti facienda. »

c) V. *De Civit. Dei* cap. 9. : « Nos adversus istos sacrilegos ausus atque impios, et Deum dicimus omnia scire antequam fiant; et voluntate nos facere quidquid a nobis non nisi volentibus fieri sentimus et novimus... Qui enim non est praescius omnium futurorum, non est utique Deus. *Quapropter et voluntates nostrae tantum valent, quantum Deus eas valere voluit atque praescivit*; et ideo quidquid valent, certissime valent; et quod facturae sunt, ipsae omnino facturae sunt; quia valituras atque facturas ille praescivit, cujus praescientia falli non potest. »

**D. Thomas.** — a) I. q. 14. a. 11. : « Cum Deus sit causa rerum per suam scientiam, ut dictum est a. 8., in tantum se extendit scientia Dei, in quantum se extendit ejus causalitas. » Et ibid. q. 57. a. 2. : « Et secundum quod causat, sic et cognoscit; quia scientia ejus est causa rei, ut ostensum est q. 14. a. 8. » Et ibid. a. 4. : « Et sic solus Deus cogitationes cordium et affectiones voluntatum cognoscere potest. Cujus ratio est: quia voluntas rationalis creaturae soli Deo subjacet, et ipse solus in eam operari potest. »

b) I Cor. 2. lect. 2. : « Angelus autem neque bonus neque malus illabitur menti humanae, ut in ipso corde hominis sit et intrinsecus operetur; sed hoc solius Dei proprium est. Unde solus Deus est conscius secretorum cordis hominis, secundum illud Job. 16, 20 : *Ecce in coelo testis meus, et in excelsis conscius meus.* »

c) Job. 12. lect. 2. : « Ostenso igitur, quod in Deo sit fortitudo, sapientia et consilium, ultimo ostendit, quod in Deo sit intelligentia, quam diximus pertinere ad cognitionem occultorum, quae maxime videntur esse circa ea, quae in corde latent. Haec autem Deum cognoscere ostendit per hoc, quod in cordibus hominum operatur; et sic occulta cordium quasi suos effectus cognoscit. Dicit ergo : *Qui immutat cor principum populi terrae*, quantum sc. ad voluntatem. Unde et Prov. 21, 1 : *Cor regis in manu Domini; quocumque voluerit, inclinabit illud*. Et licet omnium hominum Deus inclinet voluntates, tamen specialis mentio fit de regibus et principibus; quia eorum voluntates majus pondus habent, utpote quorum voluntates multi sequuntur. »

d) Coloss. 1. lect. 4. : « Deus enim non alio se cognoscit et creaturam, sed omnia in sua essentia sicut in prima causa effectiva. » *De div. nom.* cap. 5. lect. 2. : « Sic enim omnia praexistunt in Deo, sicut ipse omnium est productivus. » Et ibid. cap. 6. lect. 3. : « Si enim ita esset, quod cognoscendo seipsum non cognosceret omnia, sequeretur, quod ejus causalitas alicubi vacaret, ita sc. quod essent aliqua non ab eo causata. Sicut igitur impossibile est, quod sit aliquid a Deo non causatum, ita impossibile est, quod sit aliquid a Deo non cognitum. »

e) III. C. Gent. cap. 56. : « Deus voluntates nostras, sicut et alios suos effectus, cognoscit per hoc, quod est nobis causa volendi. » Et rursus : I. C. Gent. cap. 66. : « Sed cognitio Dei est de rebus omnibus per causam; se enim cognoscendo, qui est omnium causa, alia quasi suos effectus cognoscit. »

f) *De angelor. natura*<sup>1</sup> cap. 12. : « Si Deus se ipsum cognoscit, oportet quod perfecte cognoscat se; praesertim quia si ejus intelligere est ejus substantia, necesse est, ut quidquid est in ejus substantia, ipsius cognitione comprehendatur. Cujuscumque autem rei perfecte substantia cognoscitur, necesse est etiam ut virtus perfecte cognoscatur. Cognoscit igitur perfecte suam virtutem. Oportet igitur, quod

<sup>1</sup> Opuscul. 14. edit. Vivès, et 16. edit. Rom.

cognoscat omnia, ad quae sua virtus se extendit. Sua autem virtus extenditur ad omne quod est quocumque modo in rebus vel esse potest, sive proprium sive commune, sive immediate ab eo productum sive mediantibus causis secundis; quia causae primae virtus magis imprimit in effectum quam virtus causae secundae. Oportet igitur Deum cognitionem habere de omnibus quae sunt quocumque modo in rebus. »

g) *I. Sent.* dist. 38. q. 1. a. 5. : « Patet etiam, quod Deus ab aeterno non solum vidit ordinem sui ad rem, ex cujus potestate res erat futura; sed ipsum esse rei intuebatur. » Intueri autem ipsum esse rei ab aeterno, est videre rem coram se in praesentia aeternitatis; videre autem ordinem sui ad rem, ex cujus potestate res habet rationem esse *futuri*, est videre rem in decreto suae voluntatis. Ratio itaque suprema, quare futura libera et contingentia sunt praesentia in speculo aeternitatis, est libera ipsius Dei voluntas <sup>1</sup>.

<sup>1</sup> Verum est quidem asserere, quod Deus cognoscat certissime et infallibiliter omnia futura, etiam contingentia et libera, omnesque proinde cogitationes mentium et voluntates cordium, in quantum subduntur divino conspectui secundum suam praesentialitatem, ut BOETIUS ostendit *V. De consol. Phil.* prosa 6. Tota enim hujusce argumenti vis desumitur : 1<sup>o</sup> ex natura aeternitatis, quae est *interminabilis, semper manens, et tota simul*; 2<sup>o</sup> ex natura temporis, quae est *terminabilis, semper successionem habens et unam partem post aliam*. Unde ex comparatione temporis ad aeternitatem sequitur, quod omnia creata seu causata, sive sint praeterita sive praesentia sive futura, *coëxistunt* aeternitati; id est, sunt *praesentia* secundum suum esse in actu in rerum natura per respectum ad esse aeternum. Inde etiam deducitur *praesentia* totius esse temporalis *ut cogniti* ad Deum *ut cognoscentem*, cum Deus sit ipsa aeternitas, et aeternitas sit ipsa Dei scientia. Aeternitas namque Dei, cui coëxistunt omnia temporalia, quae in se considerata possunt esse praeterita, praesentia aut futura, est per se intelligens atque omnia uno intuitu videns. Haec est illa profunda ratio, quam D. Thomas amat repetere, evolvere atque exemplis dilucidare ad demonstrandum quod Deus ab aeterno contingentium singularium et liberorum futurorum infallibilem atque immutabilem habet scientiam; et quod Deus de excelso suae aeternitatis per certitudinem

## III

## CONCLUSIO 2.

**Voluntas Dei est adeo efficax et perfecta in causando motus voluntatis, ut non solum conferat libero arbitrio creato ut agat, verum etiam ut libere et bene agat.**

Arg. 1<sup>um</sup>. — *Ex auctoritate*. — a) Boetius V. *De Cons. Phil.* prosa 6. : « Haec enim scientiae (Dei) vis, praesentaria notione cuncta complectens, rebus omnibus modum ipsa

videt, quasi praesentia, omnia, quae per totum temporis decursum aguntur, absque hoc quod rebus contingentibus necessitas imponatur. Quod declaratur ab Angelico Doctore *I. Sent.* dist. 38. q. 1. a. 5.; *I. Perihier.* lect. 13.; Opusc. *De rationibus fidei* cap. 10. (opusc. 2. edit. Vivès); *Comp. theol.* cap. 134.; *De Verit.* q. 2. a. 12.; *I. C. Gent.* cap. 66.; I. q. 14. a. 13. Attamen in hac demonstratione supponitur *futurum*; et posito quod aliquid sit *futurum*, etiam contingenter et libere, demonstratur illud esse *praesens* Deo, cujus intelligere est in aeternitate supra tempus. Quidquid igitur per totum temporis decursum agitur, divinus intellectus in tota sua aeternitate intuetur quasi praesens; sicut ille, qui ab aliqua altitudine totam viam intuetur, simul videt omnes transeuntes per viam. At undenam futurum contingens et liberum habet *rationem futuri*? Cum ergo potentia liberi arbitrii creati se habeat ad utrumlibet et possit procedere in actus oppositos: quare ex infinitis cogitationibus mentium et ex infinitis voluntatibus cordium, quae sunt *possibiles*, quaedam sunt *futurae*, et quaedam nec sunt nec fuerunt nec erunt? Videtne Deus motus liberi arbitrii creati, quia liberum arbitrium ex sua innata vi *determinat se ad unum* ante voluntatem Dei determinantem; vel e contra, motus liberi arbitrii, seipsum ad unum libere determinantis, videntur a Deo in *suo proprio velle*, id est, in divino decreto? En quaestio capitalis, ex cujus solutione dependent reliqua omnia in controversa *de causis*. Qui doctrinam Angelici Doctoris circa hanc altissimam quaestionem desideret undequaque complete habere ac clare perspicere, diligenter legat atque attente meditetur argumenta exposita *I. C. Gent.* cap. 68. et *De angelor. natura* cap. 12.



constituit, nihil vero posterioribus debet. Quae cum ita sint, manet intemerata mortalibus arbitrii libertas. »

b) S. Augustinus *V. De Civit. Dei* cap. 9. : « Voluntates nostrae tantum valent, quantum Deus eas valere voluit atque praescivit. » Et *XII. cap. 9.* : « Si dixerimus nullam esse efficientem causam etiam voluntatis bonae, cavendum est, ne voluntas bona bonorum angelorum non facta, sed Deo coaeterna credatur. Cum ergo ipsi facti sunt, quomodo illa non esse facta dicitur?... Si autem boni angeli fuerunt prius sine bona voluntate, eamque in seipsis, Deo non operante, fecerunt : ergo meliores a seipsis quam ab illo facti sunt. Absit. »

c) D. Thomas *II. Sent. dist. 37. q. 2. a. 2.* : « Si voluntas humana actionem aliquam posset producere, cujus auctor Deus non esset, voluntas humana rationem primi principii haberet... Non tamen posset vitari, quin esset primum agens, si ejus actio in aliquid prius agens non reduceretur sicut in causam... Deus dicitur causa bonarum operationum non solum quantum ad essentiam actus, sed etiam quantum ad perfectionem, secundum quam bonae dicuntur ; utrumque enim agenti influit : et ut *agat*, et ut *bene agat*. »

Arg. 2<sup>um</sup>. — *Ex natura divinae voluntatis.* — D. Thomas *I. Periher. lect. 14.* : « Nam voluntas divina est intelligenda ut extra ordinem entium existens, velut causa quaedam profundens totum ens et omnes ejus differentias. Sunt differentiae entis possibile et necessarium ; et ideo ex ipsa voluntate divina originatur necessitas et contingentia in rebus, et distinctio utriusque secundum rationem proximarum causarum. Ad effectus enim, quos voluit necessarios esse, disponit causas necessarias ; ad effectus autem, quos voluit esse contingentes, ordinavit causas contingenter agentes, id est, potentes deficere. Et secundum harum conditionem causarum, effectus dicuntur vel necessarii vel contingentes, quamvis omnes dependeant a voluntate divina sicut a prima causa, quae transcendit ordinem necessitatis et contingentiae. Hoc autem non potest dici de voluntate humana nec de

aliqua alia causa, quia omnis alia causa cadit jam sub ordine necessitatis vel contingentiae. Et ideo oportet, quod vel ipsa causa possit deficere, vel ejus effectus non sit contingens sed necessarius. Voluntas autem divina indeficiens est; tamen non omnes effectus ejus sunt necessarii, sed quidam contingentes. » Voluntas ergo divina est causa profundens totum ens et omnes gradus perfectionis, quibus ens modificatur ac completur. Unde ex ipsa Dei voluntate originatur, quod libera hominis voluntas agat, et libere et bene et perfecte agat.

Arg. 3<sup>um</sup>. — *Ex facto*. — Dei namque voluntas adeo fuit efficax atque perfecta in causando primum motum voluntatis in angelis, in primis parentibus ac in Domino nostro Jesu Christo, ut hujusmodi primus angelicae et humanae voluntatis actus fuit : 1<sup>o</sup> actus ; 2<sup>o</sup> liber ; 3<sup>o</sup> bonus in ordine morali ; 4<sup>o</sup> bonus ac salutaris in ordine supernaturali ; 5<sup>o</sup> meritorius vitae aeternae in angelis et hominibus, et meritorius gratiae et gloriae nobis in Christo Domino, qui a primo instanti suae conceptionis fuit simul viator et comprehensor per visionem divinae essentiae.

a) *Quoad angelos*. — S. Augustinus XII. *De Civit. Dei* cap. 9. : « Et istam (voluntatem bonam) quis fecerat nisi ille, qui eos cum bona voluntate, id est, cum amore casto, quo illi adhaerent, creavit, simul eis et condens naturam et largiens gratiam? » Et D. Thomas I. q. 63. a. 5. : « Impossibile fuit angelum in primo instanti peccasse per inordinatum actum liberi arbitrii. Quamvis enim res aliqua in primo instanti, quo esse incipit, simul incipere possit operari : tamen illa operatio, quae simul incipit cum esse rei, est ei ab agente, a quo habet esse ; sicut moveri sursum inest igni a generante. Unde si aliqua res habet esse ab agente deficiente, quod possit esse causa defectiva actionis, poterit in primo instanti, in quo incipit esse, habere defectivam operationem ; sicut si tibia, quae nascitur clauda ex debilitate seminis, statim incipiat claudicare. Agens autem, quod angelos in esse produxit, sc. Deus, non potest esse causa peccati. Unde non

potest dici, quod diabolus in primo instanti suae creationis fuerit malus... Quidquid est in merito, est a Deo. Et ideo in primo instanti suae creationis angelus mereri potuit. Sed non est similis ratio de peccato... Et ideo omnes in gratia creati in primo instanti meruerunt. »

b) *Quoad primum hominem.* — Eadem quoque de primo homine tradit D. Thomas I. q. 95. a. 1. : « Homo et angelus aequaliter ordinantur ad gratiam. Sed angelus est creatus in gratia. Ergo et homo fuit creatus in gratia... Cum motus voluntatis non sit continuus, nihil prohibet etiam in primo instanti suae creationis primum hominem gratiae consensisse. »

c) *Quoad Christum Dominum.* — III. q. 18. a. 4. ad 3. : « Voluntas Christi, licet sit determinata ad bonum, non tamen est determinata ad hoc vel ad illud bonum. Et ideo pertinet ad Christum eligere per liberum arbitrium confirmatum in bono, sicut ad beatos. » Et ibid. q. 34. a. 3. : « Cum ergo sanctificatio Christi fuerit perfectissima (quia sic sanctificatus est, ut esset aliorum sanctificator), consequens est, quod ipse secundum proprium motum in Deum fuerit sanctificatus; qui quidem motus liberi arbitrii est meritorius. Unde consequens est, quod in primo instanti suae conceptionis Christus meruit. » Et ad 1. : « Liberum arbitrium non eodem modo se habet ad bonum et ad malum. Nam ad bonum se habet per se et naturaliter; ad malum autem se habet per modum defectus et praeter naturam... Et ideo liberum arbitrium creaturae in primo instanti creationis potest moveri ad bonum merendo, non autem ad malum peccando, si tamen natura sit integra. » Et III. *Sent.* dist. 18. q. 1. a. 2. ad 5. : « Liberum arbitrium Christi non erat determinatum ad unum secundum numerum, sed ad unum secundum genus, sc. ad bonum, quia in malum non potest; sed tamen hoc potest facere et non facere; et hoc non excludit libertatem arbitrii; quia *posse* peccare non est libertas arbitrii, nec pars libertatis, ut dicit Anselmus in *Dialog. de lib. arb.* cap. 1. Et haec quidem determinatio ex perfectione liberi arbitrii contingit, secundum quod per habitum gratiae et gloriae terminatur in eo, ad quod est naturaliter ordina-

tum, sc. in bono; quia liberum arbitrium, quamvis in nobis se habeat ad bonum et ad malum, non tamen est propter malum, sed propter bonum. Vel dicendum, quod si etiam esset determinatum ad unum numero, sicut ad diligendum Deum, quod non facere non potest: tamen ex hoc non amittit libertatem aut rationem laudis sive meriti, quia in illud non coacte, sed sponte tendit; et ita est *actus sui dominus*. » Hactenus D. Thomas.

### COROLLARIA

Ex quibus omnibus plurima, et haec magnifica pro manifestanda gratiae et liberi arbitrii concordia nobis offeruntur pensanda, quorum:

1<sup>um</sup>. — *Posse peccare* non est libertas arbitrii nec pars libertatis, quamvis sit quoddam libertatis signum. Quod idem est dicendum de « *posse resistere* Deo moventi et excitanti », de quo est sermo sess. 6. can. 4. Concilii Tridentini. Christus enim Dominus *non poterat resistere* Deo moventi et excitanti liberum illius arbitrium; et tamen erat liberrimus. Similiter angelus et homo in primo instanti suae creationis *non poterant* peccare, et tamen *libere consenserunt* Deo moventi atque excitanti eos ad se diligendum, et libere consentiendo meruerunt.

2<sup>um</sup>. — De ratione liberi arbitrii est se habere ad utrumque; at diversimode hoc contingit juxta diversos status hominis vel creaturae rationalis. In beatis, ad utrumque in genere tantum bonorum; in damnatis, ad utrumque in genere tantum malorum; in viatoribus, ad utrumque in genere bonorum; et quoniam dum homo est viator, liberum ipsius arbitrium potest adhuc deficere, utpote vertibile in malum, etiam ad utrumque in genere malorum.

3<sup>um</sup>. — Unde absolute loquendo « dicendum est, quod ad rationem liberi arbitrii non pertinet ut indeterminate se habeat ad bonum vel ad malum; quia liberum arbitrium per se in bonum ordinatum est, cum bonum sit objectum voluntatis, nec in malum tendit nisi propter aliquem de-



fectum, quia apprehenditur ut bonum, cum non sit voluntas aut electio nisi boni; et ideo ubi perfectissimum est liberum arbitrium, ibi in malum tendere *non potest*, quia imperfectum esse non potest. Sed hoc ad libertatem arbitrii pertinet, ut actionem aliquam facere vel non facere possit; et hoc Deo convenit; bona enim quae facit, potest non facere, nec tamen malum facere potest. » (*II. Sent. dist. 26. q. 1. a. 1. ad 2.*)

4<sup>um</sup>. — Quod ergo liberum hominis arbitrium *possit resistere* Deo moventi, si velit, involvit defectum atque imperfectionem; quod autem *resistere non velit*, nec de facto proinde resistat, involvit perfectionem maximam ipsius liberi arbitrii. Unde determinatio liberi arbitrii ad bonum auget libertatem ac naturales ejusdem liberae voluntatis vires robore accrescit; quoniam hujusmodi determinatio ex bono usu liberi arbitrii, mediante divinae gratiae auxilio, originem trahit.

5<sup>um</sup>. — Unde gratia ex se efficax maxime liberum hominis arbitrium perficit: *a)* quoniam impedit, quin de facto liberum arbitrium resistat Deo, etiam cum resistere *possit*; *b)* quoniam hujusmodi *potentiam*, quae est deficientia ac infirmitas, minuit, sicut etiam illam minuit habitualis inclinatio ad bonum, quae est per habitum gratiae sanctificantis; *c)* quoniam per gratiam ex se efficacem liberum arbitrium terminatur actualiter in eo, ad quod est naturaliter ordinatum, scilicet in bono.

6<sup>um</sup>. — Liberum arbitrium habet locum etiam cum voluntas est determinata ad bonum, id est, *ad unum* secundum genus. Unde ad Christum pertinebat eligere per liberum arbitrium confirmatum in bono; et haec est libertas Dei et beatorum.

7<sup>um</sup>. — Liberum arbitrium in Christo Domino habebat adhuc locum etiam cum esset determinatum *ad unum* numero, sicut ad diligendum Deum, quod non facere non poterat; et tamen non ex hoc amittebat libertatem aut rationem laudis sive meriti. Etenim cum Christus Salvator noster eliciebat actum caritatis et dilectionis erga Deum, erat actus

sui verus dominus. Verumtamen in statu naturae lapsae voluntas hominum viatorum, etiamsi confirmata sit in bono ex speciali Dei privilegio, sicut creditur de Beatissima Virgine, et licet supponatur determinata ad bonum ac perinde ad unum secundum genus, non tamen est determinata ad unum numero. Unde etiam ad diligendum Deum in homine viatore, quantumvis sanctissimo atque in gratia confirmato, semper adest : 1<sup>o</sup> *libertas a coactione*, ut planum est ; 2<sup>o</sup> *libertas a necessitate*. Quamobrem inter propositiones Jansenii ab Innocentio X. damnatas, propositio 3. sic se habet : « Ad merendum vel demerendum in statu naturae lapsae non requiritur in homine libertas a necessitate, sed sufficit libertas a coactione. » In Christo autem Jesu erat quidem necessitas diligendi Deum et obediendi Deo et servandi mandata Dei ; sed necessitas justitiae, sanctitatis et immutabilitatis in bono ; ac talis necessitas non tollit libertatem, sed est corona gloriae ipsius libertatis.

8<sup>um</sup>. — Ad actum liberi arbitrii et ad actum quidem vitae aeternae meritorium non requiritur, quod homo determinet se per suam rationem ad volendum hoc vel illud, sed sufficit, quod voluntas ipsius sit libera quoad exercitium actus, ut contingit quando determinatur ex judicio divinae sapientiae supra humanam rationem. Etenim nec angelus nec primus homo determinaverunt se per rationem ad diligendum Deum in primo instanti suae creationis ; sed ab ipso Deo, a quo acceperunt *esse*, acceperunt simul motum liberi arbitrii, ipsum actum, quo credendo, sperando et amando adhaerebant Deo. Et tamen hujusmodi actus erat liber et insuper meritorius.

9<sup>um</sup>. — Ex doctrina D. Thomae supra ad litteram allegata jam facilis patet via ad recte capienda et bene penetranda ea omnia, quae ab ipso Angelico Doctore traduntur : *a*) circa universalem ac specialem Dei motionem (I-II. q. 9. a. 6.) ; *b*) circa motionem, qua Deus convertit homines justos ad seipsum sicut ad specialem finem (I-II. q. 109. a. 6.) ; *c*) circa gratiam operantem, qua mens nostra est mota et non movens, solus autem Deus movens (I-II. q. 111. a. 2.) ; *d*) et circa

illum motum liberi arbitrii, per quem, dum justificamur, Deū justitiae consentimus et donum gratiae justificantis accepimus. (I-II. q. 113. a. 3. et 8.) Omnia adeo sibi consonant in sancta D. Thomae doctrina!

10<sup>um</sup>. — Si ergo voluntas Dei ita fuit efficax et perfecta in causando, ut in primo instanti creationis simul cum *esse* et *posse* dederit quoque *libere* ac *meritorie operari* tam angelis quam hominibus, nullum debet restare dubium, quod etiam post primum creationis instans, postquam *esse* naturae et potentias operandi contulit, operationem quoque consonam potentiis operativis et naturae hominis operantis possit conferre et de facto conferat per gratiam ex se ab intrinseco efficacem. Unde oportet quaerere clavem totius concordiae inter Dei motionem et hominis arbitrium in ipsismet aeternis decretis ac praedeterminationibus Dei Creatoris ac Salvatoris.

---

#### IV

#### CONCLUSIO 3.

**Omnes actus liberi arbitrii creati sunt praedefiniti seu praedeterminati in prima causa efficiente, quae est voluntas Dei; atque hujusmodi divina praedeterminatio seu praedefinitio actuum liberorum creaturae rationalis est ratio divinae praescientiae ipsorum.**

**Quoad 1<sup>am</sup> partem.** — Arg. 1<sup>um</sup>. — *Ex S. Scriptura.* —  
 a) Ephes. 1, 3-11 : « Benedictus Deus et Pater Domini nostri Jesu Christi, qui benedixit nos in omni benedictione spirituali in coelestibus in Christo. Sicut elegit nos in ipso ante mundi constitutionem, ut essemus sancti et immaculati in conspectu ejus in caritate. Qui praedestinavit nos in adoptionem filiorum per Jesum Christum in ipsum, secundum propositum voluntatis suae... In quo etiam et nos sorte vocati sumus, praedeterminati secundum propositum ejus, qui

operatur omnia secundum consilium voluntatis suae. » Act. Ap. 4, 27-28 : « Convenerunt enim vere in civitate ista adversus sanctum puerum tuum Jesum, quem unxisti, Herodes et Pontius Pilatus cum gentibus et populis Israël, facere quae manus tua et consilium tuum decreverunt fieri. » Ibid. 1, 24 : « Tu, Domine, qui corda nosti omnium, ostende, quem elegeris ex his duobus unum. » Et ibid. 13, 48 : « Audientes autem gentes gavisae sunt et glorificabant verbum Domini; et crediderunt quotquot erant praeordinat ad vitam aeternam. » Ibid. 22, 13-15 : « Veniens ad me (Ananias), et astans dixit mihi : Saule frater, respice. Et ego eadem hora respexi in eum. At ille dixit mihi : Deus patrum nostrorum praeordinavit te, ut cognosceres voluntatem ejus et videres justum et audires vocem ex ore ejus; quia eris testis illius ad omnes homines eorum, quae vidisti et audisti. » Rom. 13, 1 : « Quae autem sunt, a Deo ordinata sunt. » Et Luc. 12, 7 : « Sed et capilli capitis vestri omnes numerati sunt. »

Omnia igitur sunt praeordinata et cognita et praedestinata secundum propositum Dei; et Deus operatur omnia secundum consilium voluntatis suae; et quae creatura rationalis determinat proprio suo consilio facere, manus Dei et consilium Dei decreverunt fieri. Si ergo capilli capitis vestri omnes numerati sunt : quanto magis cogitationes mentis et voluntates cordium ?

Arg. 2<sup>um</sup>. — *Ex doctrina D. Thomae* istam praedeterminationem conceptis verbis asserentis. — a) I. q. 22. a. 4. ad 3. : « Necessarium et contingens proprie consequuntur ens in quantum hujusmodi. Unde modus contingentiae et necessitatis cadit sub provisione Dei, qui est universalis provisor totius entis. » Et ad 2. « In hoc est immobilis et certus divinae providentiae ordo, quod ea, quae ab ipso providentur, cuncta eveniunt eo modo, quo ipse providet, sive necessario sive contingenter. » Ibid. q. 23. a. 6. : « Sic igitur et ordo praedestinationis est certus, et tamen libertas arbitrii non tollitur, ex qua contingenter provenit praedestinationis



effectus ». Et a. 7. : « Certus est Deo numerus praedestinatorum, non solum per modum cognitionis, sed etiam per modum cujusdam principalis praefinitionis. » Ibid. q. 106. a. 1. : « Omnia, quae hic aguntur, divinae providentiae subduntur, tamquam per eam praeordinata et quasi praelocuta. » Per comparationem ad divinam providentiam nihil temere fit in mundo ; « et ea, quae hic per accidens aguntur, sive in rebus naturalibus sive in humanis, reducuntur in aliquam causam praeordinantem, quae est providentia divina. »

b) *De Verit.* q. 3. a. 7. : « Nos ponimus Deum immediatam causam uniuscujusque rei, secundum quod in omnibus causis secundis operatur, et quod omnes effectus secundi ex ejus praedefinitione proveniunt. » Et ibid. a. 8. : « Per divinam providentiam definiuntur omnia singularia. » Et q. 6. a. 6. : « Causa secunda non ordinatur ad effectum nisi ex ordinatione causae primae. Causa autem prima dat secundae quod influat super causatum suum. » Et q. 8. a. 12. : « Quidam autem effectus futuri sunt, quorum causae indifferenter se habent ad utrumque ; haec autem vocantur contingentia ad utrumlibet, ut sunt illa praecipue, quae dependent ex libero arbitrio. Sed quia ex causa ad utrumlibet, cum sit quasi in potentia, non progreditur aliquis effectus nisi per aliquam aliam causam determinetur magis ad unum quam ad aliud : ideo hujusmodi effectus in causis quidem ad utrumlibet nullo modo cognosci possunt per se acceptis ; sed si adjungantur causae illae, quae causas ad utrumlibet inclinant magis ad unum quam ad aliud, potest aliqua certitudo conjecturalis de effectibus praedictis haberi ; sicut de his, quae ex libero arbitrio dependent, aliqua futura conijcimus ex consuetudinibus et complexionibus hominum, quibus inclinantur ad unum. Omnes autem hujusmodi effectus, qualescumque sint eorum causae proximae, tamen in causa prima omnes sunt determinati, quae sua praesentia omnia intuetur et sua providentia omnibus modum imponit. »

c) Rursus : Ibid. a. 13. : « Motus autem voluntatis non habet dependentiam nec connexionem ad aliquam causam

naturalem, sed solum ad causam divinam, quae in voluntate sola imprimere potest. Unde motus voluntatis et cordis cogitatio non potest cognosci in aliquibus similitudinibus rerum naturalium, sed solum in essentia divina, quae in voluntatem imprimit. »

d) *Quodl.* 12. a. 4. : « Alii reducunt omnia haec (quae contingenter eveniunt) in causam supracoelestem, sc. in providentiam Dei, a qua omnia sunt praedeterminata et ordinata. » Et *ibid.* a. 6. : « Quod est in veritate causae alicujus, non potest cognosci nisi a causa, quae nata est movere illam; voluntatem autem movet solus Deus. Cum ergo omnes cogitationes dependeant a voluntate sicut a sua causa, solus Deus eas cognoscit. »

Ex quibus omnibus haec aperte juxta doctrinam D. Thomae habentur : 1<sup>o</sup> Quod omnes effectus, etiam actus liberi arbitrii, sunt determinati in causa prima; et quod omnes effectus causae secundae, etiam motus liberae voluntatis, ex Dei praedefinitione proveniunt; 2<sup>o</sup> quod causa secunda, etiam libera, non ordinatur ad effectum nisi ex ordinatione causae primae; 3<sup>o</sup> quod motus voluntatis non habet dependentiam nec connexionem nisi ad causam divinam, quae in voluntate sola imprimere potest; 4<sup>o</sup> quod causa prima dat libero arbitrio quod influat super causatum suum; 5<sup>o</sup> quod ex libero arbitrio creato, quod est causa ad utrumlibet, *cum sit quasi in potentia*, non progreditur aliquis effectus, nisi per causam primam *determinetur* magis ad unum quam ad aliud; 6<sup>o</sup> quod solus Deus cognoscit cogitationes cordium et quidquid est in voluntate; quia *voluntatem movet solus Deus*, motione absque dubio physica et intrinseca; 7<sup>o</sup> quod hoc, quod actus liberi arbitrii creati praedeterminentur a causa prima efficiente quae est voluntas Dei, necessario praesupponitur ad duo sc. : a) ad hoc quod certo cognosci possint; b) ad hoc quod liberum arbitrium se ipsum determinet.

Arg. 3<sup>um</sup>. — *Ex ipso D. Thoma* declarante textus S. Scripturae et SS. PP., in quibus videtur praedeterminationem

actuum liberorum negari. *III. C. Gent. cap. 90.*, ubi postquam patefecit sex argumentis electiones et voluntates humanas divinae providentiae subditas esse et sub divina determinatione cadere, quod prosequitur ostendendum usque ad cap. 98., in fine ejusdem cap. 90. addit per modum objectionis ac simul objectionem solvendo :

a) « Videntur autem quaedam in Doctrina Sacra secundum praedictam sententiam (negantium sc. praedeterminationem actus liberi) sonare. Dicitur enim Eccl. 15, 14 : *Deus ab initio constituit hominem et reliquit illum in manu consilii sui.* Et infra 17, 18 : *Apposui tibi aquam et ignem; ad quod volueris, porrige manum tuam. Ante hominem vita et mors, bonum et malum; quod placuerit ei, dabitur illi.* Et Deut. 30, 15 : *Considera, quod hodie proposuerim in conspectu tuo vitam et bonum; et e converso, mortem et malum.* » b) « Haec autem verba ad hoc inducuntur, ut homines esse liberi arbitrii ostendantur, non ut eorum electiones a divina providentia subtrahantur. Et similiter quod Gregorius Nyssenus dicit in libro, quem de homine fecit : *Providentia est eorum quae non sunt in nobis, non autem eorum quae sunt in nobis;* et Damascenus eum sequens dicit *II. De orth. fide cap. 30.* quod : *ea, quae sunt in nobis, Deus praenoscit, sed non praedeterminat :* exponenda sunt, ut intelligantur ea, quae sunt in nobis, divinae determinationi non esse subjecta quasi ab ea necessitatem accipientia. » Quod pariter observat D. Thomas I. q. 23. a. 1. ad 1. et *De Verit. q. 5. a. 5. ad 1.*

Ex quibus et ex aliis mox afferendis aperte liquet, quod juxta doctrinam D. Thomae : 1<sup>o</sup> Duplex divina praedeterminatio distinguenda est ex parte modi determinandi, nempe : a) determinatio ad unum de necessitate ; b) determinatio ad unum non ex necessitate, sed libera.

2<sup>o</sup> D. Thomas negat quidem, et ab omnibus negari oportet, quod Deus determinet liberum arbitrium de necessitate ad unum, vel quod virtus liberi arbitrii ad unum sit determinata seu coarctata ; at numquam negat liberum arbitrium determinari ad unum, id est, ad actum suum, a Deo ; sed e contra

expresse declarat : a) *necessitatem* hujus praedeterminationis ; b) et ejusdem *modum* ; c) et ipsius *effectum*.

3<sup>o</sup> *Necessitatem* quidem divinae praedeterminationis ; quia in libero arbitrio creato est indifferentia passiva et indeterminatio quaedam ex privatione actus. Liberum enim arbitrium creatum est « quasi in potentia et ad utrumlibet ex parte sui » ; et ideo indiget determinari ad unum, ut consequatur suam perfectionem per actum : ut D. Thomas expresse docet *I. C. Gent.* cap. 82. et *I. Sent.* dist. 25. q. 1. a. 1. et *De Verit.* q. 8. a. 12. et *I. q.* 19. a. 3. ad 5. <sup>1</sup>

4<sup>o</sup> *Modum* vero hujus determinationis, nempe ad unum, quod est actus liber. Et hoc clare ostenditur ex plurimis locis, in quibus Angelicus Doctor tangit atque ex professo respondet ad difficultatem istam. Sic *De Pot.* q. 3. a. 7. ad 13. : « Voluntas dicitur habere dominium sui actus, non per exclusionem causae primae, sed quia causa prima non ita agit in voluntate, ut eam de necessitate ad unum determinet, sicut determinat naturam ; et ideo determinatio actus relinquitur in potestate rationis et voluntatis. » *I. C. Gent.* cap. 68. : « Dominium, quod habet voluntas supra suos actus, per quod in ejus est potestate velle vel non velle, excludit determinationem virtutis ad unum et violentiam causae exterius agentis ; non autem excludit influentiam superioris causae, a qua est ei esse et operari. » *III. C. Gent.* cap. 90. : « Ut intelligantur ea, quae sunt in nobis, divinae determinationi non esse subjecta quasi ab ea necessitatem accipientia. » Ac tandem *I-II.* q. 10. a. 4. : « Sic Deus ipsam (voluntatem) movet, quod non ex necessitate ad unum determinat, sed remanet motus ejus contingens et non necessarius. » Et ad 1. « Magis repugnaret divinae motioni, si voluntas ex necessitate moveretur, quod suae naturae non competit, quam si moveretur libere, prout competit suae naturae <sup>2</sup>. »

<sup>1</sup> Vide supra cap. 4.

<sup>2</sup> In Congreg. *De Auxiliis* 39. seu 2. coram Paulo V. habita 12. oct. 1605, in qua de *gratiae efficacia* seu de *physica praedetermina-*



5º *Effectum* autem hujus determinationis, nempe influere libero arbitrio *ipsum libere operari*; agere in voluntate ita, ut eam ad unum determinet, non quidem ex necessitate, sed libere; non determinando ipsam virtutem operandi ad unum, sed complendo ejus virtutem atque illam conjungendo suae propriae operationi; non removendo a libero arbitrio ejus *esse ad utrumlibet* ex parte objecti, sed ejus *esse ad utrumlibet* ex parte potentiae. Deus siquidem determinat ad unum potentiam liberi arbitrii, sed non propter hoc *virtus operativa* liberi arbitrii ad unum coarctatur vel ad unum determinatur; virtus enim activa semper, dum unum

*tione* primo et generatim est disputatum, P. LEMOS explicat « quomodo Deus moveat voluntatem juxta suum proprium modum, et quomodo sit causa substantiae et modi ipsius. Deus (inquit) cum vult voluntatem ad aliquid efficaciter movere, prius agit in intellectum et illum illuminat de indifferentia objecti; et intellectus apprehendens in bono, quod debet proponere voluntati, indifferentiam et nullam absolutam necessitatem, voluntati practice per judicium rationis proponit objectum illud non esse ex necessitate amandum, nec habere necessitatem ut necessario ametur, sed habere indifferentiam ita ut possit amari et non amari; licet moveat ipsam, ut illud amet. Stante autem hac indifferentia ex parte objecti propositi per intellectum, impossibile est voluntatem velle necessario objectum tale; sed illud libere vult, sicut sibi per intellectum proponitur. Quia licet formalis libertas in actu voluntatis consistat, radix tamen omnis libertatis est in intellectu; et posita illa indifferentia ex parte intellectus in objecto voluntatis, impossibile est, quod voluntas absque indifferentia et libertate in illud feratur. Praeterea: postquam intellectus proponit voluntati tale objectum sub indifferentia, Deus sua gratia excitat voluntatem, allicit, invitat moraliter; in quo ostendit voluntatem libere moveri; quia hujusmodi invitationes et excitationes brutis non fiunt, sed solum hominibus libertatem habentibus. Ita quod Deus facit delectare objectum, et cum voluntas tum ex parte intellectus tum illis excitationibus et suasionibus invitata est et bene allecta, insuper Deus dat vires efficacissimas animae, et illam movet ut feratur in id, quod illam tantum delectabat; et sic fertur voluntas cum omni plena sua libertate ac si sola ferretur. » — Haec Lemos, qui plura alia affert, ut illustret *modum hunc ineffabilem*, quo, ut S. Augustinus *Epist. 217.* ait, *omnipotentissima facilitate convertit Deus, et volentes ex nolentibus facit.*

agit, aliud, licet oppositum, agendi servat potestatem. Quod ergo per divinam determinationem ad unum in potentia liberi arbitrii tollitur, est id ipsum quod per actum liberum tollitur, nempe *potentia passiva* ad utrumlibet, ex carentia ipsius actus liberi proveniens.

**Quoad 2<sup>am</sup> partem.** — Expresse traditur ab Apostolo Rom. 8, 29 : « Nam quos praescivit et praedestinavit conformes fieri imagini Filii sui, ut sit ipse primogenitus in multis fratribus... hos et vocavit; et quos vocavit, hos et justificavit; quos autem justificavit, illos et glorificavit. » Quae quidem declarans Cajetanus in suis *Commentariis* supra hunc locum scribit : « Scito ex theologia speculativa differentiam inter scientiam Dei quatenus est rerum absolute, et quatenus est rerum eventuum; quamvis utraque sit aeterna, prima tamen non praesupponit Deum velle creare res; secunda autem praesupponit Deum velle creare res. Et hinc sequitur, quod praescientia horum eventuum (sc. conformes esse inter se sanctos, secundum imaginem Filii Dei, ut sit ipse primogenitus etc.) non praecedit divinam praedefinitionem eorundem eventuum, sed sequitur illam. Prius enim non tempore, sed rationis ordine, Deus volendo definivit hos eventus quam sciat illos fore; imo, ratio quod sciat illos fore, est quia volendo definivit illos. Non significat itaque Paulus praescientiam esse rationem praedestinationis; sed e converso, praedefinitionem esse rationem praescientiae. Et ne intelligeres praescientiam esse rationem praedefinitionis, abstinent a pronomine *hos*. Si enim dixisset : *Quos praescivit, hos et praedestinavit*, intellexisses ordinem inter praescientiam et praedefinitionem similem subsequentibus. Sed abstinendo a pronomine, jungendoque simul, insinuavit mysterium alterius ordinis. Insinuavit haec esse simul tempore, imo aeternitate, et alterum inter se ordinem habere quam subsequencia inter se significantur habere. Est itaque sensus : dixit *secundum propositum*; nam quos praescivit conformes etc., et praedefinivit; hoc est, prius definiret quam praesciret, ut praepositio posita ante *definivit*

referatur non solum ad *definitos*, sed ad *praescientiam*, dispari tamen ordine; nam ad illos, ordine durationis; ad istam, ordine quasi causalitatis. Probando siquidem, quod *secundum propositum* dixit haec, ad confutandum dogma eorum, qui primum salutis nostrae locum tribuunt divinae praescientiae futurorum, qui praescientiam meritorum ponunt rationem definitionis divinae; ad confutandum, inquam, haec, primum nostrae salutis locum tribuit divino proposito, dicendo : *iis, qui secundum propositum*. Et probando hoc manifestat, quod divina definitio conformium Filio Dei prior est divina praescientia eorundem; hoc est, etiam prius quam praesciret, praedefinivit. » — Haec Cajetanus.

Ita quoque S. Hilarius IX. *De Trinit.* cap. 59. : « Humanae naturae quod agere definiunt, quantum in se est, praesciunt, et sequitur gerendorum cognitio voluntatem agendi; Deus vero natus quod in se et per se est nescit? Per eum enim tempora, et in eo dies est; qui et per ipsum futurorum constitutio est, et in ipso adventus sui dispensatio est. » Et S. Augustinus *De praedest. sanct.* cap. 10. : « Praedestinatione Deus ea praescivit, quae fuerat ipse factururus. » Et D. Thomas I. C. *Gent.* cap. 68. : « Deus cogitationes mentium et voluntates cordium cognoscit in *virtute causae*, cum ipse sit universale essendi principium... Cognoscendo suum intelligere et velle, cognoscit omnem cogitationem et voluntatem... Et sic remanet *causalitas* in causa prima, quae Deus est, respectu motuum voluntatis, ut sic Deus, seipsum cognoscendo, huiusmodi cognoscere possit. » Et iterum ibid. cap. 66. : « Cognitio Dei est de rebus omnibus per causam; se enim cognoscendo qui est omnium *causa*, alia quasi suos *effectus* cognoscit, ut supra cap. 49. ostensum est. » Atque iterum ibid. III. cap. 56. : « Deus voluntates nostras, sicut et alios suos effectus, cognoscit per hoc quod est nobis *causa volendi*. »

---

## V

**Ultima resolutio hujus magnae controversiae ac veluti clavis fundamentalis pro solutione omnium argumentorum in contra.**

**PRIMO : Doctrina D. Thomae.** — *a)* I. q. 19. a. 8. : « Cum enim aliqua causa efficax fuerit ad agendum, effectus consequitur causam non tantum secundum id quod fit, sed etiam secundum modum fiendi vel essendi... Cum igitur voluntas divina sit efficacissima, non solum sequitur, quod fiant ea quae Deus vult fieri, sed et quod eo modo fiant quo Deus ea fieri vult. Vult autem quaedam fieri Deus necessario, quaedam contingenter, ut sit ordo in rebus ad complementum universi. Et ideo quibusdam effectibus aptavit causas necessarias, quae deficere non possunt, ex quibus effectus de necessitate proveniunt; quibusdam autem aptavit causas contingentes defectibiles, ex quibus effectus contingenter eveniunt. Non igitur propterea effectus voliti a Deo eveniunt contingenter, quia causae proximae sunt contingentes; sed propterea, quia Deus voluit eos contingenter evenire, contingentes causas ad eos praeparavit. »

*b)* *De Verit.* q. 23. a. 5. : « Oportet enim patiens assimilari agenti; et si agens sit fortissimum, erit similitudo effectus ad causam agentem perfecta... Voluntas autem divina est agens fortissimum. Unde oportet ejus effectum ei omnibus modis assimilari, ut non solum fiat id quod Deus vult fieri, quod est quasi assimilari secundum speciem; sed ut fiat eo modo quo Deus vult illud fieri, ut necessario vel contingenter, cito vel tarde, quod est quasi quaedam assimilatio secundum accidentia. Et hunc quidem modum rebus divina voluntas praefinit ex ordine suae sapientiae. Secundum autem quod disponit aliquas res sic vel sic fieri, adaptat eis causas illo modo, quem disponit; quem tamen modum posset rebus inducere etiam illis causis non median-



tibus. Et sic non dicimus, quod aliqui divinorum effectuum sint contingentes solummodo propter contingentiam causarum secundarum, sed magis propter dispositionem divinae voluntatis, quae talem ordinem rebus providit. »

c) VI. *Metaph.* lect. 3. : « Ens in quantum est ens, habet causam ipsum Deum; unde sicut divinae providentiae subditur ipsum ens, ita etiam omnia accidentia entis in quantum est ens, inter quae sunt necessarium et contingens. Ad divinam igitur providentiam pertinet non solum quod faciat hoc ens, sed quod det ei contingentiam vel necessitatem. Secundum enim quod unicuique dare voluit contingentiam vel necessitatem, praeparavit ei causas medias, ex quibus de necessitate sequatur vel contingenter. Invenitur igitur uniuscujusque effectus secundum quod est sub ordine divinae providentiae necessitatem habere. Ex quo contingit, quod haec conditionalis est vera : *si aliquid est a Deo provisum, erit.* Secundum autem quod effectus aliquis consideratur sub ordine causae proximae, sic non omnis effectus est necessarius; sed quidam necessarius et quidam contingens secundum analogiam suae causae. Effectus enim in suis naturis simulantur causis proximis, non autem remotis, ad quarum conditionem pertingere non possunt. Sic ergo patet, quod, cum de divina providentia loquimur, non est dicendum solum : *Hoc est provisum a Deo, ut sit*; sed : *Hoc est provisum a Deo, ut contingenter sit vel necessario sit.* Unde non sequitur secundum rationem Aristotelis hic inductam, quod ex quo divina providentia est posita, quod omnes effectus sint necessarii; sed necessarium est effectus esse contingenter vel de necessitate. Quod quidem est singulare in hac causa, sc. in divina providentia. Reliquae enim causae non constituunt legem necessitatis vel contingentiae, sed constituta a superiori causa utuntur. Unde causalitati cujuslibet alterius causae subditur solum quod ejus effectus sit. Quod autem sit necessario vel contingenter, dependet ex causa altiori, quae est causa entis in quantum est ens, a qua ordo necessitatis et contingentiae in rebus provenit. »

d) *De div. nom.* cap. 5. lect. 3. : « Considerandum est,

quod Platonici ponentes Deum esse *totius esse* causam, quia credebant, quod idem non posset esse causa plurium secundum propria in quibus differunt, sed solum secundum id, quod est omnibus commune, posuerunt quasdam secundas causas, per quas res ad proprias naturas determinantur, et quae communiter esse a Deo recipiunt; et has causas *exemplaria rerum* vocabant; sicut exemplar hominis dicebant quendam hominem separatum, qui esset causa humanitatis omnibus singularibus hominibus, et similiter de aliis. Sed Dionysius, sicut dixerat Deum esse causam *totius esse communis*, ita dixerat eum esse causam *proprietas uniuscujusque*; unde conseqebatur, quod in ipso Deo essent omnium entium exemplaria. Quod quidem hoc modo intelligi oportet... Hoc est ergo, quod dicit quod *exemplaria dicimus esse* non res aliquas extra Deum, sed in ipso intellectu divino quasdam existentium rationes intellectas, quae sunt *substantiarum factivae*... Et hujusmodi rationes S. Scriptura vocat *praedefinitiones, praedestinationes*... etiam *divinas et bonas voluntates*. Quae quidem praedefinitiones et voluntates sunt distinctivae entium et effectivae ipsorum; quia secundum hujusmodi rationes supersubstantiales Dei essentia praedeterminavit omnia et produxit. »

e) I. *Periher.* lect. 14. : « Nam voluntas divina est intelligenda ut extra ordinem entium existens, velut causa quaedam profundens totum ens et omnes ejus differentias. »

f) I. q. 20. a. 2. : « Amor Dei est infundens et creans bonitatem in rebus. »

SECUNDO : **Corollaria.** — 1<sup>um</sup>. — Sicut a voluntate divina causatur imago Dei in creatura rationali quoad *esse*, ita imprimatur ex efficacia divinae voluntatis imago ipsius in voluntate creata quoad *operari* et *operandi modum*.

2<sup>um</sup>. — Voluntas divina est causa profundens totum actum liberum et omnes ejus positivas differentias; et in causando se extendit et ad actum qui fit, et ad modum fiendi. Unde quidquid est in actu de ratione entis, de ratione actus, de ratione liberi, de ratione boni : totum hoc a primo agente,

sc. Deo procedit mediante voluntate. Operatio causae primae magis pertingit ad intima rei quam operatio causarum secundarum; et non solum est causa bonarum operationum quantum ad essentiam actus, sed etiam quantum ad perfectionem, secundum quam liberae et bonae dicuntur.

3<sup>um</sup>. — Unde ex voluntate divina, quae est agens fortissimum et attingit a fine usque ad finem actus liberi fortiter et suaviter, originatur et fit immediate immediatione virtutis quod liberum arbitrium creatum: *a)* operetur; *b)* operetur non necessario, sed contingenter et libere; *c)* operetur bene; *d)* operetur etiam ut oportet ad salutem.

4<sup>um</sup>. — Liberum arbitrium creatum est facultas, qua homo per rationem et voluntatem movet seipsum ad volendum hoc vel illud; sed per hoc, quod a Deo movetur, habet hoc ipsum quo se actualiter moveat; Deus movendo causas voluntarias non aufert, quin actiones earum sint voluntariae, sed potius hoc in eis facit.

5<sup>um</sup>. — Liberum arbitrium est facultas eligendi media, servato ordine in finem. Quapropter permagna liberi arbitrii perfectio est gratia ex se et per se efficax, sub qua liberum arbitrium, licet vertibilitas ejus ad malum in via non totaliter auferatur, semper tamen servat ordinem finis in electione mediorum.

6<sup>um</sup>. — Cum ergo major sit perfectio liberi arbitrii in angelis et beatis qui peccare non possunt, quam in nobis qui peccare possumus: ideo quanto major erit illuminatio, qua Spiritus Sanctus tangit cor hominis, et fortior inclinatio, qua manus Domini vertit illud in bonum, tanto erit nobilior actus liberae voluntatis ac firmitus in recte operando liberum de ratione iudicium, in quo est radix prima libertatis.

7<sup>um</sup>. — Cum ergo voluntas tanto sit liberior, quanto est sanior et ad bene agendum potentior; et tanto sit potentior ac sanior, quanto Deo subjectior: idcirco per gratuitam ipsam motionem, quae gratia ab intrinseco efficax dicitur, libera voluntas crescit sic mota in libere operando et attingit usque ad summum suae propriae libertatis. In Deo enim vivimus, movemur et sumus; et quanto magis a Deo per

suam gratiam movemur, tanto magis amor Dei est infundens et creans bonitatem in nobis atque veram libertatem, quae est libertas filiorum Dei.

## VI

**Praeclarum exemplum verae concordiae liberi arbitrii cum divina motione ex se et ab intrinseco efficaci.**

PRIMO : Jesus Christus, Salvator noster, sicut est gratuita praedestinationis exemplar, sic et verae concordiae liberi arbitrii cum divina praedeterminatione est testimonium. — S. Augustinus *De praedest. sanct.* cap. 12. ut praedestinationem ante praevisa merita evidenter ostenderet, gratuita praedestinationis praeclara exempla in medium protulit, parvulos nimirum et ipsum Dei et hominum mediatorem, hominem Christum Jesum. « Sed omnis haec ratio, inquit, qua defendimus gratiam Dei per Jesum Christum Dominum nostrum vere esse gratiam, id est, non secundum merita nostra dari, quamvis evidentissime divinatorum eloquiorum testimoniis asseratur : tamen apud eos, qui nisi aliquid sibi assignent, quod priores dent, ut retribuatur eis (Rom. 11, 35), ab omni studio pietatis reprimi se putant, laborat aliquantum in aetatem majorum jam utentium voluntatis arbitrio ; sed ubi venit ad parvulos et ad ipsum *mediatorem Dei et hominum, hominem Christum Jesum* (I Tim. 2, 5), omnis deficit praecedentium gratiam Dei humanorum assertio meritorum ; quia nec illi ullis bonis praecedentibus meritis discernuntur a ceteris, ut pertineant ad liberatorem hominum, nec ille <sup>1</sup> ullis humanis praecedentibus meritis, cum et ipse sit homo, liberator factus est hominum. » Unde ex eo, quod Christus, secundum quod homo, est praedestinatus esse Filius Dei, et unio hypostatica fuit gratia facta humanae

<sup>1</sup> Vide D. Thomam III. q. 2. a. 11. et q. 24.



naturae, ut Filio Dei uniretur in unitate personae ita, quod unionem Verbi Incarnati nulla merita Christi potuerunt praecedere, evidenter concluditur nostram quoque praedestinationem esse omnino gratiosam et ante praevisa praedestinatorum merita.

Pari modo illimet theologi, qui videntur aliquid sibi assignare in actibus liberi arbitrii, quod Deus dicitur quidem *praevidere*, sed virtute suae causalitatis non attingit, quique liberum arbitrium hominis non valent componere cum Dei gratuita motione ab intrinseco efficaci, nesciunt <sup>1</sup> quam via possint pergere et fugere, cum pervenitur ad hominem Christum, cujus liberum arbitrium a Deo motum et excitatum *non poterat resistere, non poterat peccare*, sed infallibiliter et indeclinabiliter et insuperabiliter et liberrime obediebat Deo Patri et servabat praecepta ejus. Unde optime ad rem S. Augustinus loco supra citato, cap. 15. : « An ideo in illo (Christo) non libera voluntas erat, ac non tanto magis erat, quanto magis peccato servire non poterat? »

**SECUNDO : Christus Dominus noster patiens et moriens pro nobis ex obedientia Patris et ut adimpleret verum mandatum Patris, liberrima quidem voluntate passus et mortuus est. —**

1<sup>o</sup> Quia Christus patiendo et moriendo pro nobis causavit nostram salutem per modum meriti. De ratione vero meriti est, quod procedat ex libera voluntate. (III. q. 48. a. 1.)

2<sup>o</sup> Quia Christus passus et mortuus est ex obedientia. Obedientia autem est actus virtutis, et maximae virtutis inter virtutes morales. Nullus vero datur actus virtutis sine libera voluntate. (II-II. q. 104. a. 3.)

3<sup>o</sup> Quia Christus passus et mortuus est pro nobis ex dilectione ac caritate. Eadem enim ratione Christus passus est ex caritate et ex obedientia; quia et praecepta caritatis ex obedientia implevit, et obediens fuit ex dilectione ad Patrem praecipientem. Dilectio autem et caritas augent voluntarium, adaugent libertatem. (III. q. 47. a. 2.)

<sup>1</sup> Vide nostras *Praelect. in Summ. Theol.* III. q. 47. a. 1., 2. et 3.

4<sup>o</sup> Quia Christus passus est ex necessitate justitiae et sanctitatis, quae est necessitas rectitudinis et obedientiae et subjectionis ad Deum. Hujusmodi autem necessitas importat libertatem et maximam libertatis humanae perfectionem, quia quaelibet res perficitur per hoc, quod subditur suo superiori ; sicut corpus per hoc quod vivificatur ab anima, et aër per hoc quod illuminatur a sole. (II-II. q. 81. a. 7 et q. 104. a. 4.)

5<sup>o</sup> Quia Deus Pater tradidit Christum passioni et morti : a) in quantum sua aeterna voluntate praeordinavit passionem Christi ad humani generis liberationem ; b) in quantum inspiravit ei voluntatem patiendi pro nobis, infundendo ei caritatem. Ergo Christus homo vere voluit et liberrime voluit pati et mori pro nobis, quia passus est ex voluntate et caritate, quam Deus Pater ei dedit et inspiravit, ut sic pro nobis pateretur et moreretur, libere volendo, nosque nimia caritate diligendo. (III. q. 47. a. 3. ; *III. Sent.* dist. 20. q. 1. a. 5.)

**TERTIO : Suprema itaque ratio conciliandi liberum hominis arbitrium cum Dei gratia, quaerenda est ibi ubi reperitur, nempe in ipsa efficacia gratiae, in ipsamet motione Dei, ejus voluntas est profundens totum ens et omnes differentias entis. —** Etenim prima ratio et prima causa liberrimi actus, quo Christus Dominus ex obedientia Patris passus et mortuus est pro nobis et operatus est nostram salutem per modum meriti, est Deus ipse : 1<sup>o</sup> praeordinando sua aeterna voluntate passionem Christi ad nostram salutem ; 2<sup>o</sup> exsequendo suam aeternam atque immutabilem dispositionem in tempore per intrinsecam et efficacem motionem ipsius liberae voluntatis humanae Christi. Quomodo ergo exsecutus est Deus hanc aeternam praeordinationem ? D. Thomas respondet : « Infundendo ei (Christo) caritatem... inspirando ei voluntatem patiendi. » (III. q. 47. a. 3.) « Christo homini voluntatem dando et caritatem, ex qua pati voluit... Deus Pater non tradidit Christum in mortem quasi cogendo ipsum mori, sed dando ei voluntatem bonam, qua mori vellet. » (*III. Sent.* dist. 20. q. 1. a. 5.) Et rursus : « Christus

secundum quod Deus, tradidit semetipsum in mortem eadem voluntate et actione, qua et Pater tradidit eum; sed in quantum homo, tradidit seipsum voluntate a Patre inspirata. Unde non est contrarietas in hoc, quod Pater tradidit Christum, et ipse tradidit semetipsum. » (III. q. 47. a. 3. ad 2.)

Unde nec contrarietas est in hoc, quod Deus moveat et agat et determinet nos ad bene operandum, et nos moveamus et determinemus nosmetipsos ac libere agamus; eo quod ex ipsa Dei motione ac determinatione recipimus et habemus hoc ipsum quod nos ipsos moveamus et determinemus. Praedeterminationes Dei nihil aliud sunt nisi « divinae et bonae voluntates. Quae quidem praedefinitiones et voluntates sunt distinctivae entium et effectivae ipsorum. » (*De div. nom.* cap. 5. lect. 3.)

Sicut ergo praedestinatio Christi est exemplar nostrae praedestinationis, sic concordia liberi arbitrii hominis Christi cum divinis motionibus ac praedeterminationibus est exemplar verae concordiae omnis liberi arbitrii creati cum gratuito Dei auxilio, quo a Deo vocamur, et vocati justificamur, et justificati glorificamur. Prima ratio et prima causa nostrae liberae et bonae voluntatis est Deus : 1<sup>o</sup> praeordinando et definiendo; 2<sup>o</sup> exsequendo suam aeternam ordinationem in tempore per gratiam seu virtutem motivam ex se efficacem. Quod D. Thomas etiam tradit I. q. 23. a. 2. : « Praedestinatio est quaedam ratio ordinis aliquorum in salutem aeternam, in mente divina existens. Exsecutio autem hujus ordinis est passive quidem in praedestinationis, active autem est in Deo. Est autem exsecutio praedestinati *vocatio et magnificatio*, secundum illud Apostoli Rom. 8, 30 : *Quos praedestinavit, hos et vocavit, hos et magnificavit.* »

En concordiam liberi arbitrii hominis Christi et liberi arbitrii eorum, quos Deus praescivit et praedestinavit conformes fieri imagini Filii sui, cum Dei motione et cum Dei voluntate, videlicet : per ipsum Dei velle, quod est efficax ad agendum; per Spiritum Sanctum, a quo ii, qui sunt filii Dei, aguntur, ut libere atque ex amore ipsimet agant; per ipsam gratiam ex se efficacem, qua sic nos Deus ad agendum

inclinat, ut nos non solum libere, sed etiam cum magna voluntatis promptitudine faciamus bonum ac salutem operemur. Divina siquidem motio extenditur et ad substantiam et ad modum actus voluntatis creatae, ita ut dum voluntatem movet, complet ejus libertatem potentialem ac producit libertatem actuale. Cum autem Deus movet per motionem, quae est gratia efficax, aufert etiam ipsam duritiam cordis, dat nobis voluntatem bonam ac in bono perseverantem, et facit nos *crescere in gratia et in cognitione Domini nostri et Salvatoris Jesu Christi. Ipsi gloria et nunc et in diem aeternitatis. Amen.* (II Petri 3, 18).





## CAPUT DECIMUM

Quomodo juxta D. Thomam tota haec de divino influxu controversia veniat postremo resolvenda in veritatem fundamentalem philosophiae christianae, nempe : « Solus Deus est suum esse; in omnibus autem aliis differt essentia rei et esse ejus. »

---

« Et necesse est haec recurrere usque in Primum, in quo idem est *esse* et *quod est*. »

(B. Albertus Magnus *II. De causis*  
tract. 4. cap. 3.)

« Cujus essentia ab alio est, oportet quod virtus et operatio ab alio sit. »

(D. Thomas *II. Sent. dist. 38. q. 2. a. 2.*)

### I

#### PRAENOTANDA

PRIMO : Quid nomine philosophiae christianae est intelligendum. — *Philosophiam christianam* illud videlicet philosophicum systema appellamus, quod ab Aristotele praecipue delineatum, a PP. et DD. Ecclesiae plus minusve excultum ac retentum, ab Angelico Doctore omni ex parte tandem perfectum est atque in mirificam unitatem redactum, veritatumque plurimarum splendore adornatum atque praeclaro idearum ordine compositum, coadunatum ac illustratum. Unde Leo XIII. in Litteris Apostolicis <sup>1</sup> *Gravissime Nos* :

<sup>1</sup> « Litterae Apostolicae, quibus Constitutiones Societatis Jesu de doctrina S. Thomae Aquinatis profitenda confirmantur. » « Datum Romae apud S. Petrum sub annulo Piscatoris die XXX. Decembris 1892, Pontificatus Nostri anno decimoquinto. »

« Deliberatum Nobis esse et constitutum doctrinam Sancti Thomae Aquinatis in scholas omnes revocare; eam nempe doctrinam, quam amplae Romanorum Pontificum Sacrorumque Conciliorum laudes commendant, et qua, suffragante saeculorum voce, nihil solidius possit aut fructuosius optari... Philosophia S. Thomae nihil demum alia est atque Aristotelea : hanc nempe Angelicus scientissime omnium interpretatus est; hanc erroribus, scriptori ethnico facile excidentibus, emendatam. *christianam* fecit; hac ipsemet usus est in exponenda et vindicanda catholica veritate. Hoc ipsum numeratur inter summa beneficia, quae magno Aquinati debet Ecclesia, quod christianam theologiam cum peripatetica philosophia jam tum dominante tam belle sociaverit. ut Aristotelem Christo militantem, jam non adversarium. habeamus. Neque vero aliter ab eo fieri poterat, qui doctorum theologiae scholasticae extitit princeps; nam, quod omnes norunt, haec disciplina ejusmodi est, quae fontes adeat quidem proprios, doctrinas nimirum divinitus revelatas, ex eisque in rem suam omni religione et studio derivet, sed operam quoque multam adhibeat sibi philosophiae tamquam optimae adjutricis ad fidem ipsam sive tuendam sive illustrandam. Quotquot igitur Aristotelem cogitant debentque tuta via sectari, philosophiam Aquinatis amplectantur oportet <sup>1</sup>. »

<sup>1</sup> Ad rem Cardinalis GONZALEZ : « Hay una doctrina filosofica que, nacida en Grecia y fruto de las vastas y profundas concepciones de los mayores ingenios con que se honrara la antigüedad, introducida en Europa en la edad media, espurgada de los errores de que el génio de su fundador no pudo libertarla, despues de haber contribuido poderosamente á fomentar la actividad que en los siglos XI, XII y XIII. comenzó á manifestarse en las naciones europeas, recibió por último *profundas modificaciones* de un genio eminente, que dominándola, por decirlo así, le dió saludable direccion, separó lo útil y sólido de lo falso y peligroso, señaló el flaco de algunas de sus partes, le dió unidad, claridad y precision, desarrolló sus consecuencias, puso de manifesto sus relaciones con la doctrina revelada; en una palabra, la puso en estado de servir fielmente á la causa de

SECUNDO : **Philosophiae D. Thomae excellentia.** — Minime dubium, quod D. Thomae opera integram ac veluti absolutissimam synthesim continent totius philosophiae, quae ab ipsis Romanis Pontificibus tamquam *aurea ac christiana* summopere cunctis scientiarum cultoribus commendatur, et ejus praecipuae ac characteristicae notae sic eleganter exponuntur a Leone XIII. in suis Litteris Encyclicis *Aeterni Patris*, nimirum :

1º *Universalitas doctrinae.* « Nulla est, inquit, philosophiae pars, quam non acute simul et solide pertractavit (D. Thomas) : de legibus ratiocinandi, de Deo et incorporeis substantiis, de homine aliisque sensibilibus rebus, de humanis actibus eorumque principiis ita disputavit, ut in eo neque copiosa quaestionum seges, neque apta partium dispositio, neque optima procedendi ratio, neque principiorum firmitas aut argumentorum robur, neque dicendi perspicuitas aut proprietas, neque abstrusa quaeque explicandi facilitas desideretur. »

la religion y de la sociedad. Bien se deja conocer que hablo de *Santo Tomás de Aquino*... La filosofía de Santo Tomás es la expresión mas elevada de la que hemos llamado *peripatético-cristiana*..., y aunque peripatética en cuanto al método, es realmente ecléctica en cuanto al fondo mismo de la doctrina..... En esta filosofía, el orden ideal intelectual se halla en perfecta consonancia con el orden real y empírico ; el orden de la verdad con el de la realidad. Dios, *alfa* y *omega* del ser y de la verdad, es tambien el *alfa* y *omega* de la ciencia y de la filosofía del santo Doctor. Por eso tambien su filosofía, sin perder nada de su profundidad científica y racional, es á la vez eminentemente católica : es una filosofía, profunda como la idea católica de Dios, elevada como el Cristianismo, sencilla como el Evangelio, grande y noble como la razón humana cuyo poderío revela. » (*Estudios sobre la filosofía de Santo Tomás*, por el P. Zeferrino Gonzalez, del sagrado orden de Predicadores, Catedrático de sagrada teología en la Real y Pontificia Universidad de Manila, 1864. » Vide tom. I. lib. I. cap. I. et tom. III. *Conclusion*). Hoc sane egregium opus constituit verum ac perfectum *commentarium* Encyclic. Litterar. Leonis XIII. *Aeterni Patris* ; *Commentarium* profecto scriptum ac editum, antequam ederetur *textus*. Qui ergo excellentiam philosophiae D. Thomae et características ejus doctrinae notas scire

2º *Altitudo principiorum.* « Illud etiam accedit, quod philosophicas conclusiones Angelicus Doctor speculatus est in rerum rationibus et principiis, quae quam latissime patent et infinitarum fere veritatum semina suo veluti gremio concludunt, a posterioribus magistris opportuno tempore et uberrimo cum fructu aperienda. Quam philosophandi rationem cum in erroribus refutandis pariter adhibuerit, illud a se ipso impetravit, ut et superiorum temporum errores omnes unus ille debellarit, et ad profligandos qui perpetua vice in posterum exoriturum sunt, arma invictissima suppetitarit. »

3º *Concordia cum doctrina fidei.* « Praeterea, rationem, ut par est, a fide apprime distinguens, utramque tamen amice consocians, utriusque tum jura conservavit tum dignitati consuluit, ita quidem, ut ratio ad humanum fastigium Thomae pennis evecta, jam fere nequeat sublimius assurgere; neque fides a ratione fere possit plura aut vali-

desideret, in opere cardinalis Gonzalez viam paratam inveniet. Postea, cum jam esset episcopus Cordubensis, in prologo alterius operis *Filosofía Elemental* sic iterum de S. Thomae philosophia loquebatur: « El pensamiento filosófico de Santo Tomás, síntesis á su vez del pensamiento filosófico de Platon, de Aristoteles, de la escuela cristiana de Alejandria y de S. Agustin... No hay para que añadir que santo Tomás observó en la práctica lo que en teoría enseñaba; porque para cualquiera que conozca á fondo sus obras, es indudable, que el carácter en ellas dominante y el espíritu general de las mismas, y con especialidad de las filosóficas, es un eclecticismo superior y transcendental, que reúne y funde en una concepción sintética todos los elementos racionales diseminados en la historia de la filosofía, fecundados y armonizados á la vez por la fuerza de su génio, y por la originalidad relativa de su pensamiento... Santo Tomás, más bien que de Aristóteles, es y debe apellidarse *discípulo de la sabiduría cristiana.* » (Filosof. Elem. prólogo, edic. de Madrid 1876, pag. xxii.) Porro, Cardinal Gonzalez sic breviter ac profunde simul atque pulchre notam characteristicam philosophiae D. Thomae significavit: « *Toda su filosofía viene á ser el desenvolvimiento científico de la idea de Dios bajo sus diferentes fases y entodas sus relaciones con el HOMBRE y con el MUNDO.* » (*Estudios sobre la filosof. de S. Tomás tom. III. Conclusion.*)



diora adjuncta praestolari quam quae jam est per Thomam consecuta <sup>1</sup>. »

**TERTIO : Philosophiae Thomisticae, quam Romani Pontifices philosophiam christianam esse proclamant, veritas fundamentalis.** — Illa quippe esse debet, quae totius D. Thomae metaphysicae atque integrae proinde ipsius doctrinae philosophicae caput exstet et angulare fundamentum constituat. Hanc equidem veritatem ex professo firmiter stabilire voluit ipsemet Angelicus Doctor in opusculo *De Ente et Essentia*, in quo breviter ac dilucide nobis exhibuit quasi compendiosam totius metaphysicae ideam. ac supremam veluti

<sup>1</sup> Vide etiam Litteras Apostolicas : *De Sancto Thoma Aquinate Patrono coelesti studiorum optimorum cooplando* (4. Augusti 1880) ubi Leo XIII. praedictas philosophiae D. Thomae dotes ac proprietates peregre describit : « Doctrina quidem (ait) est tanta, ut sapientiam a veteribus defluentem, maris instar, omnem comprehendat. Quidquid est vere dictum aut prudenter disputatum a philosophis ethnicorum, ab Ecclesiae Patribus et Doctoribus, a summis viris, qui ante ipsum floruerunt, non modo ille penitus dignovit, sed auxit, perfecit, digessit tam luculenta perspicuitate formarum, tam accurata disserendi ratione et tanta proprietate sermonis, ut facultatem imitandi posteris reliquisse, superandi potestatem ademisse videtur. Atque illud est permagnum, quod ejus doctrina, cum instructa sit atque apparata principiis latissime patentibus, non ad unius dumtaxat, sed ad omnium temporum necessitates est apta, et ad pervincendos errores perpetua vice renascentes maxime accommodata. Eadem vero, sua se vi et ratione confirmans, invicta consistit, atque adversarios terret vehementer. Neque minoris aestimanda christianorum praesertim hominum judicio, rationis et fidei perfecta convenientia... Cujus convenientiae mirabilisque concordiae cunctis beati Thomae scriptis expressa imago perspicitur. In iis enim excellit atque eminet modo intelligentia, quae quod vult, fide praeunte, consequitur in pervestigatione naturae; modo fides, quae rationis ope illustratur ac defenditur, sic tamen, ut suam quaeque inviolate teneat et vim et dignitatem; atque ubi res postulat, ambae quasi foedere icto ad utriusque inimicos debellandos junguntur. » Haec et plura alia in laudem et gloriam philosophiae D. Thomae in praecitatis Apostolicis Litteris conscripta reperiuntur.

formam integri ipsius philosophici systematis exaravit. Haec igitur est thesis, quam cuncti philosophi in doctrina D. Thomae apprime instructi non dubitant appellari fundamentum ipsius doctrinae, quoddam universale principium in ea, lapidem angularem, veritatem porro fundamentalem philosophiae christianae, videlicet : **Solus Deus est suum esse; in omnibus autem aliis differt essentia rei et esse ejus.** Unde clarus e Societate Jesu philosophus, hac in re benemeritus de doctrina S. Thomae, scribit : « Angelicum Doctorem constanter et apertissime propugnasse memoratam distinctionem [realem inter essentiam et esse in creaturis], et eam posuisse uti fundamentum totius metaphysicae ab ipso explicatae, uti affirmant Sylvester Maurus et Card. Pallavicinus<sup>1</sup>. » Hic revera exprimitur nota characteristic, qua Infinitum differt a finito, et qua finitum differt ab Infinito. Hinc ex-

<sup>1</sup> DE MARIA *Philos. Prima seu Ontolog.* pars 2. q. 1. a. 3. Scholion. — Ita etiam omnes, qui doctrinam D. Thomae verè agnoscunt, amant ac sapiunt. Ita Cardinalis CAJETANUS in l. q. 3. a. 4. : « Et scito, quod ista quaestio est subtilissima et propria antiquis metaphysicis; a modernulis autem valde aliena, quia tenent non solum in Deo, sed in omni re essentiam identificari existentiae illius. » Et *Comm. in Poster. Anal. Arist.* cap. 6. sic : « In hoc loco expresse Aristoteles dicit, quod *esse* non est ipsa essentia; quod est maximum fundamentum doctrinae Sancti Thomae. »

Ita Cardinalis PECCI in sua *Parafrasi e dichiarazione dell' opuscolo di S. Tomaso, De Ente et Essentia*, prefazione : « E si vede chiaro che il piccolo lavoro fu steso, precisamente per fissare una traccia di quei principi sui quali intendeva di tessere il suo magistero, e insieme gittare i fondamenti di quel grande edificio che fin d'allora andava ideando nella sua mente. »

Ita etiam Cardinalis GONZALEZ, *Philosoph. Element. Metaphysica* cap. 1. a. 2. : « Hanc thesim Angelicus Doctor habet tamquam *veritatem fundamentalem* philosophiae christianae, eamque sexcentis plus minus locis vehementer propugnat. » Et similiter in praeclaro opere, cui titulus : *Estudios sobre la filosofia de Santo Tomas*, t. I. lib. 2. *Ontologia*, cap. 6. et 7., ubi solide et eleganter evolvit ac declarat argumenta D. Thomae.

Plura alia testimonia possunt videri in opere nostro : *De veritate fundamentali philosophiae christianae*, cujus primus et secundus libri publici juris facti sunt in ephemeride *Divus Thomas*.

surgit radix prima omnium differentiarum, quibus Creator ac creaturae ab invicem discernuntur; atque exinde elucescit quidquid verum patefieri potest humano intellectui circa rerum omnium creationem, circa earundem in esse creato conservationem, ac simul circa influxum causae primae in universas causas secundas, etiam liberas et contingentes. Primum namque et ultimum, alpha et omega in his omnibus discutiendis, investigandis ac determinandis, clauditur in hac adeo sublimi veritate : **Solus enim Deus est suum esse; in omnibus autem aliis differt essentia rei et esse ejus.** Atque ex identitate esse et essentiae in Deo atque ex reali utriusque compositione in omnibus praeter Deum, logice inferuntur ac manifestantur illa :

**QUARTO : Quinque summa capita, ad quae postremo deducitur integra de divino influxu controversia.** — Ut autem controversia de influxu Dei in creaturas, in suas altiores causas resolvatur, oportet devenire :

1<sup>o</sup> Ad veram notionem causae primae et ad veram notionem causae secundae ;

2<sup>o</sup> Ad veram notionem causae principalis et ad veram notionem causae instrumentalis ;

3<sup>o</sup> Ad veram notionem agentis per essentiam et ad veram notionem agentis per participationem ;

4<sup>o</sup> Ad veram notionem liberi per essentiam et ad veram notionem liberi per participationem ;

5<sup>o</sup> Ad veram notionem entis per essentiam et ad veram notionem entis per participationem.

Quoniam in solo Deo est idem essentia et esse, soli ergo Deo competit ratio causae primae et principalis, et agentis per se, et liberi per essentiam, et entis per essentiam. Unde identitas essentiae et esse est de ratione primi moventis, quod a nullo movetur et a quo moventur omnia ; et de ratione primae causae non habentis causam, et a qua omnia tam in essendo quam in operando immediate immediatione virtutis causantur ; et de ratione primi necessarij in essendo et primi liberi in agendo, non habentis aliunde causam suae necessi-

tatis quoad esse, nec suae libertatis quoad operari, et quod est causa tam necessitatis quam libertatis aliis; et de ratione entis per essentiam, quod omnibus entibus est causa esse et bonitatis et cujuslibet perfectionis. E contra, realis compositio essentiae et esse est de ratione omnis moventis moti; et de ratione habentis causam tam quoad esse quam quoad operari; et de ratione libere agentis in ordine causae secundae; et de ratione entis per participationem.

**QUINTO : Relationes inter ordinem essendi et ordinem operandi.** — Et quia in Deo essentia vel substantia est suum esse, ideo in Deo substantia est suum agere, et Dei esse est Dei intelligere et Dei velle. At quoniam in omnibus praeter Deum est compositio realis substantiae et esse, idcirco, ait D. Thomas :

1<sup>o</sup> Impossibile est, quod actio angeli vel cujuscumque alterius creaturae sit ejus substantia;

2<sup>o</sup> Impossibile est, quod actio angeli vel cujuscumque creaturae sit ejus esse;

3<sup>o</sup> Impossibile est, quod in angelo vel in aliqua creatura virtus vel potentia operativa sit idem quod sua essentia;

4<sup>o</sup> Impossibile est, quod nec in angelo nec in aliqua creatura virtus vel potentia operativa sit idem quod suum esse. (I. q. 2. a. 3.; q. 3. a. 4.; q. 44. a. 1.; q. 54. a. 1-3.)

Haec igitur sunt quae a D. Thomā<sup>1</sup> afferuntur tamquam

<sup>1</sup> Atque haec et alia hujusmodi, per quae ostenditur relatio inter ordinem essendi et operandi, passim et ubique apud D. Thomam leguntur. Sic *a) II. Sent. dist. 3. q. 1. a. 1. ad 4.* : « Sicut in angelo differt *esse et quod est*, propter hoc quod *esse*, quod habet, habet ab alio; ita differt in eo *intellectus et quo actu intelligit*, propter hoc quod intelligere ab alio habet. » *b) Quodl. 10. a. 5.* : « In nulla enim substantia creata est idem esse et operatio; hoc enim solius Dei est. Essentia autem est essendi principium; potentia vero, operationis. » *c) De creatura spiritali a. 11.* : « Sicut autem esse est actualitas quaedam essentiae, ita operari est actualitas operativae potentiae seu virtutis. Secundum enim hoc utrumque eorum est in actu; essentia quidem secundum esse, potentia vero secundum operari. Unde cum in nulla creatura operari sit suum esse, sed hoc sit proprium solius Dei,



supremae rationes, quare necesse est, ut omnia quae sunt, et omnia quae agunt, sint a Deo et agantur a Deo. Quod quidem per subsequentes quinque conclusiones, Deo adiuvante, ac nobis praeunte Angelico Doctore, qui philosophiae christianae et theologiae dux magisterque est, fiet manifestum atque in perspicuo ponetur.

## II

### CONCLUSIO 1.

**De ratione primae causae efficientis, qui est Deus, est, ut physice praemoveat sive reducat de potentia in actum omnes alias causas efficientes; et de ratione omnium causarum secundarum efficientium est, quod physice praemoveantur, id est, reducantur de potentia in actum a causa prima efficiente.**

### § 1

#### Argumenta D. Thomae.

Arg. 1<sup>um</sup>. — « Respondeo dicendum, quod Deum esse quinque viis probari potest. Prima autem et manifestior via est, quae sumitur ex parte motus. Certum est enim et sensu constat aliqua moveri in hoc mundo. Omne autem quod movetur, ab alio movetur; nihil enim movetur, nisi secundum quod est in potentia ad illud, ad quod movetur. Movet autem aliquid secundum quod est actu; movere enim nihil aliud est quam educere aliquid de potentia in actum. De potentia autem non potest aliquid reduci in actum nisi per aliquod ens in actu; sicut calidum in actu, ut ignis, facit lignum, quod est calidum in potentia, esse actu calidum, et

sequitur, quod nullius creaturae operativa potentia sit ejus essentia; sed solius Dei proprium est, ut sua essentia sit sua potentia. » Vide etiam I. q. 59. a. 2. et q. 77. a. 2.

per hoc movet et alterat ipsum. Non autem est possibile, ut idem sit simul in actu et potentia secundum idem, sed solum secundum diversa. Quod enim est calidum in actu, non potest simul esse calidum in potentia, sed est simul frigidum in potentia. Impossibile est ergo, quod secundum idem et eodem modo aliquid sit movens et motum vel quod moveat seipsum. Omne ergo quod movetur, oportet ab alio moveri. Si ergo id, a quo movetur, moveatur, oportet et ipsum ab alio moveri, et illud ab alio. Hic autem non est procedere in infinitum, quia sic non esset aliquod primum movens, et per consequens nec aliquod aliud movens; quia moventia secunda non movent nisi per hoc, quod sunt mota a primo movente, sicut baculus non movet nisi per hoc, quod est motus a manu. Ergo necesse est devenire ad aliquod primum movens, quod a nullo movetur; et hoc omnes intelligunt *Deum.* » (I. q. 2. a. 3.)

**Declaratio primae viae.** — Haec autem prima via ex quinque, quibus Deum esse probari potest, substernitur aliis quatuor veluti fundamentum ipsarum; quae quidem nihil aliud sunt nisi determinationes primae, quae sub diversis aspectibus ac relationibus in aliis quatuor contrahitur, nempe: vel ad viam motus secundum rationem causae efficientis, vel ad viam motus secundum rationem causae formalis sive exemplaris, vel ad viam motus secundum rationem causae finalis. Quapropter cum omnes viae in ultima resolutione ad primam quodammodo reducantur, robur argumentorum ac evidentia demonstrationis in aliis quatuor viis pendet ex soliditate principiorum, quibus via prima innitur. Principia vero haec sunt:

1<sup>um</sup>. — *Omne quod movetur, oportet ab alio moveri.* — Hoc siquidem principium, quod tam Aristoteles quam D. Thomas <sup>1</sup>

<sup>1</sup> ARISTOTELES VII. *Physic.*, procedens ab hac propositione per se nota: *Omne quod movetur, necesse est ab aliquo moveri*, pervenit discurrens supra naturam motus usque ad hanc ultimam conclusionem: *Omne quod movetur, ab aliquo alio movetur.* Et D. Thomas

tradunt veluti firmum ac evidenter demonstratum, in hoc aliud resolvitur : *Omne quod reducitur de potentia in actum, ab aliquo alio, quod est in actu, reducitur.* Quod profecto semper verificatur etiam in his, quae dicuntur seipsa movere et seipsa determinare et seipsa de potentia in actum reducere. Quoniam non est possibile, ut idem sit simul in actu et potentia secundum idem, neque quod secundum idem aliquid sit movens et motum, sed solum secundum diversa. Unde D. Thomas, *IV. Sent.* dist. 17. q. 1. a. 1. : « Nihil se educit de potentia in actum. » Et *I. Sent.* dist. 8. q. 3. a. 1. ad 4. : « In omnibus, in quibus operatio differt a substantia, oportet esse aliquem modum motus ex hoc, quod exit de novo in operationem ; quia acquiritur in ipso operatio, quae prius non erat. »

2<sup>um</sup>. — *In moventibus et motis per se ordinatis non est procedere in infinitum.* — Patet ex eo, quod moventia secunda non movent nisi per hoc, quod sunt mota a primo, sicut baculus non movet nisi per hoc, quod est motus a manu. Cum ergo omnis motus sit in mobili a movente, oportet seriem ordinatam moventium et mobilium terminari in aliquo movente per suam propriam virtutem a nullo alio acceptam et a quo omnia alia accipiunt. Necesse est itaque devenire ad aliquod movens immobile, in quo sit fons omnium motuum atque operationum.

Arg. 2<sup>um</sup>. — « Secunda via est ex ratione causae efficientis. Invenimus enim in istis sensibilibus esse ordinem causarum efficientium ; nec tamen invenitur nec est possibile, quod aliquid sit causa efficiens sui ipsius ; quia esset prius seipso, quod est impossibile. Non autem est possibile, quod in causis efficientibus procedatur in infinitum ; quia in omnibus causis efficientibus ordinatis primum est causa medii, et medium est causa ultimi, sive media sint plura sive unum tantum.

VII. *Physic.* lect. 1. addit, quod « demonstratio Aristotelis sit demonstratio *propter quid* ; continet enim causam, quare impossibile est aliquod mobile movere seipsum ». Vide VII. *Physic.* lect. 1. et VIII. lect. 7.

Remota autem causa, removetur effectus. Ergo si non fuerit primum in causis efficientibus, non erit ultimum nec medium. Sed si procedatur in infinitum in causis efficientibus, non erit prima causa efficiens; et sic non erit nec effectus ultimus nec causae efficientes mediae: quod patet esse falsum. Ergo est necesse ponere aliquam causam efficientem primam, quam omnes *Deum* nominant. » (I. q. 2. a. 3.)

**Declaratio secundae viae.** — Haec autem secunda via est ipsa via motus, contracta ad ordinem causarum efficientium, quae per se requiruntur ad aliquem effectum producendum, et quae proinde agunt simul ad productionem illius. Principia vero, quibus innititur, sunt:

1<sup>um</sup>. — *Non est possibile, quod aliquid sit causa efficiens suiipsius.* — Veritas hujus principii non modo se extendit ad res omnes in quantum *sunt*, sed etiam in quantum *operantur*; non tantum quatenus res sunt *entia*, verum quatenus sunt quoque *causae*. Unde sicut non est possibile, quod aliquid sit causa efficiens suiipsius quoad *esse*, quia esset prius seipso, ita pariter impossibile est quod aliquid sit causa efficiens suiipsius, reduplicative ut *efficiens*, ut *causa*; quia esset etiam prius seipso in ordine causae efficientis. Sicut ergo implicat aliquid esse causa antequam sit ens, sic quoque implicat aliquid efficere et causare antequam sit causa efficiens.

2<sup>um</sup>. — *Non est possibile, quod in causis efficientibus per se ordinatis procedatur in infinitum.* — Ratio quidem est eadem ac in prima via. Sicut enim moventia secunda non movent nisi per hoc, quod sunt mota a primo movente, ita in causis efficientibus per se ordinatis simulque ad eundem effectum producendum agentibus, primum est causa medii, et medium est causa ultimi; sive causae mediae efficientes sint plures, sive sit una tantum. Unde sicut in via prima moventia secunda non movent nisi per hoc, quod a primo movente moventur: sic in hac secunda via causae secundae nec efficiunt nec causant nisi moveantur in genere operativae virtutis, in ordine ipso causalitatis, ac per hoc compleantur



in virtute agendi a prima causa efficiente non habente causam suae propriae virtutis ac efficientiae.

De omnibus itaque ac de singulis causis creatis, etiam libere agentibus, oportet verificari : *Omne quod movetur, ab alio movetur; omne quod transit de potentia in actum, ab alio in actum reducitur*. Etenim hoc est de ratione causae secundae. Unde D. Thomas *De nat. angel.* cap. 13. : « Primum movens immobile, quod Deus est, omnium motionum principium est, sicut et primum ens est *omnis esse* principium. In causis autem per se ordinatis tanto aliquid magis est causa, quanto in ordine causarum prior est; cum ipsa aliis conferat, quod *causae* sint. » Et *De Verit.* q. 22. a. 2. : « Secunda causa non potest influere in suum effectum nisi in quantum recipit virtutem primae causae... Influere causae efficientis est *agere*... Deus propter hoc, quod est primum efficiens, *agit in omni agente* <sup>1</sup>. »

## § 2

### Doctrina Cajetani et Dominici Bannez circa physicam praemotionem.

**Cajetanus** in I. q. 2. a. 3. : « Causa media ex eo, quod causa media, necessario dependet a prima. Ad cujus evidentiam oportet recolere, quod de ratione causae est *efficacia*; nisi enim causa aliquid efficiat, causa in actu, de qua est sermo, dici non potest. Efficacia namque causae in illius causalitate actuali consistit; et propterea nisi *causalitas compleatur*, neque causa in actu neque efficacia seu efficientia aliqua salvatur. Oportet ergo ad hoc, quod causae ratio salvetur, ut causalitas illius compleatur; ac per hoc quidquid repugnat complemento causalitatis alicujus causae, repugnat causae illi. Cum igitur causa media vere causa sit, oportet ipsam habere propriam causalitatem completam.

<sup>1</sup> Vide nostras *Praelect. in Summam Theol.* I. q. 2. a. 3., ubi ex professo declarantur *quinque viae*, quibus Deum esse demonstrative probari potest.

*Complementum causalitatis* causae mediae nullatenus potest esse sine dependentia a prima causa; ergo causa media, ut est causa media, dependet a prima. Ergo optime dicit Aristoteles, et habetur in littera, quod *primum est causa medii*... Si tolleretur prima causa sic, quod ante omnem causam esset alia causa, numquam *perficeretur causalitas* istarum causarum essentialiter dependentium. Ergo complementum mediarum dependet a prima.... Impossibile est mediam causalitatem perfici, nisi sustentetur in prima; si enim ab infinitis prioribus dependet, numquam perfici poterit. » Haec Cajetanus.

**Bañez** in I. q. 2. a. 3. : « Notandum est, quod, ut dicitur *De Causis* lect. 1., causae essentialiter subordinatae hoc habent, quod prima causa prius influit in effectum, et ab illa cetera in omnibus suis operationibus recipiunt *actualem virtutem* influendi in suos effectus; quae susceptio virtutis non debet intelligi habitualiter. Causae enim mediae non ideo dicuntur *mediae*, quia habent virtutem, quam aliquando susceperunt a causa superiori, sed quia in actuali operatione sua pendent necessario ab actuali virtute, quam recipiunt a causa superiori. In hoc enim consistit essentialis subordinatio causarum, quod sc. in actuali operatione inferiores causae habeant dependentiam a superioribus. Ex quo sequitur impossibile esse dari processum in infinitum in huiusmodi causis efficientibus subordinatis. » Hactenus Bañez.

**Corollaria.** — 1<sup>um</sup>. — Ergo Cajetanus sicut Bañez tradit, quod causa secunda, in quantum causa, dependet a prima, quasi aliquid recipiens a prima, dum causat; videlicet *actualem virtutem* influendi in suum effectum, et qua propria causalitas causae secundae perficitur.

2<sup>um</sup>. — Ergo de ratione primae causae efficientis est agere in omni agente et causare omnes causas in ratione causae in actu, ac proinde complere causalitatem omnium causarum atque efficere earundem efficaciam: et hoc omnes intelligunt *physicam praemotionem*.

3<sup>um</sup>. — Ergo de ratione causae secundae est esse causam mediam inter ipsius proprium effectum et causam primam, et ab illa habere virtutem agendi per modum permanentis, et ab illa recipere etiam complementum talis virtutis per motionem transeuntem. Nam omnis causa secunda, dum a prima movetur, perficitur in virtute agendi, atque in ratione causae completur.

### § 3

#### Duplex genus physicae praemotionis.

**Duplex modus movendi.** — In his duobus viis ex quinque, quibus Deum esse probari potest, traduntur conceptis verbis ab Angelico Doctore illa duo genera physicae praemotionis, de quibus Cajetanus loquitur I. q. 14. a. 13. et q. 19. a. 8., nimirum : 1<sup>o</sup> Illa motio *praevia propriae actioni* rei mobilis et motae ; « sicut aqua calefacit, calefacta ab igne », et « sicut baculus movet lapidem, motus a manu ». Idem quippe est exemplum, quod D. Thomas adducit in via prima, quae sumitur ex parte motus, et in qua non consideratur nisi *potentia passiva* rerum. 2<sup>o</sup> Illa motio *cooperativa intrinsece propriae actioni* rei mobilis et motae ; « sicut cum aliquis vult aliquid, seu cum sol illuminat, non oportet primam causam praevia motione cooperari, sed sufficit et exigitur eam intrinsece cooperari tali electioni et illuminationi : et hoc, quia cooperatio in unoquoque est secundum naturam uniuscujusque. Sic enim (Deus) disponit omnia suaviter. » Haec enim exempla a Cajetano allata quadrant pro secunda via, quae sumitur ex ratione causae efficientis, et in qua consideratur *potentia activa* rerum seu virtus agendi propria causarum secundarum ; sit causa libera, sit necessaria, sicut « cum aliquis vult eligendo, seu cum sol illuminat », ait Cajetanus. Nulla enim causa secunda datur quae non sit inclusa in secunda via ; sicut nec ullum movens motum, quod non claudatur in via prima.

**Utraque motio est praevia.** — Sed in primo genere motionis sive modo movendi : 1<sup>o</sup> « illa prioritas est secundum aliquam

quasi durationem naturae, ut in *uno instanti* naturae effectus attingatur a prima causa, et in *alio* a secunda; » 2<sup>o</sup> res mota « movet praecise quia movetur, quia mota, et nihil ex se confert; et sic non est causa », addit Cajetanus.

In secundo autem genere motionis vel modo movendi : 1<sup>o</sup> « Illa prioritas non est sic intelligenda quasi sit *aliqua duratio* naturae, in cujus *primo instanti* causa prima respiciat effectum, et in *secundo* causa secunda; puerilis enim hic est sensus. Sed est intelligenda quoad independentiam et intimitatem, secundum independentiam et immediationem virtutis; quia prior independentius et immediatius *immediatione virtutis* attingit effectum quam secunda. In eodem tamen instanti naturae effectus ab utraque attingitur. » 2<sup>o</sup> « Non enim causa secunda movet ob hoc praecise quia movetur, sed etiam ex virtute propria; si enim causa secunda est causa, ergo non praecise movet, quia mota; sed etiam ex se aliquid confert », respondet Cajetanus.

**In quo differat, et quandonam habeat locum utrumque genus motionis.** — 1<sup>o</sup> Primum genus physicae motionis habet locum in rebus mobilibus, in quibus non reperitur nisi *sola potentia passiva* ad effectum producendum, ut patet in exemplis aquae ad calefaciendum, et baculi ad movendum lapidem; et tunc *movere* moventis moti provenit ex *moveri* tantum a causa prima; 2<sup>o</sup> alterum vero physicae motionis genus habet locum in omnibus causis creatis, etiam « cum aliquis vult, cum aliquis eligit », ait Cajetanus. Et tunc *movere* causae secundae provenit ex duobus : a) ex moveri a causa prima; b) ex virtute propria causae secundae.

**In quo convenient.** — In utroque modo movendi : 1<sup>o</sup> causa prima est immediata immediatione virtutis, et causa secunda immediata immediatione suppositi; 2<sup>o</sup> virtus causae primae conjungit movens motum et causam secundam suo effectui, et ipsum attingit independentius et intimius et vehementius quam secunda; 3<sup>o</sup> virtus propria causae secundae, quantumvis perfecta ponatur, completur in sua efficientia ac causalitate a virtute causae primae, a qua omne agens



secundum *mendicat complementum* propriae virtutis et *conjunctionem* ad propriam actionem et ad effectum proprium. Ita Cajetanus, ita Bañez, ita D. Thomas.

### III

#### CONCLUSIO 2.

De ratione causae principaliter agentis est, ut physice moveat et elevet causam instrumentalem ad operandum; et de ratione omnis instrumentalis causae est, ut physice moveatur atque supra suam propriam vim agendi elevetur per virtutem transeunter acceptam a causa principali.

#### § 1

##### Doctrina D. Thomae circa rationem causae principalis ac instrumentalis.

PRIMO : « Cum enim quod movetur ab alio, sit quasi instrumentum quoddam primi moventis : si primum movens non sit, quaecumque movent, instrumenta erunt. Oportet autem si in infinitum procedatur in moventibus et motis, primum movens non esse. Igitur omnia infinita moventia et mota erunt *instrumenta*. Ridiculum est autem; etiam apud indoctos. ponere instrumenta moveri nisi aliquo principali agente..... Oportet igitur primum movens esse, quod sit omnibus supremum; et hoc dicimus *Deum*. » (*Compend. Theol.* cap. 2.)

SECUNDO : « Quidquid applicat virtutem activam ad agendum, dicitur esse causa illius actionis; artifex enim applicans virtutem rei naturalis ad aliquam actionem, dicitur esse causa illius actionis, sicut coquus decoctionis, quae est per ignem. Sed *omnis applicatio* virtutis ad operationem est principaliter et primo a Deo : applicantur enim virtutes

operativae ad proprias operationes per aliquem motum vel corporis vel animae. Primum autem principium utriusque motus est Deus; est enim primum movens omnino immobile, ut supra ostensum est. Et similiter omnis motus voluntatis, quo applicantur aliquae virtutes ad operandum, reducitur in Deum sicut : a) in *primum appetibile* ; b) et in *primum volentem*. Omnis igitur operatio debet attribui Deo sicut primo et principali agenti. » (III. C. Gent. cap. 67.)

TERTIO : « Actio ejus quod movetur ab altero, est duplex : a) una quidem, quam habet secundum propriam formam ; b) alia autem, quam habet secundum quod movetur ab alio ; sicut securis operatio secundum propriam formam est *incisio* ; secundum autem quod movetur ab artifice, operatio ejus est *facere scamnum*. Operatio igitur, quae est alicujus rei secundum suam formam, est propria ejus, nec pertinet ad moventem nisi secundum quod utitur hujusmodi re ad suam operationem ; sicut *calefacere* est propria operatio ignis, non autem fabri nisi quatenus utitur igne ad calefaciendum ferrum. Sed illa operatio, quae est rei solum secundum quod movetur ab alio, non est alia praeter operationem moventis ipsam ; sicut *facere scamnum* non est seorsum operatio securis ab operatione artificis, sed securis participat instrumentaliter operationem artificis. Et ideo ubicumque movens et motum habent diversas formas seu virtutes operativas, ibi oportet quod sit alia operatio moventis, et alia operatio propria moti ; licet motum participet operationem moventis, et movens utatur operatione moti, et sic utrumque agat cum communione alterius. Sic igitur in Christo humana natura habet propriam formam et virtutem, per quam operatur ; et similiter divina. Unde humana natura habet propriam operationem distinctam ab operatione divina, et e converso. Et tamen divina natura utitur operatione naturae humanae sicut operatione sui instrumenti ; et similiter humana natura participat operationem divinae naturae, sicut instrumentum participat operationem principalis agentis. (III. q. 19. a. 1.)

QUARTO : « Instrumentum habet duas actiones : a) unam instrumentalem, secundum quam operatur non in virtute propria, sed in virtute principalis agentis ; b) aliam autem habet actionem propriam, quae competit ei secundum propriam formam, sicut securi competit scindere, ratione suae acuitatis ; facere autem lectum, in quantum est instrumentum artis. Non autem perficit instrumentalem actionem nisi exercendo actionem propriam ; scindendo enim facit lectum. Et similiter sacramenta corporalia per propriam operationem, quam exercent circa corpus quod tangunt, efficiunt operationem instrumentalem ex virtute divina circa animam... in quantum est instrumentum virtutis divinae ; nam ex anima et corpore unum fit. » (III. q. 62. a. 1. ad 2.)

QUINTO : *I. C. Gent.* cap. 44. : « Omnia autem moventia, quae sunt in mundo, comparantur ad primum movens, quod est Deus, sicut instrumenta ad agens principale. Cum igitur in mundo inveniantur multa moventia per intellectum, impossibile est, quod primum movens moveat absque intellectu. » Rursus, *III. C. Gent.* cap. 147. : « Sub Deo autem, qui est primus intellectus et volens, ordinantur omnes intellectus et voluntates sicut instrumenta sub principali agente. » Et ibid. cap. 149. : « Motio moventis praecedat motum mobilis ratione et causa... Sed anima nostra operatur sub Deo sicut agens instrumentale sub principali agente. » Atque iterum, *IV. C. Gent.* cap. 41. : « Omnes enim homines comparantur ad Deum ut quaedam instrumenta, quibus operatur ; *Deus est enim qui operatur in vobis et velle et perficere pro bona voluntate*, secundum Apostolum, Philipp. 2, 13. Sed alii homines comparantur ad Deum quasi instrumenta extrinseca et separata ; moventur enim a Deo non ad operationes proprias sibi tantum, sed ad operationes communes omni rationali naturae, ut est intelligere veritatem, diligere bona et operari justa. Sed humana natura in Christo assumpta est, ut instrumentaliter operetur ea, quae sunt operationes propriae solius Dei, sicut est mundare peccata, illuminare mentes per gratiam et introducere in perfectionem vitae

aeternae. Comparatur igitur humana natura Christi ad Deum sicut instrumentum proprium et conjunctum, ut manus ad animam. »

## § 2

### Corollaria.

1<sup>um</sup>. — Ergo omnes intellectus et voluntates ordinantur sub Deo, qui est primus intellectus et volens, sicut instrumenta sub principali agente; ac perinde clauduntur intra ambitum primae ac secundae viae ex quinque, quibus Deum esse probari potest. Et sic omnis intellectus et voluntas est movens motum sub Deo primo movente, et est causa efficiens completa in sua causalitate per motionem Dei, qui est prima causa.

2<sup>um</sup>. — Nec intellectus intelligit veritatem, nec voluntas diligit bona aut operatur justa, nisi quatenus motio Dei moventis, sub quo operatur anima nostra sicut agens instrumentale sub principali agente, praecedit motum mobilis ratione et causa, id est, prioritate naturae ac causalitatis.

3<sup>um</sup>. — In omni agente creato, etiam libertate praedito : a) esse duplicem actionem; unam quidem secundum propriam formam seu virtutem operativam, aliam vero secundum quod movetur a Deo; b) utramque actionem exerceri ab agente creato, ita tamen, quod causa secunda non perficit actionem instrumentalem nisi exercendo propriam; c) duplicem etiam esse virtutem operativam in causa secunda : alteram nempe per modum permanentis, alteram vero per modum transeuntis, dum a causa prima movetur.

4<sup>um</sup>. — Omne agens creatum, etiam liberum, in quantum a Deo motum, participare operationem Dei moventis; et Deum, quatenus moventem, uti et potentia operativa et ipsamet operatione creaturae.

5<sup>um</sup>. — Utrumque igitur agens, principale et instrumentale, Deum et creaturam, agere cum communione alterius ac producere eundem effectum; aliter tamen et aliter. Nam licet verum sit, quod creatura agit per Deum et Deus per



creaturam, attamen diversimode, secundum quod superior agere dicitur per inferiorem, et inferior per superiorem. Unde D. Thomas I. q. 36. a. 3. ad 4. : « Virtus causae primae conjungit causam secundam suo effectui. Sic igitur, in quantum ballivus est medius secundum ordinem suppositorum agentium, dicitur rex operari per ballivum; secundum ordinem vero virtutum dicitur ballivus operari per regem, quia virtus regis facit, quod actio ballivi consequatur effectum. » Et *III. Sent.* dist. 23. q. 3. a. 1. solut. 1. : « Actio primi agentis et est prior et est posterior. Prior in movendo; quia actiones omnium secundorum agentium fundantur super actionem primi agentis... Est autem posterior in utendo aliorum actibus ad finem proprium. »

6<sup>um</sup>. — Et sic omnis applicatio virtutis, etiam libere agentis, ad operationem est principaliter et primo a Deo, qui est primus intellectus et primum volens; et omnis motus voluntatis, quo et ipsamet voluntas se applicat ad operandum, reducitur in Deum immediate immediatione virtutis sicut in primum volentem. Nam sicut ridiculum est, etiam apud indoctos, ponere instrumenta moveri nisi ab aliquo principali agente, sic est ridiculum, saltem apud doctos, ponere intellectus et voluntates creata *movere se* nisi motio primi intellectus et primi volentis praecedat ratione et causa. *Movere* namque omnis agentis creati, etiam libero arbitrio praediti, provenit ex duobus : a) ex *moveri* a prima voluntate; b) et ex propria virtute liberae voluntatis creatae.

7<sup>um</sup>. — Et sic ab instrumento Dei, quod est libera voluntas creaturae rationalis, non oportet quod excludatur ratio libertatis, immo potius ratio libertatis completur ac perficitur ex virtute agentis primi et primae voluntatis; nam per hoc, quod homo a Deo movetur ut instrumentum a principali agente, confertur ei hoc ipsum quod seipsum moveat. Unde D. Thomas *De Verit.* q. 24. a. 1. ad 5. : « Ab instrumento non oportet quod omnino excludatur ratio libertatis, quia aliquid potest esse ab alio motum, quod tamen seipsum movet; et ita est de mente humana. » Et *De Malo* q. 3. a. 2. ad 4. : « Similiter, cum aliquid movet

seipsum, non excluditur quin ab alio moveatur, a quo habet hoc ipsum quod seipsum movet; et sic non repugnat libertati, quod Deus est causa actus liberi arbitrii. »

## IV

### CONCLUSIO 3.

**De ratione agentis per essentiam est, quod movendo determinet omnia agentia per participationem, atque omnibus illis modum et ordinem imponat; de ratione autem agentis per participationem est, quod recipiat juxta modum ac conditionem suae naturae determinationem atque influxum agentis per essentiam.**

### § 1

**Argumenta D. Thomae quoad utramque conclusionis partem.**

Arg. 1<sup>um</sup>. — « Dicendum, quod in Deo non est aliud *esse* et sua *substantia*. Ad cujus evidentiam considerandum est, quod cum aliquae causae effectus diversos producentes communicant in *uno effectu* praeter diversos effectus, oportet, quod *illud commune* producant ex virtute alicujus superioris causae, cujus illud est proprius effectus. Et hoc ideo, quia cum proprius effectus producat ab aliqua causa secundum suam propriam naturam vel formam, diversae causae, habentes diversas naturas et formas, oportet quod habeant proprios effectus diversos. Unde si in aliquo uno effectu conveniunt, ille non est proprius alicujus earum, sed alicujus superioris, in cujus virtute agunt; sicut patet, quod diversa complexionata conveniunt in calefaciendo, ut piper et zinziber et similia, quamvis unumquodque eorum habeat suum proprium effectum diversum ab effectu alterius. Unde effectum communem oportet reducere in priorem causam, cujus sit proprius, sc. ignem. Similiter in motibus coelestibus, sphaerae planetarum singulae habent proprios motus, et

cum hoc habent unum communem, quem oportet esse proprium alicujus sphaerae superioris omnes revolventis secundum motum diurnum. Omnes autem causae creatae communicant in uno effectu, qui est *esse*, licet singulae proprios effectus habeant, in quibus distinguuntur. Calor enim facit *calidum esse*, et aedificator facit *domum esse*. Conveniunt ergo in hoc, quod causant *esse*; sed differunt in hoc, quod ignis causat *ignem*, et aedificator causat *domum*. Oportet ergo esse aliquam causam superiorem omnibus, cujus virtute omnia causent *esse*, et ejus *esse* sit proprius effectus. Et haec causa est Deus. Proprius autem effectus cujuslibet causae procedit ab ipsa secundum similitudinem suae naturae. Oportet ergo quod hoc, quod est *esse*, sit substantia vel natura Dei. » (*De Pot.* q. 7. a. 2.)

Arg. 2<sup>um</sup>. — « Secundum ordinem causarum est ordo effectuum. Primum autem in omnibus effectibus est *esse*; nam omnia alia sunt determinationes ipsius. Igitur *esse* est proprius effectus primi agentis, et omnia alia agunt ipsum in quantum agunt in virtute primi agentis; secunda autem agentia, quae sunt quasi particulantia et determinantia actionem primi agentis, agunt sicut proprios effectus alias perfectiones, quae determinant *esse*. Praeterea: Quod est per essentiam tale, est propria causa ejus quod est per participationem tale, sicut ignis est causa omnium ignitorum. Deus autem solus est ens per essentiam, omnia autem alia sunt entia per participationem; nam in solo Deo *esse* est sua *essentia*. *Esse* igitur cujuslibet existentis est proprius effectus ejus; ita quod omne, quod producit aliquid in *esse*, hoc facit in quantum agit in virtute Dei. » (*III. C. Gent.* cap. 66.)

Arg. 3<sup>um</sup>. — « Est enim Deus ipsum *esse* suum, in nullo receptum. Unde patet, quod Deus est infinitus, quod sic videri potest. *Esse* enim hominis terminatum est ad hominis speciem, quia est receptum in natura speciei humanae; et similiter *esse* equi vel cujuscumque creaturae. *Esse* autem Dei, cum non sit in aliquo receptum, sed sit *esse* purum,

non limitatur ad aliquem modum perfectionis essendi, sed totum esse in se habet; et sicut esse in universali acceptum ad infinita se potest extendere, ita divinum esse infinitum est; et ex hoc patet, quod virtus vel potentia sua activa est infinita... Intensio autem in operatione divina non est attendenda secundum quod operatio est in operante, quia sic semper est infinita, cum operatio sit divina essentia; sed attendenda est secundum quod attingit effectum; sic enim a Deo moventur quaedam efficacius, quaedam minus efficaciter. » (*De Pot.* q. 1. ad 2.) Et ibid. a. 4. ad 3. : « Licet causa prima maxime influat in effectum, tamen ejus influentia per causam proximam *determinatur* et *specificatur*; et ideo ejus similitudinem imitatur effectus. » Atque *De Verit.* q. 24. a. 1. ad 4. : « Causa prima dicitur esse principalis simpliciter loquendo, propter hoc, quod magis influit in effectum; sed causa secunda secundum quid principalis est, in quantum effectus ei magis conformatur. » Et ibid. q. 8. a. 12. : « Omnes effectus, qualescumque sint eorum causae proximae, in causa prima sunt determinati, quae sua providentia omnibus modum imponit. »

*I. Sent.* dist. 38. q. 1. a. 5. : « Virtus causae primae recipitur in causa secunda secundum modum causae secundae. Effectus enim ille non procedit a causa prima nisi secundum quod virtus causae primae recipitur in causa secunda. »

*II. C. Gent.* cap. 87. : « Quidquid producitur in *esse* ab aliquo agente, acquirit ab ipso vel aliquid quod est principium essendi in tali specie, vel ipsum esse absolutum. Ipsum autem *esse* est proprius effectus primi et universalis agentis; secunda enim agentia agunt per hoc, quod imprimunt similitudines suarum formarum in rebus factis, quae sunt formae factorum. »

Opusc. *De quatuor oppositis* <sup>1</sup> cap. 4. : « Actio Dei ad ipsum *esse* terminatur; actio creaturae proprie terminatur ad *rem*, ad *compositum*; ad ipsum *esse* ex consequenti, cum compositi sit *esse*. »

<sup>1</sup> Opusc. 33. edit. Vivès et 37. edit. Rom.



*De Pot.* q. 3. a. 4. : « Cum omnes secundae causae agentes a primo agente habeant hoc ipsum quod agant, oportet, quod a primo agente omnibus secundis agentibus modus et ordo imponatur; ei autem non imponitur modus vel ordo ab aliquo. »

*I. Sent.* dist. 3. q. 2. a. 3. ad 3 : « Aliquid dicitur modificari aliquo dupliciter : Vel *formaliter*, et sic res dicitur modificari suo modo, qui in ipsa est. Vel *effective*, et sic omnia modificantur ab eo, qui modum rebus imponit; et hinc est, quod Deus dicitur *effective* modus omnium rerum. »

*III. Sent.* dist. 23. q. 3. a. 1. solut. 1. : « Omnes actiones aliorum agentium modificantur per actionem primi agentis. »

## § 2

**Quomodo enim perfectio, quod est esse, determinet alias perfectiones; et quomodo aliae omnes perfectiones determinent esse.**

**PRIMO : Doctrina D. Thomae circa hoc quod dicimus esse.** — *a)* « *Esse* est formalissimum inter omnia, et est etiam maxime communicabile. » (*De Anima* a. 1. ad 17.)

*b)* « *Esse* est actus ultimus, qui participabilis est ab omnibus; ipsum autem nihil participat. » (*Ibid.* a. 6. ad 2.)

*c)* « *Esse* est perfectissimum omnium; comparatur enim ad omnia ut actus; nihil enim habet actualitatem nisi in quantum est. Unde ipsum *esse* est actualitas omnium rerum, etiam ipsarum formarum. » (*I. q. 4. a. 1. ad 3.*)

*d)* « Hoc quod dico *esse*, est inter omnia perfectissimum; quod ex hoc patet, quia actus est semper perfectior potentia. Quaelibet autem forma signata non intelligitur in actu nisi per hoc, quod esse ponitur. Nam humanitas vel igneitas potest considerari ut in potentia materiae existens, vel ut in virtute agentis, aut etiam ut in intellectu; sed hoc, quod habet esse, efficitur actu existens. »

*e)* « Unde patet, quod hoc quod dico *esse*, est actualitas omnium actuum; et propter hoc est perfectio omnium perfectionum. »

f) « Nec intelligendum est, quod ei, quod dico *esse*, aliquid addatur, quod eo sit formalius, ipsum determinans, sicut actus potentiam; *esse* enim, quod huiusmodi est, est aliud secundum essentiam ab eo, cui additur determinandum. Nihil autem potest addi ad *esse*, quod sit extraneum ab ipso, cum ab eo nihil sit extraneum nisi *non ens*, quod non potest *esse* nec forma nec materia. »

g) « Unde non sic determinatur *esse* per aliud sicut potentia per actum, sed magis sicut actus per potentiam. »

h) « Et per hunc modum *hoc esse* ab *illo esse* distinguitur, in quantum est talis vel talis naturae... Ipsum *esse* Dei distinguitur et individuatur a quolibet alio *esse* per hoc ipsum, quod est *esse per se subsistens*, et non adveniens alicui naturae, quae sit aliud ab ipso *esse*. Omne autem aliud *esse*, quod non est subsistens, oportet quod individuetur per naturam et substantiam, quae in tali *esse* subsistit. Et in eis verum est, quod *esse* huius est aliud ab *esse* illius, per hoc quod est alterius naturae. Sicut si esset unus calor per se existens sine materia vel subjecto, ex hoc ipso ab omni alio calore distingueretur; sicut calores in subjecto existentes non distinguuntur nisi per subjecta. » (*De Pot.* q. 7. a. 2. ad 5. et ad 9.)

SECUNDO : **Corollaria.** — 1<sup>um</sup>. — Ergo *esse*, qui est actus omnium actuum et omnium formarum, semper est aliquod *esse determinatum*, *esse tale*, *esse hoc vel illud*; id est, *esse* unum, individuum, indivisum in se et divisum ab aliis; et tanto magis, quanto huiusmodi *esse* sit majus aut excellentius *esse*. Nam si *esse* est per se subsistens, tunc individuatur per suam propriam puritatem et bonitatem; per hoc, quod in aliquo non est receptum, nec advenit alicui naturae, quae sit aliud ab ipso *esse*; et hoc est Deus, cujus substantia est suum *esse*. Si autem *esse* non est per se subsistens, recipitur in alio tamquam in potentia vel subjecto, et specificatur atque fit *esse tale* per naturam potentiae vel subjecti, cui inhaeret, in quo recipitur et cujus est actus.

2<sup>um</sup>. — Unde *esse* in ordine operationis specificatur et fit

*tale esse* ratione potentiae operativae, ex qua educitur, a qua egreditur et in qua recipitur, si operatio est immanens ; in linea vero cujuscumque effectus specificatur et fit *tale esse* ratione alterius entitatis vel formae vel determinatae naturae, cujus est ultima actualitas.

3<sup>um</sup>. — Ergo omnes aliae perfectiones determinant *esse* ; sicut potentia actum, sicut subjectum formam, sicut participans participabile ac participatum, sicut perfectibile perficiens.

4<sup>um</sup>. — Ergo *esse* determinat omnes alias perfectiones, sicut actus potentiam, sicut forma subjectum, sicut participabile ac participatum participans, sicut perficiens perfectibile. « *Esse* enim est actualitas omnis rei... et illud, quod est maxime formale omnium. » (I. q. 5. a. 1. et q. 7. a. 1.)

### § 3

**Quomodo ergo virtus primi agentis determinet  
virtutem agentis secundi,  
et quomodo agens secundum determinet virtutem agentis primi.**

Hic tangitur radix totius controversiae *de influxu* causae primae in universas ac singulas causas creatas, sive necessarias sive contingentes vel liberas ; simul atque patet, quomodo juxta doctrinam philosophicam D. Thomae quaestio de *esse* et *essentia* constituit caput totius Metaphysicae et fundamentum vere solidum ad quaestiones de creatione mundi, de conservatione rerum, deque influxu primi moventis immobilis in omnia quae moventur, scientifice dilucidandas. Ex supradictis habetur :

1<sup>o</sup> Agens per essentiam, qui est Deus, est causa fiendi et essendi ; agens vero per participationem est causa fiendi tantum.

2<sup>o</sup> Agentis primi proprius effectus est *esse* ; proprii vero effectus secundorum agentium sunt aliae perfectiones, quae determinant *esse*.

3<sup>o</sup> Ac proinde, sic actio causarum secundarum determinat

actionem causae primae, sicut effectus proprii secundarum causarum determinant *esse*; et e contra, sic actio primae causae determinat virtutem et actionem causarum secundarum, sicut *esse* determinat alias perfectiones.

4<sup>o</sup> Unde agens primum, quod est agens per essentiam, determinat *active*; id est, perficiendo, elevando, complendo sua virtute virtutes et potentias operativas omnium agentium secundarum. Secunda vero agentia determinant *passive* actionem primi agentis; dum quidquid recipitur, ad modum recipientis accommodatur; dum recipiendo influxum agentis primi, limites apponunt ei per suas potentias, intra quarum capacitatem influxus divinus contrahitur; et sic secunda agentia *specificant* circumscribendo actionem primae causae, dum recipiunt instrumentalem virtutem juxta modum propriae virtutis operativae, cujus virtus divina transeunter movens est complementum.

5<sup>o</sup> Agens itaque per essentiam determinat omnia per modum perficientis, conferendo omnibus agentibus omnia, *esse, posse et agere*; et « nihil est in re, per quod determinetur ejus natura communis, cujus Deus non sit causa ». (*De Verit.* q. 2. a. 4.) Secunda vero agentia sunt quasi participantia et determinantia actionem primi agentis, eo quod non agunt *esse* nisi in virtute primi agentis, et agunt sicut proprios effectus alias perfectiones, quae determinant *esse*.

6<sup>o</sup> Nihil omnino in effectu nec in operatione est perfectionis seu entitatis, quod non fiat a causa prima, et quod non fiat immediate immediatione virtutis; ita quod, quidquid fit a causa secunda, fit a causa prima, sed non omne quod fit a causa prima, a causa secunda fit.

7<sup>o</sup> Omnia modificantur *effective* a Deo, qui modum rebus imponit; atque omnes actiones aliorum agentium *modificantur* per actionem primi agentis. A primo tandem agente omnibus secundis agentibus modus et ordo imponitur; ei autem non imponitur modus vel ordo ab aliquo.



## § 4

**Doctrina Ferrariensis, Cajetani et Dominici Bannez.**

PRIMO : **Ferrariensis** in *III. C. Gent.* cap. 66. : « Circa istam propositionem : *Secunda agentia determinant actionem primi agentis*, advertendum, quod hoc non est sic intelligendum, quasi secundaria agentia aliquid erga divinam actionem, ut in se est, operentur, cum sua actio sit sua substantia; sed intelligitur ut ex superioribus constat, secundum quod ipsa mediantibus causis secundis ad effectum aliquem terminatur; sic enim virtus divina et actio, secundum quod in secunda causa recipitur, accipit limitationem et determinationem ex conditione causae secundae, tamquam ex susceptivi conditione; quia unumquodque recipitur in alio per modum recipientis. »

SECUNDO : **Cajetanus** in I. q. 19. a. 8. : a) « Deus gloriosus, quia omni genere causarum secundarum uti statuerit... Virtutem causae primae *modificari* in secunda... Conditiō causae secundae... est *modificans* primae efficaciam... Stat causam secundam necessario moveri a prima, et cum hoc ipsum *moveri* modificari ex naturae causae secundae. Et sic *movere* causae secundae provenit non ex moveri tantum, sed ex *moveri* et *modo proprio* ipsius causae secundae. Ex tali autem modo consurgere potest quod non necessario movet. » b) « Quia Deus vult res et modos essendi et fiendi rerum..., et illud velle *efficacissimum* est; et res et modi voliti fiunt... Ipsa secunda causa nullum effectum producit nisi virtute primae *concurrente* et *conjungente* virtutem secundae suo effectui; quoniam prima omnia attingit immediate immediatione virtutis. »

TERTIO : **Bannez** in I. q. 19. a. 8. : « Ceterum, immediatus concursus divinae voluntatis, consideratus ut se tenet ex parte agentis et ut est actio, impossibile est quod *modifi-*

*retur* ab aliquo inferiori; et ratio videtur evidens: 1<sup>o</sup> Quia omnis causa modificabilis ab altera non determinat seipsam ad effectum specialem. Sed divina voluntas seipsam determinat ad quemcumque effectum specialissimum et singularem producendum. Ergo non est modificabilis a causa inferiori concursus activus divinae voluntatis. 2<sup>o</sup> Quia esset pōnere maximam imperfectionem in Deo asserere, quod quemadmodum idem omnino concursus solis producit distinctos effectus, quia *modificatur* per distinctas causas inferiores, ita concursus divinae voluntatis, quantum est ex parte sua, manet *indifferens*, sed *modificatur* et *determinatur* ad distinctos effectus per causas inferiores. 3<sup>o</sup> Praeterea, sicut se habet liberum arbitrium hominum respectu illorum, quae omnino subjiciuntur sibi, ita se habet et multo efficacius divina voluntas respectu eorum, quae sibi subjiciuntur; quae quidem sunt universa. Sed concursus liberi arbitrii nostri ad aliquid agendum per media subordinata *non modificatur* ab ipsis mediis, sed potius *modificat* motum et concursum mediorum... Ergo multo minus potest inveniri aliquid creatum, quod *determinet* divinae voluntatis activum concursum sive attingentiam activam. 4<sup>o</sup> Denique, omnis causa, cujus actio modificatur ab aliquo, dependet ab illo in sua operatione in aliquo genere causae. Sed Dei voluntas in sua operatione non dependet ab aliqua causa. Ergo ejus actio non modificatur ab aliquo..... Et doctrina valde notanda est pro materia *de gratia* et *de praedestinatione*, in qua multi paralogizantur putantes, quod liberum arbitrium hominis *modificat* aequalem concursum et auxilium Dei, *determinans* illud ad magis vel minus efficiendum. Et ita solent aliqui ignorantes dicere, quod cum aequali auxilio gratiae Dei unus convertitur et alius non. Qua via facile inciditur in errorem Pelagianorum <sup>1</sup>. »

<sup>1</sup> *Nota*: Hoc fuit scriptum et praelo mandatum anno 1584. Prima autem editio *Concordiae* facta fuit anno 1588. Unde Bañez in hoc loco non impugnat Molinam nisi quatenus Molina docuit doctrinam quam impugnaverat Bañez.

QUARTO : Ergo haec duo possunt simul stare, nimirum : 1<sup>o</sup> *actionem primi agentis modificare et determinare active et per modum causae efficientis omnia secunda agentia, etiam libera*; 2<sup>o</sup> *secunda vero agentia modificare et determinare passive, ex susceptivi conditione sive per modum causae materialis, actionem primi agentis*. Verum itaque est, ut ait Bañez, quod prima causa universalissima, qualis est divina voluntas, omnia active modificat quantum ad *fieri* et quantum ad *esse* et quantum ad *modum essendi*; sed hoc non negat Cajetanus, cum expresse dicat : 1<sup>o</sup> « Deus vult res et modos essendi et fiendi rerum »; 2<sup>o</sup> « illud velle efficacissimum est »; 3<sup>o</sup> « res et modi voliti fiunt »; 4<sup>o</sup> « ipsa secunda causa nullum effectum producit nisi in virtute primae *concurrente* et *conjungente* virtutem secundae suo effectui, et attingente omnia immediate im-mediatione virtutis. » Unde cum Cajetanus ait : *virtutem causae primae modificari in secunda*, eum rectum sensum videtur exprimere, quem D. Thomas tradit per illa verba : *secunda agentia determinant actionem primi agentis* <sup>1</sup>.

## V

## CONCLUSIO 4.

De ratione liberi per essentiam est, quod omnia prae-definiat ac praedeterminet ac physice praemoveat ad operandum; de ratione autem liberi per participationem est, ut se moveat et se determinet ad operandum, praemotum tamen et determinatum a libero per essentiam.

## § 1

Argumenta D. Thomae quoad utramque conclusionis partem.

Quoad 1<sup>am</sup> partem. — Arg. 1<sup>um</sup>. — « Exemplar enim est, ad cujus imitationem fit aliud. Non autem omnia, quae scit

<sup>1</sup> Quod profecto BANNER non videtur satis advertisse, dum fatetur

Deus ex ipso posse prodire, vult in rerum natura producere. Illae igitur solae rationes intellectae a Deo exemplaria dici possunt, ad quarum imitationem vult res in *esse* producere; sicut producit artifex artificata ad imitationem formarum artis, quas mente concepit, quae etiam artificialia dici possunt. Hoc ergo, quod dicit *exemplaria*, dicimus esse non res aliquas extra Deum, sed in ipso intellectu divino quasdam existentium rationes intellectas, quae sunt substantiarum factivae... Et huiusmodi rationes Sancta Scriptura vocat *praedefinitiones* sive *praedestinationes*, secundum illud Rom. 8, 30 : *Quos praedestinavit, hos et vocavit*. Et vocat etiam eas *divinas* et *bonas voluntates*, secundum illud Ps. 110, 2 : *Magna opera Domini, exquisita in omnes voluntates ejus*. Quae quidem praedefinitiones et voluntates sunt distinctivae entium et effectivae ipsorum; quia secundum huiusmodi rationes substantialis Dei essentia praedeterminavit omnia et produxit. » (*De div. nom.* cap. 5. lect. 3.)

Arg. 2<sup>um</sup>. — *De Verit.* q. 3. a. 6. : « Cum Deus de his, quae facere potest, quamvis numquam sint facta nec futura, habeat cognitionem virtualiter practicam, relinquitur, quod *idea* possit esse ejus, quod nec est nec fuit nec erit; non tamen eo modo sicut est eorum, quae sunt vel erunt vel fuerunt; quia ad ea, quae sunt vel erunt vel fuerunt, producenda *determinatur ex proposito divinae voluntatis*, non autem ad ea, quae nec sunt nec erunt nec fuerunt; et sic huiusmodi habent quodammodo indeterminatas ideas. »

Et ibid. a. 7. : « Quia nos ponimus Deum immediatam causam uniuscujusque rei secundum quod in omnibus causis secundis operatur, et quod *omnes effectus secundi ex ejus praedefinitione proveniunt* : ideo non solum primorum entium, sed etiam secundorum ideas ponimus; et sic substantiarum et accidentium; sed diversorum accidentium diversimode. »

ipsi displicere modum loquendi, quo Cajetanus utitur. Attamen ex contextu verba Cajetani ad verum sensum juxta D. Thomam trahi possunt et debent.



Ibid. a. 8. : « Nos autem ponimus Deum esse causam *singularis* et quantum ad formam et quantum ad materiam. Ponimus etiam, quod *per divinam providentiam definiuntur omnia singularia* : et ideo oportet nos singularium ponere ideas. »

Ibid. q. 6. a. 6. : « In quolibet enim ordine causarum attendendus est non solum ordo primae causae ad effectum, sed etiam ordo secundae causae ad effectum, et ordo etiam causae primae ad secundam; quia causa secunda non ordinatur ad effectum nisi ex ordinatione causae primae. Causa autem prima dat secundae quod influat super causatum suum. »

*Quodl.* 12. a. 4. : « A providentia Dei omnia sunt *praedeterminata et ordinata*. »

Arg. 3<sup>um</sup>. — *Quodl.* 12. a. 3. : « Voluntas Dei est principium totius entis; ergo non cadit sub ratione contingentiae vel necessitatis; sed haec effluunt et ordinantur ex Dei voluntate; et sic ipsa Dei voluntas facit quaedam contingentia, praeparando causas contingentes illis rebus, quas vult esse contingentes, et similiter necessarias causas rebus et effectibus necessariis. Et sic voluntas Dei semper impletur; non tamen omnia necessario eveniunt, sed eo modo, quo Deus vult ea esse, et vult quod sint contingentia. »

*I. Perihier.* lect. 14. : « Voluntas divina est intelligenda ut extra ordinem entium existens, velut causa quaedam profundens totum ens et omnes ejus differentias. Sunt autem differentiae entis possibile et necessarium; et ideo ex ipsa divina voluntate originantur necessitas et contingentia in rebus, et distinctio utriusque secundum rationem proximarum causarum. Ad effectus enim, quos voluit necessarios esse, disponit causas necessarias; ad effectus autem quos voluit esse contingentes, ordinavit causas contingenter agentes, id est, potentes deficere. Et secundum harum conditionem causarum, effectus dicuntur vel necessarii vel contingentes, quamvis omnia dependeant a voluntate divina, sicut a prima causa, quae transcendit ordinem necessitatis et contingentiae. »

VI. *Metaph.* lect. 3. : « Nihil inveniri potest quod ab ordine causae altissimae divinae exeat, cum ejus causalitas extendat se ad omnia in quantum sunt entia. Non potest igitur sua causalitas impediri per indispositionem materiae; quia et ipsa materia et ejus dispositiones non exeunt ab ordine illius agentis, quod est agens per modum dantis *esse*, et non solum per modum moventis et alterantis. »

**Quoad 2<sup>am</sup> partem.** — Arg. 1<sup>um</sup>. — I. q. 83. a. 1. ad 3. : « Dicendum, quod liberum arbitrium est causa sui motus, quia homo per liberum arbitrium seipsum movet ad agendum. Non tamen hoc est de necessitate libertatis, quod sit prima causa sui id, quod liberum est; sicut nec ad hoc, quod aliquid sit causa alterius, requiritur, quod sit prima causa ejus. Deus igitur est prima causa movens et naturales causas et voluntarias. Et sicut naturalibus causis, movendo eas, non aufert quin actus earum sint naturales: ita movendo causas voluntarias non aufert quin actiones earum sint voluntariae, sed potius *hoc in eis facit*; operatur enim in unoquoque secundum ejus proprietatem. »

Et I-II. q. 6. a. 1. ad 1. et ad 3. : « Dicendum, quod non omne principium est principium primum. Licet ergo de ratione voluntarii sit, quod principium ejus sit intra, non tamen est contra rationem voluntarii, quod principium intrinsecum causetur vel moveatur ab exteriori principio; quia non est de ratione voluntarii, quod principium intrinsecum sit principium primum... Deus movet hominem ad agendum non solum sicut proponens sensui appetibile vel sicut immutans corpus, sed etiam sicut movens ipsam voluntatem; quia omnis motus, tam voluntatis quam naturae, ab eo procedit sicut a primo movente. Et sicut non est contra rationem naturae quod motus naturae sit a Deo sicut a primo movente,... ita non est contra rationem actus voluntarii quod sit a Deo, in quantum voluntas a Deo movetur. »

Arg. 2<sup>um</sup>. — I. C. *Gent.* cap. 82. : « *Ad utrumlibet enim esse* alicui virtuti potest convenire dupliciter: Uno modo,

ex parte sui; alio modo, ex parte ejus ad quod dicitur. Ex parte quidem sui... : hoc in imperfectionem virtutis redundat, et ostenditur esse *potentialitas* in ipsa... Ex parte autem ejus ad quod dicitur... : hoc ad imperfectionem virtutis non pertinet, sed magis ad ejus eminentiam, in quantum utrumlibet oppositorum excedit. »

*De Verit.* q. 24. a. 14. : « Sed voluntas hominis non est determinata ad aliquam unam operationem, sed se habet indifferenter ad multas; et sic quodam modo est in *potentia*, nisi mota per *aliquid activum*; vel quod ei exterius repraesentatur, sicut est bonum apprehensum; vel quod in ea interius operatur, sicut est ipse Deus. »

Arg. 3<sup>um</sup>. — *De Malo* q. 6. a. unico ad 17. : « Dicendum, quod voluntas, quando de novo incipit eligere, transmutatur a sua priori dispositione quantum ad hoc, quod prius erat *eligens in potentia* et postea fit *eligens actu*; et haec quidem transmutatio est ab aliquo movente, in quantum ipsa voluntas movet seipsam ad agendum, et in quantum etiam movetur ab aliquo exteriori agente, sc. Deo. »

II. *Sent.* dist. 25. q. 1. a. 2. ad 1. : « Dicendum, quod Deus operatur in voluntate et in libero arbitrio secundum ejus exigentiam; unde etiamsi voluntatem hominis in aliud mutet, nihilominus tamen hoc sua omnipotentia facit, ut illud in quod mutatur, voluntarie velit. » Et ibid. ad 3. : « Ad actum liberi arbitrii nulla virtus est eo superior nisi Deus, quamvis forte aliqua alia virtus creata simpliciter potentior sit. Unde nulla virtus creata liberum arbitrium cogere nec immutare potest. Deus autem potest quidem immutare; sed non cogere, eo modo quo dicitur non posse facere, ut duo contradictoria sint simul. » Et ibid. ad 5. : « Deus solus in voluntate operari potest et in ipsam imprimere; et ideo diversitates humanae voluntatis in uniformitatem voluntatis divinae reducuntur sicut in primum regulans. »

## § 2

**Ergo omnia prorsus, etiam libera et contingentia, praedeterminantur et praedefiniuntur a Deo ; et ad divinam dignitatem pertinet, ut omnia moveat et inclinet et dirigat ipse Deus, a nullo alio motus vel inclinatus vel directus.**

PRIMO : Quia Deus est primum movens immobile in ordine libere agentium, a quo necesse est ut moveantur omnia, etiam quae seipsa libere movent.

SECUNDO : Quia Deus est causa efficiens prima, a qua derivatur tota efficientia atque causalitas omnium causarum et omnium voluntatum.

TERTIO : Quia Deus est primum per se liberum, non habens causam suae propriae libertatis aliunde, et quod est causa libertatis omnibus aliis.

QUARTO : Quia Deus est maxime liberum, a quo sicut a libero per essentiam accipiunt totum suum posse et suum agere omnia libera per participationem.

QUINTO : Quia Deus est primum intelligens et primum volens, sub quo ordinantur omnes intellectus et voluntates sicut instrumenta sub agente principali, et a quo transmutantur omnes voluntates de potentia eligendi ad actum electionis.

SEXTO : Quia per divinam providentiam definiuntur omnia singularia, et nulla causa secunda ordinatur ad effectum suum nisi ex ordinatione causae primae.

SEPTIMO : Quia omnia determinantur ex proposito divinae voluntatis ; et omnes effectus secundorum agentium ex ejus praedefinitione proveniunt ; et hujusmodi praedefinitiones ac praedeterminationes sunt divinae et bonae voluntates distinctivae entium et effectivae ipsorum. Quia voluntas Dei est causa efficiens ac profundens totum ens et omnes ejus differentias, et agens non tantum per modum moventis et alterantis, sed etiam per modum dantis *esse*.



## § 3

**Ergo ad rationem et essentialem dependentiam liberi arbitrii creati atque ad ipsius etiam dignitatem et perfectionem pertinet, ut se quidem moveat ac determinet, sed a Deo motum ac determinatum.**

PRIMO : *Quia omne liberum arbitrium creatum est causa secunda.* De ratione autem omnis causae secundae est, quod ejus causalitas compleatur per motionem causae primae; et secunda causa non potest *influere* in suum effectum nisi in quantum recipit virtutem primae causae. Influere vero causae efficientis est agere.

SECUNDO : *Quia omne liberum arbitrium creatum sub libero arbitrio Dei est causa instrumentalis.* De ratione autem causae instrumentalis est, quod sit movens motum, et quod applicatio ejusdem virtutis ad agendum fiat primo et principaliter a principali agente. Unde D. Thomas III. q. 62. a. 1. ad 1. : « Causa instrumentalis... non solum est causa, sed etiam quodammodo effectus, in quantum movetur a principali agente. » Et ibid. q. 7. a. 1. ad 3. : « Instrumentum anima rationali animatum ita agitur, quod etiam agit. »

TERTIO : *Quia omne liberum arbitrium creatum est agens infimum sub libero Dei arbitrio, quod est agens supremum.* Virtus autem infimi agentis non habet quod producat suum effectum *ex se sola*, sed primo et principaliter ex virtute agentis supremi, quae : a) est complementum agentis inferioris; b) et invenitur *ex se* productiva effectus quasi causa immediata. (III. C. Gent. cap. 70.)

QUARTO : *Quia liberum arbitrium creatum est ad utrumlibet ex parte sui.* Quod profecto in imperfectionem virtutis redundat; quoniam est indifferentia potentialis, et importat transmutationem seu transitum de potentia in actum, quotiescumque de novo incipit eligere. Quapropter indiget moveri et transmutari per aliquid activum, quod est semper in actu, nempe Deum, qui solus potest operari in libero arbitrio et

immutare voluntatem multo amplius quam voluntas immutat seipsam.

QUINTO : *Quia liberum arbitrium creatum perficitur in suo esse ad utrumlibet ex parte objecti, quod pertinet ad eminentiam suae operativae virtutis, per ipsam divinam motionem.* 1<sup>o</sup> Quia magis repugnaret divinae motioni, si voluntas ex necessitate moveretur, quod suae naturae competit, quam si moveretur libere, prout competit suae naturae (I-II. q. 10. a. 4.); 2<sup>o</sup> quia Deus movendo causas voluntarias non aufert quin actiones earum sint voluntariae, sed potius *hoc in eis facit* (I. q. 83. a. 1. ad 3.); 3<sup>o</sup> quia hoc sua omnipotentia facit, ut illud, in quod voluntas mutatur, voluntarie velit (II. Sent. dist. 25. q. 1. a. 2. ad 1.); 4<sup>o</sup> quia ex *moveri* a Deo et ex *propria virtute activa* voluntatis procedit hoc ipsum quod voluntas seipsam libere moveat, libere prorumpat in actum, libere agat.

## VI

### CONCLUSIO 5.

**De ratione entis per essentiam est, quod omne ens, quod quocumque modo est, ab illo efficiatur immediate immediatione virtutis; et de ratione entis per participationem est, quod sit effectum immediate immediatione virtutis ab ente per essentiam.**

### § 1

#### Argumenta D. Thomae.

Arg. 1<sup>um</sup>. — I. q. 44. a. 1. : « Respondeo dicendum, quod necesse est dicere omne ens, quod quocumque modo est, a Deo esse. Si enim aliquid invenitur in aliquo per participationem, necesse est quod causetur in ipso ab eo, cui essentialiter convenit; sicut ferrum fit ignitum ab igne. Ostensum est autem supra q. 3. a. 4., cum de divina simplicitate age-

retur, quod Deus est ipsum esse per se subsistens. Et iterum ostensum est q. 11. a. 3. et 4. quod esse subsistens non potest esse nisi unum; sicut si albedo esset subsistens, non posset esse nisi una, cum albedines multiplicentur secundum recipientia. Relinquitur ergo, quod omnia alia a Deo non sint suum esse, sed participant esse. Necesse est igitur omnia, quae diversificantur secundum diversam participationem essendi, ut sint perfectius vel minus perfecte, causari ab Uno Primo Ente, quod perfectissime est. » (Vide etiam I. q. 61. a. 1. et q. 65. a. 1.)

Arg. 2<sup>um</sup>. — II. C. Gent. cap. 15. : « Quod per essentiam dicitur, est causa omnium quae per participationem dicuntur, sicut ignis est causa omnium ignitorum in quantum hujusmodi. Deus autem est ens per essentiam suam, quia est ipsum esse; omne autem aliud ens est ens per participationem, quia ens, quod sit suum esse, non potest esse nisi unum, ut lib. 1. cap. 13. et cap. 42. ostensum est. Deus igitur est causa essendi omnibus aliis. »

Arg. 3<sup>um</sup>. — II. Sent. dist. 37. q. 2. a. 2. : « Alia opinio dicebat actus peccatorum nullo modo, nec etiam in quantum actus sunt, a Deo esse..., propinquissima est errori. »

1<sup>o</sup> Quia ex ea videtur sequi, quod sint plura prima principia; hoc enim est de ratione primi principii, ut agere possit sine auxilio prioris agentis et influentia ejus. Unde si voluntas humana actionem aliquam posset producere, cujus auctor Deus non esset, voluntas humana *rationem* primi principii haberet. Quamvis solvere hoc nitantur dicentes, quod voluntas, etsi per se possit actionem producere sine influentia prioris agentis, non tamen habet a se esse, sed ab alio : quod etiam exigeretur ad rationem primi principii. Sed hoc videtur inconveniens, ut quod a se esse non habet, a se *agere* possit; quod etiam per se durare non possit, quod a se non est. Omnis etiam virtus ab essentia procedit, et operatio a virtute. Unde cujus *essentia* ab alio est, oportet quod *virtus* et *operatio* ab alio sit. Et praeterea quamvis per hanc responsionem evitaretur, quod non est primum

simpliciter, non tamen possit vitari quin esset primum agens, si ejus actio in aliquid prius agens non reduceretur sicut in causam.

2º Quia cum actio peccati sit ens quoddam, non solum secundum quod privationes et negationes *entia* dicuntur, sed etiam secundum quod res in genere existentes entia sunt, eo quod ipsae actiones in genere ordinantur : sequeretur, si actiones peccati a Deo non sunt, quod aliquod ens, essentiam habens, a Deo non esset; et ita Deus non esset universalis causa omnium entium, quod est contra perfectionem Primi Entis. »

## § 2

**Oportet itaque creaturam rationalem, reduplicative ut libere agentem et ut seipsam moventem ad agendum, collocari intra illas quinque vias, quibus Deum esse probari potest. Omne ergo liberum arbitrium creatum venit necessario collocandum in :**

**Prima via,** quae sumitur ex parte motus : in qua omnia constant ex potentia et actu, tam in ordine essendi quam in ordine operandi ; in qua omne quod movetur, ab alio movetur ; in qua perinde omnia moventia movent mota, etiamsi moveant seipsa, ac de potentia reducuntur in actum per aliquod ens in actu. Unde D. Thomas *De Malo* q. 3. a. 2. : « Necesse est enim omnes motus secundarum causarum causari a primo movente, sicut omnes motus inferiorum corporum causantur a motu coeli. Deus autem est primum movens respectu omnium motuum, et spiritualium et corporalium ; sicut corpus coeleste est principium omnium motuum inferiorum corporum. Unde cum actus peccati sit *quidam motus liberi arbitrii*, necesse est dicere, quod actus peccati, in quantum est actus, sit a Deo. Sed tamen attendendum est, quod motus primi moventis non recipitur uniformiter in omnibus mobilibus, sed in unoquoque secundum proprium modum... Sic ergo dicendum, quod cum Deus sit primum principium motionis omnium, quaedam sic moventur ab ipso, quod etiam ipsa movent, sicut quae habent liberum arbitrium ; quae si fuerint in *debita dispo-*



*sitione et ordine debito* ad recipiendum motionem, quæ moventur a Deo, sequentur bonæ actiones, quæ *totaliter* reducuntur in Deum sicut in causam. Si autem *deficiant a debito ordine*, sequetur actio inordinata, quæ est actio peccati; et sic id, quod est ibi de *actione*, reducetur in Deum sicut in causam; quod autem est ibi de *inordinatione* vel *deformitate*, non habet Deum causam, sed solum liberum arbitrium. Et propter hoc dicitur, quod actio peccati est a Deo, sed peccatum non est a Deo. » Attamen nulla est involuntate debita dispositio, quam Deus ipse non fecerit, nec ullus debitus ordo, cujus Deus non sit auctor; et si magnus et misericors Dominus voluerit, ita potest movere humanam voluntatem, ut omne obstaculum removeat atque omnem cordis duritiam primitus auferat, ut S. Augustinus docet *De prædest. sanct.* cap. 8. et D. Thomas tradit Hebr. 12. lect. 3. Dicendum ergo cum Angelico Doctore : a) « Sicut autem Deus est primus motor omnium, quæ naturaliter moventur, ita etiam est primus motor omnium voluntatum ». (II-II. q. 104. a. 4.) b) « Deus non eodem modo inclinat voluntatem in bonum et in malum. Inclinat siquidem voluntatem in bonum administrando virtutem agendi et directe movendo ad bonum; sed ad malum dicitur inclinare, in quantum gratiam non præbet, per quam quis a malo retraheretur; et non quod directe voluntatem in malum ordinet. » (II. Sent. dist. 37. q. 2. a. 1. ad 1.)

**Secunda via**, quæ sumitur ex ratione causæ efficientis : in qua non est possibile, quod aliquid sit causa efficiens sui quoad ipsammet causalitatem et efficientiam; in qua primum est causa medii, et medium est causa ultimi, sive media sint plura sive unum tantum; in qua proinde causalitas omnium causarum, etiam libere agentium, completur per virtutem causæ efficientis primæ, quæ non habet causam. In hac siquidem via bonæ actiones totaliter reducuntur in Deum : quoniam « Deus dicitur causa bonarum operationum non solum quantum ad essentiam actus, sed etiam quantum ad perfectionem, secundum quam bonæ dicuntur; utrumque

enim agenti influit, et *ut agat et ut bene agat.* » (II. Sent. dist. 37. q. 2. a. 2. ad 3.) Sed in malis actionibus quamvis Deus sit causa earum quantum ad essentiam, non tamen est causa quantum ad defectum. « Et ideo non oportet, ut ad malum cooperari dicatur, quamvis actionis illius causa sit, in qua malum consistit, secundum quod influit agenti *esse, posse et agere*, et quidquid perfectionis in agente est. » (Ibid. ad 2. 1.)

<sup>1</sup> S. AUGUSTINUS VII. Confess. cap. 3. et cap. 5. quaerit : « Unde igitur mihi malum velle et bonum nolle, ut esset cur juste poenas luerem? Quis in me hoc posuit et iniecit mihi plantarum amaritudinis, cum totus fierem a dulcissimo Deo meo? Si diabolus auctor, unde ipse diabolus? Quod si et ipse perversa voluntate ex bono angelo diabolus factus est! Unde et in ipso voluntas mala, qua diabolus fieret, quando totus angelus a conditore optimo factus esset bonus? His cogitationibus deprimebar, iterum et suffocabar... Ubi ergo malum, et unde, et qua huc irrepsit? Quae radix ejus? » Postea, XII. De Civit. Dei cap. 7. concludit non esse quaerendam *causam efficientem* malae voluntatis : « Nemo igitur (inquit) quaerat efficientem causam malae voluntatis; non enim est efficiens, sed *deficiens*; quia nec illa *effectio* est, sed *defectio*. Deficere namque ab eo quod summe est, ad id quod minus est, hoc est incipere habere voluntatem malam. Causas porro defectionum istarum, cum efficientes non sint, ut dixi, sed deficientes, velle invenire, tale est ac si quisquam velit videre tenebras vel audire silentium. »

D. THOMAS II. Sent. dist. 44. q. 1. a. 1. : « Cum potentia voluntatis humanae sit per se ordinata ad bonum, *defectus* a bono in actu ejus oportet quod causetur ex *aliquo defectu* in ipsa, per quem ab aliquo vinci potest, vel delectatione, vel suggestionem, vel quocumque alio, ut ab eo quod est *naturale* sibi, ad id quod est *innaturale* trahatur. Hic autem defectus est secundum quod *ex nihilo est*. Hujusmodi autem defectus, sc. quod creatura ex nihilo sit, Deus directe causa non est...; quia quod convenit rei secundum se, non causatur in eo ex alio. Res autem creata, si sibi relinquatur, *nihil est* : unde hoc, quod est *ex nihilo esse*, non est creaturae a Deo, quamvis *esse* creaturae a Deo sit... Sic ergo potentia peccandi, quantum ad id quod potentiae est, a Deo est; sed quantum ad defectum, qui implicatur, non est a Deo. » Et De Malo q. 3. a. 2. ad 2. : « Dicendum, quod *deformitas peccati* non consequitur speciem actus secundum quod est in *genere naturae*; sic autem a Deo causatur; sed consequitur speciem actus secundum quod est moralis, *prout causatur* ex libero arbitrio. » Et ibid. a. 3. ad 5. : « Voluntas cum

**Tertia via**, quae sumitur ex contingenti et necessario : in qua omnia incipiunt esse et operari, atque operari et esse desinunt; in qua omnia quandoque sunt in potentia, quandoque in actu; et cum sint in actu, quandoque actualiter agunt, quandoque vero sunt agentia in potentia

sit ad utrumlibet, per aliquid *determinatur ad unum*, sc. *per consilium rationis*. » Et ad 11. : « Dicendum, quod Deus est universale principium cujuslibet consilii et voluntatis et actus humani, sicut supra (in c. a.) dictum est; sed quod *error* et *peccatum* et *deformatitas* accadat in *consilio*, *voluntate* et *actione humana*, hoc provenit ex defectu hominis. Nec oportet hujus aliam extrinsecam causam assignare. »

BOSSUET autem, vestigia S. Augustini et D. Thomae premens, sic utriusque Doctoris doctrinam solide evolvit: *Traité du libre arbitre*, chap. 11. : « Et si on demande par où le mal peut trouver entrée dans la créature raisonnable, au milieu de tant de biens que Dieu y met, il ne faut que se souvenir qu'elle est libre, et *qu'elle est tirée du néant*. Parce qu'elle est libre, elle peut bien faire; et parce qu'elle est tirée du néant, elle peut faillir : car il ne faut pas s'étonner que venant, pour ainsi dire, et *de Dieu et du néant*, comme elle peut par sa volonté s'élever à l'un, elle puisse aussi par sa volonté retomber dans l'autre, faute d'avoir tout son être, c'est-à-dire, toute sa droiture. Or, le manquement volontaire de cette partie de sa perfection, c'est ce qui s'appelle péché, que la créature raisonnable ne peut jamais avoir que d'elle-même; parce que telle est l'idée du péché, qu'il ne peut avoir pour sa cause qu'un *être libre tiré du néant*.

Telle est la cause du péché, si toutefois le péché peut avoir une véritable cause. Mais, pour parler plus proprement, comme *le néant* n'en a point, le péché, qui est un défaut et *une espèce de néant*, n'en a point aussi; et comme si la créature n'est rien d'elle-même, c'est de son propre fond, et non pas de Dieu, qu'elle a cela; elle ne peut aussi avoir que d'elle-même, et d'être *capable de faillir* et de *faillir en effet* : mais elle a le premier nécessairement, et le second librement; parce que Dieu l'ayant trouvée capable de faillir par sa nature, la rend capable de bien faire par sa grâce.

Ainsi, nous avons fait voir, qu'à la réserve du péché, qui ne peut, par son essence, être attribué qu'à la créature, tout le reste de ce qu'elle a dans son fond, dans sa liberté, dans ses actions, doit être attribué à Dieu; et que la volonté de Dieu, qui fait tout, bien loin de rendre tout nécessaire, fait au contraire, dans le nécessaire aussi bien que dans le libre, ce qui fait la différence de l'un et de l'autre. »

lantum; et in qua proinde omnia quae sunt, sive necessaria sive contingentia, et similiter omnia quae operantur, sive necessario sive contingenter et libere, habent causam sui *esse* et sui *operari* et sui quoque *modi* operandi. In hac siquidem via suum proprium locum habent omnia libere agentia creata; quoniam omnis voluntas creata incipit velle aliquid, quod prius non volebat; et quotiescumque de novo incipit eligere, transmutatur a sua priori dispositione et transit de potentia eligendi ad actum electionis; et quantumvis voluntas ad aliquid sufficienter se moveat et in suo ordine, sc. sicut agens proximum, sed non potest se movere quantum ad omnia, et indiget moveri ab alio sicut ab exteriori agente sc. Deo, a quo omne agens accipit omnia : 1<sup>o</sup> hoc ipsum, quod est, et modum essendi; 2<sup>o</sup> hoc ipsum, quod potest, et modum potentiae; 3<sup>o</sup> hoc ipsum, quod potentia applicatur ad agendum; 4<sup>o</sup> et hoc ipsum, quod agit, et modum agendi. Unde D. Thomas I. q. 19. a. 3. ad 5. : « Causa, quae ex se contingens, oportet quod determinetur ab aliquo exteriori ad effectum. Sed voluntas divina, quae *ex se necessitatem* habet, determinat seipsam ad volitum, ad quod habet habitudinem non necessariam. » Ac *De Verit.* q. 24. a. 14. : « Sed voluntas hominis non est determinata ad aliquam unam operationem, sed se habet indifferenter ad multas; et sic quodammodo est in *potentia*, nisi mota per aliquid activum; vel quod ei exterius repraesentatur, sicut est bonum apprehensum; vel quod in ea interius operatur, sicut est ipse Deus. » Quapropter omnis libera voluntas creata habet causam supremam suae propriae determinationis aliunde, videlicet a voluntate divina, quae ex se necessitatem habet et ex se sola determinat seipsam ad volitum; et cum sit actus purus, semper est in actu volendi. (I-II. q. 9. a. 4. ad 3. et q. 10. a. 1. ad 2. et a. 4.)

**Quarta via**, quae sumitur ex gradibus, qui in rebus inveniuntur : in qua invenitur aliquid magis et minus bonum et verum et nobile, et ideo etiam aliquid liberum magis et minus excellens. Etenim, ut D. Thomas docet I. q. 59. a. 3. :



« Ubicumque est intellectus, est liberum arbitrium. Et sic patet liberum arbitrium esse in angelis etiam excellentius quam in hominibus, sicut et intellectum. » Et rursus ibid. q. 62. a. 8. ad 3. : « Quod liberum arbitrium diversa eligere possit, servato ordine finis, hoc pertinet ad perfectionem libertatis ejus. Sed quod eligat aliquid, divertendo ab ordine finis, quod est peccare, hoc pertinet ad defectum libertatis. Unde major libertas arbitrii est in angelis qui peccare non possunt, quam in nobis qui peccare possumus. » Igitur per hanc viam ascendere oportet usque ad aliquid maxime bonum, maxime verum, maxime liberum, quod est causa essendi omnibus quae sunt, et causa agendi omnibus quae libere agunt; nimirum usque ad Deum, qui cum sit per suam essentiam libere agens, idcirco est causa esse, bonitatis, libertatis et cujuslibet perfectionis omnibus libere agentibus per participationem. Hoc est, quod D. Thomas expresse tradit I-II. q. 79. a. 2. : « Omne enim ens, quocumque modo sit, oportet quod derivetur a primo ente. Omnis autem actio causatur ab aliquo existente in actu; quia nihil agit nisi secundum quod est actu. Omne autem ens actu reducitur in primum actum, sc. Deum, sicut in causam, qui est per suam essentiam *actus*. Unde relinquitur, quod Deus sit causa omnis actionis in quantum est actio. »

**Quinta via**, quae sumitur ex gubernatione rerum, et in qua omnia agunt propter finem, et operantur, ut consequantur id quod est *optimum*. In hac igitur via omnia tendunt in finem, directa a primo cognoscente et intelligente, sicut sagitta a sagittante; etiam creaturae rationales, quarum est proprium ut tendant in finem, quasi se agentes vel ducentes ad finem (I-II. q. 1. a. 2.). Etenim : 1<sup>o</sup> « Operatio illius agentis, qui per se agit, oportet ut in primum agens sicut in causam reducatur; quamvis enim hujusmodi entia per se agant, quia per propriam naturam et proprium iudicium *actus suos determinant*, non tamen a se habent quod agant, sed a primo agente, quod eis et *esse* et *posse* et *agere* confert. » (II. Sent. dist. 37. q. 1. a. 2. ad 5.)

2º « Sub Deo autem, qui est primus intellectus et volens, ordinantur omnes intellectus et voluntates sicut instrumenta sub principali agente... Anima nostra operatur sub Deo sicut agens instrumentale sub principali agente... Anima humana ordinatur sub Deo sicut particulare agens sub universali. Impossibile est ergo esse aliquem rectum motum in ipsa quem non praeveniat actio divina. Unde et Dominus Joh. 15, 5 dicit : *Sine me nihil potestis facere.* » (III. C. Gent. cap. 147. et 149.) 3º « Ad illud autem, ad quod non potest aliquid virtute suae naturae pervenire, oportet quod ab alio transmittatur, sicut sagitta a sagittante mittitur in signum. Unde proprie loquendo, rationalis creatura, quae est capax vitae aeternae, perducitur in ipsam quasi a Deo transmissa... Praedestinatio est quaedam ratio ordinis aliquorum in salutem aeternam, in mente divina existens. Executio autem hujus ordinis est *passive* quidem in praedestinis, *active* autem est in Deo. Est autem executio praedestinationis *vocatio* et *magnificatio*, secundum illud Apostoli Rom. 8, 30 : *Quos praedestinavit, hos et vocavit; et quos vocavit, hos et magnificavit.* » (I. q. 23. a. 1. et 2.)

Oportet igitur operationes creaturae rationalis, reduplicative ut agit per liberum arbitrium, quod est facultas voluntatis et rationis, reduci immediate immediatione virtutis in ipsum Deum, sicut in primum movens et primum agens et primum intelligens et primum volens. Unde D. Thomas I. q. 2. a. 3. ad 2. : « Etiam quae ex proposito fiunt, oportet reducere in aliquam altiore causam, quae non sit ratio et voluntas humana; quia haec mutabilia sunt et defectibilia. Oportet omnia mobilia et deficere possibilia, reduci in aliquod primum principium immobile et per se necessarium. » Hoc autem est Deus, qui est intellectus secundum totam suam naturam, cujus intelligere est fixum et quietum absque discursu, et cujus intellectus est semper in actu existens et totaliter perfectus intelligentia veritatis. (*De spirit. creat.* q. unica a. 10. 1.)

<sup>1</sup> BOSSUET, *Traité du libre arbitre*, chap. 8. cujus titulus est :

« Quatrième et dernier moyen pour accorder notre liberté avec les décrets de Dieu : la *prémotion* et la *détermination physique*. Elle sauve parfaitement notre liberté et notre dépendance de Dieu » ; postquam exposuit doctrinam Thomistarum circa hanc materiam, concludit his verbis valde notandis : « Au reste, le fondement principal de toute cette doctrine est si certain, que toute l'école en est d'accord. Car, comme on ne peut poser qu'il y ait un Dieu, c'est-à-dire, une cause première et universelle, sans croire en même temps qu'elle ordonne tout, et qu'elle fait tout immédiatement, de là vient qu'on a établi un concours immédiat de Dieu, qui atteint en particulier toutes les actions de la créature, même les plus libres : et le peu de théologiens qui s'opposent à ce concours, sont condamnés de témérité par tous les autres. Mais si on embrasse ce sentiment pour sauver la *notion de cause première*, il la faut donc sauver en tout ; c'est-à-dire que, dès qu'on nomme la cause première, *il faut la faire partout aller devant* ; et si on songe à l'accorder avec son effet, il faut fonder cet accord sur ce qu'elle est cause, et cause encore qui, n'agissant pas avec une impétuosité aveugle, ne fait ni plus ni moins qu'elle veut : ce qui fait qu'elle ne craint pas de prévenir son effet en tout et partout ; parce que, assurée de sa propre vertu, elle sait qu'ayant commencé, tout suivra précisément comme elle l'a ordonné, sans qu'elle ait besoin pour cela de consulter autre chose qu'elle même.

Tel est le sentiment de ceux qu'on appelle *Thomistes* : voilà ce que veulent dire les plus habiles d'entre eux, par ces termes de *prémotion* et *prédétermination physique*, qui semblent si rudes à quelques-uns ; mais qui, étant entendus, ont **un si bon sens** ! Car enfin ces théologiens conservent dans les actions humaines l'idée tout entière de la liberté, que nous avons donnée au commencement ; mais ils veulent que l'exercice de la liberté, ainsi défini, ait Dieu pour cause première, et qu'il l'opère non seulement par les attrait qui le précèdent, mais encore dans ce qu'il a de plus intime : ce qui leur paraît d'autant plus nécessaire, qu'il y a plusieurs actions libres, comme il a été remarqué, où nous ne sentons aucun plaisir, ni aucune suavité, ni enfin aucune autre raison qui nous y porte, que notre seule volonté : ce qui ôterait ces actions à la Providence, et même à la prescience divine, selon les principes que nous avons établis, si on ne reconnaissait que Dieu atteint, pour ainsi parler, toute action de nos volontés dans son fond, donnant immédiatement et intimement à chacune tout ce qu'elle a d'être. » Hactenus Bossuet.

## EPILOGUS

---

PRIMO : **Quare physica praemotio sit necessaria.** — D. Thomas II. *Sent.* dist. 37. q. 1. a. 2. : « Ens invenitur in pluribus secundum prius et posterius. Illud tamen verissime et primo dicitur *ens*, cujus *esse* est ipsum quod est ; quia *esse* ejus non est receptum, sed per se subsistens. In omnibus autem, quae secundum prius et posterius dicuntur, primum eorum, quae sunt, potest esse causa, et per se dictum, est causa ejus quod per participationem dicitur ; et ideo oportet, quod illud *ens*, quod non per participationem alicujus *esse*, quod sit aliud quam ipsum, dicitur *ens*, quod primum inter entia est, sit causa omnium aliorum entium. Alia autem entia dicuntur per posterius, in quantum aliquod *esse* participant, quod non est idem quod ipsa sunt ; et haec procedunt usque ad ultima entium, ita quod quaecumque rationem essendi aliquid habeat, non sit sibi nisi a Deo, sed defectus essendi sit ei a seipso. »

III. C. *Gent.* cap. 66. : « Ultimum in bonitate et perfectione inter ea, in quae potest agens secundum, est illud, in quod potest ex virtute agentis primi ; nam complementum virtutis agentis secundi est ex virtute agentis primi. Quod autem est in omnibus agentibus perfectissimum, est *esse* ; quaelibet enim natura vel forma perficitur per hoc, quod est actu, et comparatur ad *esse* in actu sicut potentia ad actum ipsum. Igitur *esse* est quod agentia secunda agunt in virtute primi agentis. »

*De Pot.* q. 3. a. 7. ad 7. : « Dicendum, quod virtus naturalis, quae est rebus naturalibus in sua institutione collata,



inest eis ut quaedam forma habens esse ratum et firmum in natura. Sed id, quod a Deo fit in re naturali, quo actualiter agat, est ut intentio<sup>1</sup> sola, habens esse quoddam incompletum per modum, quo colores sunt in aëre, et virtus artis in instrumento artificis. Sicut ergo securi per artem dari potuit acumen, ut esset forma in ea permanens, non autem ei dari potuit, quod *vis artis* esset in ea quasi quaedam forma permanens, nisi haberet intellectum : ita rei naturali potuit conferri virtus propria ut forma in ipsa permanens, non autem *vis*, qua agit ad *esse* ut instrumentum primae causae, nisi daretur ei quod esset universale essendi principium; nec iterum virtuti naturali conferri potuit, ut moveret seipsam nec ut conservaret se in esse. Unde sicut patet, quod instrumento artificis conferri non potuit quod operaretur absque motu artis, ita rei naturali conferri non potuit quod operaretur absque operatione divina. »

**SECUNDO : In quo fundetur processus philosophicus, quo D. Thomas pervenit ad concludendum physicam praemotionem esse necessariam.** — Fundamentum hujusce scientifici processus positum fuit ab Angelico Doctore in opusculo *De Ente et Essentia* et I. q. 3. a. 4. et I. C. Gent. cap. 22. et II. C. Gent. cap. 52. et 53.; atque in hoc nimirum consistit, quod : a) « hoc, quod est *esse*, sit substantia vel natura Dei. » (*De Pot.* q. 7. a. 2.) b) « In substantia autem intellectuali creata inveniuntur *duo*, sc. substantia ipsa et *esse* ejus, quod non est ipsa substantia; ipsum autem *esse* est complemen-

<sup>1</sup> « Virtus instrumenti, in quantum hujusmodi, secundum quod agit ad effectum ultra id, quod competit sibi secundum suam naturam, non est *ens completum, habens esse fixum in natura*, sed *quoddam ens incompletum*, sicut est virtus immutandi visum in aëre, in quantum est instrumentum motum ab exteriori visibili; et hujusmodi *entia* consueverunt *intentiones* nominari, et habent aliquid simile cum ente, quod est in anima, quod est ens diminutum, ut dicitur VI. *Metaph.* Et quia sacramenta non faciunt effectum spirituales nisi in quantum sunt instrumenta, ideo virtus spiritalis est in eis non quasi *ens fixum*, sed sicut *ens incompletum*. » (D. Thomas IV. *Sent.* dist. 1. q. 1. a. 4. solut. 2.)

tum substantiae existentis. » (II. C. Gent. cap. 53.) Sive quod : « Solus Deus est suum *esse*; in omnibus autem aliis differt essentia rei et esse ejus, ut ex superioribus patet, q. 3. a. 4. » (I. q. 61. a. 1.) En lapidem angularem integrae controversiae ! D. Thomas enim ascendens per illas quinque vias, quibus Deum esse demonstrative probat (I. q. 2. a. 3.), ostendit necessitatem deveniendi usque ad primum movens, quod a nullo movetur, et usque ad primam causam efficientem, quae non habet causam sui *esse*. Deinde q. 3. a. 4. demonstrat *identitatem* esse et essentiae pertinere ad veram notionem primi motoris immobilis et primae causae non causatae. Postea vero ex hoc, quod in Deo non est aliud esse et aliud essentia ejus, infert atque declarat divinas perfectiones, quas inter emicat summa unitas Divini Esse. Exinde ex hoc, quod Esse Subsistens non potest esse nisi unum, pervenit ad has supremas ac fundamentales conclusiones, quarum :

1. Necesse est dicere et angelos et omne id, quod praeter Deum est, a Deo creata esse. Necesse est ergo esse unum essendi principium, a quo *esse* habeant quaecumque sunt quocumque modo ; sive sint invisibilia et spiritualia, sive sint visibilia et corporalia. (I. q. 44. a. 1. ; q. 61. a. 1. ; q. 65. a. 1.)

2. Necesse est dicere et secundum fidem et secundum rationem, quod creaturae conservantur in esse a Deo. (I. q. 103. a. 1.)

3. Necesse est dicere, quod nec in angelo nec in aliqua creatura virtus vel potentia operativa est idem quod sua *essentia* ; nec actio angeli est ejus *esse*, nec actio alicujus creaturae ; et quod in solo Deo sua substantia est suum esse et suum agere. (I. q. 54. a. 1., 2. et 3.)

4. Necesse est dicere, quod Deus non solum dat formas rebus, sed etiam conservat eas in esse, et applicat eas ad agendum, et est finis omnium actionum ; et quod omnia agunt in virtute ipsius Dei. (I. q. 105. a. 5. et 6.)

5. Necesse est dicere, quod Deus est causa operandi omnibus operantibus, et ipse est, qui operatur in omni operante tam per naturam quam per voluntatem ; et quod producit aliquid in esse, hoc facit in quantum agit in virtute.

Dei; et quod hujusmodi *vis*, qua omnes causae secundae agunt ad *esse* ut instrumenta primae causae, non potest conferri causis secundis per modum permanentis, nisi daretur eis quod essent *universale essendi principium*. (III. C. Gent. cap. 66. et 67.; De Pot. q. 3. a. 7.)

Unum igitur et idem est fundamentum scientificum in philosophia D. Thomae : a) ad demonstrandam veritatem creationis omnium rerum; b) ad ostendendam necessitatem conservationis; c) et ad inferendam necessitatem physicae praemotionis.

**TERTIO : Quod quid est physicae praemotionis.**—Physica ergo praemotio sic ad litteram notificatur ab Angelico Doctore :

1<sup>o</sup> Illud, sine quo voluntas humana agens rationem primi principii haberet; et quamvis evitaretur quod non est primum simpliciter, non tamen possit vitari quin esset primum agens. (II. Sent. dist. 37. q. 2. a. 2.)

2<sup>o</sup> Id, quod a Deo fit in re naturali, quo actualiter agat, habens *esse* quoddam incompletum per modum quo colores sunt in aëre et virtus artis in instrumento artificis. (De Pot. q. 3. a. 7. ad 7.)

3<sup>o</sup> Applicatio virtutis in omni operante per naturam vel per voluntatem, facta primo et principaliter a Deo ad operationem. (III. C. Gent. cap. 67.)

4<sup>o</sup> Complementum virtutis agentis secundi ex virtute agentis primi. (III. C. Gent. cap. 66.)

5<sup>o</sup> Virtus divina per modum transeuntis, qua homo virtute sibi data per modum permanentis uti potest. (III. C. Gent. cap. 89.)

6<sup>o</sup> Motio divina, sine qua creatura rationalis, quantumvis perfecta ponatur, non potest procedere in suum actum. (I-II. q. 109.)

7<sup>o</sup> Virtus primi agentis, qua virtus agentis secundi conjungitur cum suo proprio effectum, quem virtus agentis supremi producit immediatius et attingit intimius, et in quem ingreditur vehementius quam ipsa virtus secundi agentis. (III. C. Gent. cap. 70.; de Pot. q. 3. a. 7.)

8º Illud, quo causa prima adjuvat causam secundam faciens eam operari, et quo « virtus causae superioris est *virtus* virtutis causae inferioris ». (*De Causis* lect. 1. et 9.)

9º Vis, qua omne agens agit ad esse ut instrumentum primae causae; et quae conferri non potest causae secundae ut forma in ipsa permanens, nisi daretur ei quod esset universale essendi principium. (*De Pot.* q. 3. a. 7. ad 7.)

**QUARTO : Triplex modus, quo Deus exercet suam virtutem movendo creaturam rationalem.** — D. Thomas in opusc. <sup>1</sup> *De rationibus fidei* cap. 6. hunc triplicem modum sic profunde atque eleganter describit : « Est autem virtus Dei infinita, cui omnis creatura subicitur, et unaquaque utitur pro suo arbitrio; non autem eis uteretur, nisi aliquo modo per efficaciam suae virtutis uniretur eis. Tanto autem alicui naturae perfectius unitur, quando in ea magis suam virtutem exercet. »

*Primus modus movendi* : « Inter omnes siquidem creaturas virtutem suam exercet quantum ad hoc, quod omnibus esse largitur et ad proprias operationes movet; et secundum hoc quodam communi modo in omnibus rebus dicitur esse. »

*Secundus modus movendi* : « Sed specialiori quodam modo virtutem suam exercet in mentibus sanctis, quas non solum in esse conservat et ad operandum movet, sicut et alias creaturas; sed etiam eas convertit ad se cognoscendum et amandum. Unde etiam sic in sanctis mentibus specialiter dicitur habitare, et mentes sanctae Deo plenae esse dicuntur. »

*Tertius ac supremus modus movendi* : « Quia ergo secundum quantitatem virtutis, quam Deus exercet in creaturam, magis et minus dicitur creaturae uniri, patet, quod cum efficacia divinae virtutis humano intellectu comprehendere non possit, sublimiori modo Deus potest creaturae uniri quam intellectus humanus capere possit. Quodam ergo incomprehensibili et ineffabili modo dicimus Deum unitum esse humanae naturae in Christo non solum per inhabitatio-

<sup>1</sup> Opusc. 2. edit. Vivès; opusc. 3. edit. Rom.



nem sicut in aliis sanctis, sed quodam modo singulari, ita quod humana natura esset quaedam Filii Dei natura; ut Filius Dei, qui ab aeterno habet naturam divinam a Patre, ex tempore per assumptionem mirabilem habeat humanam naturam ex genere nostro; et sic quaelibet partes humanae naturae, ipsius Filii Dei dici possunt; et quidquid agit vel patitur quaelibet pars naturae humanae in Filio Dei, potest attribui Unigenito Dei Verbo. Unde non inconvenienter dicimus animam et corpus esse Filii Dei, sed et oculos et manus; et quod Filius Dei corporaliter videat per oculi visionem et audit per aures auditum, et sic de aliis, quae partibus animae vel corporis convenire possunt. »

**QUINTO : Secundum quantitatem virtutis, quam Deus exercet in creaturam rationalem, magis et minus Deus dicitur creaturae uniri, et ipsa rationalis creatura magis et minus ut instrumentum Dei dicitur bona opera operari.** — Etenim omnes creaturae, etiam libero arbitrio praeditae, sunt instrumenta Dei; et Deus, qui per suam physicam motionem confert omnibus creaturis rationalibus posse virtute sibi data uti, utitur etiam unaquaque rationali creatura pro suo arbitrio; et eatenus creaturis utitur, quatenus per efficaciam suae virtutis unitur eis; et tanto perfectius eis unitur, quanto in eas magis suam virtutem exercet. Unde :

1<sup>o</sup> Juxta communem primum modum, quo Deus exercet virtutem suam in omnes creaturas, quatenus omnibus dat esse, et virtutem operandi, et ad proprias operationes movet, Deus dicitur esse in omnibus et intime per essentiam, praesentiam et potentiam; et motio, qua creatura rationalis movetur ad operandum, pertinet ad ordinem generalem divinae providentiae; et ita Deus omnes homines diligit et etiam omnes creaturas, in quantum omnibus vult aliquod bonum. Per divinam enim providentiam homines in vitam aeternam ordinantur; sed pertinet etiam ad divinam providentiam, ut permittat aliquos ab isto fine deficere. (I. q. 8. a. 1., 2. et 3. et q. 23. a. 3.)

2<sup>o</sup> Juxta specialiores autem modum, quo Deus virtutem

suam exercet in creaturam rationalem non solum movendo ad proprias operationes, sed etiam eam convertendo ad se cognoscendum et amandum, creatura rationalis convertitur ad Deum sicut ad specialem finem, quem intendit et cui cupit adhaerere sicut bono proprio; atque hujusmodi motio pertinet ad ordinem praedestinationis, quae est pars providentiae respectu eorum, qui divinitus ordinantur in aeternam salutem; hominum namque justorum quodam excellentiori modo Deus habet providentiam quam impiorum, in quantum non permittit contra eos evenire aliquid, quod finaliter impediatur salutem eorum. Secundum hoc dicitur Deus in sanctis mentibus specialiter habitare, quia sola gratia facit singularem modum essendi Deum in rebus. Motio vero, qua Deus convertit sic hominem ad se, est intrinsece efficax; nam quod homo convertatur ad Deum, hoc non potest esse nisi Deo ipsum convertente. Est ergo illa motio, qua rationalis creatura, quae est capax vitae aeternae, perducitur in ipsam quasi a Deo transmissa. Atque intra istum secundum modum divinae motionis adhuc inveniuntur diversi gradus perfectionis in movendo, quibus diversimode justus crescit sicut lux usque ad perfectum diem, crescit in fide, spe et caritate, quousque cupit dissolvi et esse cum Christo, ac pervenit ad gloriam, quae est gratia consummata. (I. q. 8. a. 3. ad 4.; q. 22. a. 2. ad 4.; q. 24. a. 1., 3. et 4.; I-II. q. 109. a. 6.; II-II. q. 24. a. 7., 8. et 9.)

3<sup>o</sup> Juxta illum denique singularissimum atque ineffabilem modum, quo humana natura in Christo assumpta est a Filio Dei in unitatem personae, « humana natura in Christo existit in persona Verbi »; « anima in Christo non acquirit *proprium esse* humanae naturae, sed Filio Dei acquirit respectum secundum *suum esse* ad naturam »; et « humanitas unitur in esse divino prout est personae »: ita quod « illud *esse* aeternum Filii Dei, quod est divina natura, fit *esse* hominis, in quantum humana natura assumitur a Filio Dei in unitatem personae »; atque ideo in Christo est tantum *unum esse*. (III. q. 2. a. 2. ad 2. et ad 3.; q. 17. a. 2.; III. Sent. dist. 6. q. 2. a. 2.) Quapropter gratia habitualis Christi intelli-

gitur ut consequens ad hanc unionem, sicut splendor solem ; et humana natura in Christo assumpta est ut instrumentaliter operaretur ea, quae sunt operationes propriae solius Dei, sicut est sanctificare nos per gratiam et nos introducere in perfectionem vitae aeternae. Anima enim Christi, secundum quod est instrumentum Verbi sibi uniti, habet instrumentalem virtutem ad omnes immutationes miraculosas faciendas, ordinabiles ad Incarnationis finem, qui est *instaurare omnia sive quae in coelis sive quae in terris sunt*. Christus, secundum quod homo, est praedestinatus esse Filius Dei ; praedestinatio hominis Christi est altior quam praedestinatio aliorum electorum, sicut est altior unio ad Deum secundum esse personale quam unio secundum *operari* per gratiam et per gloriam dumtaxat. Et praedestinatio Christi est causa nostrae praedestinationis, quatenus Deus praeordinavit nostram salutem, ab aeterno praedestinando, ut per Jesum Christum compleretur. (III. q. 13. a. 2. et q. 24. a. 4.)

*In principio erat Verbum, et Verbum erat apud Deum, et Deus erat Verbum... Et Verbum caro factum est, et habitavit in nobis ; et vidimus gloriam ejus, gloriam quasi Unigeniti a Patre, plenum gratiae et veritatis... Et de plenitudine ejus nos omnes accepimus, et gratiam pro gratia. Quia lex per Moysen data est, gratia et veritas per Jesum Christum facta est.* (Joh. cap. 1.)

*Pater sancte, serva eos in nomine tuo, quos dedisti mihi ; ut sint unum sicut et nos... Sanctifica eos in veritate... Et ego claritatem, quam dedisti mihi, dedi eis : ut sint unum, sicut et nos unum sumus. Ego in eis, et tu in me : ut sint consummati in unum... Pater, quos dedisti mihi, volo ut ubi sum ego, et illi sint mecum : ut videant claritatem meam, quam dedisti mihi... Et notum feci eis nomen tuum, et notum faciam : ut dilectio, qua dilexisti me, in ipsis sit, et ego in ipsis.* (Joh. cap. 17.)

*Decebat enim Eum, propter quem omnia et per quem omnia, qui multos filios in gloriam adduxerat, auctorem salutis eorum per passionem consummare. Qui enim sanctificat et qui sanctificantur, ex uno omnes.* (Hebr. cap. 2.)

**SEXTO : Deus ergo, cujus natura est ipsa essentia bonitatis, dat nobis et ut simus, et ut boni simus, et ut in bono perseverantes perveniamus ad supremam divinae bonitatis participationem.** — Misericordias Domini eloquentem audiamus Augustinum, Doctorem gratiae, cujus aurea verba constituent totius *concordiae* finem atque coronam : a) « Denique (inquit) attendens omnia bona quaecumque habere possumus, sive in natura, sive in instituto, sive in ipsa conversatione, in fide, in spe, in caritate, in bonis moribus, in justitia, in timore Dei, totum non esse nisi ex illius donis, ita concludit (Propheta) : *Deus meus, misericordia mea!* Non invenit impletus bonis Dei, quid appellaret Deum suum, nisi misericordiam suam ! O nomen, sub quo nemini desperandum est ! Deus meus, inquit, misericordia mea ! Quid est *misericordia mea* ? Si dicas : *salus mea*, intelligo quia dat salutem. Si dicas : *refugium meum*, intelligo quia confugis eum. Si dicas : *fortitudo mea*, intelligo qui dat tibi fortitudinem. *Misericordia mea!* quid est ? Totum quidquid sum, de misericordia tua est. Sed promerui Te, invocando Te ? Ut essem, quid feci ? Ut essem qui te invocarem, quid egi ? Si enim egi aliquid ut essem, jam eram antequam essem. Porro si omnino nihil eram, antequam essem, nihil te promerui ut essem. Fecisti, *ut essem* ; et non tu fecisti *ut bonus essem* ? Dedisti mihi, *ut sim* ; et potuit mihi alius dare, *ut bonus sim* ? Si tu mihi dedisti ut sim, et alius mihi dedit ut bonus sim : melior est ille qui mihi dedit ut bonus sim, quam ille qui mihi dedit ut sim. Porro quia Te nemo melior, nemo te potentior, nemo Te in misericordia largior : a quo accepi ut essem, ab illo accepi ut bonus essem. *Deus meus, misericordia mea!* » (*Enarrat. in Ps. 58.*)

b) « In altis coeli sunt ; in altis angeli sunt, Sedes, Dominationes, Principatus et Potestates : Tibi debent quod *sunt*, Tibi debent quod *vivunt*, Tibi debent quod *juste vivunt*, Tibi debent quod *beate vivunt*. Potentiam tuam et justitiam tuam usquequo ? Usque in altissima quae fecisti magnalia. Ne putes hominem solum pertinere ad gratiam Dei. Quid erat angelus antequam fieret ? qui est angelus, si deserat qui



creavit? Ergo potentiam tuam et justitiam tuam usque in altissima quae fecisti magnalia. » (*Enarrat. in Ps. 70.*)

c) « Haec est ergo tota scientia magna, hominem scire quia ipse per se nihil est; et quoniam quidquid est, a Deo est et propter Deum est. » (*Ibid.*)

Ipsi ergo Deo, cujus *substantia* est *esse*, et qui est causa essendi omnibus; qui dat omnibus vitam, inspirationem et omnia; in quo vivimus, movemur et sumus; qui trahit omnia ad se, et omnia ad se convertit, et cor hominum vertere potest quocumque voluerit: sit benedictio et honor et gloria et potestas in saecula saeculorum. Atque nostras etiam rebelles dignetur per suam misericordiam compellere voluntates <sup>1</sup>; faciatque nos crescere in gratia et in cognitione

<sup>1</sup> Ad rem BOSSUET: « Le dessein de notre Sauveur est que, contemplant ce regard secret qu'il jette sur ceux qu'il sait, et que son Père lui a donnés par un certain choix, et reconnaissant qu'il les sait conduire à leur salut éternel par des moyens qui ne manquent pas, nous apprenions, premièrement, à les demander, à nous unir à sa prière, à dire avec lui: *Préservez-nous de tout mal* (Math. 6, 13); ou, comme parle l'Eglise: Ne permettez pas que nous soyons séparés de vous; si notre volonté veut échapper, ne le permettez pas; tenez-la sous votre main, changez-la, et la ramenez à vous.

C'est donc la première chose que Jésus-Christ nous veut apprendre. Ce n'est point à nous à nous enquérir ou à nous troubler du secret de la prédestination, mais à prier. Et afin de le faire comme il faut, une seconde chose qu'il nous veut apprendre, c'est de nous abandonner à sa bonté; non qu'il ne faille agir et travailler, ou qu'il soit permis de se livrer, contre les ordres de Dieu, à la nonchalance, ou à des pensées téméraires, mais c'est qu'en agissant de tout notre cœur, il faut au-dessus de tout nous abandonner à Dieu seul pour le temps et pour l'éternité.

Mon Sauveur, je m'y abandonne; je vous prie de me regarder de ce regard spécial, et que je ne sois pas du malheureux nombre de ceux que vous haïssez, et qui vous haïront. Cela est horrible à prononcer. Mon Dieu, délivrez-moi d'un si grand mal: je vous remets entre les mains *ma liberté* malade et chancelante, et ne veux mettre ma confiance qu'en vous.

L'homme superbe craint de rendre son salut trop incertain, s'il ne le tient en sa main; mais il se trompe. Puis-je m'assurer sur moi-même? Mon Dieu! je sens que ma volonté m'échappe à chaque mo-

Domini nostri et Salvatoris Jesu Christi ; ac per intrinsecam suae divinae gratiae efficaciam ab ipso transmittamur in vitam aeternam, sicut sagitta a sagittante mittitur in signum ; et ab ipso secundum propositum suae voluntatis et vocemur, et justificemur, et glorificemur. Ipsi gloria et nunc et in diem aeternitatis. Amen.

ment ; et si vous vouliez me rendre le seul maître de mon sort, je refuserais un pouvoir si dangereux à ma faiblesse. Qu'on ne me dise donc pas que *cette doctrine de grâce et de préférence met les âmes bonnes au désespoir*. Quoi ! on pense me rassurer davantage en me renvoyant à moi-même et en me livrant à mon inconstance ? Non, mon Dieu, je n'y consens pas. Je ne puis trouver d'assurance qu'en m'abandonnant à vous. Et j'y en trouve d'autant plus que ceux à qui vous donnez cette confiance de s'abandonner tout à fait à vous, reçoivent dans ce doux instinct la meilleure marque qu'on puisse avoir sur la terre de votre bonté. Augmentez donc en moi ce désir, et faites entrer, par ce moyen, dans mon cœur, cette bienheureuse espérance de me trouver à la fin parmi ce nombre choisi. » — (BOSSUET *Méditations sur l'Evangile, La Cène, seconde partie, LXXII<sup>me</sup> Jour. Effet secret de la prière de Notre-Seigneur : Jésus-Christ toujours exaucé. Prédestination des saints.*)





# INDEX

PROLOGUS . . . . .	3
--------------------	---

## CAPUT PRIMUM

**Gratia convenienter dividitur in sufficientem et efficacem.**

<b>Praenotanda.</b> — Supra doctrinam S. Augustini et D. Thomae haec divinae gratiae divisio constituenda est. — Doctrina S. Augustini. — Doctrina D. Thomae . . . . .	5
<b>Conclusio 1.</b> — Gratia Dei convenienter dividitur in sufficientem et efficacem . . . . .	10
<b>Conclusio 2.</b> — Gratia divina, quae dicitur sufficiens, est gratia multiformis, et amplectitur intra latitudinem sui generis plurima ac diversa Dei auxilia . . . . .	13
<b>Conclusio 3.</b> — Gratia divina, accepta prout est gratia actualis, convenienter dividitur in sufficientem et efficacem . . . .	16
<b>Conclusio 4.</b> — Gratia interior, sumpta prout est motio, qua Deus physice agit in ipsam potentiam liberi arbitrii, convenienter etiam dividitur in sufficientem et efficacem . . .	19
<b>Observationes</b> circa hanc gratiae divisionem. — D. Thomas. — Johannes a S. Thoma. — Lemos. — Alvarez. — Gonet . . .	23

## CAPUT SECUNDUM

**Quomodo divisio gratiae in sufficientem et efficacem habeat fundamentum in distinctione divinae voluntatis in antecedentem et consequentem.**

<b>Praenotanda.</b> — Quaenam sint opera, in quibus ostenditur efficacia gratiae. — Gratia divina in summo suae efficaciae. — Multiplex operandi bonum salutare potentia, et undenam oriatur. — Duplex causa, quare meritum Christi non se habeat aequaliter ad omnes quantum ad efficaciam. — Quaestio dilucidanda . . . . .	29
---	----



<b>Conclusio.</b> — Divisio divinae gratiae in sufficientem et efficacem habet suum angulare fundamentum in distinctione divinae voluntatis in antecedentem et consequentem . . .	33
Ostenditur conclusio diversis rationibus . . . . .	33
Corroboratur auctoritate Romani Pontificis. — Propositiones Quesnelli. — Doctrina SS. PP. et DD. . . . .	36
Duplex quidem ordo hominum in salutem . . . . .	41
Duplex etiam voluntas Dei . . . . .	43
Duplex igitur gratia. — Doctrina S. Augustini, D. Thomae et Cajetani. — Verba Leonis XIII . . . . .	46

## CAPUT TERTIUM

## De intrinseca divinae gratiae efficacia.

<b>Praenotanda.</b> — Doctrina S. Augustini et D. Thomae circa efficaciam gratiae. — Eritne haeticum asserere : 1 <sup>o</sup> Nullam dari gratiam divinam ex se efficacem ; 2 <sup>o</sup> gratiam divinam ex se efficacem tollere aut diminuere liberum arbitrium ? — Determinatur sensus quaestionis. — Undenam oporteat quaestionem dilucidare ac definire . . . . .	51
<b>Conclusio.</b> — Gratia actualis seu gratuita motio, qua Deus movet nos ad opus salutare, id est, ad volendum et agendum bonum in ordine ad vitam aeternam, est efficax ex se, ab intrinseco sui, in ratione esse principii : hoc est, habet efficaciam non ex libero arbitrio hominis sicut a moto, sed a solo Deo ut a movente . . . . .	57
Argumenta ex ipsa Sacra Scriptura . . . . .	57
Argumenta ex doctrina S. Augustini . . . . .	67
Argumenta ex auctoritate Conciliorum atque Romanorum Pontificum. — Concilium Trident. — Andreas Vega et Dominicus Soto . . . . .	81
Argumenta ex doctrina theologica D. Thomae . . . . .	92
Argumenta ex doctrina philosophica D. Thomae circa Deum ut est Primus Motor, et Prima Causa, et Ens per essentiam, et Creator nostrae voluntatis . . . . .	109
Argumenta ex doctrina philosophica D. Thomae circa liberum arbitrium creatum, ut est causa secunda et agens per participationem, et habens rationem instrumenti sub Deo, qui est primus intellectus et primum volens. . . . .	122

## CAPUT QUARTUM

**Natura seu characteres essentialis physicae praemotionis juxta  
doctrinam D. Thomae.**

<b>Praenotanda.</b> — Nihil velle possumus nisi sit intellectum. — Causa et subjectum libertatis. — Relationes inter intel- lectum et voluntatem. — Duplex modus, quo voluntas movetur ad agendum. — Natura utriusque motionis. — Quomodo voluntas agatur per utramque motionem. — In quo consistat uterque modus agendi in potentiam volun- tatis. — Characteres essentialis physicae praemotionis . .	141
Physica praemotio est Dei motio immediata immediatione suppositi in ipsam potentiam liberi arbitrii. . . . .	147
Physica praemotio est Dei motio immediata immediatione virtutis in ipsum actum liberi arbitrii . . . . .	155
Physica praemotio est Dei motio determinans ad unum poten- tiam liberi arbitrii . . . . .	159
Physica praemotio est Dei motio faciens nos velle hoc vel illud.	168
Physica praemotio est Dei motio ad quam necessario necessi- tate infallibilitatis sequitur effectus in potentia liberi arbi- trii, qui est eligere vel consentire . . . . .	174

## CAPUT QUINTUM

**Gratia efficax, quae formaliter constituitur  
per physicam praemotionem, est aliquid physicum ac reale  
in potentia liberi arbitrii receptum.**

<b>Praenotanda.</b> — Recapitulatio doctrinae traditae. — Quomodo omnia sint a Deo in toto processu boni operis, quod pertinet ad salutem. — Conversio S. Pauli exemplar est mirificum intrinsicae efficaciae. — Omnis etiam uniuscujusque prae- destinati conversio, sicut conversio S. Pauli, habet finem et habet modum. — A Deo quippe sunt omnia, quae mediante nostra voluntate operantur in toto processu bonae atque salutaris operationis. — Quid nomine divinae motionis sit intelligendum . . . . .	178
--	-----

<b>Conclusio 1.</b> — Physica motio, et consequenter gratia efficax, est aliquid reale receptum in potentia liberi arbitrii . . .	185
<b>Conclusio 2.</b> — Physica motio, et proinde gratia efficax, est aliquid reale causatum a solo Deo in potentia liberi arbitrii.	185
<b>Conclusio 3.</b> — Physica motio, et consequenter gratia efficax, est aliquid reale causatum in potentia liberi arbitrii prius prioritate naturae et causalitatis quam ipsa operatio liberae voluntatis . . . . .	186
<b>Conclusio 4.</b> — Physica motio, et ideo gratia efficax, est aliquid reale causatum in potentia liberi arbitrii per modum impressionis transeuntis . . . . .	190
<b>Conclusio 5.</b> — Physica motio, et a fortiori gratia efficax, est aliquid reale causatum in potentia liberi arbitrii per modum actuantis, complementis ac perficientis . . . . .	192
Doctrina Aristotelis et D. Thomae circa naturam seu quidditatem motus. . . . .	194
<b>Corollaria</b> . . . . .	197

## CAPUT SEXTUM

## De diversis perfectionis gradibus in physica praemotione.

<b>Praenotanda.</b> — Sensus quaestionis. — Quot et quales sint actus voluntatis. — Actus voluntatis per comparisonem ad intellectum. — Actus voluntatis per comparisonem ad ipsam voluntatis potentiam. — Actus voluntatis per comparisonem ad objectum. — Quid significet movere seipsum .	201
<b>Conclusio 1.</b> — Eo modo, quo movetur quantum ad exercitium actus, id est, tamquam a causa efficiente actum, voluntas non movetur nisi a solo Deo sicut ab exteriori principio.	209
<b>Conclusio 2.</b> — Ad universale objectum voluntatis, quod est bonum in universali, voluntas non movet seipsam, sed a solo Deo movetur . . . . .	210
<b>Conclusio 3.</b> — Quotiescumque homo per rationem determinat se ad volendum hoc vel illud bonum, voluntas movetur etiam a Deo per modum causae efficientis . . . . .	213
<b>Conclusio 4.</b> — Cum Deus convertit hominem ad seipsum sicut ad specialem finem, propter quem homo velit omnia quaecumque vult, voluntas hominis movetur a solo Deo in huiusmodi prima conversione . . . . .	218

- Conclusio 5.** — Quotiescumque Deus movet potentiam liberi arbitrii per gratiam operantem, voluntas movetur equidem libere, sed movetur a solo Deo, absque eo quod moveat seipsam . . . . . 221
- Conclusio 6.** — Quotiescumque post justificationem homo movetur a Deo, ut auctor est gratiae, ad operandum, utendo habitibus infusis gratiae sanctificantis et caritatis ceterarumque virtutum, de lege ordinaria voluntas sub Dei gratuita motione movet etiam seipsam . . . . . 224
- Conclusio 7.** — Quotiescumque homo, habens gratiam sanctificantem ac caritatem, movetur a Deo secundum habitus infusos, qui vocantur dona Spiritus Sancti, libera hominis voluntas non movet seipsam, sed est tantum mota . . . . . 225

## CAPUT SEPTIMUM

## De distinctione divinarum motionum.

- Praenotanda.** — Primus ac supremus gradus physicae praemotionis. — Deus etenim operatur in quolibet operante, sive operatione naturae sive operatione voluntatis, secundum tria praedicta : sc. finem et agentem et formam. — Exacta adaequatio inter omnia genera divinae motionis. — Divinae motiones per comparisonem ad creaturam rationalem. — Si terminus motus est supernaturalis, supernaturale est quoque ejusdem principium. — Formae supernaturales seu virtutes infusae. — Nobilissima omnium formarum supernaturalium est caritas. — Regula ad discernendum perfectionem physicae praemotionis . . . . . 231
- De distinctione divinarum motionum in genere . . . . . 237
- Conclusio 1.** — Omnes divinae motiones convenienter reducuntur ad tria genera, videlicet : secundum rationem causae efficientis, exemplaris ac finalis . . . . . 237
- Conclusio 2.** — Aliquando per unam solam numero motionem Deus simul agit secundum rationem agentis et formae . . . . . 239
- Conclusio 3.** — Motio Dei secundum rationem formae potest dici duplex ex parte modi, quo respicit terminum ; et similiter motio Dei secundum rationem agentis potest etiam dici duplex ex parte modi, quo terminatur ad effectum . . . . . 241
- Conclusio 4.** — Motio Dei qua Deus dat creaturae virtutem operandi, et motio qua conservat virtutem operativam in esse suo, potest dici *una motio* ; et pariter, motio Dei qua



Deus applicat virtutem propriam creaturae ad agendum, et motio in cuius virtute omnis alia virtus creaturae agit, potest etiam dici <i>una motio</i> . . . . .	243
<b>Conclusio 5.</b> — Concursus simultaneus in doctrina D. Thomae nihil commune habet, quoad rem significatam, cum concursu simultaneo, quem tradit ac propugnat Molina . . . . .	243
De distinctione physicae motionis . . . . .	245
<b>Conclusio 1.</b> — Physica praemotio, considerata per respectum ad determinationem rationis, convenienter distinguitur in tres diversos gradus perfectionis . . . . .	245
<b>Conclusio 2.</b> — Physica praemotio, si consideretur per ordinem ad perfectionem mobilis, quod est facultas voluntatis et rationis, convenienter dividitur etiam in tres diversos perfectionis gradus . . . . .	246
<b>Conclusio 3.</b> — Physica praemotio, qua homo justus movetur a Deo ad meritorie operandum per usum habituum supernaturalium, tam virtutum quam donorum, convenienter dividitur in tres diversos gradus . . . . .	247
<b>Conclusio 4.</b> — Physica praemotio, si consideretur per comparisonem ad potentiam liberi arbitrii, convenienter dividitur in motum qui est <i>actus imperfecti</i> , et in motum qui est <i>actus perfecti</i> . . . . .	248
<b>Recapitulatio.</b> — Quinque gradus enumerantur. — Quomodo se habeat voluntas mota sub unaquaque motione. — Quomodo omnes gradus motionis reducuntur ad tres . . . . .	253

## CAPUT OCTAVUM

## De concordia physicae praemotionis cum libero arbitrio.

<b>Praenotanda.</b> — Documenta S. Augustini et D. Thomae in hac questione constanter servanda. — Quomodo se habeant ad invicem esse necessarium et esse liberum. — Quid sit liberum arbitrium. . . . .	259
Argumenta contra concordiam physicae praemotionis cum libero arbitrio . . . . .	270
§ 1. Difficultates sumptae ex efficacia divinae voluntatis . . . . .	271
§ 2. Difficultates sumptae ex infallibilitate divinae praescientiae . . . . .	272
§ 3. Difficultates sumptae ex ipsa natura physicae praemotionis atque ex ipsa natura liberi arbitrii . . . . .	274

<b>Conclusio.</b> — Gratia ex se efficax, qua Deus physice movet potentiam liberi arbitrii ad opera salutaria, non modo non laedit nec minuit liberum arbitrium creatum, verum etiam ipsum auget atque perficit . . . . .	276
§ 1. Argumenta ex auctoritate . . . . .	276
§ 2. Argumenta rationis . . . . .	286
<b>Solutio argumentorum in contra.</b> . . . .	292
§ 1. Solvuntur difficultates sumptae ex efficacia divinae voluntatis . . . . .	292
§ 2. Solvuntur difficultates sumptae ex infallibilitate divinae praescientiae . . . . .	293
§ 3. Solvuntur difficultates sumptae ex ipsa natura physicae praemotionis atque simul ex natura liberi arbitrii . .	295

## CAPUT NONUM

**Suprema ratio concordiae inter liberum hominis arbitrium  
et Dei motionem repetenda ex ipsa divinae voluntatis efficacia.**

<b>Praenotanda.</b> — Ponere gratiam ex se efficacem nihil aliud significat nisi gratuitam Dei motionem esse efficacem ex omnipotentia Dei moventis. — Ponere gratiam efficacem ex omnipotentia Dei moventis nihil aliud significat nisi ponere illam efficacem esse ex scientia atque Dei moventis voluntate. — De divina ista motione, involvente divinam voluntatem et divinam intentionem, quae deficere non potest, dicimus non stare quod homo simul cum illa componat contrarium dissensum. — Quaenam ergo sit ultima atque suprema ratio in concordia liberi arbitrii cum gratuita Dei motione ex se et ab intrinseco efficaci . . . . .	299
<b>Conclusio 1.</b> — Deus cognoscit motus seu actus liberi arbitrii creati, cognoscendo seipsum ut primam efficientem causam respectu omnium motuum liberae voluntatis creatae. . . .	304
<b>Conclusio 2.</b> — Voluntas Dei est adeo efficax et perfecta in causando motus voluntatis, ut non solum conferat libero arbitrio creato ut agat, verum etiam ut libere et bene agat. . . .	311
<b>Conclusio 3.</b> — Omnes actus liberi arbitrii creati sunt praedefiniti seu praedeterminati in prima causa efficiente, quae est voluntas Dei; atque hujusmodi divina praedeterminatio seu praedefinitio actuum liberorum creaturae rationalis est ratio divinae praescientiae ipsorum . . . . .	318

Ultima resolutio hujus magnae controversiae ac veluti clavis fundamentalis pro solutione omnium argumentorum in contra . . . . .	327
Praeclarum exemplum verae concordiae liberi arbitrii cum divina motione ex se et ab intrinseco efficaci . . . . .	331
Jesus Christus, Salvator noster, sicut est gratuita praedestina- tionis exemplar, sic et verae concordiae liberi arbitrii cum divina praedeterminatione est testimonium. — Christus Dominus noster patiens et moriens pro nobis ex obedientia Patris et ut adimpleret verum mandatum Patris liberrima quidem voluntate passus et mortuus est. — Suprema itaque ratio conciliandi liberum hominis arbitrium cum Dei gratia, quaerenda est ibi ubi reperitur, nempe in ipsa efficacia gratiae, in ipsamet motione Dei, cujus voluntas est profun- dens totum ens et omnes differentias entis . . . . .	331

## CAPUT DECIMUM

**Quomodo juxta D. Thomam tota haec de divino influxu controversia  
veniat postremo resolvenda in veritatem fundamentalem philosophiae  
christianae, nempe : « Solus Deus est suum esse ; in omnibus autem  
aliis differt essentia rei et esse ejus ».**

**Praenotanda.** — Quid nomine philosophiae christianae est  
intelligendum. — Philosophiae D. Thomae excellentia. —  
Philosophiae Thomisticae, quam Romani Pontifices philoso-  
phiam christianam esse proclamant, veritas fundamentalis.  
— Quinque summa capita, ad quae postremo deducitur in-  
tegra de divino influxu controversia. — Relationes inter  
ordinem essendi et ordinem operandi . . . . . 336

**Conclusio 1.** — De ratione primae causae efficientis, qui est  
Deus, est, ut physice praemoveat sive reducat de potentia  
in actum omnes alias causas efficientes ; et de ratione  
omnium causarum secundarum efficientium est, quod phy-  
sice praemoveantur, id est, reducantur de potentia in actum  
a causa prima efficiente . . . . . 344

§ 1. Argumenta D. Thomae atque illorum declaratio . . . 344

§ 2. Doctrina Cajetani et Dominici Bañez circa physicam  
praemotionem . . . . . 348

§ 3. Duplex genus physicae praemotionis . . . . . 350

- Conclusio 2.** — De ratione causae principaliter agentis est, ut physice moveat et eleuet causam instrumentalem ad operandum; et de ratione omnis instrumentalis causae est, ut physice moveatur atque supra suam propriam vim agendi eleuetur per virtutem transeunter acceptam a causa principali . . . . . 352
- Conclusio 3.** — De ratione agentis per essentiam est, quod movendo determinet omnia agentia per participationem, atque omnibus illis modum et ordinem imponat; de ratione autem agentis per participationem est, quod recipiat juxta modum ac conditionem suae naturae determinationem atque influxum agentis per essentiam . . . . . 357
- § 1. Argumenta D. Thomae quoad utramque conclusionis partem. . . . . 357
- § 2. Quomodo enim perfectio, quod est esse, determinet alias perfectiones; et quomodo aliae omnes perfectiones determinent esse . . . . . 360
- § 3. Quomodo ergo virtus primi agentis determinet virtutem agentis secundi, et quomodo agens secundum determinet virtutem agentis primi . . . . . 362
- § 4. Doctrina Ferrariensis, Cajetani et Dominici Bañez. . . . . 364
- Conclusio 4.** — De ratione liberi per essentiam est, quod omnia praedefiniat ac praedeterminet ac physice praemoveat ad operandum; de ratione autem liberi per participationem est, ut se moveat et se determinet ad operandum, praemotum tamen et determinatum a libero per essentiam. . . . . 366
- § 1. Argumenta D. Thomae quoad utramque conclusionis partem . . . . . 366
- § 2. Ergo omnia prorsus, etiam libera et contingentia, praedeterminantur et praedefiniuntur a Deo; et ad divinam dignitatem pertinet, ut omnia moveat et inclinet et dirigat ipse Deus, a nullo alio motus vel inclinatus vel directus . . . . . 371
- § 3. Ergo ad rationem et essentialem dependentiam liberi arbitrii creati atque ad ipsius etiam dignitatem et perfectionem pertinet, ut se quidem moveat ac determinet, sed a Deo motum ac determinatum . . . . . 372
- Conclusio 5.** — De ratione entis per essentiam est, quod omne ens, quod quocumque modo est, ab illo efficiatur immediate immediatione virtutis; et de ratione entis per participationem est, quod sit effectum immediate immediatione virtutis ab ente per essentiam . . . . . 373




Oportet itaque creaturam rationalem, reduplicative ut libere agentem et ut seipsam moventem ad agendum, collocari intra illas quinque vias, quibus Deum esse probari potest.

375

**Epilogus.** — Quare physica praemotio sit necessaria. — In quo fundetur processus philosophicus, quo D. Thomas pervenit ad concludendum physicam praemotionem esse necessariam. — *Quod quid est physicae praemotionis.* — Triplex modus, quo Deus exercet suam virtutem movendo creaturam rationalem. — Secundum quantitatem virtutis, quam Deus exercet in creaturam rationalem, magis et minus Deus dicitur creaturae uniri, et ipsa rationalis creatura magis et minus ut instrumentum Dei dicitur bona opera operari. — Deus ergo, cujus natura est ipsa essentia bonitatis, dat nobis et ut simus, et ut boni simus, et ut in bono perseverantes perveniamus ad supremam divinae bonitatis participationem . . . . .

383












BRIGHAM YOUNG UNIVERSITY



3 1197 21046 9620



